

郭青螺先生諸艸序



青螺先生宦游海內



至皆看艸督學蜀昔德塵管窺

十分之一今黔中以全艸見示

德喟然嘆曰先生于道辟則造

物春虜東皇造物隨地而脀其





物焉因物而鑄其質焉道無違  
而不在物無地而不生楚而蘭  
彭澤而菊會稽而竹徂徠而松  
新甫而栢嶧陽而桐殊形異狀  
爭美競豔物之不齊者物之情  
而所以物其物者非物也惟文

亦然三才皆可以言物人成位  
乎中威儀文詞之脊形者皆物  
也而所以根據之者則德也孔  
子曰君子以懿文德曰文莫吾  
猶人也躬行君子則吾未之有  
得曰脊其容則文以君子之詞



遂其辭則實以君子之德執此  
三說可以論文矣今之為文者  
德惑焉鑿空鍊誕牛鬼神陰  
陽違乎爻象政事違乎典謨情  
性違乎風雅榮辱違乎春秋和  
序違乎禮樂其理覩人之目而

不可曉其字啞人之口而不可  
句六經之文孔子所且載道文  
不本于六經何必置之齟齬間哉  
先生之文則不然為東鹵南北  
之人則行東鹵南北之道行東  
鹵南北之道則洩東鹵南北之



文其教其議其約其論其文其  
序其尺牘 奏疏皆道不離乎  
其身故文不出乎其位孔子所  
謂君子之懿君子之實君子之  
躬行非先生與至黔則忠信行  
于蠻貊聲教于鬼方較之陽

明先生尻夷于風清月朗之際  
青螺先生居夷于枕戈被甲之  
昔難易雖別而所以行道則一  
也 晉蘇公步處後人以蘇步名  
之千載而下黔何緣而得理學  
名臣二妙步于此地哉德初讀



其文數千言宛然肴同心之臭  
焉讀之既久如餐落英嚼之而  
其味無窮焉總而遍讀之想其  
三十季來道德文章相為表裏  
貫串確乎如筠如心貫四時而  
不改柯易葉焉分而細讀之文  
章之枝枝葉葉散希于天下以  
正人心以維世教枝可棲鳳葉  
可剪圭指日朝陽德復見其論  
道燮理之艸焉曰蠓衣者謙言  
也喻言也德少日不揣愚劣願  
學孔子今耄矣而媿未能故于



同志之文惟以孔子之言序之  
萬曆辛丑歲孟春月望日治下  
晚生梁山來知德撰



不肖男孔陵謹書



國家圖書館, NATIONAL CENTRAL LIBRARY, TAIWAN R.O.C.



續衣生黔草卷之一

泰和郭子章相奎甫著  
友人楊寅秋義叔甫校

奏疏

交代恭謝 天恩疏

謹 奏爲恭謝 天恩事臣原任福建左布政使萬曆二十七年四月初十日准吏部咨爲缺官事該本部等衙門會推題奉 聖旨郭子章陞都察院右副都御史巡撫貴州兼督理湖北川東等處地方軍務寫勅與他欽此欽遵備咨到臣臣卽望 闕叩頭謝 恩訖臣自去年 覲還





道病十月中具疏乞身蒙 旨下吏部部檄臣寬限到任  
臣依限入閩沿途調治甫及閩界忽捧 綸音感激泣下  
而夙疾尚纏擬再疏陳乞間接得兵部咨爲播苗大殺官  
兵飛報軍情等事奉 聖旨是這叛苗圍劫事情着該巡  
按嚴勘具奏李化龍并郭子章你部裡馬上差人催他到  
任俱限於五月內接管行事劉綎也着再催先帶家丁馳  
赴四川俱不許任情延緩致悞軍機其餘應該區處的上  
緊酌議來行欽此欽遵臣以疆場有事 簡書可畏力疾  
依限於五月二十二日前到湖北沅州准前任巡撫貴州  
右僉都御史今回籍致仕江東之咨送達字貳百叁拾陸  
號 符驗一道預備倉糧督木 勅諭各一道巡撫貴州  
關防一顆 令旗 令牌各八面副同吏卷到臣臣接管  
外伏念臣心本寡竅面更多牆竊第幾三十年頓不及事  
歷官遍六七省久而無聞懼罔效乎涓埃寔籍容於 覆  
載閩藩入 覲尚寬黜幽之誅驛路抱疴未遂乞骸之請  
詎期 簡命俾拊黔南夜即雜夷半屬犬羊之地播酋倚  
險忽發豺狼之聲自非文武兼才曷任安攘重寄臣謬以  
駑蹇猥備馳驅感激而髮欲衝冠兢懼則背若負刺未獲  
呂嘉之首可稽劉闢之師臣敢不益勵此心勉圖以報綏  
柔漢夷於錯雜之域整飭軍士於委頓之秋播 神武於



天南冀遠邁鬼方三年之伐沛 皇仁於徼外願再見有  
苗七旬之來臣下情無任感 恩激切屏營之至

請增兵餉疏

謹 題爲播患孔殷貴陽伊邇敬陳阽危之勢畫防禦之  
策懇乞 聖明增兵給餉以遏強寇以固邊疆事臣以謫  
劣謬肩重巨於本年五月二十二日與前撫臣江東之代  
於沅州六月十三日入貴陽蒞事矣卷查本年閏四月二  
十九日准兵部咨爲狡酋殘暴無忌糾苗殺虜防禦官兵  
懇乞 聖明亟賜究處以慰忠魂以解倒懸事奉 聖旨  
楊應龍輒敢糾苗殺官好生悖逆可惡着即催督撫李化

龍郭子章及劉綎着遵旨一併星馳到任調兵進剿不許  
延緩滋亂餘俱依擬欽此臣惟人臣無將將則必誅應龍  
昔年殺蜀官兵於白石今年殺黔官兵於飛練執迷不復  
謂暴無傷 皇上赫然震怒聲悖逆之罪下進剿之 令  
刑茲無赦師則有名第臣與總督李化龍雖已履任而總  
兵劉綎童元鎮傳將入境進剿事宜重大除會同會議另  
題外而臣貴陽之危機燃眉搏膺有不敢自緘默者敬先  
爲 皇上陳之臣標下募兵僅五百名總兵標下僅百餘  
名通省各參備分守信地兵共五千餘名比者飛練之役  
臣標兵已殲其半矣楚蜀協濟軍餉歲僅陸萬捌千有奇



蜀猶如數楚多愆期而各衛所軍糧又支去十之八矣此  
按臣宋興祖形之 奏牘謂黔無兵無餉也蓋據實言也  
平居無事司計者左支右吾尚不暇給而今何時哉播苗  
今年二月圍偏橋城索五司長官而黔之東大震三月屠  
飛練之師殺官十有七員而黔之南日駭自臣入貴陽才  
二十餘日黃平報播賊九萬將渡烏江矣白泥報播目金  
第之子同龍角中寨師和領兵將到水洞矣安平道左參  
政郭廷良又報播酋與師亮講話討路且攻黃平矣總督  
李化龍咨稱遊擊房嘉寵拿獲苗夷袁志剛吐稱楊朝棟  
分兵貳萬要往貴州六萬要犯綦江等處矣又沿播小苗  
倚播爲援鳩集蟻結蝟起鴟張道路爲梗驛遞盡虛與隆  
平越之間黃平龍泉之徼益岌岌殆矣臣謂此賊何讎於  
黔而毒黔甚也既反復輿圖播距楚四衛近距武昌甚遠  
距蜀綦江近距成都亦遠即云剝牀未及以膚猶門牆外  
之寇也播距貴州養龍司九十里距貴陽二百餘里萬一  
振鴟勢甚疾雷則卧榻外之寇也賊之耳目甚廣黔之虛  
實盡知謂廣大繁昌而莫已若謂 君門萬里莫如之何  
其敢於輕黔而果於毒黔也職此之故矣臣身坐虎穴耳  
聽鯨吼將蒐十二衛軍與之角乎是驅羊以飼虎也不敢  
爲於殺之續也將調土司兵以移之乎是走鹿以衛麋也



且以合韓趙魏之交也將募兵坐無餉將積餉坐無金空  
券必不可張枵腹必不可往而臣之心苦矣臣惟勢既阨  
危法且自固屯兵以守乘間而入此目前之計也查得貴  
州隣播之地自平溪至貴陽約六百餘里府衛之城十司  
所之城二府衛之城每城約三千人司所之城每城約二  
千人大約得三萬人分布而後可守也募兵一名日給銀  
三分歲當人給銀十兩八錢總三萬人歲當給銀三十萬  
二千餘兩而將官賞功之費不與焉平溪清浪鎮遠偏橋  
四衛原屬湖廣募兵一萬楚之力尚可支也不然即移湖  
北之兵分守四衛可支其半也興隆清平平越新添龍里

貴州五衛龍泉司黃平所原屬貴州募兵二萬黔之力必  
不能堪也近蒙 皇上俞戶部請將雲南十二萬金助黔  
不翅禾黍之被膏雨矣顧今尚未解到即解恐未必能如  
數而臣不得不再丐之 陛下伏乞 陛下哀黔之辰野  
無完室憐黔之藏室如懸罄 勅下戶兵二部再加查議  
應楚募者行楚議給應貴募者作何區處或取之 南京  
兵工二部或取之淮庫或取之閩廣如數發給而後臣可  
召募以資防禦夜郎犬羊之衆實不下十萬如其糾合入  
寇則此三萬人即未能屈彼羣醜亦足以堵截其入如  
天厭其兇我得多筭則以黔之三萬人合楚蜀之衆乘隙



而入滅此而後朝食未可知也然非臣之明所能逆睹也  
如欲圖萬舉萬全之謀成百戰百勝之功振九攻九却之  
威奮七縱七擒之略臣竊謂盛夏之劍當 賜總督朝鮮  
之舟當濟瞿塘彼夜郎之罪惡浮於劉曄蜀黔之蒼黎親  
於高麗 皇上豈嚴於彼而寬於此邪費於東北而惜於  
西南邪必不然矣惟 皇上垂聽焉臣無任戰兢祈懇之  
全

催方面官到任疏

謹 題爲方面雅陞邊地強半遷延不赴懇乞 聖明下  
部嚴趣以肅官守以安疆圉事竊惟 國家設官以贊政  
無分遠近人臣隨地以服官何擇美惡今天下各省至於  
貴州漢夷錯處軍民雜居崇山險巖茂林蒼翳比之中原  
之地蓋遠方也益以播酋稱兵行路阻塞比之太平之日  
又危邦也人情樂近惡遠喜安避危孰肯樂居此者顧業  
已奉 天子之命惟 朝廷所使 君言不宿 簡書可  
畏人臣之義也險夷何常平陂一視貞士之守也而况貴  
州非絕域也臣至菲劣伏蒙 皇上 簡任填拊其地以  
五月二十二日交代以六月十三日蒞事司道相見寥寥  
數員各郡公移半注缺官臣謹會同巡按貴州監察御史  
宋興祖查得貴州方面三司共十五員知府八員今副使



聖諭  
李仕亨右叅議方萬策以入 賀行矣副使尤錫類洪澄  
源添文昌路雲龍右叅議梁銓都司署都指揮僉事張秉  
忠李獻忠未到石阡黎平二府未補銅仁知府李思中鎮  
遠知府張叔璽思州知府林繼喬俱未到任臣等所與共  
事者惟藩臬二長分守提學二道及掌印都司貴陽都勻  
思南三府或以一人而攝五道或以堂官而兼兵備或以  
錢穀而議軍旅或以刑名而署驛傳即令安常已爲侵職  
即盡通才未免疲神而况惡苗肆毒四郊多壘地方數千  
里而以三五司道彈壓其間臣竊懼焉臣查 大明律官  
員赴任過限有規避者從重論本年四月內欽奉 聖諭

近來欽點及陞遷各處官員皆推故推遲不行趨赴到任  
供職管事致令候代署庖之官次意戀位其于君命名不  
俟駕何謂好生玩視怠慢爾該部可查但是欽點及陞遷  
官員都着作速上緊到任更替供職管事如有仍前蔑旨  
不遵枉道原籍爲私忘公推調支吾的着科道官指名叅  
來依律重治不饒欽此 聖謨洋洋豈諸臣道遠尚未之  
聞邪而何遷延若此也伏乞 皇上軫念邊圉疆場多虞  
勅下吏兵二部查推陞年月久近未赴者嚴行催促未補  
者速爲推補務在得人共濟時艱抑臣又有說焉當無事  
之日則黔中爲簡僻之區際多事之會則黔中亦盤錯之



地計今以後一切鄙薄邊方請告致仕者寢閣不爲題  
覆毋以鴻寘爲高才堪臨戎原薦邊才者破格調用於黔  
勿以蟻封爲嫌庶幾文武各得其人而寇賊指日可平矣  
謹題請 旨

捐俸助 大工疏

謹 奏爲 宸居鼎建願捐微俸少裨 大工事臣伏觀  
邸報 兩宮 三殿之脩經營有年大小臣工輸 獻自  
効誠以 宮殿雖創於 九重旡蒙實被乎八埏顧凝土  
度木爲費不貲而時謫帑虛未觀厥成爲人臣子凡可少  
補萬分一亦義所不容後者么麼如臣留滯閩海伏蒙

皇上拔之坎壈之中授以節鉞之任入黔無幾疆場多虞  
身在徼荒心懸將作既未能供往役之義亦願少效子來  
之誠伏乞 勅下戶部將臣一年應得之俸和解本部少  
助 大工固知飛塵無裨於蒿黍纖流何籍乎溟渤然大  
馬奚知尚思報 主燕雀有喜猶來賀厦此臣所以處黔  
南而戀 闕望 紫極以杼枕者也臣無任悚惕之至

報綦江城陷疏

謹 題爲播酋陷城殺將地方萬分危急事萬曆二十七  
年七月二十日據兵巡上川東道副使莫容重慶知府張  
與行呈稱六月二十日播酋楊應龍統兵八萬逼近綦江



縣城遊擊房嘉寵并張良賢分兵一千守城二千出敵頗有斬獲苗兵退去至二十一日辰時楊酋親統衆兵圍城數匝房遊擊於城上親放火磚誤入火藥桶內燒死我兵數人苗兵乘機蜂屯蟻聚上城又於城內大戰房遊擊張良賢督陣亡守備胡汝寧入水渰死千戶等官未知存亡各兵馬損傷逃出俟查明另報等因到臣臣查本年六月初一日准督臣李化龍咨稱遊擊房嘉寵拿獲苗夷袁志剛等吐稱楊朝棟分兵二萬要往貴州六萬要犯綦江等處已於本月初六日具疏請增兵餉題 報訖今據報到前因爲照酋自招撫之後 皇上待以不死 天地之恩

無以加矣不謂豺狼之心飽之而逾發梟獍之性養之而益毒今年二月圍我偏橋黃平猶曰索七姓逋逃尚有名也三月敗我師於飛練殺官一十七員喪師數千猶曰蠶結拒討殺人盈野也茲者攻陷邑城戕殺驍將敢孤 覆載自絕生成益二百餘年土司所未有者臣駐貴州省城距綦江遠甚酋自破城後連營結固蒙盾負羽道路爲梗羽書不通即以川東之報從荆入沅逾月而始達臣貴中士民一聞驚駭譁虎噬而色變聞梟響而股栗益怵於偏橋飛練之毒而益震於綦江之破無怪其然也臣惟益州天府之國昔稱用武之地而酋悍詭異常乘虛突發呼吸



之間猶不足以當其剋而况黔之帑藏兵戈萬萬不如蜀  
貴陽相距兔穴止隔烏江一帶水將何所憑以爲固臣入  
黔董四十餘日急調土漢兵萬人分布各衛董董自守而  
又苦於無餉遣使告急於滇滇撫臣陳用賓解銀七萬有  
奇董可棟目前而成敗利鈍尤非臣之明所能逆睹也况  
新總兵童元鎮在塗不前舊總兵沈尚文杜門不出近播  
四道分守新鎮道右叅議梁銓去年以入 賀行思石道  
右叅議方萬策今年以入 賀行到未可期分巡思石道  
副使路雲龍都清道副使漆文昌雖陞遷未久俱未見到  
近播二守備清鎮守備史良將業已革任都清守備柳國  
柱新病初起而臣所與共事行間者止清浪叅將劉效節  
一人臣之心柰何不皇皇也伏望 皇上軫念遐陬亟  
賜棟援 勅下該部將臣前疏所請增兵益餉如數如期  
亟發庶幾可裨戰守以完疆圉夫拯溺者急於援手棟經  
者先於扶足徐而議之駭而圖之則無及已今日之黔正  
溺與經之時也所恃爲手足扶掖者不望之 君父更何  
望邪臣無任激切待 命之至

停止稅監疏

謹 題爲賊勢方張邊地大震稅監特 命人心益搖懇  
乞 聖明俯停稅差以定民志以銷隱憂事本年七月內



據四川兵巡上川東道副使莫容重慶府知府張與行報稱六月二十一日播酋楊應龍統賊八萬攻破綦江縣城殺死遊擊房嘉寵等官已經臣具疏 奏報訖貴州軍民轉相傳播東犇西竄鳥逐魚散一夕四五驚常如寇至已接邸報應天衛百戶范倉一本爲恪遵 祖制再懇 聖明敬復稅課等事奉 聖旨這所奏貴州地方稅課併土產名馬有裨國用准差奏內內官監左監丞張慶督率原奏官民前去彼處會同撫按等官照例征收銀兩解進不許擾害地方寫勅與他該衙門知道臣聞之不勝驚駭士民傳聞千百成羣具訴於臣與按臣衙門稱貴州舟楫不通商賈原稀益以播亂四方行旅視黔中如虎穴且水銀硃砂封閉已久諸洞一開苗夷竊發實爲隱憂等情臣與按臣多方諭之謂 皇上有不許騷擾地方不忍加派小民之 旨中官有不許濫用羣小額外需求之禁而民心搖搖終莫能定該臣會同巡按貴州監察御史宋興祖看得貴州雖名一省實不如江南一大縣山林之路不得方軌溝渠之流不能容船民居其一苗居其九一線之外四顧皆夷即平居無事商賈稀濶今年楊酋二月圍我偏橋三月屠我飛練四郊小苗乘間崛起道路行劫無日無之加以綦江之破民莫必命商且絕武誰肯委身豺狼投尸



鯨鯢即城市所貿易者不過米穀菜果棉花油布之類蓋  
董董也至范倉所稱水銀硃砂銅鉛名馬等物生於嶼巖  
之中隣於虎豹之窟倘一開鑿之後苗人耽耽劫奪而去  
臣將欲陳兵衛之乎則禦播之兵臣方 疏請之 皇上  
而安得復請兵護洞穴也將欲貨之商賈乎則青犢嘯風  
遊商歛跡而臣安能驅之必來也將盡輦而致之 闕下  
乎則鳥道千里龍灘九折非若金銀之轉輸其積尤可辦  
也名馬之有無臣不敢知然每歲土司 貢馬折銀以進  
則此方之驥騫大較可知也况查貴州常賦每年硃砂共  
三十三斤水銀共四百四十四斤黃蠟共二千九百一十

斤 祖 宗朝豈不知諸物之產黔中哉而限其數若此  
之儉者以爲荒服之外可以責包茅不當盡錙銖明以其  
利遺之實以安之也况地方官兵之力量以守城池猶且  
不足而必不能分其力以布於巖洞之間臣等之謏劣以  
禦強寇猶尚未周而必不能分其心以杜彼苗夷之發如  
臣言不驗 國家之福也萬一稅使甫臨播寇環於外苗  
賊竊於內臣顧此失彼捉襟肘見此身不足惜如辱 朝  
廷何此臣等所爲愁慮迴腸丐之 皇上以貴州非他省  
比也肥瘠之地殊而治亂之形異也伏望 皇上仰體  
祖 宗貢賦之額毋溢舊數近憐地方殘破之劇特收



成命俾臣等專力戰守以淨妖氛則內地之隱憂既銷而邊圉之底定可期矣臣等無任戰惕祈懇之至

銓補更調有司疏

謹題爲地方多事有司未備懇乞 聖明銓補府佐更調縣令以實邊圉以安生靈事臣竊惟貴州八郡戶口幾何誠僻地也一線之路四顧皆苗蠻益藪也當其無事則僻地之官即中材不難於器使及其有事則益藪之官非賢智孰與之籌策至於八郡之中止同知一員知縣五員蓋極少矣乃府佐缺而不備其官縣令備而未當其才則臣等不容以無言者臣謹會同巡按貴州監察御史宋興

祖查得貴陽府同知張子程由浙江樂清知縣陞任至今未到臣行貴陽府差人守催始得本官病狀請告乞休息南府原未設同知項者御史蕭重望建議應設同知一員協守龍泉臣會同總督李化龍巡按四川監察御史趙楷巡按貴州監察御史宋興祖覆議添設已經具疏會題訖第今地方殘破苦於無官若不就近陞補則同知雖設遷延不來無補於危急猶未設也臣等行貴州布政司會同按察司查議去後續據二司通詳到臣臣等看得獨山州知州徐廷綬才諳爽愷心思周詳歷俸三載永有一心新貴縣知縣張羽鴻才可剴犀守堪茹蘗歷俸六載漢夷



共戴此二臣者在徐廷綬應陞補貴陽府同知在張羽鴻  
應陞補思南府同知駕輕車以就熟路既已習於夷苗之  
情朝聞 命而夕到任又不苦於往來之煩相應就近銓  
補者也鎮遠府鎮遠縣知縣袁尚紀才局精明議論妥當  
此健令也而處之郡城附郭未足以展遊刃之才施秉縣  
知縣文嘉兆問學充瞻規模清淨此廉吏也而處之近苗  
山城恐難以施舞干之化此二臣者移鎮遠於施秉籍之  
防禦悍苗將益弘其壯猷移施秉於鎮遠籍之坐鎮夷俗  
亦無損其清名相應互爲 更調者也伏乞 皇上軫念邊  
疆多故用人爲急 勅下 吏部再加查覈如果臣等言不  
刺謬將應補者銓補應調者更調其原任貴陽府同知張  
子瑄准令致仕遺下獨山州新貴縣二缺乞於楚滇二省  
查資俸相應才力堪任者或調或陞則庶官布列可無廢  
事而羣盜芟夷當不旋踵矣臣等無任祈懇之至

考覈給由縣官疏

謹 題爲遵例考覈給由有司官員事據貴州布政使司  
呈行准貴州按察司并守巡新鎮二道咨牒及據黎平軍  
民府申稱考覈過永從縣三年考滿給由知縣龔一慶詞  
語并重覆結查得本官任內竝無公私過名增減歷俸月  
日其保民實政五事弔取先今道府覈實并蒙撫按閱查



過文簿對查俱已脩舉果無虛冒無礙緣由結報到司據此案照先奉前巡撫貴州江都御史批據黎平軍民府申據永從縣申准本縣知縣龔一慶關稱本職年二十七歲四川順慶府蓬州營山縣人由舉人萬曆二十年五月初十八日除授陝西西安府盩厔縣儒學教諭本年八月初三日到任二十四年三月十六日推陞今職本年八月十九日到任扣該萬曆二十七年六月十八日止連閏實歷俸三十六箇月二年考滿例應給由關縣申府轉詳奉批仰布政司查報奉此又蒙巡按貴州監察宋御史批布政司查報蒙此就經備行各該司道府考覈結勘無礙又該本司覆查明白合行具造五事總數書揭呈乞考覈具奏等因呈詳到臣該臣會同巡按貴州監察御史宋興祖考覈得黎平軍民府永從縣知縣龔一慶守嚴一塵才精百鍊治荒陬而拮据不遺餘力撫悍苗而咻噢備極苦心稱職既經各司道查結無礙又奉有府州縣正官雲貴兩省免其赴部之例除行令本官在任接俸管事文冊差人齎繳并將覈過脩舉實政五事書揭咨報都察院查考外相應題請伏乞勅下吏部再加查覈照例施行謹題請旨

增設黃平婺川叅將疏



謹題爲地方孤懸無援賊勢侵軼可虞懇乞聖明設  
將增兵以圖萬全事臣看得賊自破綦江後日驕日肆黔  
中士民日駭日震臣七月中疏請兵三萬請餉三十萬金  
爲一歲防守計君門萬里至今尚未奉旨臣假便宜  
從事已調募土漢兵二萬有奇分布偏橋鎮遠興隆平越  
新添貴陽各衛石阡思南鎮遠三府龍泉黃平二司聯絡  
以守遣使告急於滇滇中撫臣陳用賓解銀七萬七百有  
奇董足棟目前故自六月以至今日未見衝突幸矣而賊  
談未息猶未知其終果何如也續據龍泉司都司楊惟中  
黃罕司守禦指揮徐登階千戶李朝陽婺川縣署印經歷  
江師周申呈二司一縣孤懸邊塞相距播酋近者百里遠  
者二百里龍泉無城郭兵止二千黃平雖有土城垣卑牆  
薄兵董二千餘土司與通判屬四川守禦千戶屬貴州雖  
云犬牙相倚未免推諉難制婺川縣董民兵三百又無將  
官殊爲可虞臣隨處增兵而餉銀有限終是束手龍泉雖  
有都司而黃平婺川未有重將終難彈壓臣計黃平婺川  
二處俱當設一遊擊黃平增兵至五千龍泉增至三千婺  
川增至二千約增一萬此在臣前疏所增三萬外者總之  
在貴州共四萬兵不爲多也將增二員兵增一萬一應糧  
餉與兵將俱伏乞皇上勅下戶兵二部再加查議如果



異州 卷之一  
臣言不謬戶部即爲措處糧餉兵部增設二將得如部議  
李經王芬之類及王鳴鶴藍芳威等補之庶幾我兵之勢  
力以振賊之衝突可杜矣臣無任激切待 命之至

考覈給由州官疏

謹 題爲遵例考覈給由有司官員事據貴州布政使司  
呈行准貴州按察司并守巡安平二道咨牒及據貴陽府  
申稱考覈過定番州二年考滿給由知州王應昌詞語并  
重覆結查得本官任內竝無公私過名增減歷俸月日其  
保民實政五事弔取先經道府覈實并蒙撫按閱查過文  
簿對查俱已脩舉果無虛冒無礙緣由結報到司據此案

照先奉前巡撫貴州江都御史批據貴陽府定番州申准  
本州知州王應昌開稱本職見年四十一歲浙江紹興府  
嵗縣人由舉人萬曆十四年四月內揀選除授福建紹武  
縣知縣本年八月二十五日到任十九年十月推陞直隸  
大名府通判駐劄宣府管南路事二十年三月初九日到  
任二十三年十月推陞今職二十四年六月十五日到任  
二十七年三月內蒙巡按貴州監察應御史復 命題稱  
本官誠與才合威由廉生馭漢夷動中事宜酌興釐業有  
成績薦舉一次扣該萬曆二十七年閏四月十四日止連  
二閏實歷俸三十六箇月三年考滿例應給由關州申府



轉詳奉批仰布政司查報奉此又蒙巡按貴州監察宋御史批布政司查報蒙此就經備行各該司道府考覈結勘無礙又該本司覆查明白合行具造五事總數書揭呈乞考覈具奏等因呈詳到臣該臣會同巡按貴州監察御史宋興祖考覈得貴陽府定番州知州王應昌軀標岳立才識淵凝遇事若出匣之鋒而體解頓解砥操如在石之璞而澳恣盡蠲稱職既經各司道查結無礙又奉有府州縣正官雲重員兩省免其赴部之例除行令本官在任接俸管事文冊差人齎繳并將覈過脩舉實政五事書揭咨報都察院查考外相應題請伏乞勅下吏部再加查覈

照例施行謹題請 旨

請貸安疆臣陳恩王嘉猷疏

謹題爲土司納賄樞臣遂致蔑法無君懇乞聖明查究長惡緣由以靖治本以消亂萌事行據貴州按察司呈問得犯人陳恩年五十歲係貴州宣慰安疆臣下目把狀招恩故祖陳祥先於正德二年由原籍江西前來宣慰司管下西溪驛寄住生理因與本驛在官土民今充目把王嘉猷故祖王倖熟識結親隨即入籍充差至恩三世萬曆二十二年宣慰安國亨身故該今安疆臣襲職到任見得伊父手管事人役恐有積年壞事另選僉恩與王嘉猷



各充當把事身後專一催辦糧馬公務萬曆十八年間有  
宣慰司所屬貴竹長官司民張良珠等願改土設流赴京  
奏行貴州撫按轉行都布按三司勘處又有貴州平伐司  
土官庭拱極亦奏奉 欽依改屬貴陽府提調後蒙三司  
將張良珠等所奏前事會勘允妥議將貴竹平伐二司地  
方改併一縣屬貴陽府統攝添設知縣一員將二司正副  
土官改縣丞主簿貴竹司吏目改授典史貴竹司原額銀  
力公費差銀係貴陽府經歷司徵收改聽該縣徵解通詳  
會 題銓官到任無異萬曆二十年三月內有安疆臣下  
不在官示親目把夜莫阿能化你等各商說我宣慰司原

管十長官司近日將貴竹司改爲新貴縣杜去一司糧馬  
難當等語從動安疆臣惑聽出名妄稱 祖制乞要恢復  
情由於本年十一月內奏 准行勘問比恩與王嘉猷既  
充把事自當諫宣安疆臣不得縱容各夷妄動爲是各亦  
不合坐視二十四年十月內蒙巡撫江都御史撫臨貴州  
安疆臣謁見隨蒙將夜莫等所奏事情及貴竹司改縣來  
歷備細詰問安疆臣稱年幼不知至二十五年八月內安  
疆臣差李元育陳志善往京進 表借過在京店戶張矮  
子等銀共一十九兩作盤纏回家訖隨蒙本院訪得安疆  
臣差人進京叅看得安疆臣聽恩王嘉猷播弄屢肆不法



及納賄樞臣求復十司各情并議酌處安疆臣三策初不法則念安疆臣年幼許其自新即陳恩王嘉猷不遽加誅苟能改行從善則錄其輔導之功而宥其撥置之罪可也再不法革其冠帶三不法則率三省之兵裂其茅土絕其世爵等因題奉 聖旨兵部知道欽此隨蒙部院科道覆議將恩等行賄情由嚴行鞫審務要根究下落等因覆奉聖旨是著巡按御史審究具奏欽此都察院劄行巡按貴州應御史轉行按察司并畢節道切責安疆臣解出陳恩王嘉猷等審究行賄下落招解覆審具 奏間蒙司道行貴陽府著落安疆臣拏恩與王嘉猷解審比恩王嘉猷既奉 欽依提究自當速出聽罪却又不合稟安疆臣代爲回護藉稱未奉行提之先已差二犯採運大木去訖其欲恢復貴竹司事情係是宗日夜莫等所奏與恩等無干等因回覆轉報又蒙察院牌行按察司嚴諭安疆臣毋聽蠱惑始終執迷務刻期將恩等正身解官究結完銷考成如再飾詞抗違 明旨據實叅呈以憑 題叅蒙牌仰貴陽府署印曾同知會同駐鎮新添李推官會審間二十五年七月內有直隸徽州府歙縣先已問遣江鏜因在四川被成都府經紀傅萬興吞騙財本思起巡撫江都御史係是同鄉於本年八月前來將情具告蒙審係私債不准又見



詞稱同鄉恐滋假詐當差健步毛茂芳等遞押出境彼因路由安疆臣九驛地方宗目人等探知將江鏜誘進安疆臣地名大方江鏜要得乘機誑騙明知指稱內外大小官員名頭誑騙財物計贓犯該徒罪以上者不分首從發邊衛充軍事例就不合故違隱匿的名捏名江若海詐係江都御史姪子安疆臣聽信當將銀三十兩餽送懇鏜代稟軍門寬免提問比江鏜誑受前銀入己意要當夜潛逃不遂後安疆臣見江鏜不肯具稟隨將前銀掣回將情報知本院當蒙差人拘提江鏜等赴審比安疆臣思恐江鏜到官供出前情不便遂淹留不發蒙本院 題叅看得安疆

臣明知江鏜等之詐而聽陳思主使謬爲尊信欲以損臣之名節江鏜等明知臣必治之以法躲避安疆臣處任其請張欲以撓臣之職守乞將江鏜陳思等提問等因叅題該都察院覆奉 聖旨是陳思江鏜等著巡按御史嚴提究問具奏欽此劄行巡按應御史轉行司道屢提思等比安疆臣見軍門將江鏜事情叅問隨將江鏜送往四川華陽縣去訖隨蒙軍門差人往四川將江鏜拏送華陽縣監候牌行按察司差人前去提解江鏜到司發貴陽府監候提獲思等至日併招又蒙巡按應御史節行司道拘提思等又不合仍前不出蒙叅看得宣慰安疆臣聽姪撥置



妄意更新貴縣已定之版籍而復彼貴竹司姦 王法也  
且納賄樞臣致部覆倒置犯 明禁也撫臣業已發其姦  
狀科臣復權其機宜庶 詔旨勘問不次行提陳恩等抗  
避不出安疆臣庇護不發乞 勅部院將安疆臣革去冠  
帶必待獻出各犯聽勘方准議復或從重議罰觀其將來  
至於改貴竹司爲新貴縣原奉 皇上成命戶口糧差已  
定統攝徵輸成規夜莫等妄奏事情似應免勘等因具題  
蒙兵部覆奉 聖旨是陳恩等著落撫按官責令安疆臣  
解發勘結若再庇護參來重處新貴久已設縣不必再勘  
餘依擬欽此蒙咨巡撫江都御史案行按察司勒限安疆  
臣速將陳恩王嘉猷等解出勘結夜莫等所奏改縣事情  
免勘間又蒙巡按應御史牌行速提陳恩等勘報其江鏜  
先行按法擬戍具招馳報蒙牌仰府弔取江鏜到官問擬  
誑騙徒罪照例免徒杖解發詳定邊衛充軍終身具招呈  
解本司依擬轉詳蒙巡撫江都御史批新貴縣奉 旨不  
勘張良珠等免提江鏜詐冒入夷法不可追發叙南衛充  
軍終身招達兵部陳恩王嘉猷另行提結又蒙巡按宋御  
史批陳恩王嘉猷俟提出究結江鏜照撫院并前院批行  
繳蒙司備案仰府將江鏜抄招解發叙南衛著伍訖二十  
七年閏四月十八日又蒙本司抄牌蒙本院憲牌奉都察



院勘劄爲稽查章奏隨事考成等事仰經歷司抄牌呈堂將恩等事情作速勘問明白以憑回奏蒙移行畢節道并本府行提恩與王嘉猷勘明招解又蒙催行安疆臣提解恩等審問招解比恩與王嘉猷思得事久未結懼累本官願出認罪安疆臣隨即差人押解貴陽府審出前情蒙看得陳恩王嘉猷既充目把管事又當本官少年宜極陳國制之森嚴諭禁各夷之妄作乃一味順承坐視不諫以致夜莫等得逞其奏辯之臆安疆臣幾冒不韙之名罪責已自難辭及蒙提究即當出候處分乃遷延躲避托詞採木情屬抗違律應加等至於撥置一節再三詳審委係伊祖入籍在彼年代已久實與投夷者不同又備查納賄樞臣等情二犯堅執不知各證俱無實跡緣由進表方回復有朝覲之往貢木未已續有貢馬之行京使頻煩郵符絡繹事係風聞恐難懸斷合無俯念土人無知既出認罪姑從審實情由議擬餘情疑似難過誅求將恩等各擬犯罪逃走加等各減杖六十徒一年罪名招詳到司覆詳無異該本司看得陳恩王嘉猷久占夷籍實匪逋逃但膺把目之名須明輔導之義當彼衆奏復土司既不能喻止於先及撫按察提勘問又畏罪遷延於後是二犯真坐井觀天之見不可遽爲負隅釀亂之徒也且查前院原疏亦



有念安疆臣年幼許其自新陳恩王嘉猷若改行從善則錄其輔導之功而宥其揆置之罪等語今安疆臣服命守土頗效勤勞而二犯連臂就糜實知畏悔似與原疏所議正相脗合委應量擬徒杖以懲其前愆寬宥疑情以責其後效也將恩等取問罪犯一議得陳恩王嘉猷各所犯除不應輕罪不坐外俱合依犯罪逃走者加凡奉制書有所施行而違者杖一百本罪上二等律各杖七十徒一年半俱有大誥減等各杖六十徒一年係民審俱有力照例納贖緣係欽依提問人犯合候奏請施行一照出陳恩王嘉猷民紙銀各一錢贖徒銀各四兩紙贖徒銀共八兩二錢候詳追解布政司貯庫作正取庫收繳報其建縣一事已經奉旨免勘張良珠等免提有罪江鏗前招照明不再照等因具招通詳到臣案照先准兵部咨爲土酋庇姦抗旨懇祈聖明亟賜議處以嚴紀法重成命以正封疆併祈勅議兵餉以消姦萌事該前任巡撫右僉都御史江東之就經備行按察司轉行貴陽府提審去後今據招呈前來覆詳相同該臣會同巡按貴州監察御史宋興祖看得陳恩又占夷籍王嘉猷祖係夷目歷事安氏積有歲年始不能以義匡掇止宗自人等上恢復之疏既不能即出聽勘幾陷其主以庇護之罪今自出官



認罪依律擬徒夫復何辭至於納賄樞臣原無實跡揆置  
家主亦屬浮言安疆臣年方弱冠志切請纓近以揚酋之  
亂臣等一檄之躬同士卒防守烏江此即疆臣忠順之蹟  
或亦因與嘉猷左右之力也該司擬徒以繩其舊愆而不  
盡法以責其後效蓋斟酌於情與法之中而審度於事與  
勢之外相應俯從者也如疆臣果能盡心救亂恩與嘉猷  
果能朋力爲國尤望皇上弘開使過之仁大霽賞功  
之澤專其責不疑其黨錄其新不責其舊此又臣等之所  
以望於皇上而不敢必者也既經司府等衙門審勘明  
白理合具題伏乞 勅下兵部都察院將陳恩王嘉猷

所擬罪名再加會議上 請行臣等欽遵查照施行謹題

請旨

請安插夷婦疏

謹題爲夷類相殘萬命可憫敬陳安插事宜以杜讎殺  
事萬曆二十七年九月二十五日據貴州按察司呈奉臣  
牌仰司會同布政司即查安定寡妻雷氏母子原係安插  
著隴今據伊姑沙氏保領回業撫恤事情是否穩便仍詰  
問雷氏有無樂從并行宣慰安疆臣母子務要加意撫恤  
不致殘害逐一從長酌議明悉具由通詳以憑會題施  
行奉此又據經歷司呈抄蒙巡按貴州監察御史宋興祖



黑州 卷之十一  
牌仰司抄牌呈堂即查露氏母子原奉 欽依安插著隴  
沙氏安疆臣因何取回作速查明具由通詳以便具 題  
施行等因抄呈到司蒙此案照萬曆二十六年九月十五  
日據經歷司呈抄蒙巡按貴州監察御史應朝卿案驗爲  
夷類相殘等事即將露氏安鳳鳴安插著隴王嘉臣等歸  
屬霸陽守備提調仍管安定地方安邦仍居織金卧這施  
行等因到司又奉前任巡撫右僉都御史江東之案驗同  
前事奉此已經備移畢節守巡道及貴陽府遵照安插去  
後萬曆二十七年九月二十日據已故土舍安國貞妻沙  
氏帶同已故安定妻露氏赴司投見結稱氏子安定遺媳

露氏與孫安鳳鳴居住省城日久衣食無聊情願將媳露  
氏母子領回原土阿傀儡地方安住稟乞准從等情又據露  
氏亦稱情願同姑回歸故土庶不流離等情隨據安疆臣  
齎執印信結狀內稱當官保領故目安定妻露氏回業侍  
奉伊姑加意撫恤中間不致殘害等情又據伊母鳳氏及  
宗目人等投遞甘結俱各稱同前情據此該本司會同布  
政司看得省會之地原非夷婦所居今露氏以寡婦孤兒  
住居日久不惟零丁無倚抑且衣食無聊求歸故土實出  
至願而姑媳同處亦其至情且伊姑沙氏憐其寂苦親赴  
領回露氏久處孤寒樂從復業况安疆臣母子併各宗目



執有保領不致殘害其結赴司投遞事出彼此情願相應  
准從合無將霑氏母子准令沙氏領回原土復業仍青令  
安疆臣照依其結以恩撫恤母加殘害等因通詳到臣據  
此案照先准兵部咨前事內稱安定被刺遺妻霑氏子鳳  
鳴赴著隴私莊安插目把王嘉臣歸屬霸陽守備提調仍  
舊管理安定地方催辦糧差等因題奉 聖旨是欽此欽  
遵備咨前任巡撫右僉都御史江東之就經備行按察司  
轉行遵照去後今據前因該臣會同巡按貴州監察御史  
宋興祖看得貴州雖漢夷錯居然住址原有畛域漢不通  
夷夷不雜漢制也夷人雖居荒甸然內外亦有分別婦人

夫死從子從姑義也水西被刺頭目安定原係宣慰司人  
本是夷種令居會城原已非制突有刺客之變至今窮詰  
未得又未正法寡婦霑氏孤兒安鳳鳴原奉 旨安插著

隴亦夷則夷之之意也乃數年以來仍居城中夷婦盛年  
獨處恐有慙德則傷化孤兒孑然無依復有刺客則損威  
非惟不足以明恩而適足以褻體今據姑沙氏領回原土  
阿傀地方同住霑氏亦願同去姑媳相守祖孫相依似為  
得所但與原 題安插著隴地名不同臣等未敢擅便再  
照安定被刺人言籍籍出自安疆臣報讎今據疆臣指天  
誓曰謂萬無此事臣等責以大義令其保護沙氏霑氏并



孤兒安鳳鳴俟其長成仍作本枝頭目疆臣頓首拜母鳳  
氏及諸宗目俱遞有加意撫恤不致殘害其結庶幾漢夷  
不雜孤寡得所而地方亦賴以安輯矣除刺殺安定強賊  
行按察司另緝正法外相應題 請伏乞 勅下兵部查  
議覆 請行臣等欽遵查照施行謹題請 旨

請別處兵餉疏

謹 題為楚滇助餉勢難如期懇乞 聖明下部別處以  
濟軍興事臣案查萬曆二十七年六月二十三日准戶部  
咨為解發防播兵餉事內稱雲南原借四川銀四十萬兩  
二十五年內已經解還七萬七千九百三十兩零其三十  
二萬二千六十有零在今日為黔蜀然眉之急合無行雲  
南撫按將該省二十二年新借四川議還餉銀十萬兩除  
補還外尚欠銀二萬二千六十六兩併先年二次借銀三  
十萬兩於內再還十萬兩作速併解黔省助餉等因於萬  
曆二十七年閏四月十三日題奉 聖旨是欽此本年九  
月二十三日又准戶部咨為播患孔殷貴陽伊邇等事內  
稱近奉 明旨預處貴餉本部題將湖廣應解 京銀酌  
留自十七年起至今年止白蠟并商稅銀一十一萬三千  
三百二十五兩又取雲南應還四川原借銀十萬兩又於  
福建取銀十萬兩嚴行各該撫按督併各布政司解赴貴



州等因題奉 聖旨依擬行欽此同日又准戶部咨爲患切剝膚敬陳一得以圖萬全事內開條議將廣西存餉動支銀十萬兩令該省撫按差官徑解貴州等因題奉 聖旨銀兩准解發軍興爲急編派著照丁糧出辦毋以優免靠損小民欽此俱備咨到臣臣一聞報差人分投各省催促又准滇中撫臣陳用賓咨稱原議銀一十二萬二千六十六兩今解銀七萬七十五兩九錢所云解欠川省銀二萬二千六十六兩一錢八分則今年三月業已解還四川乞咨彼省取用臣又咨總督李化龍行四川布政使司左布政使程正誼解銀二萬二千六十六兩一錢八分內將

六千五百二十三兩二錢充作川中原代黔省募兵六百名二十八年分糧銀等因查弄實少二萬九千九百二十四兩一錢臣自六月以來至今半年召募土漢并還今年三月飛練興師等餉皆藉此二項以揀然眉幸矣十月二十六日接得雲南撫臣陳用賓咨准臣咨催移解原議餉銀備行雲南布政使司查解隨據呈稱司庫掾括益極目下包賠解 進礦課及各營秋冬二餉與來年金價兵餉等費俱不知作何措處本司尚無以爲自贍之策將以何者推濟鄰封等因到院看得滇省窮荒素無積蓄近年以來百計節省方能處還蜀餉十萬連歲多故費用浩繁檢



括殆盡况今矣堵等寨叛亂師行糧隨費亦不貲全滇匱乏之狀於今極矣頃者川省於已還十萬之外又復責償十萬應黔之急計無所出議解七萬餘兩乃原借 南京支剩之銀司庫那得有此業已移咨回覆及具疏題 請言其難處之情不能足數之故矣所稱數內尚少銀二萬九千九百二十四兩一錢行據該司回稱果難解足亦無別項堪借合行咨覆查照體諒窮滇亟爲別議等因備咨到臣臣看得前次餉銀一十二萬二千六十餘兩據滇蜀共解銀九萬二千六十六兩一錢八分不足之數滇中空乏尚難湊補今復益以十萬勢必不能如期解助用賓念

臣其急顧亦無如財匱何矣臣又接得總督李化龍揭帖內稱近該戶部議定湖貴用兵應發餉銀責令湖廣以節年派剩太倉餘銀十六萬零解四川以白蠟等銀九萬零及商稅銀一萬零並雲南借川銀十萬俱解貴州各軍前支用緣彼時湖廣未設官兵故令分餉二省今湖廣設有總兵自有重兵屯守需餉必多豈可轉餉他方臣已行令將銀十六萬不必解川留於該省支用近得該省撫臣支可大書言十六萬止一萬見在其餘及應解貴州白蠟等銀皆節年帶徵虛數非見銀也臣初意聞中粵西距黔遠甚楚滇比鄰轉輸尤近自謂咄嗟問餉可立辦今准楚中



撫臣之書謂白蠟等銀皆節年帶徵虛數滇中撫臣之咨謂體諒窮滇亟爲別議則楚滇二十三萬之金徒爲望梅畫餅之說閩粵二省雖屢差人告急而道阻且長勢難猝至萬一復如楚滇以空文回臣則臣將何所恃以餉兵邪臣今已集兵三萬十一月可再集一萬以月計之約費四萬餘金兵集而餉不繼黔中司庫又無可那移而臣之懼滋甚始以餉之不集而患無兵懼無以奮犁庭之威今又以兵之既集而患無餉恐未免於脫中之虞在楚以方用兵勢不暇助在滇以帑空竭勢不能助而閩粵之餉又在有無之間則黔猶然一貧國也恐未可以聞於賊也伏乞

勅下戶部再加查議必於實有積貯省分別爲處給更乞天語叮嚀各省如期解發毋以地方有事而遲遲不發毋以道路險遠而期期不至夫天下猶一身也一指之痛遍體皆楚天下猶一家也一子之貧昆弟共隱夜即之叛禍豈專在黔哉惟 聖明留意焉臣無任哀懇待 命之至

議處驛遞疏

謹 題爲驛遞殘破羽檄稽遲懇乞 聖明議處協濟以重軍機事本年十一月初一日臣據貴州驛傳道按察司副使尤錫類呈據平越衛掌印指揮郭維藩呈爲播酋殺擄失陷糧馬請乞議處急救事照得本衛平越驛額設馬



一十八匹案編四川草塘瓮水貴州楊義等司高坪牌白泥麻哈州江邊三保落邦瓮河羊腸等地方承走今年春飛練之變正在本衛地方潘經歷督兵取馬十二匹入營一槩殺虜高坪牌原隸本衛因叛投播負固不納糧馬今照大兵四集公使絡繹無馬答應違誤匪輕伏乞急爲酌議等因又據興隆衛掌印指揮張維呈爲驛馬久缺傳舍多虛懇乞急救倒懸以免貽累事竊照四川黃平驛設在本衛一應馬館原隸黃平駐鎮通判專督今年黃平司官民被播酋劫掠該司與清平凱里司俱不上驛答應往來公使貽累卑職揭銀雇募今當馳報軍情時刻難停呈乞

速賜議處等因據此該職看得貴州驛傳頻年仰藉滇省協濟僅可支持今春平越驛馬殘於飛練而興隆黃平界在虎穴地方人民逃移過半以致二驛馬館久缺經過官司交口愁怨羽書紛紜到輒稽遲職反復思之司庫本貧無堪動之銀可以接濟各驛皆疲無堪抽之馬可以那借合行呈請於相應鄰省咨借數拾匹分派二驛承當以濟目前寇平即還等因呈報到臣臣謹會同巡按貴州監察御史宋興祖看得貴州一線之路以通滇蜀通蜀諸驛專屬之水西料理通滇諸驛派之各土司走遞此在平居無事日猶仰藉於夷司也今年飛練之役驛馬殘於鋒鏑馬



戶因之逃亡而近播各土司盡爲播賊虐劉彼自採死不暇奚暇爲驛遞奔走就其中黃平平越二驛尤甚自六月以來臣等屢檄驛傳道多方設處終莫能濟欲問土司則無官可尋欲問馬戶則無家可提欲責之衛官彼武弁未領錢糧欲責之驛丞彼貧官何能賠贖以故往來二驛者非雇募以去則徒步而走此猶往來官司之苦也至於羽檄交加兵符更調軍興之徵解器械之馳遞行至二驛袖手縮武而不能前幾何不敗公事而誤軍機也據該道議欲借濟於各省臣等看得近黔鄰封惟楚滇二省楚地用兵在湖北而湖南一帶驛遞稍逸雲南解餉入黔在安普而洱海金滄一帶驛遞稍逸臣意於二省稍逸驛遞每驛借馬一匹約三十匹內湖南十五匹洱海金滄十五匹或解馬或解銀分屬平越黃平二驛共濟時艱以滅強寇俟寇平而止其餘別驛苟可支持者無得援此爲例夫黔今日如多病人也帑藏空虛疾在腠理強寇侵軼疾在寒暑驛遞不通疾在血脉均之不可無醫醫藥者故不敢避瑣屑爲 皇上陳之伏乞 勅下兵部再加查議行二省暫借接濟庶驛路少通軍機不誤矣臣等無任祈懇之至

類報擒獲姦細疏

謹 題爲將官陸續擒獲姦細斬獲助播小苗類叙 奏



報以作士氣以銷姦黨事案省萬曆二十七年六月十八日據防守黃平叅將劉效節呈黃平所把總李朝陽等領兵於本所軍人陳旺家拏獲陳守邦吐稱王表係邦姐夫舉家搬投播州楊應龍將王表安於養鷹局住坐至二十七年三月內差王表來黃平探聽消息表又同黃平司叛投播民吳志倅等在肆牌謝朝倅處借苗兵三百名於浪洞平溪等處燒劫屯寨閏四月初三日半夜表帶力弩箭筒至黃平岳母唐氏家歇宿說楊應龍差來探聽黃平官兵虛實初四日到陳旺家藏躲被官兵於牛圈內搜獲將王表監候等因本月二十九日又據平越衛申報本衛管

下水洞夷頭阿亮等稟報本年伍月內有飛練殺官反頭盧阿反與我大架寨相殺阿亮將盧阿反射著重傷二箭未死又殺他大老虎阿寅等小軍六十餘人等因八月初四日又據防守偏橋原任清鎮守備今聽勘史良將稟據偏橋衛報本年七月十九日被白泥司土舍楊通定楊七等統領黃岑等寨數百攻圍本屯捉擄男婦有鄉導屯老劉念還等稟稱前賊必往梭洞過河回寨乞發兵堵截卑職親統練兵把總葉正賜曹仁佐哨官羅國器石萬龍葉占春武生王嘉賓等帶兵伏捕至二十二日早果有多苗牽牛挑担至梭洞經過截殺拒敵就陣斬獲首級二顆奪



獲牛一隻刀弩等件天已近暮苗奔入箐難追回營等因  
本月十七日又據石阡府經歷陳廷範申據本府水口渡  
住民彭希舜等拏獲細作馬良貴到職供係楊應龍差來  
石阡探聽楊應龍將肆牌夷頭莫老明家口拘入播州要  
出攻劫各處地方等情將馬良貴監候等因本月二十一  
日又據帶管都清兵巡驛傳道副使尤錫類呈准叅將劉  
效節移解拏獲姦姪杜老冬到道審稱係四川人搬在播  
州地名大竹園住坐於七月二十一日謝朝俸諭令來黃  
平探聽軍兵多少回話又稱楊應龍打破碁江廢了此兵  
水滄死此今要來打黃平屯堡割了田禾然後打城又撥

朱老二來幫謝朝俸今被兵楊再東拏獲審據楊再東稱  
老冬原擄再東在肆牌後再東偷走回黃平今遇老冬來  
黃平探聽在街撞認拏獲等因本月二十二日該臣訪得  
貴州省城居住舍餘吳塑父子交通播州牌行都布按三  
司拏獲會問得犯人張五十係貴州前衛舍餘招稱五十  
先年不守本分慣往夷寨買賣就不合故違雲貴等處但  
有漢人交結夷人互相買賣惹釁貽害地方者問發邊衛  
充軍事例即潛住播州投見楊應龍有貴州衛未獲舍餘  
吳塑即吳應舉與已獲男吳二弟吳三兒各習塑神像張  
五十引去播州見楊應龍母令塑羅漢觀音等神像又未



回至二十七年四月內吳應舉令吳二弟吳三兒回家看視八月初一日吳二弟與吳三兒因爭分祖遺弓張互嚷吳二弟罵吳三兒不知你將父殺在何處吳三兒回說你也同去如何說我彼此嚷罵致將通播事情傳聞貴州士民恐吳塑將來爲內應投揭撫院八月二十二日蒙行三司拏獲五十與吳二弟等到官發貴陽府引例問擬五十與吳二弟吳三兒各免徒發邊衛永遠充軍發遣吳二弟監故張五十吳三兒仍監候九月初六日據石阡府經歷陳廷範申據葛彰司生員安啓於八月二十八日拏獲肆牌夷犯李貴到職審得本犯供係播州琵琶坪住人本年

同李信并苗頭石勝鳳石富父子逆黨宋東等到葛彰司將二渡落田等屯軍民財畜盡行劫去被害良民楊再禮等識認是李貴兄弟後因外兵四集李貴將男婦奔出外境被楊再禮等拏獲申報等因致月二十九日據參將劉效節呈把總王嘉賓於梭洞要隘把截本月二十一日有九股兇苗數百入播經過本洞地方帶兵對敵斬獲苗級二顆驗明等因十一月初一日據帶管都清兵巡驛傳道副使尤錫類呈據偏橋衛呈據楓香小水等屯軍餘謝義高等稟稱九月二十二日被白泥司土惡楊七等統兵攻圍各屯殺死軍人李珠等四名捉擄軍人鄺廷臣等家財



牛隻當有鄰近侯家屯舍餘侯世元等督率鄉兵救護陣  
斬苗級一顆等因本月十二日又據分守新鎮道右叅議  
梁銓呈據防守清平重安江把總楊國宏於本月初三日  
午時被苗賊衝突刦殺督兵斬獲苗級二顆生擒一名阿  
利連人呈解等因十月十六日又據叅將劉效節呈據黃  
平安撫司土同知楊位呈據目把劉桂等報稱十月初六  
日播惡楊應龍總管楊三楊七統賊數百燒擄白株等寨  
桂等同把總薛瑞分兵截殺斬獲賊級二顆鞍馬二匹槍  
氈等項奪回被傷男婦三十餘口等因轉呈十月二十七  
日又據叅將劉效節呈據黃平把總李朝陽等拏獲姦細

郭天俸郭天祿隨帶兵書該職會同通判王三策審得郭  
天祿郭天俸稱係浙江衢州府龍游縣人一向常住播州  
孰識與楊七交好今年二月內楊七差江西人徐伏五前  
來同往京回欲進播州先令徐伏五回播聽接天祿十月  
十九日由白泥進播經過爛橋被兵盤獲審天祿稱我平  
生智大善用諸法陣戰道術黃平土城何足爲懼我將北  
門河水湧逼架起雲梯雲車火器頃刻見功若放我將楊  
應龍容易誘出又檢行李內有天文地理圖二張通天竅  
一本古風一本火器攻城書一本羅經一箇軒轅小鏡一  
箇虎豎摘要天機統會集一本五經標題書一本觀象玩



占書一本紫微垣經一本 大明一統紀要叙二本楊應龍給發刊印細字程途一條大小圖書二面雕刀紬衣等項人贓併連解審等由十一月初四日又據叅將劉效節呈據防守梭洞哨把總王嘉賓東坡哨把總蔣奇功帶兵伏隘拏獲苗賊阿寶阿桑老二供係叛酋楊七管下黎山新寨苗人因肆牌復金虎領我苗種一百送老苗一千回九股行至釘靴冲不想官兵截倒殺傷苗人我三人迷路連夜奔到營邊拏獲等情連箭弩刀綿被一併連人解審等因本月初六日又據叅將劉效節呈據黃平所掌印千戶褚綬呈據夷頭阿保等把截草塘要路十月二十七日

播州叛苗謝朝俸帶兵二百餘人殺擄平越松坪堡擄去男婦一十四口家財等物本堡軍人王張生等來報堡兵追截敵殺斬獲首級二顆奪回被擄男婦一十三名口當交原主止擄去一口殺傷彼兵三十餘人我兵亦傷二人等因呈詳到臣臣等陸續行司道將已斬級者驗實懸示已獲審明者牢固監候各將官兵量行犒賞外案照先該臣訪得播賊因見川貴設兵有備無能竊發乃以目犯姦徒裝扮漢人出入黃平偏橋一帶或招苗劫掠爲害或打聽遠近情形亦有內地軍民利酋金帛所引或潛踪隱跡與之走透消息甚至以違禁硝磺鹽布等件攜入爲姦者



牌行貴州按察司并守巡兵備等道及轉行將領等官各將鄰播一帶要隘地方嚴加把截盤詰姦細如遇播苗出沒併力擒斬有功員後先行犒賞事完優叙設或怠玩從重究處各等因節次申飭去後今據前因該臣謹會同總督川湖貴州軍務兼理糧餉巡撫四川地方兵部右侍郎兼都察院右僉都御史李化龍看得貴州地方拏獲姦細共七起而多在黃平平越之間是賊所垂涎者意可知已而郭天俸兄弟以異省亡命不遠數千里來助叛黨所攜諸書畫皆自兵家詭秘之冊則姦細之魁者幸而見獲姦謀稍阻今已審明相應與王表馬良貴杜老久李貴阿利

寶阿桑老二張五十吳三兒等分別情罪或斬或戍以銷姦黨者也斬獲小苗功雖不多然自飛練喪敗之後我軍氣不揚而賊氣日驕九股黃岑寨膽肆牌茶牌諸苗助播為虐往來充斥於偏橋黃平之區如入無人之境末敢誰何自阿亮射中盧阿反雖未即死而魄已奪此後梭洞斬獲二起黃平侯家屯重安江草塘斬獲四起兵氣稍振故阿亮阿保等與史良將李朝陽王嘉賓等相應加賞以作士氣者也夫細作甚微苗功甚小臣等非不知瑣瑣者不足以瀆天聽而必為之叙報者功無微而不錄則人知建功者必不遺而益勸於巨賊無細而不誅則人知助惡



者必不赦而漸散其黨未必非鼓舞人心之一助也伏乞  
皇上勅下兵部覆議行臣等將郭天祿杜老冬等明正典  
刑張五十吳三兒等遠戍遐方將阿亮阿保史良將李朝  
陽王嘉賓等分別犒賞庶刑賞既明士卒益奮矣臣等無  
任悚惕之至



蟪衣生黔草卷之二

恭和郭子章相奎甫著  
友人楊寅秋義叔甫校

奏疏

報賊阻東坡請增兵疏

謹題爲播寇突出充斥與隆黃平之間阻塞官路殺擄  
居民懇乞聖明嚴勅援兵以拯危急事萬曆二十七年  
十一月十八日據清平縣知縣劉啓周申報本月十三日  
卑職親至重安江查兵忽聞播賊列營七處圍劫重安乞  
賜發兵應援等因本月二十日又據興隆衛申報十一月



十六日亥時據東坡軍人李萬等飛報播兵數萬徑出梭洞圍殺白田乾溪水口等屯堡燒擄房屋人口家財由白泥出大小章劄營又五萬由構皮灘過河到白泥劄下有三大營八小營攻圍東坡又要攻打興隆黃平衛所城池等因又據防守黃平叅將劉效節把總李朝陽帶管都清兵巡道按察司副使尤錫類呈報俱同前因該臣差官隨調各衛所官兵前往應援去後本月二十四日又據四川重慶府知府張與行揭報據把總劉添忠兵李子忠報稱楊酋於十一月初五日發兵二萬劄在官壩與南基相連又據東鄉邊勇報稱楊酋親領兵數萬出發川等情合行

稟報等因同日又據貴州布政司分守新鎮道今降調叅議梁銓呈報據興隆巡捕指揮常靖國并防守東坡把總許攀龍傳報苗賊三萬來劫東坡勢甚猖獗職一面發兵應援一面調叅將劉效節兵接應印捕官帶領蒙兵沅州鎮溪兵接應比時苗賊蜂擁迎來鎮溪所兵奮力抵敵頗有功級悉被奪去柔緣後兵不力被苗包圍不能全勝回兵固守城池十八九等日節行偵探苗建五營於十里之外兩投木刻俱稱來衛追要馮權張熙等語及查此賊俱係近寨熟苗為苗勾引即今十里橋與東坡絕無人煙偏鎮音信不通該衛士民恍惚無計職係去官雖盡心力事



多掣肘等因同日又據駐鎮興隆衛貴陽府同知徐廷綬呈報本月十九日辰時據哨探軍兵執報木刻上寫播州總把事隆諭知興隆通衛官民吾今督兵數萬追尋欺主叛逆姦徒行至地名東坡切被無知流徒積兵千餘截殺吾兵勢不得已定決雌雄近查本司姦徒馮權張熙等潛入興隆衛內不思舊惡再欲叛逆欺主爾等早要省悞照名發出以免刀兵之患等語二十日又據執報木牌上寫正欲發兵來衛追尋逃奴何以爵羅承恩楊京馮權等各衛何故發兵把截地名梭洞等處不容該管九股夷獠往來實係你與隆偏橋甲不有切害又不容我辯訴你各衛兵

每處不過數千何故猖狂紛紛阻截要路即將姦奴照名發還以免屠城大患等因到臣除臣催調各將領官兵星馳前赴應援及嚴行興隆黃平偏橋平越各將官竭力固守城池外看得賊勢重大動稱數萬連營結寨窺我衛城塞我官路令楚黔之咽喉不通一應 奏疏兵餉文移俱不得達其志甚大其謀甚詭其勢亦甚岌岌矣臣分布興隆之兵三千八百名清平之兵二千一百名黃平之兵四千九百有零平越之兵三千一百有零鎮遠施秉之兵六百有零石阡之兵三千四百有零思南婺川之兵三千有零龍泉之兵一千九百有零赤水之兵六百名貴陽之兵



五千六百有零永寧蜀兵五千名自貴陽府以及西四衛  
烏江水西諸路屬之監軍按察使楊寅秋駐貴陽自下六  
衛所以及思石等府諸路屬之監軍參議張存意駐清平  
合之則通省兵共二萬九千分之則每城僅止數千兵分  
則勢弱彼此不能相援播賊一舉動必合二三萬攻一城  
又故多方出兵以牽我師故今日之用兵不得不多多者  
其勢然也督臣李化龍復調雲南兵七千廣西兵一萬臣  
復調湖廣永保兵一萬分駐各衛爲遊兵而尚未即至近  
播四道用兵半年參議梁銓到而復將去其餘三道竟無  
一至湖廣辰沅兵備竟亦未入偏橋貴州總兵童元鎮以

十一月初九日交代尚駐銅仁未入貴陽湖廣總兵陳璘  
傳牌雖到亦未入黔楚兵三四千分劄偏鎮勢甚衰弱今  
東坡之賊不退則楚黔之路不達 陛下發京餉六萬尚  
阻於辰沅雲南太監楊榮進 上之扛亦阻於貴陽廣西  
福建二十萬之餉即至亦不能入楚滇二十一萬之餉又  
屬烏有臣自六月至今雲南解到銀五萬又二萬留作滇  
中七千兵衣甲行糧以故未解川餉解到銀二萬二千六  
十六兩一錢八分內除四千還布政司作飛練用兵借過  
之銀六千給布政司作龍泉舊餉之銀臣實有餉六萬支  
持半年用過四萬餘而今兵至者已二萬九千未至者尚



二萬七千總之十二月終皆可畢至豈二萬之金所能接濟乎區意欲就於川中借銀十萬即以福建十萬金逕解補之滇中借銀十萬即以廣西十萬金逕解補之前兵部咨稱老庫未發銀十萬兩乞全給黔兵從蜀解入黔申而楚滇二十一萬未有之金早爲區處如數解給更乞 皇上勅下兵部嚴催湖廣二萬之兵及總兵陳璘副使王應霖早入偏橋共勦東坡之賊以紓咽喉之急嚴催滇粵一萬七千之兵早入貴陽雲南總兵沐睿入密查益廣西總兵李如樟入泗城共圖掎角之勢以爲黔中之援臣曰外侮重有如倒懸而臣猶有說焉地方多難文武共憂集兵聚餉責在撫臣援戈仗劍責在總兵自有播患以來川貴總兵畏賊甚於畏法愛身重於愛國在沈尚文則高枕不出今則優游泉林矣在劉綎遷延不入今則安閒善地矣彼富貴已極又何所畏忌而必於討賊邪新到總兵伏乞天語責成毋蹈前轍共紓寇難以必期於蕩平若使陛下之令不行於總兵則總兵之令不行於偏裨偏裨之令不行於三軍而臣等將何所持以收西南之危局邪此非細故也故臣不避斧鉞爲 皇上陳之伏乞 勅下戶兵二部一併覆議施行臣不勝激切待 命之至

請再增兵餉疏



謹題爲播賊分道突犯全黔勢甚岌危懇乞聖明再  
增兵餉以謀然眉事本年十一月二十九日據新添衛報  
稱本月二十八日亥時蒙防守車越原任參將今充爲事  
官蔡兆吉稟稱播兵數萬攻陷王解圍劄兵聲言往新添  
攻打屯寨該衛官兵晝夜謹守城池隨據本衛所管喇啞  
夷民報稱播兵萬餘已將王解燒劫盡空且王解逼近本  
衛乞賜發兵應援等因同日又據帶管新鎮按察司驛傳  
道副使尤錫類報稱據防守車越爲事官蔡兆吉駐鎮知  
州李珏稟據平越衛劉家堡民鄒應龍報稱見賊楊總管  
董提調郭提調管領賊兵過雍水河稱要打我江山地方  
又發掃帚一把火燒木刻一箇去播州趕兵掃土快來等  
因同日又據監軍右叅議張存意報稱據平越衛呈報本  
月二十七日午時據管理王解把總安榮報稱突被播賊  
數萬四路攻打本解榮當統苗向敵賊勢重大難抵被賊  
攻破頭寨殺死寨苗男婦不計其數放火大燒倉房衆苗  
擁榮奮死奪回屢據偵探人役報稱播苗數萬過河屯劄  
各處聲息攻城乞賜添兵策應等因本月二十日據清平  
縣知縣劉啓周稟據凱里楊燧報稱野洞七寨苗俱要反  
出由狗窩攻打清平城等情又據趙崇報稱七洞等苗已  
攻打徕嶺欲與七寨由草塘司入楊老攻打平越清平俱



有定約伏乞憫念孤城添兵防禦等因十二月初二日據  
防守黃平叅將劉效節及通判王三策指揮徐登階報據  
防守得勝關百戶薛應時稟稱十一月二十五日被播賊  
楊七楊總管統兵前來公翁巖高漆劄營聲言我今日來報  
信我主楊太爺已經令各處搭完浮橋大兵的於二十七  
八准來攻你平溪浪洞黃平與東坡黃蓮柳塘等處我兵  
在此劄營只等大兵四路齊到來攻卑職分兵四路哨探  
播兵日夜經過不絕播酋詭計甚多請乞加兵各處隘口  
把截事在然眉等因本月初四日又據清鎮守備王之棟  
并偏橋衛指揮許繼祖揭報播賊於十一月二十二日倡  
狂擁衆劄營於偏橋城南官道水井坡離城五里大勢圍  
城我兵固守城外劄營對壘一日我兵傷賊馬兵奪獲綿  
被二牀各賊方退臺蠟原營去訖查得內有陣亡漢兵湯  
法等七名土兵高元等七名擄去漢兵一名羅仲重傷兵  
毋成宗等二名其節次申報事俱經繳回又差兵由小路  
遞送被其截路草塘黃母徐姚爛橋一帶等哨保軍兵四  
散人煙盡絕本衛漢土官兵二千有零謹守城池賊勢重  
大不敢輕出等因本月初六日又據湖廣辰沅兵備副使  
王應霖報同前因同日又據鎮遠衛揭報十一月十八日  
准本衛巡捕指揮何天寵關據本衛軍餘郭正朝走報本



日天明時分被播夷約有五六千餘將本衛許花屯中屯周旗屯窩底屯一帶地方盡劫一空擄去男婦李賢火孫等數十等情各稟報等因本月初九日又據布政司帶管分守思仁道左叅政郭廷良呈十一月三十日據管思石守備事都司楊惟中報據坐鎮指揮胡効忠報據四十八屯軍餘黎廷恩等連夜前來報稱播賊何漢良住劄馬渡起七頭苗兵點齊於二十八日劄營三跳威逼思等講取思石婺川龍泉地方今已知 朝廷旨意先是進剿今又是剿了來說到此田地左右是死不壞也是壞了四川水西蘭州白泥黃平已分兵敵殺你龍泉思石婺川若不先

下手剿蕩將來大兵容易入境此番定然是實等情到職及查見今偏橋興隆被賊劄營接取九股生苗裏應外合等因同日又據監軍叅議張存意呈報本月初六日據興隆衛呈據鄉導陳八報據臺蠟寨苗由七九傳出播州把事木刻說是本衛詐哄連和我大兵已齊不日攻圍偏橋黃平你興隆既要免禍可備銀二千兩退兵待我打了偏橋黃平各兵見於校洞立營劄兵數萬要行攻圍城池禍在然眉萬分緊急等因各揭報到臣除調官兵分布楛援其校協官兵及失事員役容臣等查覈另 題外今照前因臣謹會同總督川湖貴州軍務兼理糧餉巡撫四川地方



兵部右侍郎兼都察院右僉都御史李化龍巡按貴州監察御史宋興祖看得播酋楊應龍逆節滔天自分罪在不宥又計黔中衛所郡縣數千里而遙所在單弱漢土官兵分布城守不足抗禦乃糾搜生苗分道突犯先梗塞餉道次倡攻城池爲先發制人之計初據興隆偏橋二衛報稱攻破東坡爛橋等處殺擄軍民慘毒異常今則鎮遠衛告殺擄許花屯堡矣平越副添告王解國被擄矣黃平告楊七統兵翁巖矣龍泉告何漢良劄兵三跳矣在在皆賊處處告急楚兵三萬滇粵永保之兵三萬聲息至今杳然辰沅道兵備副使王應霖尚在沅州總兵童元鎮交代一月仍駐銅仁俱未投足到偏橋興隆參將陳寅婺川參將王鳴鶴俱泄泄未知進止何在事貝之阽危甚於累卵其尤急者偏橋興隆之間東坡爛橋重安三處實楚黔之交會滇貴之咽喉此地一爲賊據則楚不得入黔滇不得出楚匪獨無黔且并無滇此必爭必守之地非大集勁兵勢必不守臣等會議得東坡爛橋重安三處每處當設重兵一萬爛橋東坡重安三處共三萬庶幾道路可通咽喉不塞而後可以議及大舉顧此三萬之兵又當在原議兵數之外臣等非不知兵多費餉而此三處無兵即有餉亦不能達今參將朱鶴齡之餉阻於鎮遠不得入黔者爲此路之塞



故也伏乞 皇上軫念全黔坐諸水火 勅下戶兵二部  
急催楚兵二萬以林偏橋思石一帶催滇粵求保兵二萬  
以林與黃貴陽一帶容臣等再募兵二萬分屯東坡爛橋  
重安二處以固要害而通喉舌增兵糧餉嚴督如數解發  
未到各官嚴督如期入黔仍復規避逗遛者容臣等查察  
處治庶幾易危爲安在此一舉不然黔滇二省臣惴惴且  
莫必其終矣臣等無任激切待 命之至

請借川湖庫金疏

謹 題爲黔中需餉然眉異省加派難待懇乞先借川湖  
庫金就扣加派抵還以濟軍興事本年十二月初七日臣

接得邸報戶部一本夷氛甚惡 天 討宜彰等事覆總督  
臣李化龍會同臣等題同前事內稱貴州於雲南取銀二  
十二萬據報止解過銀七萬餘兩廿六餘無從處解又湖廣  
一十一萬有零廣西福建各十萬共計三十八萬有零催  
督軍前支用去後今該前因數尚不敷於湖廣四川二省  
夏稅秋糧加派銀共三十八萬三千餘兩以佐時急楚得  
其餘蜀得其半貴州處其不足然貴之被難也兵俱新增  
餉無宿儲其需銀實切則取盈濟虛相應不分畛域通融  
支用等因奉 聖旨是兵興餉急這四川湖廣地畝加派  
准權宜行著總督於三省通融支用仍禁有司豪右巧避



貪漁等弊毋致累害窮民兵罷之日即行具奏減免欽此  
欽遵臣反復讀之戶部計處貴州之餉視川湖獨盈憫念  
貴州之苦視川湖獨切 皇上慨然俞允臣不勝加額厚  
幸顧臣之仰給於 皇上者非歲月之急而目前之急也  
臣安敢默然無言貴州地方遼長在在與播爲鄰先議募  
兵四萬分布防守似亦稍足復議大舉督臣李化龍慮路  
岐兵分賊衆我寡調雲南兵八千廣西兵一萬永保兵一  
萬俱劄貴州大約以年終取齊則貴兵實不止六萬有奇  
新設參將陳寅王鳴鶴朱鶴齡都司錢中選等官及犒賞  
製造軍火器具等費俱取足於新餉以一年計之非六七  
十萬不可臣自六月受事至今實止有銀六萬兩臣前疏  
已悉之矣又以東坡之賊未退南來之餉益阻臣不得已  
借川餉十萬即以閩餉十萬抵還借滇餉十萬即以粵餉  
十萬抵還然今猶未到也竊計戶部爲臣區區處當有見銀  
而乃以川湖加派處黔之不足臣豈不知加派奉有 明  
旨誰敢慢令愆期第派之閭閻輸之官府即彼此共念時  
艱徵解必待歲餘臣之兵環向旦夕待哺安能俟此伏乞  
勅下戶部川湖濟貴之餉每歲實該銀若干每省先借庫  
銀若干急解貴州即以加派之數立徵抵補在川湖聊煩  
一時之那借在臣可紓萬分之然眉不然脫巾之虞必不



聖訓 卷之二 十一  
能免臣之憂不獨在播且在兵矣總計貴州用兵不止六萬有奇一年當六十餘萬近日川滇解到銀七萬而以一萬補布政司飛練用過之銀及龍泉舊兵之餉其餘各省並未解到臣之焦苦不敢言如 國事何此則不能無望於戶部爲臣急處尤不能無望於各省撫臣憐臣之苦而共濟之也伏乞 皇上勅下戶部再加查議急爲設處施行臣無任激切待 命之至

叅總兵到任違限疏

謹 題爲將官到任違限懇乞 聖明俯念地方多事姑留討賊以責後効事行據貴州按察司呈准銅仁總兵童

元鎮手本爲缺官事移稱萬曆二十七年五月十一日奉兵部劄付該本部題奉 聖旨童元鎮著以原官充鎮守貴州總兵官兼提督平清等處地方寫制勅與他便著馳赴管事不必候代欽此欽遵備劄不必候代選帶驍驍兵丁多則五千少則三四千俱要人人堪用依限於本年五月二十八日到任等因奉此續准貴州按察司手本奉巡撫貴州右副都御史郭子章案驗准兵部咨同前事奉此又據經歷司呈抄蒙巡按貴州監察御史宋興祖案驗亦同前事蒙此備行催促本職遵照不敢候代擬即束裝就道第募兵議餉非旦夕可齊具呈兵部改限本年八月二



十八日到任其新任廣西總兵限期亦改所有 冬至  
表箋例應本職拜 進且准廣西巡撫右副都御史楊芳  
手本准貴州撫院咨行職調取泗城南丹那地各土州精  
兵及候三院詳行印務至九月二十日方交與廣西都司  
收掌二十四日起程至湖廣東安縣忽感風寒不能動履  
該本縣知縣張進送醫生劉文喬調治數日力疾登途帶  
醫隨行於十月二十八日至靖州入境十一月初八日到  
平溪初九日與原任總兵沈尚文面代隨准咨送 符驗  
一道 令旗牌五面副關防一顆到職接管任事外合行  
移文轉報等因到司該本司查得總兵童元鎮改限本年

八月二十八日到任今准移稱行至湖廣東安縣染疾調  
治至十一月初九日交代計到任日期違限二箇月零十  
日相應照例叅究但該鎮原在廣西候拜進 冬至 表  
箋又奉行調泗城南丹等兵及候三院詳行印務方敢起  
程比與無故愆期者稍間况經地方多故應否叅究等因  
呈詳到臣據此案照本年八月二十七日准兵部咨前事  
等因備移到臣就經差人移催該鎮及案行按察司轉催  
去後今據前因該臣謹會同巡按貴州監察御史宋興祖  
看得貴州總兵官童元鎮自五月 簡用改限八月終到  
任不爲不寬乃今受代之期計違劄限七十日當備騰揭



黑州 卷之二  
三  
狂之時正臣子急公之日乃延遷道路違限兩月既之挾  
輒傳棋之勇終非披髮纓冠之義論法相應奉究但臨敵  
易將兵家所忌而東安染疾情非無故合無姑貸其遲緩  
之罪專責以討賊之任庶幾收之桑榆用以克清兇慙相  
應留用以責後効或量加罰治以懲怠玩伏乞 勅下兵  
部再加覆議行臣等欽遵施行謹題請 旨

報賊破龍泉土司疏

謹 題爲播賊殘破孤懸土司尋復歸集謹據實查察失  
事將官以肅軍政事萬曆二十八年正月十八日據貴州  
右監軍道布政司右叅議兼按察司僉事張存意呈稱萬

曆二十八年正月十六日據思南府申本年正月初六日  
據防守本府前茶溪關把總黃明儒報稱播酋步兵六萬  
馬兵三萬於初五日殺破龍泉司本司駐鎮守備楊惟中  
帶兵先於十二月內將家眷送往本府附近鸚鵡溪避住  
該司止有土官安民志兵五百名在司今被殺擄告急會  
移石阡請發大將重兵庶得堵禦等因呈報到府初七日  
據偵兵回稱龍泉司初五日寅時播酋數萬擁至龍泉就  
將本司并鳳凰山營俱圍劄數層一湧進入已將土官安  
民志吏目劉王鑾綁擄去訖遺失本司印信楊守備於初  
肆日徑至鸚鵡溪潮底河下潛住本備今又帶兵復見住



鸚鵡溪未回播兵尚劄龍泉附近地名魚跳不知何爲等情據此查得楊惟中失事潛入鸚鵡溪避劄本府聞知就於本日移會楊惟中帶兵回守龍泉立功以圖一創至初九日惟中回稱龍泉切近播境深居虎穴逆酋近來狂逞勢焰愈猖本職部兵不滿二千彼酋兵馬動稱數萬衆寡難支本年正月初四日本備出謁分守道面議地方事宜行令把總李君寶協同土官安民志料理地方行至地名煎茶溪於初五日辰時據報逆酋楊應龍督兵出犯龍泉本職星馳急回至地名沙灘分兵殿後堅持其千把總李君寶等督兵與賊對敵自卯至午彼兵勢衆約有數萬我

兵寡少難支被賊在陣縛去土官安民志吏目劉玉鑾死傷官兵查實另行呈報我兵殺死苗賊亦多急難割取首級彼酋稱言欲要長驅直入思南等語本備帶兵聚劄鸚鵡溪堵截虛實情辭希圖倖免據此查得本備標下官兵一千八百名俱係自行遴選召用糧餉按月徑自覈支此外又有湄潭永靖哨把總胡効忠標下月糧本府亦按月聽支不缺其前被殺擄錫落馬頭綏陽等哨亦龍泉所轄隨該本府稟白帶管分守道郭叅政發把總丁文明兵伍百名黃明儒兵五百二員名又發陸希管官兵三百二十二員名前去煎茶溪日頭岩等處相機接應去後至正月



初五日楊惟中一旦離遁遂使逆酋乘虛侵犯致失司印  
流禍一至於此今據各所報前情應合通報除行駐鎮石  
阡都司錢中選督兵前去應援及另文申請大兵外據此  
該本道看得龍泉乃思石二府咽喉孤懸賊境士馬單弱  
自趙仕登授首以後逆酋揣知天討難容輒敢乘虛衝  
突節該本道呈詳兩院行令添兵固守續奉本部院許發  
陝兵施兵俱一時不能齊集彼賊勢猖狂固非數千兵所  
能捍禦而鄰鎮隔越又非一二日所及救援者也及查副  
總兵陳良玘駐鎮偏橋一月頗有調停守備楊惟中堅守  
龍泉二年竝無失事但讀原奉題議思石龍泉皆良玘

應援之信地况當賊衆入犯司治官印賴惟中協力以相  
保今據該府備報前來反覆參詳在陳良玘以急守偏橋  
爲詞而屢催不去同舟共濟之義則踈在楊惟中以公出  
思南爲解而懇留不允事不避難之忠未盡情若苛原法  
難并貸等因呈詳到臣據此查先據帶管思仁道布政  
司左叅政郭廷良思石兵巡道副使路雲龍與石阡府并  
龍泉司土官安民志節報二十七年十二月十八日播目  
何漢良朱敬等統領賊兵數萬一由錫落關將把總喻時  
興哨官刁榮賢楊廷貴與馬頭山把總李惶三俱各殺死  
虜去喻時與兵一百五十名當砍死五十名餘一百名用



木靴穿繫一路由龍洞哨一路由穿礮哨一路由三跳哨  
綁去把總蕭才一郭明選并兵一百二十名一由綏陽哨  
綁去把總冉文燦將永靖營大毛坪等各哨房盡行燒燬  
官兵殺傷大半等因到臣該臣即調防守偏橋副總兵陳  
良玘帶兵二千銅仁守備葛如錦帶兵一千又差人催調  
永順宣慰使彭元錦帶兵五千由銅仁出間道應援尤慮  
其未足也又催督臣所發施州兵八千陝西馬兵三千從  
婺川入援及得正月初五日之報臣又移行總兵官童元  
鎮親督凱里司應襲土舍楊燧把總毛宗慶等兵二千速  
赴應援外爲照龍泉蕞爾一土司耳距貴陽千五百里而

遙去播僅二百餘里而近於貴陽爲遼隔之藩籬於播爲  
切近之門戶逼在虎穴瞬息可至臣一入境即慮其以彼  
孤懸當此狂勁去年八月內具題爲地方孤懸無援賊  
勢侵軼可虞等事內稱龍泉無城郭婺川無將官又俱無  
勁兵議將婺川增設參將一員龍安增兵二千隨該兵部  
覆議上請增設參將推補今狼山副總兵王鳴鶴臣又  
查得都司楊惟中守龍泉二年曾殺播賊項逆酋公移至  
大加怨恨臣知其伎倆已窮顯去之似爲賊報怨乃咨兵  
部量移別地另選材勇將官以補其缺兵部亦如臣議  
題稱龍泉兵少無城恐起別禍暫將楊惟中移置量陞遊



擊而以今江南副總兵坐營沈弘猷補之臣之慮龍泉者非不蒿目苦心顧自去年六月至十二月解餉無幾支持半年藩司司庫僅存四千五百金即那借無從勢難多募而王鳴鶴沈弘猷俱未入境狡酋自分天討必加乘我大兵未集以數萬之苗賊襲無城之土司此非賊之強實我之守備弱耳楊惟中與土官安民志同處一司惟中擁兵二千安民志兵止數百民志挺身與鬪惟中避劄鸚鵡失事之罪惟中即萬口無以自解豈獨惟中臣受事半年不能討賊而一土司反爲賊所乘臣亦安所逃罪又何敢以分屬楚信地爲辭續據思南府申據播州逃犯充受吐

稱楊應龍自率賊赴龍泉正月初一日起身初五日至龍泉將本司各寨攻破初六日楊朝棟書來報稱上邊軍馬至急初七日遂回州去訖又據思南府申報正月十三日吏目劉玉鑾自賊營放歸臣惟賊雖稍退而土司已殘吏目劉玉鑾雖已放歸而土官安民志生死未測除殺傷官兵擄掠民人行思石道查實另報外伏乞勅下吏兵二部再加查議將遊擊楊惟中行巡按御史提問正法或念巨寇未滅代者未即至先行革去職銜令戴罪立功以贖日後無功并議前罪帶管分守思仁道叅政郭廷良已承兩院批准交代而行思石兵巡道路雲龍初接帶管未入



思南至於副總兵陳良玘雖云龍泉信地分屬偏橋總兵而總兵官陳璘未到良玘暫爾代庖難以苛責總兵官童元鎮業已督兵貴陽龍泉既屬偏橋總兵信地本官原開遙制雖鞭之長不及馬腹以上各官似應免究者也如臣不職無裨地方伏乞 勅下速賜斥罷別選才望素著者前來代臣以竟厥功庶幾邊圉之任事有人而西南之凱奏有日矣臣無任悚惕待罪之至

### 報賊襲土官疏

謹 題爲播賊夜襲土官殘害地方事本年二月初九日據防禦劄佐養龍等處指揮夏應龍申報本月初八日申

時據乖西司申稱本月初七日申時分據本司把守桃子臺舍人楊鍾走報本日鷄鳴時分被播賊由河渡越江至馬場將防禦官慰宋承恩并親枝各舍包擄去訖殺傷守把土兵賊勢兇勇難敵應合飛報等因到臣據此隨即差官指揮葉天培督領水西漢把王嘉猷等帶兵前去彼處堵截應接續據漢把李勝擒獲播賊梁守富廖華到臣臣牌行貴州按察司審問據該司詳稱梁守富廖華俱係逆酋楊應龍族人楊統從賊稱應龍說宋宣慰不與同心令楊朝棟楊三田二領兵一萬前來新土將宋宣慰擄去做親同生同死已先於各庄取男女陪嫁等情續據指揮葉



天培千戶范之文漢把王嘉猷等報稱播賊擄去宋承恩  
燒劫龍堰馬胯窰較等寨楊朝棟接宋承恩至尚溪整酒  
換衣以去竝未創營在彼等情續據指揮夏應龍等獲姦  
細王祥雲南領兵中軍張澍等獲姦細王宗文王玉毛繼  
章趙良才毛繼祖等俱稱宋承恩被楊應龍擄去就將女  
結配成親安在上街新橋住坐等情到臣臣看得宣慰宋  
承恩故父宋德賢存日議婚楊應龍之女至今尚未過門  
二十七年十二月據宋承恩稟楊應龍議於二十七日送  
女過江成親臣恐其假名親迎襲我地方督兵嚴拒之已  
不得遂其姦姁又令贊畫官周英協同宋承恩起十二馬頭  
各兵阻守河渡乃於初七日夜竟襲承恩以去周英突圍  
而出有言承恩以翁壻之故當應龍未叛時實與往來近  
睹明旨森嚴始與之絕酋憤之而襲以去者有言酋妻  
田氏愛女必欲承恩成親令子楊朝棟襲之以婚者有言  
承恩年幼兵弱拒之不可絕之不可不得已而去者人言  
藉藉俱未可知承恩今在賊中其生死未測其成親與否  
亦屬傳說其失事之罪誠無所逃而其從逆之情未敢遙  
度但三省之師已於本月十二日竝進夾攻逆酋亡在旦  
夕不自悔禍而夜襲土官擄殺邊民擄髮之惡所不可言  
搖尾之毒至於此極不寸斬之不足以謝地方除擄殺寨



民另行查實 奏報外伏乞 勅下兵部行臣等并力討賊以靖妖氛謹題請 旨

叅五開叅將失事疏

謹 題爲將官輕舉債事惡苗掩殺官兵謹據實查叅以肅兵政事萬曆二十八年二月二十五日據湖廣按察司辰沅兵備道副使王應霖呈據黎平署印推官丘獻可呈奉本道牌該五靖叅將黃冲霄督率鎮守備邊上將於原調征播哨兵內摘發二百名及令靖州守備張世忠帶領五開衛所款兵一千五百名擇於萬曆二十八年二月初二日同職前往永從縣駐劄撫綏皮林等寨諸苗當出

火牌傳諭 朝廷恩威令獻首惡餘黨罔治但各苗肆惡怙終執迷不服各官兵於初四日自縣詣該寨相機挾勘值道路崎嶇羊腸險峻至本日午時據潰兵走報黃叅將督兵行至擒鬼坡被該寨惡苗糾集下皮林頓洞多苗并無管生苗裝塘埋伏俟兵經過各苗蜂擁齊出截殺將守備陳世忠并五開衛指揮趙國王劉繼光千百戶張治新李承熙邢德唐世臣莫自是楊天時江應潮閔宗騫胡順化馬騰雲孔聞韶孟師孔凌善馮時選哨官丘明李高及靖州哨領兵千戶楊啓賢莊世恩陸懷忠哨官劉紹尚龍珊登時殺死并戮殺多兵亦未查的等情報府至酉時黃



參將亦奔至永從縣中初五日各苗蜂集縣前勒要退兵銀千兩不從即攻城劫官奪印本府與龔知縣見事勢危迫多方善諭令附郭赤沙寨衣巾土生楊永祿勸化諸苗又據五靖哨退兵寫送木刻乞借銀五十兩退苗以保多命等情隨於該縣借出秋糧綿花一千斤并隨帶犒賞銀牌銀花共七十餘兩給與衆苗復勒寫印信承管文帖并猪酒方行解散初六日本府與黃參將龔知縣方得回府次日子時惡苗又將五開衛水井燕窩長春三堡等處盡行燒劫等因詳報到道又准參將黃冲霄手本移報相同案照先奉巡撫湖廣支都御史批據本道呈詳皮林寨惡苗於擒鬼坡將銅鼓守禦千戶所操舍馬朝弟馬臣及軍餘董應魁殺死行委千百戶張正蒙武繼文等會同永從縣知縣龔一慶帶領鄉導詣寨切責苗頭管銀等查勘處分各苗仍前糾衆據險操戈截路拒敵當將軍兵王邦等殺死九名又糾苗夜圍五開衛三舟長春屯堡放火燒燬傅國明等八家殺死軍李明圓并妻吳氏殺傷軍餘楊大付家財牛禾等物一空當該本道牌行黎平府出示曉諭撫處隨據該府呈准黃參將手本回稱皮林寨惡苗肆惡已極理法難容矧今糾衆附勢抗納秋糧合款揚言欲行攻縣至今該縣不敢出入且十二土司諸苗觀望人心洶



洵至於五靖哨兵共有五百七十名俱已整棚齊備衛所  
款兵一千五百名亦已點齊惟候借沅鎮侯兵六百名至  
日一齊舉行煩酌議轉詳等因報道看得惡苗刦殺軍民  
藐法抗勘商民不敢往來縣官艱於出入若不夫加懲創  
則一寨狂逞諸苗効尤地方將無寧日候詳轉行黎平府  
查議堪動錢糧移會黃叅將委官召集侯家兵并哨款兵  
及叅守親兵相機挾擒首惡正罪脅從罔治安撫諸苗庶  
孤縣無虞苗酋知警等因通詳奉批惡苗稱亂截殺官兵  
負固不服罪不容於死矣仰道嚴行該府議處錢糧仍移  
會黃叅將督兵挾勘先擒首惡正罪仍撫諸苗無懷二心

繳又奉巡撫貴州郭都御史批上皮林寨惡苗不其多如  
黃叅將力能制之則專任之但止於擒首惡餘脅從者撫  
之可也仍候楚中兩院詳行繳又蒙巡按湖廣監察王御  
史批惡苗刦殺法所當誅如議行仍候撫院詳示行繳又  
蒙巡按貴州監察宋御史批惡苗肆害逐殺官兵非一大  
創不可候撫院詳行繳蒙此就經牌行黎平府會同黃叅  
將查議糧餉集兵相機挾勘安撫脅從去後今據前因看  
係地方重大事情應合通詳等因到臣據此隨批皮林寨  
惡苗戕殺守備等官至二十餘員此地方之大變神人之  
共憤也不一大創之不足以靖邊圉第楚黔二省方有事



於播勢難兼舉且賊已稍退姑羈縻之俟平播之後提一  
二營大兵剿之易易耳黃冲霄失律之罪已無所追姑令  
戴罪聽參推官丘獻可知縣龔一慶姑令解散賊黨少安  
地方仍候楚中兩院詳行去後續據該道呈詳參將黃冲  
霄既已失事該參事務應令委官暫署查得原任浙江遊  
擊呂應陽韜鈴素諳堪以署理等因覆詳前來除批原任  
遊擊呂應陽准令暫署參將事外該臣參看得參將黃冲  
霄驍駘末品斗筭小材始當諸苗憑陵既乏綢繆之策及  
至會官勘處竟違撫治之文擅驅孱兵深入虎穴輕信精  
壯逃竄之語遂墮逆苗埋伏之姦致令守備等官盡遭鋒  
鏑營哨各卒槩被虐斃劉失律喪師辱至此極損威釀禍罪  
安所逃所當照例參治禡職提問以肅兵政者也黎平府  
推官丘獻可求從縣知縣龔一慶未雨既乏桑土之防臨  
事又鮮駕馭之術棄甲而走衣冠維羞登城與盟春秋所  
恥相應重加罰治以警懦庸者也辰沅兵備副使王應霖  
地方雖屬兼轄兵戈豈不與聞但本官以播事孔亟移駐  
偏橋相距五開遠甚勢難遙度且原議止於勘撫不專主  
戰似應量加罰治以責後効者也再照上皮林等寨諸苗  
稔惡有年尾大不掉乘危蝟起怙險鴟張委官查勘宜當  
靜聽處分嘯侶拒討輒敢擅殺官兵日月其愆鬼神弗赦



法當督兵剿治以伸 國威第楊酋尚未即殄楚黔之師  
方向夜即且惡苗已漸解散豺虎未翦安問狐狸姑候平  
播之後留一人大將提兵剿處原任遊擊呂應陽照依道  
議暫署五開參將事陣亡被傷官兵張世忠等容臣會同  
湖廣撫臣查覈酌議優恤另報外相應具 題伏乞  
勅下吏兵二部再加查議將黃冲霄等分別議處皮林寨  
惡苗姑令府縣暫且羈縻以候剿治庶庸將有所懲創而  
邊圉不甚决裂矣謹題請 旨

增設庫吏疏

謹 題爲增設庫吏以濟軍需事據貴州布政使司呈奉

臣批據貴陽等府州縣吏鄧壽遠等連名訴稱切照貴州  
夷地初開會省招納川湖吏農多缺書辦故經制未備近  
年土著輸納愈盈缺少人多有一缺而十餘人守候者以  
二三十年計之三考百歲尚難成就及查腹裏府州縣俱  
有庫吏貴州止貴陽一府添設其餘皆無各衙門輪撥候  
缺吏經管吏代不常事無專責雖此中錢糧寡少與中州  
有間然出納事體相同乞軫蟻役壅滯俯將七府各州縣  
添設庫吏并各衛經歷司吏一併議建如原撥缺遠願改  
庫參者酌量收參遠近照等遞加納銀庶軍需少濟經制  
可全等情奉批 國制府有庫吏而縣無庫吏府庫吏准



查明會 題添設縣庫吏仰司再查詳奪奉此又蒙巡按  
貴州監察宋御史批同前情蒙批布政司查可行否報蒙  
此就經移行按都二司守巡安平貴寧思仁新鎮各道會  
議去後隨准各咨牒回覆到司該本司查看得貴州原係  
荒服開拓始自 國朝當時以夷方事簡有司軍衛吏役  
俱未全設或以兩房科歸併一房或以三五事經承一吏  
先年事少人稀名缺相宜乃今地方生齒日繁政務頗多  
以致缺少人多紛紛具訴告改各府應設庫吏一名州縣  
似應添設架閣庫吏一名至於各衛經歷司吏查 大明  
會典原無開載應行免設既經各司道議覆相同且所增

係典吏行頭俱無吏俸紙劄委應准從但查府庫州縣架  
閣庫缺一開首願即得見叅如有原撥各衙門吏役缺遠  
難叅願改新增前缺者查叅期久近遞加納銀合無酌定  
府庫缺首願者應上銀一十二兩次願者應上銀八兩州  
架閣庫缺首願者應上銀八兩次願者應上銀六兩縣架  
閣庫缺首願者應上銀六兩次願者應上銀五兩俱充兵  
餉支用但張官置吏事屬創始請乞裁奪 題請 明旨  
至日施行等因呈詳到臣除批仰候會 題外該臣會同  
巡按貴州監察御史宋與祖會看得貴藩初創因陋就簡  
經制率多未備邇來法紀漸張川楚黔民納銀充吏倍於



往昔而各衙門房科缺少不惟兵馬錢糧漫無專責難便稽考抑且候缺多人株守委屬不便據鄧壽遠等訴增吏缺司道會議僉同矧黔當師旅煩興措餉甚艱得此涓滴之濟少爲軍興之助查得貴陽府已設庫吏思南等七府似應照例增庫吏一名安順等七州新貴等八縣亦當增架閣庫吏一名專管錢糧以清出納照例不支俸銀紙劄其於公帑吏治兩有裨也相應題請伏乞勅下吏部再加酌議行臣等增設永爲遵守庶遐方冗役可疏而邊餉亦得少充矣謹題請旨



續衣生黔草卷之三

恭和郭子章相奎甫著  
友人楊宙秋義叔甫校

奏疏

初奏捷疏

謹題爲大兵初進首摧賊鋒恭報捷音少慰 聖懷事  
萬曆二十八年三月初六日據右監軍右叅議張存意署  
都清道副使充錫類糧道左叅政郭廷良呈奉督臣及臣  
憲牌播會紀順 朝廷必誅即今糧草霧集兵馬雲騰凡  
我文武將吏漢土官兵的於本年二月十二日各照分定



道路同日竝進開刀剿殺至十八日各抵播州等因又奉  
臣牌平越興黃一路出門便是賊境至期興黃兵出擣白  
泥平越兵出擣肆牌共相犄角以圖萬全奉此遵奉依期  
率兵進剿外本月初三日准征播總兵李應祥手本報本  
年三月初二日據副總兵陳寅報稱統領土官蒙詔土舍  
莫勞把總安世珍孫仲謨等探得肆牌叛賊聚集截堵職  
等黎明直抵旋水賊布陣拒敵職將虎兵當先藥弩亂射  
火器銃彈齊發大獲全勝斬獲賊級八十一顆俘獲器械  
不計同日又據原任叅將今充爲事官蔡兆吉統領土舍  
楊治隆土官張元虎把總猶鶴安生等前往天邦圍賊據

險瞭見即出截殺官兵奮勇直前賊敗奔圍官兵架放百  
子銃火箭齊攻登寨斬獲賊級七十三顆同日又據原任  
守備伍萬鍾統領呂守現李正中阿亮等兵攻剿三百落  
圍叛賊山箐險峻賊恃固堵截官兵仰攻被滾石梭杆不  
能遽上隨該本鎮標下原任守備柳國柱中軍官張奇盛  
易之謙百戶李師沅江世才等率同領兵把總華統吳文  
秀宋世臣等部兵從後路偷上火箭銃炮齊發賊力不支  
前後夾攻當陣斬獲賊級六十一顆各兵見在搜剿山箐  
等因先該本鎮偵得逆酋楊應龍選差張文相朱敬董教  
郭倅冉坐寨等起集肆牌并河內賊衆拒敵官兵雄據三



圍屯劄肆牌恃險勢重又據出哨兵士拏獲馬賊一名阿林供報賊欲早晚襲糧隨該本鎮統督官兵酌定緊要進止爲營四山揆伏挨次前進今據攻破險圍通共斬獲賊級二百一十五顆俘獲賊屬一十七名口賊仗器械五十三件到職職隨公同紀驗官同知徐廷綬知州李珪陳聖佐於本營查驗明實合行呈報等因同日准總兵李應祥手本到臣亦同前事又據副使充錫類呈本月初四日據都清守備汪如淵稟報本月初二日職督官兵劄青池令把總張鶴狎許攀龍等帶兵梭山直抵肆牌有草塘松坪浪杵播民楊世祿等原順劇賊謝朝俸今見大兵已進攜家二十九名口出降令充鄉導報効同日又據貴陽監軍按察使楊寅秋貴靈餉道左參議梅國樓都司僉書標下遊擊將軍張秉忠呈據泗城州土知州岑紹勳指揮李懋標申報本月初三日率兵前去鰕子渡遇賊用火箭射焚賊房四間初四日土官男岑雲漢兼同職家兵張宗義等前去河渡關用火箭射焚隔岸賊房八間米二倉射死賊三名射傷二名本夜伏兵關下裝塘至五更時候遇賊在隔岸巡邏當即浮水前去對賊血戰斬獲賊級一十八顆呈解前來該職驗是真正賊級當即發醢熏類解同日又准貴州總兵今充爲事官童元鎮手本亦同前事各緣由



飛報到臣臣札行兩監軍道會同各道驗明照格行賞楊世祿等准充鄉導立功外案照先於本年二月初九日據思石兵道副使路雲龍呈據婺川守備徐允爵申報正月十七日播賊數千聚石樑水天坪劄營將攻圍本縣職率兵追捕至石橋關殺死賊兵無數俱被搶去止奪回擄去生員良民朱國賓等男婦三十餘名口俘獲牛馬四十隻斬獲賊級一顆生擒一名二月十五日據畢節兵道副使洪澄源呈據宣慰安疆臣報稱播民黑老虎等攜帶妻小共一百一十三戶過渡投降即安插內地李毛地方量給衣糧二月二十三日據副使路雲龍呈據思石守備楊惟中呈賊首冉崇學藍大藍二等統苗屯劄三跳水職發兵搗巢當陣斬獲藍大等二十五級馬二匹斬刀三把弩一張長槍四枝虎槍二枝紅絮被一牀并奪回被擄民王良臣男婦二十七名口已而苗賊復出把總李君寶楊第督兵血戰斬獲賊級三顆又獲刀槍等物二月二十九日據副使洪澄源呈據宣慰安疆臣師至烏慶水令日把丁良茂等招獲擄帶妻小播民阿蒙等六十八戶暫行安插三月初四日據辰沅兵道副使王應霖呈准總兵陳璘手本稱二月十二日於大塘地方生擒苗徒吳阿保審係肆牌播黨來探湖廣兵馬十五日早遊擊陳策千戶張金把總



何棟吳應龍李元敬朱萬乾吳嘉隆張文爵等督兵共擒斬賊三十五名顆俘獲賊屬三十八名口初五日據副使王應霖呈准總兵陳璘手本稱二月二十七日申時本鎮親統諸部官兵進次龍溪地方遇賊來敵躬督遊擊陳策都司吳時喬守備白元潔王之棟陳九經保靖司應襲彭象崑等率兵奮勇向前通共斬獲賊級九十一顆奪獲賊仗各等因轉報到臣臣除將投降苗民隨宜安插獲功員役應賞者分別獎賞應叙者聽候并叙外該臣會同總督川湖貴州軍務兼理糧餉巡撫四川地方兵部右侍郎兼都察院右僉都御史李化龍看得逆酋自拒 命以來肆

牌之地莽爲賊墟烏江一衣帶水視若天塹黔陽官兵不得入肆牌而渡烏江蓋六七年於茲矣又姦細之往來甚易黔中之虛實盡知以故東西狂逞彼直以爲官兵易與耳茲者大兵四集即烏江平越二哨不下六萬餘人臣等猶以爲薄也在平越令合興黃之師共擣白泥以及肆牌故兵勢稍厚賊遂不支三國既拔肆牌可復在烏江新調泗城之兵結營河渡以防夜襲雖功不甚多亦足少爲諸路之倡而寒逆賊之膽矣是役也總鎮監軍各道叅遊親行營壘漢土官兵併力用命同知徐廷綬知州李珏陳聖佐惺壽居多土知州岑紹勳土同知蒙詔土舍莫勞楊治



隆先登足尚其功均有不可泯者臣等不敢不以 上聞  
伏乞 勅下兵部待播平之日總爲覆議施行謹題請  
旨

查叅烏江河渡失事將官疏

謹 題爲烏江河渡二關連克不守謹查叅失事將官以  
重軍機事本年三月十六日據左監軍按察使楊寅秋稟  
報三月十五日戌時據河渡統兵都司張秉忠報本月十  
四日夜因擒播姦細搜出公文已知賊來衝營預令部兵  
加謹慎防并一面請兵應援去後十五日未時播賊數萬  
突然而來雲南官軍先殺一二陣敗走過河泗城官兵初

尚劄住以俟交鋒後虞糧餉積在老寨尤恐有失遂即收  
兵回守糧餉并分兵把截渡口因而損失士兵三百餘名  
等因馳報到司除會同總鎮星催鎮雄隴兵策應催水西  
安兵邀賊歸路一面直搗巢穴牽賊內顧及督泗城滇兵  
劄營外等因呈報到臣隨行各將官督兵加意隄防劄營  
去後十九日據統兵雲南中軍張澍稟報十五日賊兵數  
萬滇兵沅江寧州羅平迎敵以象先衝摧其先鋒賊遁走  
斬馘詎料無援兵象奮不顧身淹溺督陣官何天慶名色  
把總耳靖方朝宗楊王王彥緯哨長許應元奮勇衝鋒各  
手砍逆賊數人中槍而死餘各陣亡衆寡不敵領兵指揮



胡珠等冒陣而出損傷官兵千餘收回餘卒劄守老營等因本月二十日又准總兵童元鎮手本移稱本月十七日寅時據總領求靖哨原任參將楊顯稟十六日午時求順兵出哨至雅水遇兵稱係安兵相約會哨各有旗幟把目質當意在十八日起營等情本鎮正疑慮間隨准左監軍面會此必賊詭謀假冒號頭亟傳令諭適據霸陽守備陳雲龍報探得播賊馬步兵不計其數前來衝突即同左監軍飛騎臨河親督各哨抵敵連對三陣至第四陣賊勢益衆所執旗號即先日會哨質當旗幟求順中哨驚亂麾令督陣等官拔刀不能禁止霸陽兵等相繼奔渡浮橋當有

一人走過砍斷橋纜隊兵俱各浮水不能水者淹沒無數原任參將楊顯守備陳雲龍白明達阮仕奇等俱陣亡及該本鎮召集各兵另行相機進剿擬合馳報等因又據左監軍按察使楊寅秋報同前事據此案照二月十二日據左監軍按察使楊寅秋呈本月十一日巳時據守備陳雲龍白明達阮仕奇求順宣慰使彭元錦目把彭永賢等各飛報本日辰時該雲龍督率霸陽兵明達阮仕奇永賢等督率求順兵奮勇爭先搶渡烏江關賊衆乘高崖坎拒敵弩石俱發急難傍岸官兵用竹牌遮蔽船上崖邊烏銃對打求順霸陽兵先登各賊破山奔潰官兵直衝烏江關縱火



登時焚燒附近關邊賊寨燒掃一空煙蔽十里陳雲龍部  
斬賊級十顆永順彭永賢王道等部斬賊級九顆餘賊奔  
逸官兵奮追十里不敢深入十三日據左監軍楊寅秋呈  
報本月十二日午時據河渡統兵遊擊謝崇爵雲南中軍  
張澍守備沐榮贊書黃龔飛報本日卯時發兵奮勇渡江  
各賊約千餘拒敵官兵銃弩俱發併力先登奪占河渡險  
關燒蕩各寨當陣生擒賊五名斬賊級二十二顆又頂皮  
功二顆餘賊四逸奔潰連日各官兵攻打鬼囤等處擒斬  
賊一百三十一名顆連烏江河渡共擒斬一百八十名顆  
各等因到臣臣惟烏江河渡二關原稱天險賞格開載能  
先登烏江者陞三級賞銀千兩官兵二日連破二關不可  
謂非矢力先登但斬獲頗少臣不敢專題自二關既破  
爲各路倡破竹之勢可以直搗不謂烏江距橋止六十里  
接足即係害地而各路兵未能一一即至逆賊得以全力  
獨衝我兵以故十五十七二日我兵失利陣亡將士損傷  
官兵除臣查實另報外該臣看得總兵童元鎮始以觀望  
道途逗遛銅仁不入貴陽失在懦弱今以奮勇破關不能  
禦賊爲賊所破失在輕率顧破關之功竟成畫餅而戰敗  
之罪遂至塗地原奉部議童元鎮充爲事官管事如尚在  
觀望即以聽用總兵李應祥補之今累敗之後心志俱灰



號令不行此一臣者當即行罷斥代以李應祥者也遊擊謝崇爵本以承乏而起假爲鄉導之帥茲以望風而遁難逃失律之罪都司僉事張秉忠管理泗城兵而賊至即退中軍張澍督率雲南兵而一戰輒北此三臣者內謝崇爵力窮計阻亟應罷革另換張秉忠張澍宜重加罰治姑令戴罪立功者也監軍按察使楊寅秋到任僅三月餘指據不辭平羊腸距賊不二百里踪跡親踏於虎穴即近日兩關之克皆其鼓舞之力而水西搗巢之舉又其指蹤之謀諸將雖云失利本官亦與有責此一臣者所當量罰或嚴行策勵以責後効者也至於臣子章本以書生未諳軍旅連破險關未能固守義當首罷以謝三軍除臣席棗待罪外伏乞 皇上勅下吏兵二部將童元鎮等分別議處將臣急行罷斥庶幾軍政一新強寇可滅矣謹題請 旨

再奏捷疏

謹 題爲漢土官兵奮勇連克險關俘醜斬級乘虛進搗賊巢事本年三月十二日據左監軍按察使楊寅秋呈本月十一日巳時據守備陳雲龍等永順宣慰使彭元錦目把彭宗卿彭永賢等各飛報奉監軍總鎮親臨烏江分布哨渡整備船隻銃彈火器定限十一日齊力渡江進剿賊兵千餘四山伏草出沒沿江發犬叫話猖狂本日辰時該



雲龍督率壩陽兵宗卿永賢等督率永順兵奮勇爭先搶渡關嶺險絕水勢洶惡賊衆乘高崖坎拒敵弩石俱發急難傍岸官兵用竹牌遮蔽船上崖邊烏銃對打永順壩陽兵先登各賊破山奔潰官兵直衝烏江關縱火登時焚燒附近關邊賊寨燒掃一空煙蔽十里陳雲龍部斬賊級十顆永順彭永賢等部斬賊級九顆永順兵陣亡一名被傷五名壩陽兵陣亡苗兵千總一名被傷四名餘賊奔逸官兵奮追十里不敢深入十三日據左監軍楊寅秋呈報本月十二日午時據河渡統兵游擊謝崇爵雲南中軍張澍守備沐黎替畫黃龍飛報本日寅時奉監軍手令總鎮飛

傳大兵奪烏江關劄營關上河渡各哨即便渡江攻打河渡關以分賊勢本日卯時發兵奮勇渡江各賊約千餘拒敵官兵銃弩俱發併力先登奪占險關燒蕩各寨當陣生擒播賊五名斬獲賊級二十三顆又頂皮功二顆餘賊四逸奔潰又據永順舍把彭宗卿王有富尚禎於十二日寅時督兵出哨至鬼囤白羊壩遇賊百餘設伏彭志孝等斬獲賊級三顆獲婦女二口孩子一名彭牯牛等斬獲賊級三顆獲婦女一口各賊奔散巢穴盡焚又據標下游擊將軍張秉忠呈報十二日卯時同泗城州土知州岑紹勳男岑雲漢指揮李懋標督兵前至磁竹渡火箭烏銃齊發自



辰至申尚稽一路賊寨營房盡行燒燬賊奔遁後山止斬獲賊級一顆紹勳隨即督勇雲漢尾追申時至鬼囤奮力攻打復拔鬼囤斬獲賊首余有忠首級一顆從賊四十五顆生擒賊四名各賊奔竄續據遊擊張秉忠移報泗城土兵又於盧家水及白羊囤與賊血戰二起共斬賊級六十顆生擒一十三名通計前後共擒斬一百八十名顆各緣由飛報到臣又准貴州總兵今充爲事官童元鎮手本又據貴寧餉道左叅議梅國樓紀驗委官雲南廣南府知府黃宇各報相同十五日據遊擊張秉忠中軍張澍報稱本日播賊數萬衝突河渡關雲南兵與戰不利折兵千餘

泗城兵渡河泮死三百餘人十七日據左監軍楊當秋報稱播賊復衝烏江關壩陽永順兵失利泮死無數隨該本司會同總鎮急催水西鎮雄兵前來採援邀賊歸路或徑搗賊寨牽賊內顧以解二關之危等因續據宣慰安疆臣報據督兵目把陳恩張峴等稟報十八日奉楊監軍令今楊應龍父子敵散河渡烏江官兵責令恩等議撥以白標得蘇魏良海等督兵一枝徑往地名青塘水等路堵截應龍歸路去後陸續報稱正遇賊兵回歸在於青塘水截殺一陣各目兵奮勇殺死偽內官一人賊頭酋兵共一百二十餘人鞍馬五副槍弩劊刀綿甲腦包共八十五件檳榔



一搭連生擒張受吳受老彭老青等一十九人餘賊萬衆  
倚營在險各目兵不敢搜山今將生擒張受等隨審各稱  
係同楊應龍前去河邊趕殺官兵就要過河聞得水西大  
兵已到內地慌忙轉回撞遇各兵衝殺被擒等情將所獲  
器械給兵收領其各賊級候獲元兇之日方割另解生擒  
賊兵十九名呈解本司轉解畢節道外等因稟報到司合  
行轉報本日又據右監軍右叅議張存意帶管都清兵道  
副使尤錫類糧道左叅政郭廷良新鎮守道右叅議張文  
奇呈准總兵李應祥手本據副總兵陳寅報稱奉令統率  
土官蒙詔舍把莫勞守備汪如淵等漢土官兵於三月初

七日三鼓出營往肆牌高圍攻剿約賊千餘下圍拒敵突  
戰官兵用火器衝擊斬獲賊級一百零五顆重傷馬兵阿  
顧等十二名輕傷兵朱旺等八名陣亡兵阿舉等九名奪  
獲賊仗六十一件俘獲賊屬十三名口餘賊奔走回圍該  
標下坐營原任守備柳國柱中軍張奇盛督率把總吳文  
秀李師沉等部兵帶火箭烏銃從後偷上銃炮震天本鎮  
督把總華統宋世臣朱運昌張翀等策應前路嚴督陳寅  
部兵併力前後夾攻賊力不支官兵奮勇斬獲賊級二十  
七顆當令撫民黎烈認係向平龍向老五苗頭曾殺潘經  
歷首惡其餘跌墜崖箐不能找級者不計俘獲男女八名



口奪獲器仗二十一件輕傷兵的二等四名重傷兵老文等五名又據領兵爲事官蔡兆吉奉令統領把總猶鶴戎茂才土舍楊治隆土指揮張元虎把總楊通霑安宇等部兵同督陣官馮化把總汪世才等前剿龍水囤賊紛來截殺官兵奮勇抵敵賊奔走上囤跟追接戰四陣隨有守備伍萬鍾率領土官楊燧把總呂守現葉逢春等從小路攀崖上舉放銃炮前後攻圍賊力不支蔡兆吉部斬賊級十六顆伍萬鍾部斬賊級十四顆連前通共斬賊首級一百六十二顆生擒賊三名俘獲賊屬二十一名口器仗八十三件共重傷兵十七名輕傷兵十二名陣亡兵九名迄今

官兵屯劄疆界河其河內肆牌賊首謝朝俸等巢穴及盤據有名險固俱已攻破剿滅合就移報到道准此合行轉報等因到臣又准總兵李應祥手本移報相同同日又據左監軍楊宙秋副使洪澄源叅將朱鶴齡呈據宣尉使安疆臣呈報沙溪營目把陳恩張崑李輔同罵色丁良茂沙卒等於十三日寅時督率各兵分路進取播賊苗頭王阿賽督苗把守新關阿秋阿二得等奮勇登濠上關發弩射死五十七人射傷四十三人隨放火箭前燒關賊逃深箐我軍破柵平塹決堤取間道破傳頭石壁一帶關隘又頭目阿五等打破大紅關及兩路口一帶坑塹射退苗賊阿架



等殺死三十四人餘賊俱逃頭目柯阿箇等克破胡石口各關攻破黑水關射殺守關仲賊李從正等四十三人我兵衝傷六名俱同阿秋阿五等於本日申時齊到水坎五里臺山口屯劄等因准總兵童元鎮手本移報相同十八日又據左監軍楊寅秋副使洪澄源叅將朱鶴齡呈據水西大營領兵目把陳恩等飛報於十五日巳時攻破板山圍射殺賊兵一百三十人苗頭十二名本道義民官李武帶兵併力進圍斬苗頭阿王一名苗賊阿二阿右二名俘獲賊兵二名楊冬受鍾宣餘賊奔箐各自登圍傳諭招撫在圍民戶老幼婦女六百房計一千四百三十五名口隨

近聚住待事定安挿原業同日又據鎮雄府土知府隴澄揭報十三日本府督把事王嘉猷領兵由李稍塘進攻播賊迎敵我兵奮勇殺死賊十七名於十四日攻苦竹關殺死苗賊二十五名追至平頂關復戰斬首二十名各賊奔走關我兵自午至酉殺死賊頭二名餘賊三十二名十九日據右監軍張存意呈准總兵李應祥手本移稱據為事官蔡兆吉報於十二日官兵抵青岡圍叛賊出敵領兵把總猶鶴等奮勇陣斬賊級三十七顆賊敗回圍據險至十三日黎明官兵克圍斬賊級通共二百二十三顆生擒謝王保等二十六名俘獲賊屬男女七十八名口奪獲器



仗二百三十一件奪獲被擄男女六名口同日據湖廣辰  
沅道副使王應霖左監軍胡桂芳右監軍魏養蒙呈准備  
橋總兵陳璘手本稱二月二十七日督兵攻打龍溪山斬  
獲賊級九十一顆餘賊遁入肆牌保兒圍被傷哨官一員  
官兵三名奪獲賊仗二十七件次早發兵追賊至袁家渡  
各賊對敵不過我兵斬獲賊級一百二十二顆生擒找級  
二顆俘獲賊屬男婦八十四名口沙水牛一百零一頭賊  
仗六十四件官兵陣亡四名被傷二十七名十九日據湖  
廣左右監軍胡桂芳魏養蒙副使王應霖呈准總兵陳璘  
手本移稱二月初六日督兵於乾溪埕與賊接戰數日互

有損傷各兵奮勇衝鋒兼用火器賊敗當陣斬獲賊級五  
十九顆奪獲賊仗十件沙水牛三十二頭俘獲賊屬二十  
二名口陣亡兵一名被傷兵七名餘賊逃竄本月二十三  
日據左監軍楊寅秋副使洪澄源參將朱鶴齡呈據鎮雄  
府報本府兵十六日自刀靶水移營至雷打舖陡被賊兵  
數千截路迎敵前哨各兵奮勇衝逐殺死三百四十七名  
各賊敗退徑追過新站倒戈投降二百五十三名就於本  
站屯劄至戌時賊復衝營我兵出殺死苗頭阿曲等五名  
餘賊一百二十九名擒獲苗賊阿易吐稱應龍知道鎮雄  
兵至新站隔州不遠已將兵二萬在大水田埋藏接路先



呼我苗兵五千來衝營是實當將本賊斬訖就經與漢把  
王嘉猷較議明揚往大水田搗巢暗督兵由野里坎陳世  
田小路破大夫關徑抵馬坎截其後路去訖除將斬獲苗  
頭首級五顆解赴監紀官驗明轉報二十四日據宣慰安  
疆臣報據督兵目把陳恩張焜李輔等報稱十九日夜四  
鼓賊兵前來劫營我兵奮勇射殺賊兵數多生擒彭四等  
六名得獲槍弩綿甲腦包共十五件我兵亦多中傷同日  
據左監軍楊寅秋副使洪澄源叅將朱鶴齡呈據宣慰安  
疆臣飛報十九日辰時據本司目把柯阿個阿五陳恩等  
揭報各目兵蒙主官母子差親信目把阿石齋執諭帖到

營諭稱本衙非眼疾當親督進取見蒙部院軍門按院左  
監軍各司道諭檄爾等已破三關當乘勝搗巢擒斬元兇  
奉此即會各目同兩省督陣官於十六日寅時分兵三哨  
進攻至揚亡水遇偽提調楊廷章劉惠領賊兵由兩小路  
抄出衝擊我兵大殺一陣頭目阿戶部斬賊一百五十三  
人頭目以箇等部斬賊六十七人苗頭五人雲南武定府  
頭目李保親斬苗頭一人部斬苗兵五人餘賊逃菁我兵  
中傷二十三人隨即督兵盡渡揚亡水當日申時兵目俱  
抵浪頭壩離落濠水大關二里劄營又獲細作阿敗報稱  
楊劉二賊奔回落濠收殘賊拒守報州起大兵接應本夜



要來偷營除嚴諭各營目兵加謹防範合先宣報據此看得五關連破諸隘已平嚴示各目遵照部院憲檄務於本月二十日直搗州城白田壩不許違悞同日據左監軍楊寅秋副使洪澄源叅將朱鶴齡報據宣慰安疆臣報稱本月二十日午時據沙溪路督兵目把柯阿箇阿五陳恩張崑李輔等報稱本司大兵於本月十六日戰勝楊亡水進割浪頭壩隨奉發牛犒賞聚眾議得落濠水雄鎮前跨深溪後倚大菁楊應龍設立深溝險塹三層鹿角柵柵環築重牆當發兵一枝由上落濠水抄出樵村一枝由下流出金鼓塘伏下大兵從正路直攻關前舉炮彼此夾攻方可

取勝各目應允回營至夜賊兵劫沙卒營本日傳令兵士伏硬弩於柵柵下等候賊兵近營眾弩齊發射死賊兵六人餘賊仍回落濠關去訖彼該頭目柯阿箇領兵由上落濠出張村沙岡頭目那拱等同督兵官領兵出蓋山池平壩偷渡抄出關後三哨各放炮盡發賊兵棄關奔走當本枝目兵追趕殺賊三十五人千戶王三錫親斬苗賊一名百戶李大業親斬苗賊一名姚可興親斬苗賊一名餘由小路回州訖當令前鋒將第一重關門破毀將溪水修搭浮橋我兵盡渡於樵村三哨會合至八里水大水田割營發兵一枝攻燒桃溪衙後山母氏圍發兵一枝出毛蓋山



大夫霸與鎮雄兵會哨約期分路進攻外看得楊酋恃關  
壘障倔强負固今照落濠關為播咽喉險倍各隘賊失落  
濠是失播矣今本關已破元兇寒心授首可卜也復視其  
大水田庄宅制度臺沼亭榭僭越非常不惟雕刻綵飾龍  
鳳等物即卧床一樣黃色牙床三十六張欺僭可知等因  
同日又據右監軍張存意副使尤錫類左叅政郭廷良右  
叅議張文奇呈准總兵李應祥手本移報三月二十一日  
據副總兵陳寅報稱土舍楊治隆中軍孫仲謨等南丹平  
州土兵於夜半由構皮灘渡河伏於山後本職親領把總  
家丁陳定等獨山州兵於袁家渡過河用火器打開分兵  
齊進當陣斬獲賊級四十六顆同時本鎮親督領兵官商  
民瞻等官兵在於水旋渡架放火器齊進當陣斬獲賊級  
一百一十一顆隨據保靖宣慰彭養正凱里土官楊燧守  
備伍萬鍾汪如淵各報督兵於是日五鼓在江界河與賊  
對敵至辰巳時分諸兵奮勇登岸當陣斬賊級三十一顆  
又據爲事官蔡兆吉報稱是日領兵把總猶鶴等領兵由  
吳歪渡過河由孫家渡找搭牌筏渡河敵殺賊衆披靡退  
走上山當陣斬獲賊級四十一顆各該官兵一面攻殺一  
面搭橋抵夜該本鎮傳令各哨官兵就於賊岸劄營兩岸  
屯劄首尾救應防賊乘勞衝劫務求萬全通共斬獲賊級



二百二十九顆俘獲賊屬一百二十三名奪獲賊仗九十  
二件諸葛銅鼓二面奪獲被擄男婦一十七名口輕傷兵  
三十四名重傷兵五十一名陣亡領兵哨官劉廷宗兵馬  
長子等一十七名各等因飛報到臣節准總兵今充爲事  
官童元鎮總兵李應祥手本各移報相同除批行黔楚監  
軍各道行紀驗官查驗功級明的給賞損傷陣亡官兵候  
覆覈議恤奪獲賊屬牲畜變價充餉投降人民隨地安插  
外該臣謹會同總督川湖貴州軍務兼理糧餉巡撫四川  
地方兵部右侍郎兼都察院右僉都御史李化龍看得狡  
首竊伏草澤長江爲界頻年狂逞漸侵內地疆界河之東

僞提調謝朝俸營而穴之刈雜爲難迺茲半月擒斬絡繹  
旋水之捷已足清肆牌之涂高困之勝又足洩飛練之憤  
則總兵李應祥右監軍張存意副使尤錫類之功也合掃  
肆牌勢既成於破竹接戰乾溪勲立睹於折箠則總兵陳  
璘左右監軍胡桂芳魏養蒙副使王應霖之功也若乃烏  
江河渡二關上插雲霄下瞰江渚苦竹大紅落濠等七關  
削壁斗絕垂藤蔓延逆賊倚爲天險兇徒馮爲高墉仰攻  
方且難於斬關深入豈遂易於搗巢左監軍楊寅秋副使  
洪澄源躬授方略於虎穴總兵童元鎮參將朱鶴齡親冒  
矢石於鳥道九關連克諸險盡夷亦足稱長驅先登矣所



恨烏江河渡既克不守官兵損折數多臣另有疏 題參  
然二關不克賊不出巢併力衝突水西鎮雄之兵安得乘  
虛突入直抵桃溪衝攻彼母氏因則諸將失利之罪誠無  
所逃而拔關之功臣不敢泯若左監軍楊寅秋轉敗爲功  
尤極苦心焦畫者也宣慰使安疆臣鎮雄府土知府隴澄  
督率貔貅之衆蹂踐豺虎之境克七關而不以克關爲奇  
斬千級而不以割級爲功誠能永堅初心毋懷二念則先  
登除兇之功誰能掩之而又誰能以臆見排妬之第元兇  
未縛全局未收所當責成畢力殲狡酋而後朝食以膺懋  
賞者也目今將士用命之秋臣不一爲具 題不足以作  
敵愾而揚先聲伏乞 勅下兵部待播平之後總爲查明  
覆議施行謹題請 旨

請免三司入 賀疏

謹 題爲慶 賀事據貴州布按都三司會議呈稱萬曆

二十八年八月十七日恭遇 萬壽聖節例該各司堂官

各一員預期齎捧 表文赴 京慶 賀今查布政司左

布政使應存卓見掌司印督糧道左參政郭廷良督理通

省軍前糧餉分守貴寧道左參議梅國樓督餉烏江分守

新鎮道右參議張文奇督餉平越分守思仁道按察司副

使兼右參議陳與相督餉龍泉按察司按察使易登瀛見



掌司印驛傳道副使尤錫類帶管都清兵巡道督兵平越  
畢節兵道副使洪澄源督兵沙溪思石兵道副使路雲龍  
督兵思石提學僉事徐來儀見在巡歷考校威清都清二  
道副使袁應文王邦俊俱未到任都司掌印署都指揮僉  
事王納忠督兵守城操捕署都指揮僉事張秉忠烏江督  
兵見今寇在門庭尚未騷除見任各官俱有掌印督兵理  
餉守城之責似難離任及查嘉靖四十年四十二年隆慶  
元年二年五年萬曆十七年二十三年因缺堂官詳委首  
領經歷知事照磨趙謨孫江劉沛黃誥黃文獻葉奕光舟  
峴等齋捧代 進今布政司經歷江師周按察司經歷范

應陽都司經歷劉苗各在任堪以委代等因到臣卷查先  
准禮部咨內開齋 進慶 賀 表文如遇二司缺官或  
地方用兵差占許改差首領等官前來行禮巡撫巡按官  
先期 奏行禮部查考等因備行遵照訖萬曆八年九月  
內准吏部咨該本部題奉 聖旨今後二司官凡奉勅整  
飭兵備有地方責任的不許夤緣進表規避誤事者該科  
查叅處治欽此欽遵等因備咨前來案行各該司遵照去  
後今據前因該臣會同巡按貴州監察御史宋興祖議照  
海內諸臣恭遇 萬壽聖節莫不踴躍奔走願赴祝 慶  
之期但貴州地方正值播賊狂逞奉 旨征剿集兵十萬



三司各官掌印守城理餉督兵無頃刻空况龍泉永寧二  
哨猶借川湖司道督兵者四郊多事委難離任謹遵地方  
用兵差占許改差首領等官事例行委三司經歷江師周  
范應陽劉苗各恭行齎捧 表文赴 京慶 賀外謹題  
請 旨

二奏捷疏

謹 題爲仰仗 天威士兵併力血戰大破賊兵恭報大  
捷事萬曆二十八年四月初三日據左監軍楊寅秋呈據  
烏江哨領兵官鎮雄府土知府龍澄飛報三月十三日鎮  
雄兵過李稍塘連破苦竹等關直抵賊巢大水田屯劄與

水西兵合至二十九日逆酋楊應龍父子因恨鎮雄斬其  
來使首其醜儀遂親領賊七萬分作五路由馬坎羅會水  
落潮等路前來迎敵該水西目把王嘉猷陳恩柯阿箇阿  
五等預爲準備當即分兵七路夾衝策應自本日卯時至  
申時鏖戰該隴澄親督兵略陣衝殺賊兵大敗殺賊首提  
調把總頭目五十餘人內有偽內官五人斬應龍弟肆子  
楊惟棟殺賊萬餘不可勝數屍盈崖谷血漲溝渠我兵損  
折百餘中傷二百餘名我兵乘勢直搗破播州城桃溪  
衝等處去訖賊已喪膽餘兵大半潰入海龍國惟候四路  
兵至十面攻圍擒斬渠魁實在目下請乞嚴行各路官兵



乘機竝進給餉接濟以收萬全等因本日又據左監軍楊  
寅秋畢節道副使洪澄源叅將朱鶴齡呈據貴州宣慰使  
司領兵官安疆臣報稱本司大兵自入播後破關擒斬捷  
音案經不次呈報外職因患目喪女先經封刀一把功簿  
一扇付親信目把阿實者怯臨營督率去後復思師久變  
生力疾馳驅於四月初一日至上庄隔播一江搭架浮橋  
直抵播地安營間據督兵目把柯阿箇阿五王嘉猷陳恩  
張崐李輔箇仲等稟報我兵自劄大水田連日陰雨至三  
月二十八日略晴稟鎮雄府隴知府會議進攻間二十九  
日兇賊楊應龍父子大起苗兵七萬親督分作五路由馬  
坎羅會水落潮高下前來母氏圍前批戰家隴知府會集  
我司目把等分兵七路前去夾攻自本日卯時殺到申時  
見賊不退衆目賈勇兵卒愈奮殺死當先賊首提調把總  
五十餘人內有偽內官五人各路共殺賊兵萬餘屍橫遍  
野前五十人內有一人全身綃段金銀器械查係賊子惟  
棟待查的又報外比就欲乘敗追趕賊衆已奔上母氏圍  
由小路潰散天晚收兵歸營飛報到職據此看得卑司目  
兵自入敵境擒斬雖多尚係把關守圍賊黨此番應龍父  
子親率大兵分哨迎敵我兵會同鎮雄兵大敗賊衆偽內  
府把總俱賊心脅駢首就戮惟應龍抱頭鼠竄非仗天



威震懾何能至此請乞速發糧餉協濟嚴催各路兵馬刻期竝進不勝延頸佇望等因初四日又據左監軍楊寅秋呈據安順州土司溫希舜飛報稱卑職同水西把事王嘉猷隨隴知府屯劄大水田二月二十九日賊衆數萬前來衝營我兵奮勇大戰殺賊萬級斬獲賊首六名生擒一名何老係賊把總黃茂松部下馬兵合行呈解又據養龍權司蔡應朝報同前事二十九日辰時被楊酋父子統大兵偷破大營自辰至未殺賊萬餘應朝斬獲七顆等情各報到司該本司審得何老供係播州民充黃茂松馬兵十五日隨應龍攻河渡烏江十七日聞鎮雄兵衝出新站慌

忙奔回龍崖圍商同各僞提調稱水西馬兵難抵不要與他戰只要求他回軍因水西兵只見添不見減辦送下程等物講和被安三將差人斬訖又探得頭營內有七姓逃民在內應龍忿怒發軍先衝頭營放火安兵驚覺將放火人殺死楊家大兵隨進兩家自辰時大戰因柯官兒兵狼至未時楊兵奔潰安家馬兵包趕只見殺死不計其數填滿崖孔應龍第四子約年二十五歲殺死是的鞍馬銀刀俱被水西得了水西兵亦損傷等情初五日又據左監軍楊寅秋呈據宣慰安疆臣報稱四月初一日據督兵目把柯阿箇等飛報三月二十九日大破播賊緣由立刻飛報



間所據賊首姓名俘獲及我兵被傷數目倉忙查據未的  
不敢妄開初二日丑時據柯阿箇陳恩李輔王嘉猷等稱  
箇等殺敗楊酋天色昏晚兵士勞倦各歸營房三十日將  
生擒賊犯審問據稱應龍自見我兵進大水田後只是拒  
險固守不戰要與水西講和退軍因水西兵日見增添鎮  
雄殺他送禮差人又恐官兵齊進難抵遂於二十九日放  
兵衝抵內被殺騎大馬銀鞍的係應龍第四子楊惟棟被  
殺偽內府五人係喜受觀受劉元長受六受偽提調把總  
係朱洪楊廷柯梁天四高良顏義苗頭係朝貴老大羅三  
等其餘屍骸填溝堆箐漫山寨野遍認未週查點我兵二

處損折二百餘名重傷三百餘名輕傷五百餘名內柯阿  
箇二男普鬪魁痴各被箭傷奪獲大馬一匹銀鍍鞍一副  
金銀鍍刀一把戰馬八十餘匹鋒利副刀槍弩千餘件綿  
被腦包血污丟地不計其數探得賊破敗後退長江水屯  
劄我軍就欲追殺柰馬坎高了一帶賊將大樹砍架成樓  
堵塞又且箐深路險溪水未消難以輕動隨差漢把吳昇  
通事鄭子周帶領驍卒連夜由小路截入桃溪新庄後庄  
清水塘一帶房屋縱火焚燒使賊驚疑內顧賊見各處火  
起煙焰蔽天由長江水撤回州因屯劄去訖今見在整兵  
勢欲死鬪稟乞早賜轉達速催各路夾剿催糧救命等情



到職看得目把前報殺死賊首全身金銀器械者的係楊應龍第四子楊惟棟其偽內府僞提調俱各真的無偽今日兵有進無退請乞軫念臨湯赴火發兵發餉刻期接濟等情先後各報到臣又據總兵充爲事官童元鎮手本移報相同案照本年四月初二日據左監軍楊寅秋呈據沙溪水西營督兵目把陳恩等稟報本司兵劄大水田母氏圍下三月二十四日雨霽霧開探得賊兵埋伏近營長箐欲來衝劫西邊營壘議得若不梭緝恐我兵進州躡後不便於本日本司發兵一營會同鎮雄一營圍箐梭剿賊兵拒險伏射將鎮雄督兵冠帶把總陳啟禮射殺隨軍亦傷折多命衆兵奮勇攻進殺賊五十餘名賊兵奔入大箐天復大雨難以涉渡窮梭暫撤回營其所斬獲苗頭首級已該府解報除一面隨後會議進剿等因飛報到司看係賊兵據險設伏射殺把總我兵奮勇追殺斬獲多賊事理理合揭報初三日又據左監軍楊寅秋呈據鎮雄府揭稱三月二十六日據無知頭目引播差二人齎書儀并騾二匹赴營投見當拆來書驗係楊應龍妻田氏餽送下程禮單該本府看得楊應龍父子罪逆滔天大肆兇殘本府奉命征討誓在搗巢擒斬以謝天人焉敢私受汚名以渝臣節除將引進頭目細打四十將來使二人斬於營門懸



示并傳諭大小三軍同心戮力共擒兇殘外今將餽送騾子二匹金盞銀臺一副折程儀二十兩著段二端并原禮單差人齎上乞賜驗明貯庫以白此心仍乞通知諸路將領各攄忠赤進剿等因又據本府札差罵色游孟柯余國榮等押解生擒賊犯二名一併呈解到司審據二犯供名羅才羅慶播州大夫壩住從海龍困下來有管勾差他探聽水西營兵若干被鎮雄府探兵拏獲有應龍差小童吳比金萬富等三人前來鎮雄府送下程禮物當將吳比二人梟斬是實等情供報在官該本司審看得鎮雄府知府隴澄樹功念切滅賊氣雄狡酋百計彌縫寧使隴兵長驅直搗進落濠關進大水田距州僅拾餘里終不以一矢相加遺顯托狐兔之意輿連韓魏之交不謂犯總陳啓禮被射於長箐私計隴澄必激怒於戲下假謝過以致餽將嘗探而行成向非隴澄之激壯幾墮狡酋之姦詭立斬來差以殉盡沒來餽首解斷悠悠之情賈桓桓之勇不三日而有母氏困之捷本官向來未白心事亦足釋然於衆口矣多方詢訪僉同生擒口供允確所據呈解折程金杯銀盤衣段騾匹等件理合同生擒賊犯一併解詳到臣臣除將騾匹發軍前用金銀杯盤衣段等物發貴陽府貯庫外今據前因該臣會同總督川湖貴州軍務兼理糧餉巡撫四



川地方兵部右侍郎兼都察院右僉都御史李化龍看得  
逆酋楊應龍本以羸角之羊敢同負隅之虎連年東衝西  
突自謂峻關長江之險官兵即雲屯電驅安得一日遽從  
天下所狼顧者安氏近聯畛域其氣力其兵馬器械其漢  
目把之機警言蹶張皆足屈其力而制其命則有幣厚言甘  
納交要盟庶幾安氏之顧狐兔而興思耳先是河渡失守  
左監軍立檄隴澄力能救則躡踪邀賊歸路不能則乘虛  
直搗賊巢隴澄立報救河渡必三日抵播境只二日與其  
攻外而遠不若攻內而近遂拔營以行左監軍以揭報臣  
臣心壯之豎子乃亦有直走大梁意乎而猶未之信也越  
數日而有大水田之報合女疆臣兵破落濠關攻母氏圍  
截賊於清潭水馳報到臣臣復竒之豎子乃亦有馳入趙  
壁意乎臣爲具題作彼兄弟敵愾而猶未敢必也越數  
日而又有今日之捷焚彼免窟積彼承牙殲彼梟巢若僞  
提調僞內府把總苗頭據報不下五十餘人報斬級漫山  
堆箐以萬計馘其子奪獲金銀鞍劍則生擒何老之口具  
能言之又據報桃溪衙新庄後庄盡爲煨燼煙火彌天雖  
渠魁尚未就縛而羣兇早當落膽自有事播無此捷矣臣  
一面會同按臣委官勘覈更催安疆臣隴澄獎率各軍奮  
勇滅賊催督各路竝進給發糧餉接濟外是役也監軍按



察使楊寅秋副使洪澄源運籌帷中指掌而譚擒縱總兵  
童元鎮叅將朱鶴齡宣力閩外悉心而効馳驅內楊寅秋  
之操弄殫竭心力洪澄源朱鶴齡之羈縻備嘗荼苦功當  
首敘童元鎮蹶且益奮所當以功贖罪者也宣慰安疆臣  
餐風沐雨雖眚一目而神彌王揮戈環甲即殞一女而家  
不顧長驅貔貅之旅士飽馬騰席捲狐兔之羣禽獮草薶  
是母是子誰云一篋謗書難弟難兄無復三至市虎鎮雄  
知府隴澄以十七歲將家之子負一寸丹赤子之心必欲  
立功報 朝廷誓不以賊遺 君父振臂而士皆用命一  
呼而功收先登至首賊賄於公帑香餌不關其念兼斬來  
使於營邸舊暱寧皇其衷洗刷可杜青蠅激壯足張赤膽  
查得賞格內有能奮勇先登破播州城者陞五級予三千  
金破海龍圍者陞七級予五千金擒楊應龍者照增定陞  
賞予萬金此亦疆臣隴澄畢力之秋矣伏乞 皇上勅下  
兵部將楊寅秋等分別紀錄寇平優敘童元鎮俯從議贖  
更乞 天語叮嚀安疆臣隴澄乘此破竹一舉犁庭速殄  
兇殘以慰神人則西南之綏戢可期而安攘之 奏凱不  
日矣謹題請 旨



續衣生黔草卷之四

奏疏

四奏捷疏

謹題為東路官兵奮勇奪關斬獲功級并招撫降民以  
廣皇仁事萬曆二十八年三月二十八日據貴州右監  
軍道右參議張存意思仁道副使兼右參議陳與相思石  
道副使路雲龍湖廣辰沅道副使王應霖左監軍胡桂芳  
右監軍魏養蒙呈准總兵陳璘手本據參將王一桂報二



木和郭子章相奎甫著  
友人楊廣秋義叔甫校



NATIONAL CENTRAL LIBRARY, TAIWAN, R.O.C.



月十四日親督漢土兵攻打關崖國逆酋楊應龍偽統制朱敬袁守剛等統苗數千迎敵我兵奮勇血戰一十五陣斬獲首級八十五顆十五日指揮唐一麒施州宣撫司宣撫覃宜督兵乘勝衝奪板角關有播賊萬餘關內突出官兵連殺數陣斬獲首級一百一十六顆賊遂奔潰墜巖跌死者不計其數生擒三名招降夷漢男婦并被擄龍泉等處良民妻女共計五百餘名口其牛馬豬羊甲仗等項俱經賞各兵充犒職劄營關崖國據守板角關十七日密授指揮唐一麒等預於關內採取草木劄立虛營計賊必來焚燒藉爲號火以便伏兵襲擊至十八日巳時探有播賊

馬步苗兵約三萬餘果來前後包截職發兵迎敵復遣奇兵二枝繞出賊後邀截歸路大戰二十餘陣斬級一百七十四顆餘賊望風奔潰丟棄申仗充塞道路我兵未敢深追三戰斬獲功級并生擒及招降俘獲俱解紀功鄧知縣紀驗本日據戴罪守備楊惟中報本月十九日偵探播賊因見官兵攻打板角關分兵一枝出保子國職督同千總周世祿楊茂千戶陳國祚把總李君實陳効忠等帶兵前去攻打斬級二十七顆歸降并被擄去生員歐陽緩妻何氏等男婦共一百零四名口被傷兵二名追至葛藤菁生擒八名餘賊奔潰山箐以上斬獲通共四百餘功合行飛



報等因隨准總兵陳璘手本移報相同同日據湖廣右監軍魏養蒙呈稱本道會同陳總兵多方招諭隨准該鎮移據把總吳應龍張鵬舉軍餘羅再鸞招得羅家興隆二屯軍餘并青沙二關三關石橋各寨苗民羅廷合安壩等男婦共四百四十一名口又鄉導李文龍等招下川苗等屯男婦一千三百四名口把總張鵬舉等招出鈎刀等處苗民六十三名又據戴罪守備楊惟中呈稱招出播民蕭中贊等男婦一十九名口又准副總兵陳良玘移稱陸續招出播民及被脅軍餘盧順趙正芳王世奇周廷學劉廷用胡祿宋正隆劉大魁等男婦共二百四十八名口陸續招撫過苗夷軍餘通共二千零七十五名口俱給票安插合行呈報同日據右監軍張存意副使尤錫勳左叅政郭廷良右叅議張文奇呈准總兵李應祥手本據爲事官蔡兆吉呈報三月二十一日官兵前至船頭攔公冶渡分營渡河到岸進剿有守江巨賊李得祿李坤二等畏威卸甲乘船四隻前來歸順稱願討賊贖罪職審降情是真填給免死印票令土官猶鶴收領安插船四隻修搭浮橋并將李得祿等男婦共六百八十二名口冊報到鎮分發龍里新添二衛各所屯田安置聽守巡道查恤合行轉報二十九日據湖廣副使王應霖左右監軍胡桂芳魏養蒙呈准



總兵陳璘手本報三月十九日鄉導探得楊應龍發銀每人賞二兩督令張祐何漢良謝朝俸等黑老虎軍萬餘見劄七牌野豬山伺兵渡江邀敵該本鎮親督官兵銜枚直趨二十日黎明至苦煉坪將近野豬山隘道遇賊對戰我兵火器齊發賊衆大敗當陣擒斬二百餘各賊倒戈奔命逃入箐三十日據思石守巡二道副使路雲龍陳與相呈准副總兵陳良玘及據理餉同知張羽鴻紀功推官吳天祐石阡府知府江至道委官知縣鄧弘烈節報丁文明等招降播民王正倫等男婦共八百二十六名口量動餉銀分別給賞安插內地同日據右監軍張存意副使尤錫類

左叅政郭廷良右叅議張文奇呈稱三月二十七日據統兵中軍守備伍萬鍾汪如淵宣慰彭養正等呈報於二十二日各職督發漢土官兵過河出哨賊見勢不能支有地里霸國男婦叫稱願降職等當令官兵於各路埋伏以防其詐隨差把總薛應時羅儒前去招撫得男婦九百零六名口牛三十七隻馬二匹槍刀鐮刀二十八把已經渡河另營安置分作數拾起押解各內地零星安插合先呈報同日據左監軍楊宙秋副使洪澄源叅將朱鶴齡呈據宣慰安疆臣呈據沙溪路督兵目把柯阿箇阿五陳恩張崑李輔等報稱本月二十二日黎明時賊由小路抄至後哨



偷劫營寨當得頭目隴騰化納卧東隆軍士阿著等奮勇  
鬪殺生擒陳元楊章余成受何茂等四名斬賊二十名隨  
營義官李武督家兵生擒阿邦蘇朝金二名義官楊澄清  
督家兵生擒苗賊老滿趙真二名餘賊逃竄共獲綿被十  
牀槍五根刀十把我兵亦中傷八名除將所獲器械交與  
大頭目阿五收領其殺死賊屍待獲元兇之日請委併驗  
今將生擒賊犯陳元等八名押解前來轉解到道合行轉  
報四月初一日據右監軍張存意副使陳與相路雲龍王  
應霖呈據原任守備徐允爵把總王世恩呈報三月十四  
日職同陳副總帶領官兵由播地六窖三角苗囤進十七  
日到井壩寺約會指揮胡効忠把總楊昌連奮勇攻占苦  
竹關十九日尅真武囤寨陳光大吳宗輔斬獲首級一顆  
梁茂高時貴斬獲首級一顆二十日攻開總子箐關徑抵  
賊酋內界離彼住宅不過一百餘里又於羅家坪關王嘉  
彥斬獲首級一顆本日午間至關寨下賊棄兵甲乞降者  
一百餘名口當給免死票安置到道合行轉報四月初三  
日據副使王應霖左右監軍胡桂芳魏養蒙呈稱准總兵  
陳璘手本稱三月二十日據永順宣慰彭元錦報稱苦菜  
關屯有賊兵數千本鎮當今遊擊江騰龍陳策都司吳時  
喬守備陳九經等各領部兵與永順官兵於二十一日黎



明協力夾攻至二十二日據宣慰彭元錦報稱遵令督兵會同遊擊等官兵奮勇從已殺至申時賊衆大敗當陣斬獲賊級二百餘顆投崖跌死者無算餘賊往菁遁去陣亡土兵二名殺傷及砲石打傷土兵二十二名又據遊擊江騰龍陳策都司吳時喬守備陳九經等報稱蒙令協同永順官兵攻打苦菜關部斬賊級一百餘顆并奪獲賊仗陣傷官兵除查實另報宣慰彭元錦率衆先登身被數箭幸衣甲頗堅未致重傷等因准此合行轉報四月初五日據右監軍張存意副使尤錫類左叅政郭廷良右叅議張文奇呈准總兵李應祥手本移三月二十九日據守備汪如

淵呈報奉令前去地里壩宣傳恩威遍發白旗招撫叛賊投降李彪等男婦二百二十六名口到鎮合冊移解安插合行冊報初六日據右監軍張存意副使陳與相路雲龍呈據把總葉定遠呈報龍安所等處有賊偽巡警杜童生搬移長坎因與何漢良張雲翹等會合一處尚留勁兵守家職於三月十六日督兵分路攻圍杜童生房屋各賊棄戈出降職恐是偽令先將婦女老幼送出共計招降男婦一百名口查有偽提調張雲翹親信蕭繼祖蕭倬詔等在內稟稱願招雲翹等來降職給賞格降旗就差蕭繼祖等同鄉導陳三傳等去招出黎明恭等男婦二百餘名口歸



降等因到道安插外合行轉報同日據貴州右監軍張存  
意副使陳與相路雲龍呈准總兵陳璘手本據都司錢中  
選呈報三月十五日據指揮蔣崇賢督千總唐顯威等領  
兵進至黃沙園被賊衝敵我兵奮勇唐顯威李佑等就陣  
斬級一十四顆俘獲婦女六口乳孩三口奪獲兇器六件  
十六十八日發兵攻打賊巢指揮蔣崇賢千把總李佑等  
共擒斬賊級三十四名顆投降降脅從男婦二十九名口奪  
回被擄男婦七十一名口俘獲賊屬男婦五名口兇器五  
件又據把截七星關錫落關把總薛瑞鄭國選等部兵斬  
級七顆獲槍弩各一件偽授餘慶司土官毛宗賢呈請

一把各解到職又差官撫出民苗男婦三百六十四名口  
取出偏橋衛屬荆條等屯原被播賊拘阻軍餘男婦四百  
三十名口除將降民分投安置被擄軍民省發歸業訖擒  
斬賊級俘獲人口兇器俱解紀功吳推官紀驗等因移道  
合先轉報各緣由飛報到臣又准平越總兵李應祥偏橋  
總兵陳璘原任總兵今充爲事官童元鎮手本移報相同  
臣除批行黔楚監軍各道行紀驗官查驗功級明的給賞  
候按臣覆覈損傷陣亡官兵候覆覈議恤生擒賊犯發按  
察司監候審決投降人民行守巡各道分發內地隨宜安  
插奪回被擄男婦驗實省歸原業外該臣會同總督川湖



貴州軍務兼理糧餉巡撫四川地方兵部右侍郎兼都察院右僉都御史李化龍巡撫湖廣等處地方兼提督軍務都察院右僉都御史支可大看得思南石阡二府去貴陽千五百里去偏橋僅數百里先是臣等議設偏橋總兵以防思石龍泉蓋就近調度可朝發而夕至者自正月有龍泉之變各路兵尚未集督臣特發施南兵八千以援龍泉乃今板角關之破竟得施州兵之力通計斬獲四百有餘查得賞格開載先入板角關者陞三級賞銀一千兩臣等不敢爽信尋即給賞千金外是役也叅將王一桂指揮唐一麒宣撫覃宜率衆賈勇當以先登論而居中運籌出奇

制勝則總兵陳璘也苦竹關有二一在烏江則鎮雄土知府龍澄兵破之業已 題敘一在龍泉則原任守備徐允

爵把總王世恩兵破之但斬獲不多未與賊鬪又其次焉

者也至於招撫降民查平越總兵李應祥一哨共撫過降

民一千八百二十四名口偏橋總兵陳璘一哨共撫過降

民并取回擄民四千七百九十九名口通共撫過六千六

百二十三名口是皆仰體 皇上好生之仁上昭 神武

不殺之恩一以散彼黨與一以安我蒸黎則諸監軍各道

招徠安輯之功亦不可泯者臣等不敢不以上 聞伏乞

勅下兵部待元兇授首之日一併覆議施行謹題請 旨



五奏捷疏

謹題爲平越哨兵奮勇渡河攻奪險關斬獲多級恭報捷音事萬曆二十八年四月十四日據右監軍右叅議張存意呈准平越總兵李應祥手本報稱江界河邊播州老鷹囤囤首石勝俸王志虎王志龍等萬餘人率妻子來降本鎮傳諭朝廷令不殺降但黃灘關未拔汝等果是真降須生擒守關頭目立功贖罪勝俸等叩頭稱願効死力等語合行飛報十五日據右監軍張存意驛傳督兵道副使充錫類都清道副使袁應文督糧道左叅政郭廷良新鎮守道右叅議張文奇呈准總兵李應祥手本據副總兵

陳寅報四月十二日寅時平越哨衝鋒官張奇盛率師沉吳文秀宋世臣王嘉綸商民瞻汪世才杜廷武易之謙土官楊燧等部兵齊渡黃灘河攻其關之前新降王志虎石勝俸王志龍王賓王倫尚習中等馬步兵從墳林暗渡河襲其關之後賊出關拒敵從辰至午大戰賊大敗追至張王壩透出關二十里至晚收兵李師沉當陣生擒有名首惡王大安張奇盛生擒首賊王愛官兵通共擒斬級八百五十六名顆奪獲賊馬牛馬被擄器仗不計輕傷重傷陣亡兵士另查報見統大兵直剿逼圍賊巢合先塘報又准總兵李應祥手本飛報相同案照本年四月初八日據右



監軍張存意呈准副總兵陳寅手本稱三月二十四日奉李總鎮令撥隨征官包佑楊應詔等家丁孫定國黃勝等伏路擒獲唐榮智蕭富宗蕭肅仁德蕭肅王元蕭仁會王高林等稱係偏橋茅坪屯軍本屯男婦約一千人遭附播白泥司土官楊正邊楊通漢父子凌虐痛害榮智等皆欲啗其皮骨伊弟楊正愛屢諫不從願爲內應職審非詐於二十六日令中軍孫仲謨旗鼓徐一夔家丁把總陳定衝鋒官方廷輔費復等總督陣官李繼晟貴州軍門把總華統鄭國明等監軍道管陣指揮曹選周宗堯都清道中軍張體仁何昂臣總鎮中軍張奇盛李師沆等於二十七日夜

三鼓唐榮智等先入賊營吹角爲號官兵一齊擁入時楊正邊正在鼾睡被伊弟楊正愛同榮智等將正邊并妻宋氏男楊通漢俱縛斬首惡楊七部下黎金六梁榮學劉老三老何首級四顆正邊所屬男婦三百餘名口本屯男婦共九百一十三名口隨帶牛四十二隻馬一十一匹乞降移解到道牌行知州李珏陳聖佐查審分發都勻獨山麻哈清平新添龍里等地方零星安插等因初十日據總兵李應祥手本稱白泥司下里土官楊正邊伊男楊通漢自宜恪守世上納糧當差迺敢糾同楊七楊珠投附叛惡楊應龍攻圍偏橋殺擄東坡紫金關打廠寨孟寨張家冲楓



香五屯紫忙寨翁聳羅家屯新地屯流毒最慘擢髮難罄  
至於楊通漢年質雖幼馬上便捷如飛偏橋興隆人號稱  
通漢名白鷄子及該本鎮將二犯肘鎖押出營門而通漢  
猶說可惜我在地下被拏據其言語狂悖乃見心性兇殘  
人神共憤理法難容倘非正愛早計又作入關勁敵罪惡  
已極百端按法難逃三尺等因又據爲事官蔡兆吉呈報  
奉令招降撫夷丘伯芝徐受等一百八十名冊報馬三匹  
牛七頭合行飛報十一日又據右監軍張存意差官解楊  
正邊楊通漢及逆酋楊應龍給與正邊照票三張到臣臣  
將楊正邊父子發按察司監候詳審斬獲功級及陣亡陣  
傷官兵行該道及紀驗官查覈另報招降男婦行守巡二  
道分布安插外今據前因該臣會同總督川湖貴州軍務  
兼理糧餉巡撫四川地方兵部右侍郎兼都察院右僉都  
御史李化龍看得白泥一司父爲賊據肆牌之地莽爲盜  
藪下里在河之內楊正邊父子據之爲賊外援而偏橋東  
坡一帶之路皆由此出老鷹囤在河之外石勝俸王志龍  
兄弟據之爲賊內翼而西平桃溪一帶之路皆由此入若  
黃灘關豐牆峭址蒼翁林斷岸則其縮轂之門也臣等初與  
李總兵張監軍計不擒楊正邊則亡以渡河恐有半渡而  
擊之虞不降老鷹囤則無以叩關思有堅壁老師之患然



而正邊父子世濟姦猾老鷹萬家雄据河壩所以遲遲不  
即渡江者以此乃監軍總鎮悉心協謀副總諸將羣力合  
攻夜擒楊正邊而正愛內應則肘腋無慮外降老鷹因而  
石勝俸等倒戈則蕃籬盡撤黃灘即險正兵攻其前路將  
躡其後其何能守斬功八百餘顆降人萬五千戶諸將之  
勇各道之謀相胥以成足稱竒捷矣是役也總兵李應祥  
橫槊而目無全牛料敵而識同老馬渡江擊楫攻其甚決河  
受降奪關勢如破竹副總兵陳寅三軍既拊羣旅爭先掃  
白泥有先人奪人之勇攻黃灘得以狄攻狄之機監軍道  
張存意督兵道尤錫類都清道袁應文七縱合寧寧辭虎

穴之危左叅政郭廷良右叅議張文竒千里餽糧躬涉羊  
腸之險知州李珏轉輸烏道而頓忘險夷知州陳聖佐紀  
驗魚門而罔避腥穢以上各官之功均當敘錄者也查得  
賞格開載先登黃灘關者陞三級賞銀一千兩臣等不敢  
惜千金以傷死士之心賞格又開石勝俸等若有能率衆  
來歸或攜家歸附者以前罪惡盡除不問授以指揮千百  
戶職銜令立功自効臣等亦不敢愛一官以阻方來之降  
伏乞 勅下兵部俟賊平之日總爲覆議施行謹題請

旨

考覈給由州官疏



謹題為遵例考覈給由有司官員事據貴州布政使司呈行准貴州按察司并守巡安平二道咨牒稱考覈過普安州三年考滿給由知州龍時躍詞語并重覆結查得本官任內並無公私過名增減歷俸月日其保民實政五事弔取先經本道覈實并蒙撫按閱查過文簿對查俱已脩舉果無虛冒無礙緣由結報到司據此案照先奉巡撫貴州郭都御史批據普安州申准本州知州龍時躍關稱本職見年三十二歲廣西平樂府恭城縣人由舉人萬曆二十年六月二十五日除授貴陽府推官二十四年十月十五日陞授今職二十五年二月初九日到任扣至萬曆二

十八年正月初八日止連閏實歷俸三十六箇月三年考滿任內蒙巡按貴州監察御史復命疏開本官英爽敦厚之器疏達變通之才吏畏神明民懷父母列薦一次例應給由關州申詳奉批仰布政司查報奉此又蒙巡按貴州監察御史批布政司查報蒙此就經備行各該司道考覈結勘無礙又該本司結查得本官父祖母妻並無貪酷再醮例應請封呈乞考覈具奏等因呈詳及具造五事總數書揭到臣該臣會同巡按貴州監察御史宋興祖考覈得普安州知州龍時躍操持皎日才華流雲善附摩而滿路垂棠勤轉輸而三軍挾纊稱職既經各司道



查結無礙又奉有府州縣正官雲貴兩省免其赴部之例除行令本官在任接俸管事文冊差人齎繳并將覈過脩舉實政五事書揭咨報都察院查考外相應題請伏乞勅下吏部再加查覈本官曾經巡按貴州監察御史應朝卿列薦一次祖父祖母父母妻查無貪酷再醮近例應得恩典併乞查酌施行謹題請 旨

考覈給由府官疏

謹題為遵例考覈給由有司官員事據貴州布政使司呈行准按察司并思仁守巡道咨牒覆考得思州府推官吳天祐見年二十五歲雲南大理府趙州籍江西臨川縣

人由舉人萬曆二十年九月二十七日除授湖廣鄖陽府

保康縣儒學教諭本年十二月二十八日到任二十四年

九月十五日陞授今職二十五年二月十三日到任扣至

萬曆二十八年正月十二日止連閏實歷俸三十六箇月

三年考滿任內蒙巡按貴州監察御史復命疏開本

官峻潔竹栢懷霜敏捷驂騑歷塊讞獄沉寃立刻覈賦夙

蠹一清列薦一次例應給由任內竝無公私過名增減歷

俸月日并將行過事蹟造冊結報到司詳奉本院批仰布

政司移各司道註考詳奪奉此又蒙巡按貴州監察宋御

史批准移會各司道考覈通詳蒙此就經移行各該司道



野史 卷之四  
考註詞語結報到司又結查得本官父祖母妻竝無貪酷  
再醮例應 請封呈乞考覈具 奏等因呈詳到臣該臣  
會同巡按貴州監察御史宋興祖考覈得思州府推官吳  
天祐守不逾尺才堪運斤折獄而肺石無冤署郡而口碑  
有誦稱職除遵例行令本官在任接俸管事文冊差人齎  
繳外相應題 請伏乞 勅下吏部再加查覈本官曾經  
巡按御史應朝卿列薦一次祖父祖母父母妻查無貪酷  
再醮近例應得 恩典併乞查酌施行謹題請 旨

六奏捷疏

謹 題爲土兵奮勇直破播治奪復江關事萬曆二十八

年四月二十一日據左監軍按察使楊寅秋畢節道副使  
洪澄源參將朱鶴齡呈據貴州宣慰使安疆臣四川鎮雄  
府知府隴澄報稱水西鎮雄會兵父劄大水田於十三日  
進兵抵播州治直至桃溪口獅子橋我兵奮勇齊入殺死  
苗頭阿天曹方等各賊奔潰隨將衙宇家廟新川後川等  
衙違禁房屋臺榭沿街賊黨民房悉行燒燬除發兵與官  
兵會哨協力攻圍擒賊外據此合行飛報二十二日據安  
疆臣隴澄報稱先該職兄弟督兵沙溪渭河合哨間時河  
渡失守奉左監軍嚴檄邀賊歸路不能即直抵賊巢以牽  
賊勢賊攻打烏江就該職目把發兵截殺於清潭水斬級



馳報去後今於十五日發兵直出烏江老軍關賊兵截伏當令馬軍衝殺斬獲一十七級生擒二十五名賊潰投箒次日黎明到關復斬獲一百一十二級生擒三十四名口見劄兵於石子了等處除殺傷兵目另行查報外理合飛報又據紀功按察使易登瀛督餉道左叅議梅國樓稟報總兵爲事官童元鎮移報俱同前事案照四月十二日據宣慰安疆臣報稱初二日我兵營於大水田出哨至白小堰見播賊牽擁象隻各兵衝擊砍斷鐵鎖奪獲播賊原擄雲南象一隻乞發象奴前來收回據此合行呈報十五日據左監軍楊寅秋副使洪澄源呈報四月十二日據宣慰安

疆臣呈稱查得逆龍父子心腹僞提調尚意黃繼枝小名潤腦管督板山落潮馬站一帶苗兵該本司用間許令尚意黃繼枝來營計議退兵賊龍同妻田氏果信隨差二賊并坐寨頭目夏文茂從黨張元等二十四人齎印信降文一角禮單一封金臺蓋二副折段銀八兩到河外止令從人轉送將二賊并從賊擒拏將各賊審實同原禮臺蓋銀兩哭服械降文鞍馬二副批差漢把李輔領解告投外看得尚意黃繼枝內處心腹外作爪牙自賊爲患飛練綦江東坡烏江等處皆其謀孽衝鋒酋之巨細事機皆其叅替酋黨雖多此二豎其最者先奉院道密諭心切遵奉不能如



意今罪盈惡極以致生擒天寶奪龍之左右手矣等因到職看得尚意黃繼枝係賊黨渠魁先奉總督密劄水西漢把能密獲尚意黃繼枝二人先賞以指揮劄付半年來圖之未得者今一旦就縛并其儀物及逆黨二十三名具解既足殲賊之羽翼而安疆臣之結讎於首益明矣等因二十九日又據左監軍楊寅秋呈稱烏江河渡距播百數十里而近兩關未復長箐餘賊未控入播咽喉終是梗塞本司祇奉憲檄調集兵士振揚銳氣已經會同童總兵分發都司徐成張秉忠守備童龍等督領滇粵及新舊募兵於四月二十一二十四等日齊劄河渡會哨進剿外烏江一

路分屬安疆臣隴澄兄弟今據安疆臣隴澄馳報相同險關既復進播有路就於二十四日以輕騎同都司戴守禮量帶隨行員役家丁馳抵烏江兩營阨險屯劄絕頂本司以二十八日渡江抵營猶恐林箐蒙蔽羽人情叵測就該戴都司帶領家丁哨出雅水清塘一帶指揮羅萬善等把總王演等一哨出刀靶水一哨狼飛渡又報料無他虞職即以是日取道新站直抵播州海龍壩督率安疆臣隴澄會同四川湖廣各路官兵併力夾攻務期元兇授首毋容爭功墮成等因各報到臣臣除將斬獲功級驗明給賞奪回象隼及令雲南中軍張澍發象奴前去取回擒獲賊首尚意



等發按察司監候審處馬匹發軍前應用金臺蓋折段銀  
發貴陽府貯庫外今據前因該臣會同總督川湖貴州軍  
務兼理糧餉巡撫四川地方兵部右侍郎兼都察院右僉  
都御史李化龍看得大兵四面雲集播州危在旦夕安疆  
臣隴澄不難斷決唇齒之情直搗虎狼之窟夷其家廟焚  
其衙宇解餽賄縛間謀亦足少杜羣疑之口實則左監軍  
楊寅秋紆謀決策竭力殫心操馭作使之也一時分猷如  
副使洪澄源督率兵入有進無退參議梅國樓拮据糧從  
用訕舉羸左布政使應存卓按察使易登瀛決機宜於指  
顧之間佐輓輸於樓櫓之會總兵童元鎮參將朱鶴齡之

宣力効勞貴陽府推官張應選定番州知州王應昌晉安  
州知州龍時躍之嘗艱歷阻度德度義期於同舟共濟者  
臣等不敢過爲鋪張亦何敢沒其勞瘁伏乞 勅下兵部  
俟賊平之日總爲覆議施行謹題請 旨

七奏捷疏

題爲平越偏橋二哨官兵奮勇破奪險關擒斬多級  
恭報捷音事萬曆二十八年四月二十二日據貴州右監  
軍右參議張存意督兵驛傳道副使尤錫類紀功道副使  
袁應文督糧道左參政郭廷良新鎮道右參議張文奇呈  
准總兵李應祥塘報本月十二日官兵攻破黃灘關次進



三渡關一名渡上關偵得叛賊楊應龍差坐寨陳胡保張貴變等在關據守隨喚降人石勝俸王志虎王倫等商計各指點路徑備陳可取之狀甚悉謂遲日必事洩兵多亦露形須精兵三千自足破敵亟選標下精銳三千同石勝俸王賓等馬步夷兵千餘十二日夜發兵十三日五鼓官兵一枝占住後路石勝俸等數十騎從前門叫說被官兵追來投奔等語比及開門我兵前後掩襲當陣李師沆生擒陳胡保即陳王保張奇盛生擒張貴變各領兵把總吳文秀部斬賊級三十五顆宋世臣部斬賊級二十九顆商民瞻部斬賊級三十一顆宋迪朱恩部斬賊級二十三顆

通共一百一十八顆生擒二名奪獲賊馬九匹賊仗一百三十一件俘賊屬二百八十三名口輕傷兵繇五等二十五名重傷兵劉允中等三十四名陣亡兵尚甫等九名除生擒斬獲功級俘屬賊仗解赴監軍紀功道驗紀轉報外馬匹就給戰卒騎乘輕傷重傷陣亡兵士照例優恤等因合行轉報准總兵李應祥手本移報相同二十四日據湖廣右監軍右叅議魏養蒙左監軍按察使胡桂芳兵備副使王應霖督糧道右叅政詹啓東呈准總兵陳璘塘報本鎮於四月初八日至湄潭日擊青蛇馬瑤長坎保子各囤峭壁插天巢壘基布遂行副總兵陳良玘都司錢中選督



發指揮把總劉之屏梁廷祿等官兵在於荆條流河渡取道前至困後夾擊又行參將王一桂督兵謹守板角關以防賊逸初十日集大小將領密授方略懸以重賞分別竒正布置已定督令找搭浮橋本日申時先遣守備楊惟中白元潔陳九經各選膽勇官兵乘夜竊伏困脚左右十一日卯時本鎮親督遊擊江騰龍陳策都司吳時喬守備李大諫領兵鼓譟而進各賊蜂擁下困迎敵連戰數合把總戴崇茂朱萬乾楊惟中冒死挺刀躍前衝鋒各斬一賊馳報首功即時各賞銀牌十兩官兵四面衝殺各賊奔潰斬級一百餘顆其餘退據險囤播石滾木弩箭如雨時值天

晚收兵一更時分復發陳九經白元潔楊惟中等仍去埋伏又發兵堵截青蛇囤以防各賊助戰十二日早本鎮復親督兵齊力夾擊長坎瑪瑙保子三囤各賊仍前據險死敵自己至未大戰三合木石如雷我兵將竹木牌筴抵塘俱被打碎廣兵把總吳應龍李元敬并土兵把總吳嘉隆等官兵奮不顧身躍過被石壓死兵身逼巢將百子發煩烏鏡火箭亂發打死各賊墜跌深巖不計其數我兵大勝攻破險囤斬級四百餘顆餘賊遁入深箐難以窮追同日又據貴州督兵副使路雲龍督餉紀功副使陳與相運餉同知張羽鴻紀功推官吳天祐知縣鄧弘烈呈准龍泉督



兵副總兵陳良玘都司錢中選塘報本月初十日奉陳總兵令調兵夾攻長坎等囤遵奉於十一日親督官兵由趙生坎囤進攻各賊集眾萬餘併力據守職令中軍指揮徐時達蔣崇賢葉定遠督兵指揮劉之屏劉自西應襲陳其可督陣紅旗官郝朝忠葛倫旗鼓把總金嶠把總千戶張夢麟把總陳大順等各率兵四路攀緣上攻與賊對敵賊連放播木梭杆矢石如雨職驅眾放火籠火箭箭百子鳥銃傷賊數名從辰至申我兵奮勇輕身破關上囤交鋒二營官兵當陣斬獲首級共一百九十一顆奪獲賊仗八十四件俘獲男婦一百餘名口我兵重傷八名輕傷二十三名

陣亡千總張勇并隊兵三名十二日卯時賊從山箐衝出我兵奮勇與賊抵敵大殺數陣共斬首級二百一十五顆奪獲賊仗一百零五件我兵重傷三名輕傷八名十三日巳時據鄉導黎世文黎廷官等報稱賊聚囤後深山職隨令中軍指揮徐時達蔣崇賢督兵指揮劉之屏等領兵直抵彼處各賊擁眾拒敵我兵對殺四陣銃箭傷賊數名賊隨奔潰我兵乘勝追殺共斬首級一百一十七顆我兵重傷十一名輕傷十七名三日共斬首級五百二十三顆俘男婦共一百餘名口合行轉報又據總兵陳璘手本移報相同二十七日據右監軍張存意副使尤錫類呈准總兵



李應祥塘報探得望鄉圍賊見克渡上關據險添兵死守本鎮當集蔡兆吉伍萬鍾等計議宜乘賊力不齊搗虛先發隨遣把總猶鶴杜廷武部兵合降民石勝俸王賓等兵爲前鋒把總吳文秀等標兵尋徑抵圍後防賊奔逸十八日夜發兵十九日五鼓齊至圍前攻打兩山峭壁菁林賊兵蜂擁前來標槍藥弩亂發官軍奮勇截殺標營兵從後路攀緣上圍放砲我兵知伏兵已到拚死攻上賊巢前後大戰從寅至午賊力不支潰敗把總吳文秀部斬賊級五十四顆宋世臣部斬賊級四十一顆商民瞻部斬賊級一百三顆守備伍萬鍾哨下把總杜廷武等部斬賊級一百

二顆守備汪如淵哨下把總王洪等部斬賊級一百八顆把總鍾啓鳴周高部斬賊級二十四顆張奇盛生擒張六元石勝俸生擒董森王倫生擒羅遮牛袁志甫生擒張代王賓生擒張士元王志龍生擒楊鑾通共擒斬賊級四百三十八名顆奪獲賊仗一百三十二件俘獲賊屬一百九名口輕傷兵劉元等四十三名重傷兵王元吉等三十一名陣亡兵陳三等六名輕重傷陣亡兵照例優恤合行轉報准總兵李應祥手本移報相同二十八日據副使路雲龍陳與相呈據紀功思州府推官吳天祐報准副總兵陳良玳手本本月十八日發兵攻打青山箐有賊首朱敬領



賊拒敵土官向日明部下土兵楊塔其胡八一奮勇衝鋒將朱敬當冑一槍土千戶張銘部兵吳昭吳老四斬獲首級奪獲摩鎖盔甲一副韞項一箇煖肚一條銀鑲大小刀二把韞膝一雙韞靴一雙紫馬一匹鏢槍一桿各兵乘勝追殺斬獲頭目賊級四十餘顆陣亡兵一名被傷兵三名各賊奔潰收兵回營據把總楊騰龍謝得信識認委係朱敬首級又一顆係謀士李旭弟李深首級并有楊應龍給票一張等因准此合行轉報同日據湖廣右監軍魏養蒙呈准總兵陳璘塘報於本月十四日督率官兵攻打青蛇圍前後夾擊賊倉皇迎戰斬首數十級賊敗入圍十五日

自辰至午連戰十陣斬首二百級各賊拒守我兵用發煩百子等銳火箭火磚等器攻破圍後守備陳九經白元潔等挺身血戰先發遊擊陳策江騰龍都司吳時喬戴罪守備楊惟中等永順司舍把彭宗惠彭勉忠張良弼保靖土舍彭象崑督漢土官兵并守備李大諫由前路斬入四面擁進賊勢大敗斬首一千餘級准此合行轉報又據總兵陳璘手本移報相同到臣臣除批行黔楚監軍各道行紀驗官查驗功級明的給賞候按臣覆覈損傷陣亡官兵候覆覈議恤生擒賊犯發按察司監候審決奪獲馬匹給戰卒克犒俘獲賊屬變價克餉外該臣會同總督川湖貴州



軍務兼理糧餉巡撫四川地方兵部右侍郎兼都察院右  
僉都御史李化龍巡撫湖廣偏沅等處地方提督軍務兼  
理糧餉都察院右僉都御史江鐸看得偏橋一哨從思石  
入板角爲極險而自板角以進青蛇四圍蚊雷聚響於苻  
澤平越一哨從疆界渡黃灘爲極險自黃灘以上河渡三  
關塘芥稱威於潢池乃總兵陳璘等仗蛇陳之威以鋤四  
圍之賊總兵李應祥等又乘魚爛之危以襲三關之黨至  
於朱敬之授首并獲其甲馬亦足紓龍泉之憤而慰安民  
志之魂此其功尤犖犖者自此合哨於西坪自此會兵於  
白田不過六七十里直搗無前矣况巴渝蘭州之衆與水

西鎮雄之兵業已驅賊入圍環攻其危巢於內河渡滇粵  
之士與安隴偏裨之將又復乘勢奪關疏通其梗道於中  
乃茲偏橋平越之旅芟四圍三關之賊或卷甲晨趨或潛  
師夜起盡掃其醜類於外賊即困守海龍臣等計之金魚  
幕燕耳除臣等催促二哨兵急合進剿外伏乞 勅下兵  
部俟賊平之日總爲覆議施行謹題請 旨

八奏捷疏

謹 題爲仰仗 天威官兵奮勇血戰首克二城攻破險  
圍蕩平兇逆飛報捷音事萬曆二十八年六月十五日據  
貴州左監軍按察使楊寅秋右監軍右參議張存意督兵



驛傳道副使尤錫類呈報節奉總督部院軍門貴州巡撫軍門憲令照得逆賊囤前險峻便難速攻囤後一路各監軍道鎮剋日合哨併力夾攻毋再曠日老師奉此該各道鎮看得逆賊楊應龍據囤環攻日久未下僉議併力攻打後囤各路占據無地屯劄該左監軍楊寅秋畢節道副使洪澄源宣諭水西將首奪右槽山坡一帶營盤於五月二十八日盡讓官兵屯劄六月初二日川貴劉總兵李總兵各先後督所部兵到囤初四日三省道鎮共議總兵劉綎李應祥於初五日總兵陳璘吳廣於初六日各照期分打劉李二總兵合哨分左右信地劉總兵攻土城門以左李

總兵攻土城門以右該三道會同李總兵將右路信地分撥三枝以都司徐成領河渡哨守備童龍督廣西隨童總兵把總陳邦揚陳大縉雲南把總安時泰陳用實等平越哨副總兵陳寅項下把總劉恩安世珍等守備汪如淵哨下把總吳國輔孫之襲向和楊正元向世爵等兵奪鳳凰嘴由右嶺進戴罪都司張秉忠領平越哨守備伍萬鍾哨下把總華統薛應時李朝陽呂守現李茂春陳汝栢張鶴翀馬育麟張世敬楊通霑等兵由左嶺進又領河渡哨泗城龍英土兵於囤右崖壁截殺大寧都司戴守禮領平越哨中軍坐營李師沅把總張奇盛吳文秀宋世臣張勝藻



等兵河渡哨牙廷相隨營操守馬化麟各家丁由中嶺進該河渡哨左監軍楊按察使洪副使督行水西安疆臣鎮雄府知府龍澄分兵於海龍泥壩固等處平越哨右監軍張叅議尤副使督行副總兵陳寅所部獨山等兵於前門朝天飛龍飛虎等關都司莊志傳於固前等關原任叅將蔡兆吉督所部兵於板角蓬水等處各截賊衝突奔逸先該副將陳寅都司徐成守備童龍議得鳳凰嘴哨險賊兵屯據死守必須衝鋒奪占鳳凰嘴山頂先得地勢方可攻取土城該三道即給發懸賞銀二百兩於是夜分給兩哨各兵初五日五鼓會同劉總兵各照畫地齊攻賊抵死在於

鳳凰嘴拒敵黎明我兵奮呼一湧殺賊兵奔潰退走土城我兵乘高頂大銃鳥銃火箭火磚俯瞰齊發賊立腳不住登時攻倒土城一面拆卸一面打開土城內排柵敵樓賊據月城矢石如雨二道同李總兵立枹鼓對山搖旗吶噉麾兵前進各拔刀分督退縮者立斬塵戰至已末緣城接梯高招先登各兵用肩頂城上先登者以手挽魚貫而上河渡哨陳邦揚親斬十二枝冠帶管事藍鳳鳴首級一顆中軍指揮羅萬善親斬何提調男何訓首級一顆平越哨指揮李世培把總張希軫等奮勇齊登二哨共斬從賊首級七十五顆內河渡哨四十七顆平越哨二十八顆賊奔



崖墜死及銳死不及找級者不計其數將月城拆倒將土城月城樓同劉總兵即時放火燒燬賊奔入大城死敵自午至申應龍父子領苗披堅出城衝突三次每次我兵用佛郎機百子銃烏銃等項直對城門齊打賊傷退回天晚兵已疲饑該三道與李總兵計議賊必乘夜衝突一面造飯餉士一面再懸犒賞每高招手銀一錢每兵銀五分各兵歡躍齊心就於月城劄守舉放號火銃炮三道同總兵各將領露坐嚴警賊兵膽落在城叫噉乞降至黎明時陳吳二總兵照依分定日期接攻賊不戰倒戈奔潰如蟻各路兵一齊登城擁入內城四面縱火賊酋楊應龍將卧房

發火同愛妾縊死要得自焚時五路總兵官齊抵賊衙妻田氏男楊以棟妻田氏楊良棟妻田氏楊惟棟楊奇棟賊妾子楊勝棟妻田氏賊長女貞惠次女貞瑞三女貞福楊朝棟妻田氏長子松壽次子春壽女性福賊首何漢良田一鵬子六老偽內官拾名使女十三口家人五名俱同時拏獲五路道鎮將賊屍擡至城樓喚伊妻男五司奏民同驗真的俘獲賊親屬公同點明收繫城樓宣慰司印田氏攜帶在身驗交陳總兵暫行收執聽解賊男楊朝棟賊弟楊兆龍走出見獲四川永合哨吳總兵營內賊從弟督軍總管楊兆麟見獲李總兵營內就據河渡沙溪哨各領兵



官報共斬獲賊首從八百九十二顆生擒賊首從二百三十四名俘獲賊屬二百七十二名口 勅命一道平越哨各領兵官報共斬獲賊級一千一百零五顆生擒長官一名 誥命一道為照貴州平越河渡二哨會同四川綦南哨攻打困後其得賊雖在初六日三省竝進之一晨而摧賊鋒破賊膽散賊黨則在初五日蜀黔竝攻之一舉等因又准總兵官李應祥手本移報相同到臣臣除批行監軍各道行紀驗官查驗功級明的候按臣覆覈逆賊身屍拜擒獲妻子與播州宣慰司印信俱解督臣審驗及四川湖廣將領功次臣不敢槩敘外該臣會同總督川湖貴州軍

務兼理糧餉巡撫四川地方兵部右侍郎兼都察院右僉都御史李化龍巡撫偏沅等處地方提督軍務兼理糧餉都察院右僉都御史江鐸看得逆酋楊應龍者僻居夜郎負固黑水豺狼有性梟獍難馴賊所恃者海龍一囤前關則有二十六步之雲梯初連無踰其高後路則二十四山之峻嶺太行莫過其險山有沃泉二道可資千萬人之飲積有糗糧百倉可供二三年之食彼且以為免穴且以為虎踞我師既老賊談復張賊之不自縛者恃有此險也乃今六月五日川省劉綎部兵攻後囤之左黔省李應祥部兵攻後囤之右先登鳳凰嘴次克土城又次克月城易如



破竹捷等摧枯六日陳璘吳廣部兵照期輪攻質明逆酋窮蹙投繯而死兵不血刃鳥散魚驚妻子爲擄巢穴盡虛茲實仰仗 聖明神武天行雷動民遂安於一怒 廟堂樞省嶽立淵澄謀常出於萬全人心震疊士氣鼓舞師雖勞於六月克無待於二年繫惟 天助事豈人謀振古以來除兇戡亂未有若斯之爲烈也除督臣露布以 聞臣不敢再有塵溷其大小文武將吏功次聽臣會同督臣及偏沅撫臣覈實另行 題敘外謹題請 旨

題監軍楊按察使請告疏

謹 題爲監理事竣夙疾舉發懇乞代繳 勅印亟賜罷

歸調理事據貴州按察司呈奉臣批據貴州左監軍提刑按察司按察使楊宙秋呈稱職以庸愚謫陋萬曆二十七年誤蒙推擇頒降 勅印監理貴州軍務自惟么磨何知金革祇奉 明旨未敢以規避上干 鈇鉞遵限戴星於十一月初五日抵黔受事軍前一切細巨天竭狗馬動勦緣蒲柳辱軀夙患痰火一經勞瘁輒復舉發數月以來延醫羅繼多何重賢等多方料理勉強支吾誓師之後連克險關詎意各路未進賊得併力一向兼之事出意外局由中變驚悸矢石之下憂危損折之餘席棗以待瀕死者數荷蒙三院不即譴斥曲賜優容勉收桑榆憲檄諄切



即憂病日劇敢不策駑磨鈍枕戈嘗膽益懸水西狐疑之心再振兵士蛙怒之氣仰仗 威稜身入賊阻徒跣後困餐宿山瘴狼煙書暝虎吼夜驚腔血已竭皮骨僅存怔忡時發瘡痍交尋詢之醫士僉云積勞積毒決非旦夕能愈查得先該吏部題奉 欽依監理事竣將 勅印繳進茲幸 天威震疊兇逆蕩平伏乞俯念殘喘危篤情非得已亟賜罷斥放歸調理原領 勅印順差代爲繳進幸不即填溝壑還慰哀慈倚閭則未死之日皆戴恩之年等因奉 批逆寇甫平普天同慶該司躬歷山箐親冒矢石焦慮愁腸殊勲偉績尚不一奏之 聖明柰何遽萌山林之念仰

按察司勉留即有微恙不妨給假調理痊可即出視事繳奉此又奉總督部院李都御史批該司自受事以來多方拮据備極勞瘁本部院深所憐念今當 奏凱論功之時正宜靜攝以需大受何得言歸且善後之事尚費經營亦非可委而去之者仰一面調理一面查敘功次及善後事宜勿得杜門廢事此繳奉此又蒙巡按貴州監察宋御史批善後事宜如蝟正倚大才擘畫遽戀戀鄉閭耶幸爲勉留以終永業仍候督撫詳行繳蒙此該本司備關勉留去後續據貴州按察司呈奉臣批據按察使楊寅秋呈爲夙疾未痊驚聞母病增劇再乞放歸田里以遂烏情以延殘



喘事職捧批感極涕隨自惟寡昧逐隊因人其去其留何裨重輕三院俯念狗馬艱頓猶然溫借勉留方今草昧載闢營建伊始誠效一日疆理之微勞足附千年經略之後塵自非木石敢遂棄捐走醫問藥庶幾強起仰荅涓埃緣職家有老母見年七十四歲春間播會徇徼道路訛傳曾遣家僮還慰倚閭本月初七日忽接家報僮甫及門母急走詢問不覺傾跌仆地神思恍惚七箸頓減職聞之五內瞽亂念職齠年失父賴母篝燈辟纊孀守垂四十年相依爲命今越在數千里外遺母疆場之憂母憂成病子病增憂連日以來神氣銷耗頭目眩暈扶病檢點冊籍忽忽有

一 喪似茲福薄骨窮豈堪卒不驚磨鈍况監軍添設之官貴州瘠薄之省自職俸餼以及吏書口糧輿隸工食俱係那借區處屬當建置經費浩繁豈可以捉衿見肘之時空糜社門伏枕之吏職一息尚存一腔知愧輒敢籲呼台慈俯憐苦情迫切乞爲轉詳將 勅印代爲 題繳罷歸田里俾得以未死之身慰母氏再生之望將曲全等於罔極而銜戴矢以沒齒矣等因奉批該司身苦夷域念懸北堂展轉憂思形貌殊瘠亦至情之不容已者既情詞懇切仰按察司查報奉此該本司看得監軍按察使楊寅秋謀慮能愴勅敵精神可折退衝項當羽檄之馳允賴籌帷之勝



黔師再出播賊四潰正方敘功忽爾請告察其情委非假托眎其病實已沉重合無准歸田里以就醫藥待病痊之日另行起用等因到臣該臣會同總督川湖貴州軍務兼理糧餉巡撫四川地方兵部右侍郎兼都察院右僉都御史李化龍巡按貴州監察御史宋興祖看得監軍按察使楊寅秋文武兼資威名素著頃綏黎莫於西粵貽九真奠枕之安今制楊酋於貴陽壯千里長城之勢黔中無務農積穀之策何止四空境內悉荷甲執文之夫幾成五大而本官冒蟠兵甲能役鬼神筆敵金湯且簸風雨親冒矢石於龍圖大築鯨鯢於鬼方壁壘洞開渠魁自縛大羊之膽

既破鴻鴈之民未安且勞動未奏於 聖明而瘡痍尚賴其拊綏乃本官拮据浮竹竟染病於瘴鄉瞻戀維桑冀投身於慈母臣既枕留於臬署又復親問於榻前而本官卧在匡牀形甚枯瘦參苓未輟於口涕泣欲省其親臣查往例敬爲具 題况查本官 勅內原載播事平定即繳勅印今仰仗 天威強寇已滅本官原無文卷錢糧不候交代合無照依外官有疾例准其致仕暫令回籍調理如念賞功之典未頒平播之勞未酬待本官病痊日照依敘功之格起用以酬其勞以竟其用臣等未敢擅便伏乞 勅下吏部再加查議將按察使楊寅秋准令致仕回籍調



理痊可之日另行起用庶遠臣不淹棄於遐陬勞臣不遂  
泯其辛勤矣謹題請 旨

請謚孫尚書疏

謹 題爲儒臣學行久著鄉評永歸懇乞 賜謚以崇正  
學以廣風勵事萬曆二十八年七月十五日據貴州按察  
司提學道僉事徐來儀呈詳奉臣批據貴州闔省鄉官舉  
監生員鄉約耆老許一德等呈稱竊惟士懷閭脩之行詎  
在得名 國有激勸之權嚴於表實故三不朽之業立德  
爲難千百聖之宗傳心是聖要照得故南京工部尚書孫應  
鰲學有本源行無枝葉想四六經之正脉慧燭迷途破百氏  
之異同司南岐路以易簡中庸爲的以綱常倫紀爲脩得  
宋儒定性安仁之旨歸宿孔門用大學明德親民之精宣  
猷 帝側咀華吸髓道統仰契於前脩戢景埋光晚節益  
堅於末路事業以生前既著輿論自身後愈清第崛起遐方  
沉淪荒徼且嗣胤靡有子遺名恐湮於草木乞賜題 請  
加謚庶命名考實泉壤之潛德攸光繼往開來邊土之斯  
文不墜等情奉批孫鄉官斯文山斗吾道羽翼謝世已久  
未易其名誠爲闕典仰提學道查覈詳奪奉此又蒙巡按  
貴州監察宋御史批同前情蒙批提學道查報蒙此又奉  
臣批據清平衛儒學廩增附生員趙文炳等呈稱本衛原



任南京工部尚書孫應鰲甲嘉靖丙午鄉試解元癸丑進士改庶吉士除刑科右給事中陞江西僉事參議陝西提學副使四川叅政按察使湖廣右布政使尋轉都察院右僉都御史撫治鄖陽陞大理寺卿禮部右侍郎掌國子監祭酒事再起前官本官性資聰睿問學淵涵文章濟美於詞林諫議效忠於青瑣振威開府承寵 經筵歷宦居鄉著書講學易談近語闡先聖之微言雖論訓規開後學之成法芳聞無間於同聲懿行有難於悉舉本學於十六年內具呈巡按趙御史批謚法 國家大典鄉賢閭巷公論非其人不得私有其人不得蔽也本官無子孫可憑據矣而士論鄉評翕然推重於身故之後可見素履之孚人心之公也既經司道咨議衆論僉同合候會 題施行仍行提學道專詳繳該提學伍僉事議詳得本官挺生異質崛起巍科詞壇蔚有時名行履又推月旦倡明道學則易談近語言言悉入精微砥礪勲猷則立 朝居藩在在想聞丰采生前公論已白身後 卹典尤隆相應如議 請謚奉軍門蕭都御史批司道之公論僉同本官之懿行具見不然彼其人化矣勢去矣子孫無可托矣而何獨翕然若一口一心也仰候會 題施行本年十二月內已經入祀鄉賢訖第祀事雖以舉行謚典未蒙 請賜懇乞題請



特謚庶潛德昭於既往懿範垂於將來等情奉批仰提學道會同布按二司新都守巡二道查覈確詳報奉此又蒙巡按貴州監察宋御史批同前情蒙批提學道查報蒙批就經備移布按二司新鎮都清二道查議確當回覆及行都勻府并清平縣查確以憑通詳去後隨准布政司照會移稱卷查萬曆十六年六月內前軍門蕭都御史批據都勻府申詳清平衛已故工部尚書孫應鰲入祀鄉賢俯賜請謚等因已經題請緣由在卷今准前因該本司看得本官著作有功於六籍忠義效於三朝造士安民而政與教皆炳乎垂不朽之績慎言脩行而華與實皆確乎有成法之存非特用身變夷素重於南黔月旦抑且挽今擬古可稱爲北斗泰山允宜易名用愜輿論又准按察司關看得本官黔方砥柱昭代羽儀見解躬脩終身匪懈論思諫諍素位而行其崇有遺愛之存衣鉢得真傳之秘誠文章之宗匠理學之名臣也千秋無媿一字宜褒又准分守新鎮道手本行據清平縣申蒙本道案驗前事遵依轉行清平衛儒學并鄉約耆老楊傳一等查報去後隨據該學廩增附生員趙文炳等鄉約楊傳一耆老陳訓顧節等各具不致扶同結狀在卷該卑縣看得本官畫資穎異識見殊常少領解名旋登制舉被選館垣則拔藻敷詞匠

成法之存非特用身變夷素重於南黔月旦抑且挽今擬古可稱爲北斗泰山允宜易名用愜輿論又准按察司關看得本官黔方砥柱昭代羽儀見解躬脩終身匪懈論思諫諍素位而行其崇有遺愛之存衣鉢得真傳之秘誠文章之宗匠理學之名臣也千秋無媿一字宜褒又准分守新鎮道手本行據清平縣申蒙本道案驗前事遵依轉行清平衛儒學并鄉約耆老楊傳一等查報去後隨據該學廩增附生員趙文炳等鄉約楊傳一耆老陳訓顧節等各具不致扶同結狀在卷該卑縣看得本官畫資穎異識見殊常少領解名旋登制舉被選館垣則拔藻敷詞匠



心根於性命權居諫省則批鱗折檻奏章寫出血誠秉憲持公旬宣美化倡理學以教三秦直接義周餘脉闡道真而陶六館仰追鄒魯遺風惟是年齡不長胤嗣衰絕家乏百金之產門無三尺之童其行誼真可師其凋殘尤可憫而遺行弗蒙表章潛光久且掩沒如蒙上請加以美謚則俗學有還醇之望夷方有至道之機等因據此隨據都勻府呈稱該本府看得本宦文學建議兼優闡微易理而擅名省垣才幹微猷並著赫炳藩省而振威部院迺一代翰苑之臣寔三朝元老之碩生爲名宦歿當請謚等因呈詳到道該本道看得本宦奮跡賢科潛心理學衣鉢傳聖賢之奧訣文章洩今古之奇英歷仕三朝正氣直聲天下想聞其羊采歸休一壑清風高節黔中咸視爲羽儀宜加華袞之褒用作士林之範又准都清兵巡道關看得本宦天生名世作代羽儀學恥章句呻吟之末而求仁定性惟以孔孟之道爲必可師身爲文學諫議之臣而納誨論思直以堯舜其君爲已之任由藩臬之司建牙開府天下望如景星慶雲謝司空之召適志林泉學者仰爲泰山北斗今其人已朽矣而休稱乃歷久而愈著則知其論已定矣而謚典宜及時而寵加等因各回覆到道准此該本道看得本宦少挺奇姿沉酣百氏長崇正學鼓



吹六經邁跡玉堂詞賦真稱倚馬致身青瑣封章直欲批  
鱗外補愈勵清勤孤忠貫日內陟終孚 簡在一德格

天奏無逸之篇祭酒名高北斗却司空之 乃尚書望重

東山法言與至行絕倫碩德共豐功競爽以定性識仁爲

根宗以審幾慎獨爲門戶奮足何假興文沒齒確然學孔

真南方之砥柱吾道之宗工也顧崇祀已行易名尚闕荒

涼門祚固天道之無知藻績輿評正人心之匪溺矧勸一

風百用夏變夷尤今日黔中之所宜亟講者伏乞會 題

加謚等因呈詳到臣除批仰候會 題行外該臣會同巡

按貴州監察御史宋興祖看得已故南京工部尚書孫應

蒼起家黔南讀書中秘謚論關四海之休戚嘉隆間時有

讜言進退係一生之重輕山林內晚全勁節 三朝元老

勲名久勒於鼎彝一代真儒淵源直濟於洙泗望已隆於

藏壑論益定於蓋棺在黔已崇祀於鄉賢在蜀更配享於

書院况羊舌之鬼已餒於廟而月旦之評不改於鄉微獨

徵人心之公益足定 國論之是既協輿情允宜易名相

應題 請伏乞 勅下禮部再加查議如果臣等所言不

謬將孫應蒼 賜謚易名庶 昭代真儒得光泉壤而矣

方士子有所矜式吾道幸甚斯文幸甚謹題請 旨

留入 覲官員疏



謹題爲朝 覲事先准吏部咨前事內開萬曆二十九年正月初一日天下諸司官員又該朝 覲之期三載述職大計羣吏黜陟幽明關係尤重預將應行應革事宜題奉 欽依備咨到臣准此該臣會同巡按貴州監察御史宋興祖議得 朝廷計吏不以遠臣而遺臣子覲 君不以殊方自阻貴州即在邊徼三年一覲 令甲常期即令所屬正官俗脩 覲禮不許規避辭勞顧臣等所屬八府七州八縣有未全設例不入 覲者有先年題 准不覲者近因地方播賊甫平瘡痍未起有不得不留者如鎮遠府知府張叔璽因該府四境多苗先任撫臣何起鳴題

奉 欽依每遇朝 覲之年准令議留其未全設衙門如鎮寧獨山鎮遠施秉印江婺川清平永從銅仁等九州縣應照例免其入 覲其餘郡縣正佐幕屬雜流當茲地方多事播酋即滅殘黨未息或安插降民或清查荒地或勘戢夷苗或收支錢糧多難離任不得不爲權宜之計理當具名請 旨施行先經案行三司查議今據布政司掌印左布政使應存卓會同按察司按察使易登瀛都司署都指揮僉事王納忠會議前來該臣等復行參酌如貴陽府知府劉冠南新任未及三月例應免 朝推官張應選在任頗屬空閑相應入 覲思南府知府陰鎔石阡府知府



江至道都勻府知府鮑獻書俱與播鄰播事即平近議改流疆理田土正屬郡守黎平府知府熊廷相見在議剽皮林寨苗貴陽府定番州知州王應昌委沙溪查理播州疆界同知王孔固署本州印思州府推官吳天祐查覈龍泉功次思南府同知張羽鴻協守龍泉查餉推官趙民說署思州府印銅仁府推官袁旦署本府印都勻府推官楊應第平越駐鎮查餉普安州知州龍時躍委河渡查理播州疆界判官周光溥署本州印安順州判官周懋良署本州印麻哈州判官盧標署獨山州印以上一十六員似難離任貴陽府經歷吳德潤上馬司吏目王致道廬山司吏目

朱仁壽木瓜司吏目胡有進程番司吏目馮臣洪番司吏目陳聯芳羅番司吏目朱權思南府沿河司吏目蔡世福石阡府石阡司吏目賈符龍泉司吏目劉玉鑾鎮遠縣典史楊啓都勻府邦水司吏目王朝相獨山州吏目陳良材清平縣典史譚文嘉安順州吏目盧盡禮宣慰司中曹司吏目毛應瑞養龍司吏目晏啓魯垂西司吏目唐以儉新添衛新添司吏目萬一貫把平司吏目王裕丹行司吏目楊應科清平衛凱里司吏目謝明思州府都素司吏目金台以上二十三員俱在軍前出內糧餉未及銷弄稽覈首功未經冊報亦應留用貴陽府小程司吏目敖應春卧龍



司吏目駱文奎盧番司吏目廖種金筑司吏目史立學黎  
平府經歷高如斗永從縣典史丁崇德潭溪司吏目楊順  
明新化司吏目黃拯歐陽司吏目楊大棟湖耳司吏目王  
慎八舟司吏目曾繼孔中林司吏目李時古州司吏目吳  
朝惠曹滴司吏目黃德淳洪州司吏目倪牧都勻府都勻  
司吏目王啟沛平州司吏目劉三鳳麻哈州吏目施良臣  
安順州寧谷司吏目王台西堡司吏目段聯瑚鎮寧州十  
二營司吏目趙端萃康佐司吏目熊鳳陽永寧州吏目吳  
德明思南府經歷饒崇奎朗溪司吏目徐禎宣慰司劄佐  
司吏目周之碩青山司吏目胡大高底寨司吏目吳汝繁  
水東司吏目楊茂光龍里衛大平伐司吏目張大紀以上  
三十員或因部落夷關不寧正當勦處或以殘寇出沒叵  
測正在巡捕或因委收倉糧未交正在磨筭并俱皆地方重  
務難以離任者也相應題請如蒙皇上軫念邊陲流  
官原少師旅方戢殘破殊甚伏乞勅下吏部再加查議  
將各官姑留在任管事其餘應該入覲大小各官督令  
照例依限起程趨赴庶脩覲之重典不虛而夷方之經  
理有賴矣謹題請旨





國家圖書館, NATIONAL CENTRAL LIBRARY, TAIWAN, R.O.C.

異  
卷之四  
四



蟾衣生黔草卷之五

泰和郭子章相奎甫著

友人楊寅秋義叔甫校

奏疏

平播敘功疏

謹題爲 天威昭布播夷蕩平謹敘黔中在事文武各  
官功罪以彰賞罰以明勸懲事萬曆貳拾捌年陸月初陸  
日合參省之兵檇十年之寇楊應龍窮蹙雉死妻子駢首  
就縛絕無噍類已經星馳 奏報訖本月貳拾伍日准總  
督右侍郎兼都察院右僉都御史李化龍咨因破賊滅巴



及一旬煩爲轉行該省監軍等道速將各營官兵以前關外關內并今日破圍殲賊前後擒斬功次并俘獲招降及奪回被虜人口各數自上緊造冊齊覈其領兵將領等官必須酌定某官立功最多應陞某官次之應賞某官無功應削某官退縮債事應罰與司餉等官運餉遲速有無功過應敘應賞等項俱一併評品分別等第詳註詞語併報以憑覆覈會 奏施行等因准此隨行左右監軍及紀功司道考覈造冊去後今據左監軍按察使楊寅秋呈稱查得烏江河渡一路沙溪一路先該總兵董元鎮主之職寅秋監之副使洪澄源督兵於沙溪叅議梅國樓督糧於烏

江河渡秋以貳拾柒年拾壹月受事首議兵將作何部署哨道作何策應險夷作何偵探器械作何繕治演習先登作何激勵糧運作何料量師涉作何預計俱經詳允竭晝夜料理去後烏江河渡逼播治柒捌拾里而近又該職秋覆議必探水西哨抵落濠水探平越哨渡疆界河及川中萋山關畢集方會哨齊驅若獨以壹哨嘗敵賊必併力一向前事可鑒俱於拾貳月具詳叅院允示遵行間本月初月誓師後水西把事王嘉猷領防守烏江兵自願參月初參初陸等日攻奪烏江關緣猷向與賊唇齒深交旣願破關絕好自難膠執前議就經犒賞獎率尋以水漲逗遛愆



期壩陽守備陳雲龍同永順兵不依主將令於叁月拾壹日徑奪烏江關斬獲賊級壹拾玖顆永順彭宗卿彭牯牛等於鬼國斬級陸顆俘獲肆口焚燒關樓附近關邊賊寨燒掃一空看係孤懸恐難屯劄星飛督催鎮雄府知府隴澄把事王嘉猷兵馳赴雞家寨出刀靶水催安疆臣兵馳赴昌田驛出落濠水犄角策應拾貳日就該統兵遊擊謝崇爵雲南坐營中軍張澍督領雲南祿州等土兵標募兵都司遊擊張秉忠督領泗城土知州岑紹勳等兵各乘勢渡江攻克河渡關前後擒斬首從姦細共斬級壹百伍拾柒顆生擒貳拾陸名俘獲伍名口賊知我兵各路未進於

拾伍拾柒日併力前來衝突兩關不守官兵損折立檄隴澄躡蹤邀賊河渡歸路如道里迂迴乘虛直擣賊巢據報救河渡必叁日抵播境貳貳日與其攻外而遠不若攻內而近等情賊見隴澄深入當日奔回隨據隴澄揭稱該標下中軍劉岳督本府領把事王嘉猷於叁月拾叁肆等日攻破苦竹關平嶺關共殺賊斬首捌拾玖名投降貳百伍拾叁名拾陸日自刀靶水移營賊兵截路追過新站前後殺賊肆百柒拾陸名苗頭阿曲等伍名據報夷俗原不斬級實止解苗頭伍顆餘功未委虛的又該畢節督兵副使洪澄源統兵叅將朱鶴齡督宣慰使安疆臣領目把陳恩



張崑頭目柯阿箇阿五等於參月拾叁日分兵進取首克  
新關從間道破傳頭石壁一帶關隘打破大紅關胡石口  
黑水關拾伍日攻破板山園前後共斬殺射死苗賊貳百  
柒拾陸名亦稱夷俗原不斬級未見功報招撫國民男婦  
陸百房計壹千肆百叁拾伍名口拾捌日目把陳恩等調  
撥以白魏良海等督兵於清塘水等路堵截應龍歸路生  
擒張受等壹拾玖名拾玖日夜賊兵前來劫營生擒彭四  
等陸名本日各目分兵叁哨攻破落濠關會劄大水田將  
桃溪衙違禁房屋燒燬貳拾叁日督同義官李武楊澄清  
等生擒賊陳元等捌名據報前後殺賊叁百捌拾陸名未  
見斬級功報實解生擒苗賊楊四元都哥張受彭四等壹  
拾柒名又准畢節道移解生擒陳元等捌名千戶王三錫  
王有聲李武等斬級伍顆轉解驗明訖又據隴澄揭報師  
次大水田發兵攻打長箐賊拒敵殺死督兵把總陳啓禮  
并隨軍拾餘命當各兵奮勇追殺賊柒拾餘名賊首楊豹  
阿寡等伍名將賊首首級伍顆具解軍門委驗訖參月貳  
拾陸日播賊應龍差小童吳比金萬富齎送書儀騾貳隻  
金銀壹盞貳副折程貳拾兩衣著段貳端赴營投見當拆  
來書驗係楊應龍妻田氏餽送禮單當將來差斬示營門  
餽送儀物同禮單齎解乞賜驗明貯庫等情及將生擒賊



聽賊犯羅才羅慶并解前來審出前情無異又據安疆臣報稱參月貳拾玖日逆賊楊應龍父子因見鎮雄斬其來使首其魏儀親領苗兵柒萬分作伍路前來迎敵該水西鎮雄合兵自本日卯時至申時鏖戰斬殺賊首偽提調頭目伍拾餘人內有偽內官伍人各路共殺賊兵萬餘屍橫遍野前伍拾人內有壹人全身絹段金銀器械查係賊子惟棟待查的又報外我兵損折百拾餘名重傷參百餘名輕傷伍百餘名就據土官溫希舜當陣擒獲馬兵何老吐供相同隨准畢節道洪副使移解拒敵當先騎馬出陣賊首首級壹百零壹顆生擒者亞壹名轉解軍門行委三司

會同委官知州龍時躍王應昌辨驗訖又據安疆臣報稱逆賊心腹提調尚意黃繼枝官押板山落潮馬寨一帶苗兵參月貳拾玖日貳賊親在衝鋒逆首巨細事機皆其內參外贊先奉院道密諭遵承間就該本道用間謀計令貳賊來營商議退兵逆賊果信隨差貳賊同坐寨頭目夏文茂等貳拾肆人齎詐降文壹角另具禮單開送金銀臺盃貳副折段銀捌兩鞍馬貳副槍刀弩箭等項前來當伏兵河口將貳賊并坐寨頭目夏文茂從賊擒拏審實將原詐降文同原禮物移解到道轉解審驗有黃繼枝自盡身故斬級解驗明白賊從逃去參名又據安疆臣隴澄報稱兵



劉大水田被賊據守金刀坑圍阻截兵糧四月十一日發  
兵攻打賊黨力拒我兵奮勇齊登殺死賊首阿富等陸名  
苗賊叁拾肆名餘賊拚死拒捕隨豎招降旗幟該圍男婦  
出圍乞降共約一百二十五房收獲鐵券牌一面同賊級  
六顆解驗訖又據安疆臣隴澄報稱四月十三日督兵直  
抵播州治桃溪口獅子橋各賊奔潰隨將衙宇家廟新川  
後川等衙違禁房宅闔州賊黨民房悉行燒燬一面於十  
五日發兵直出奪復烏江老軍關賊兵截伏當令馬軍衝  
殺賊潰投箐次日黎明到關我兵奮勇奪占前後殺賊一  
百二十餘名生擒五十九名招降二百六十二房暫於果

哈地方安插節次擒賊招降俱該畢節道洪副使朱叅將  
移報相同先是職秋祇奉三院憲檄移行新任都司徐成  
整棚標募土漢督中軍馮邦濟把總王真操習火器銃砲  
手等兵催調廣西龍英歸順等州思明府等兵行委指揮  
羅萬善督押前來雲南守備沐榮把總署守備事陳用實  
催調雲南標募沅廣等兵行委原任守備童龍整棚雲南  
安時泰祿州廣南等兵移行原領兵遊擊都司張秉忠整  
棚泗城等兵移行督糧道梅叅議分發糧餉起集運夫駝  
馬分委普安知州龍時躍定番知州王應昌運發養龍河  
渡鱗次輓輸芟芻既備器械畢集銳氣載揚就經會同童



總兵督發各新舊土漢官兵於肆月二十一日齊劄河渡  
蒙巡按貴州監察宋御史牌申飭將領招納降民以分賊  
勢不得殺降冒功致干 天和等因遵行間蒙撫院行委  
威清叅政王邦俊前赴河渡督發糧運童總兵將新募銅  
仁陳邦揚等原挑選廣西親兵陳大縉等共八百名交發  
徐都司督童龍部領會哨進剿時賊首偽提調張守欽袁  
五受阿萬龔堂王廷耀同已獲男王承受等嘯聚長箐萬  
丈林等處職秋同大盜都司戴守禮量帶家丁馳抵烏江  
哨出刀靶水狼飛渡直抵播州海龍壩隨據水西把事王  
嘉猷將前報奪復烏江生擒苗頭阿訥阿利并楊酋妾弟

何惟富等肆拾壹名鎮雄把事陳阿官將奪復烏江生擒  
苗賊麻老虎阿倫等九名苗頭首級六顆俱經審驗申解  
訖餘級未解又據安疆臣報稱三月二十二日漢把劉景  
貴陳阿九等招撫過隴都猴場把事石盡忠等壹百零柒  
房同日漢把羅一龍陳應龍同協捕指揮白璋等招撫過  
高坡箐張王壩苗頭阿滿鄆承爵等六百三十二房又據  
報四月十五日頭目阿卜者遮勒進克海雲圍殺賊一十  
三名招降民二千二百餘房又差目把魏良海胡文魁阿  
戎等領兵進攻泥壩苦竹養雞等圍殺守圍苗賊二十四  
名招降民葉善等二千八百餘房并川江客民九百餘房



賊龍原虜草塘司官民四百二十七房俱安插鄰近地方免亂兵殘害等情賊級未見解報隨准童總兵張都司手本報據泗城土官岑紹勳報稱奉令攻復河渡關協擒賊因二十六日寅時至河渡西岸該本州應襲岑雲漢同督兵指揮李懋樑督陣官胡邦奇龍英州應襲趙政立思明府等目兵併力奮擊當陣斬獲四十三顆招撫過降民梁雲等一百二十九名口安插洪邊地方又准徐都司手本報稱二十六日督率把總羅寵等招撫過賊黨王雲等一千四百三十七名口安插瓮耳大山凉水等地方又准徐都司手本報稱五月初二日督把總土同知羅寵楊遇春徐大綬等生擒賊首龔堂苗頭謝友貴潘廷貴楊承祖坐寨頭目黎民倫董三苗賊尚阿蘭并董三家人等共六名首從共拾貳名首級一顆招撫過賊黨康五元彭一等五百五十五名口又准張都司手本報據泗城土官岑紹勳指揮李懋樑於初十日督兵剿捕長箐生擒偽提調賊首張守欽一名從賊一名斬級二十三顆十一日泗城官男岑雲漢督兵於清潭攻打洞口生擒賊首袁五受提調王廷耀男王承受從賊八名斬級二十顆招撫殘賊宋荣甘茂王積脉等男婦二千四百七十二名口安插雷水長山地方又據鎮雄把事李萬年報稱萬年等接護左監軍渡



烏江進播哨至石子了賊伏深箐突出拒敵該陳阿宦督兵截殺斬獲賊級一十七顆次日護至牽狗洞賊放箭拒殺官等斬獲賊級二顆生擒賊從一名戴都司督家丁生擒四名指揮羅萬善斬賊級一顆就於長溪劄營處所解監軍審驗轉解訖又據安疆臣隴澄報稱官兵屯劄養馬城關口攻打前門鐵柱關大路該司府分撥頭目魁阿等砍伐後囤箐林梯山攀崖探尋小路三十餘里直抵海龍囤後賊見我兵劄近肩背連日出城衝殺我兵合永寧官兵自左槽開路進抵後箐山頂營前貳土山係賊樵汲咽喉賊屯勁兵拒守蒙左監軍同畢節道懸賞五月初九日四更結束二職同督陣官劉孟銑王安民羅萬善等乘霧抄賊營後黎明攻擊賊擁衆死戰該頭目覺已等奮死殺賊不計從寅至未方將賊兵衝退占奪二山職兵劄右曹副總兵劄左陣亡阿白等拾五名中傷烏鮮等三百餘兵本月二十四日總兵李應祥接管印務督率烏江河渡等兵又蒙雲南撫院行委叅將盧承爵督募兵前來該職寅秋督發徐都司帶領烏銃火器手一千五百名童龍帶領安時恭陳邦揚等兵一千名泗城龍英等土兵六千五百餘名合水西鎮雄營同劄後囤節奉憲令各道鎮克日輪攻後囤因各路占據已定無處屯劄會營中流言四布



該職寅秋會同洪副使宣諭水西鎮雄將所刊通奪占右槽山坡一帶營盤盡讓官兵屯劄各官目於二十八日自願遠嫌移出海龍壩口把截立刻移行川貴劉總兵李總兵各先後督所部兵到圍六月初四日三省道鎮共議總兵劉綎李應祥於初五日總兵陳璘吳廣於初六日各照期分打劉李二總兵合哨分左右信地劉總兵攻土城門以左李總兵攻土城門以右該職寅秋會同李總兵右監軍叅議張存意副使尤錫類將右路信地分撥三枝以都司徐成督河渡哨守備音龍領廣西把總陳邦揚陳大縉雲南把總署守備事陳月實安時泰等兵平越哨副將陳

寅等哨下把總劉恩安世珍吳國輔孫之襲等兵奪鳳凰嘴由右嶺進都司張秉忠督平越哨把總華統薛應時等兵由左嶺進領河渡哨泗城龍英等土兵於圍右崖壁截殺都司戴守禮督河渡哨把總牙廷相操守指揮馬化麟各銃手家丁平越哨把總張奇盛吳文秀等兵由中嶺進督安疆臣隴澄分兵於海龍壩泥圍等處截賊衝突奔逸先該都司徐成守備童龍會同副將陳寅議得鳳凰嘴哨險賊兵屯據死守必須衝鋒奪占鳳嘴山頂先得地勢方可攻取土城該三道即發懸賞銀二百兩分給各兵初五日五鼓會同劉總兵各照畫地齊攻賊抵死在於鳳嘴拒



敵黎明我兵奮呼一湧衝殺賊兵奔潰退走土城內我兵乘高頂大銃鳥銃火箭火磚俯瞰齊發賊立脚不住登時攻倒土城一面拆卸一面打開土城內排柵敵樓賊據月城矢石如雨職寅秋同李總兵立枹鼓對山拔刀麾兵前進退縮者立斬鏖戰至巳未緣城接梯高招先登各兵用肩頂城上先登者手挽魚貫而上河渡哨陳邦揚親斬三枝冠帶管事藍鳳鳴首級一顆中軍指揮羅萬善親斬何提調男何訓首級一顆當係投降偽內官葉正陽識認賊從首級四十七顆當陣奪獲百子銃一門賊奔崖墜死及銃死不及找級者不計其數將月城拆倒將土城月城

樓同劉總兵即時放火燒燬賊奔入大城死敵自午至申應龍父子親領首披堅出城衝突三次每次我兵用佛郎機百子銃等項直對城門齊打賊被傷退回天晚兵已疲饑三道再懸犒賞各兵歡躍齊心就於月城劄守舉放號火銃砲道鎮露坐嚴警賊兵膽落在城叫噉乞降至次日黎明陳吳二總兵照依分定日期接攻賊倒戈奔潰如蟻各路兵一齊登城擁入內城賊酋楊應龍將臥房發火同愛妾縊死要得自焚時五路總兵官齊圍賊衙賊妻田氏男楊以棟妻田氏楊良棟妻田氏楊奇棟楊勝棟妻田氏賊女貞惠貞瑞貞福楊朝棟妻田氏子松壽春壽女性福



賊首何漢良田一鵬子六老同偽內官使女一時拏獲五路道鎮將賊屍擡至城樓喚伊妻男五司奏民同驗真的俘獲賊親屬公同點明收繫城樓宣慰司印田氏携帶在身驗交陳總兵暫行收執續獲賊男楊朝棟楊惟棟俱見在聽解各該有名賊首除斬級外河渡沙溪生擒賊從弟管九族錢糧十二路督軍總管楊兆麟偽提調聶璽彭永壽偽內官張元趙天瑞主謀走差探聽向問遣今逃回文之宗即文章連前獲大提調尚意坐寨頭目夏文茂張守欽袁五受龔堂等共九名投降偽內官葉正陽馮元宦張元趙添瑞四名節該領兵官將擒斬賊首從移解前來審驗轉解兩院轉行按察司審驗去後計前後徐都司部領童龍等兵共斬獲首從賊級二百七十九顆生擒賊首從七十九名招降二千三百三十名口俘獲賊屬二百零三名口張都司部領泗城龍英等兵共斬獲首從賊級七百七十六顆生擒賊首從二十八名招降七百四十名口俘獲賊屬五十七名口戴都司部領馬化麟家丁等兵共斬獲首從賊級四十二顆生擒四名俘獲賊屬七名口通計河渡烏江一路共斬級一千一百四十四顆生擒共一百一十九名招降三千七十名口俘獲二百六十七名口又據安疆臣隴澄報稱奉令把截海龍壩口初六日惡苗奔



突衝出泥壩圍等路該職督率目把陳恩王嘉猷柯阿箇等奮勇截殺生擒苗賊王貴等一百零七名俘獲苗婦十口初七日賊伏箐奔出目把周愷陳恩等生擒苗賊播賊除審放外實六十三名俘獲賊屬四十一名口又據呈報奉左監軍密諭緝拏原殺綦江房遊擊兇犯馬騰漢及賞格有名播黨解報該目把阿石陳德擒獲馬騰漢又目把丁良茂李元玉等擒拏賞格有名大提調陳大恩門子王邦紹即王邦兆該本道先後轉解兩院轉發按察司訖又據報稱前後招出龍安水提調鍾祿馬院提調朱鶴管獵提調朱鵬馬坎坐寨陳大富雖係投降原是有名賊首不

敢隱匿又招出管事偽內官丁朝元管板山圍偽內官劉元管泥壩圍偽內官葉善元俱原悔罪投降但係淨身男子非土司敢用等情先將鍾祿丁朝元劉元葉善元具解前來隨奉督撫憲牌行查賊子楊惟棟前報斬級今何擒獲見在隨據安疆臣呈稱大水田奮勇殺賊萬餘賊首約五十餘名內一名少年裝束迥異軍中有認係賊子惟棟時未敢信飛報院道文內待查的又報次日擒獲馬兵何老供少年被殺者係賊第四子惟棟押發賊屍枕籍中辨驗據執相同方行找級同何老并解院道審供一口後左監軍圍下招降偽內官葉正陽供報死大水田者的係首



親信門子何元保狀貌裝束俱與惟棟一樣時欲檢舉尋因困破今何老見監可審原報見案可查抑或天氣炎蒸屍變亦係何老悞認竝非欺蔽等情通計前後斬關破困除夷俗原不割級者無憑查覈外共已解驗賊級一百七十二顆已解驗生擒賊首從三百五十四名招降八千六百八十六房共三萬餘名口又據畢節道移稱初六日本道隨營督兵指揮徐懋功千戶左堯臣把總許成名等各領隨營親兵於濫泥毛坪把截初六日賊苗衝出各兵奮勇生擒苗賊三十五名內偽長官一名趙鳳儀搜出前朝賞功勅命一道賊級二十三顆又據中軍劉岳報稱督率隴澄兵於海龍壩口把截同親兵斬獲二十六顆解赴李總兵移行紀功陳知州就近審驗外通計河渡烏江沙溪共斬級一千三百六十六顆生擒賊首從四百七十三名招降共三萬三千七十名口俘獲二百六十七名口除生擒首賊分別應獻俘應梟示俱審供吐真確斬獲首從賊級俱辨認的實試驗明白招降暫於附近地方安插事定議復俘獲變價入官係被虜者查發親屬領回另造冊報外該本道會同紀功按察司按察使易登瀛畢節道副使洪澄源布政司左叅政王邦俊左叅議梅國樓看得楊酋逆節滔天提封據險不下千里而遙而迫近黔省烏



江河渡之間八十里而近我一投足即害地彼一鼓翼即壓境兵分則衆寡不敵不分則咽喉不守不進見為示怯進則苦於寡援方賊之併力一向阨我烏江河渡之師也人疑不釋於安兵賴督撫軍門審勢決策震疊鼓舞安其心而作其氣遂有大水田之捷首摧賊鋒方兩關之既克不守也人謂解嚴取之後不復鼓行而西矣賴督撫軍門徵兵厲甲獎率新舊之兵決命賈勇載渡險關猶能執訊獲醜從諸路深入賊阻方水西安兵之遠嫌拔營移劄也人謂安兵解而河渡之孤壘不得圍陳合圍雷擊矣賴督撫軍門焦勞主持以威信制夷命以輪攻申軍令以懸賞勵士心六月初五日黔兵得合川東綦南哨齊驅先登一鼓而奪鳳凰嘴再鼓而克土城月城質明賊不戰倒戈遂平兇逆救萬靈之塗炭拓千里之封疆繫絲天授夫豈人謀等因又據右監軍右叅議張存意呈稱平越哨未奉師期之先適遭東坡劫殺之慘興隆偏橋平清之間官道不通者三月該本道會同帶管守巡道尤副使遵軍門密令集兵大剿掃蕩黃飄臺蠟平崖等寨火其居掘其穴斬獲雖無多級奔遁殆靡遺種軍民稍稍樂業道路漸漸肅清僉謂此一舉也當為黔中首功則叅將劉效節調度於城中守備伍萬鍾汪如淵土官蒙詔把總張鶴翀各率所部



官兵鼓舞於當陣而先鋒衝敵所向無前在水西把目王嘉猷張崑領羅兵一千名功尤表表至今未蒙敘錄公論缺然及奉督撫分布一路由興黃直掃白泥草塘等處一路由平越牛場乾溪乾坪直掃四牌等處自二月十二日起至本月終止我兵漸進賊亦漸退搜山擒斬俱屬零星驗明冊載外首記其發軔開鋒之勞則三月初二等日副總兵陳寅統領土官蒙詔土舍莫勞中軍官孫仲謨督陣官楊守乾李繼晟家丁陳定等有漩水囤之克為事官蔡兆吉統領土舍楊治隆土官張元虎把總猶鶴安生等有天邦囤之克原任守備伍萬鍾統領把總呂守現李正中阿亮等繼以百戶李師沆中軍官張奇盛率領把總華統吳文秀宋世臣汪世才等前後夾攻有三百落囤之克通共斬獲賊級二百一十五顆俘獲賊屬一十七名口賊仗器械五十三件而都清守備汪如淵劄兵清池令把總張鶴翀許攀龍等帶兵搜山直抵四牌草塘松坪招出播民楊世祿等携家二十九名口出降令充鄉導報效以上俱於三月初陸等日呈報訖次述其乘勝長驅之績則三月初七等日副總兵陳寅統率土官蒙詔舍把莫勞家丁陳定同守備汪如淵等漢土官兵拒賊於四牌高囤之下坐營守備柳國柱中軍張奇盛統率把總吳文秀百戶李師



沆等兵由後路把總華統宋世臣朱運昌千戶張翀等兵  
由前路與陳寅部兵策應偷攻於四牌高岡之上為事官  
蔡兆吉統率土舍楊治隆土官張元虎張蘭把總猶鶴楊  
通震安字戎茂才同督陣官馮伏繼以守備伍萬鍾統率  
土官楊燧把總呂守現呂廷祿葉逢春等由小路攀崖放  
銃直掃龍水岡之穴通共斬獲賊級一百六十二顆并賊  
仗八十三件而蔡兆吉復令把總猶鶴等督兵於十二日  
黎明抵青岡岡攻打共獲賊級二百二十三顆生擒謝王  
保等二十六名俘獲賊屬男女七十八名口奪獲器械二  
百三十一件并被虜男婦六口以上俱於三月十七等日

呈報訖至是而軍聲已大振矣所限者長河一帶之水耳  
深潭斗岸賊衆堅拒非船筏不得渡非火器不能抵時則  
李總兵親督中軍張奇盛百戶李師沆沿河駕三眼百子  
鳥銃對岸放打責令造船指揮邵元爵協造土官金世忠  
并差指揮周宗堯曹選星夜刻期催到船隻繩纜分發各  
渡頭於是副總兵陳寅先令中軍孫仲謨土舍楊治隆等  
里夜引南丹等兵偷渡構皮灘潛伏山後以為策應乃親  
領把總家丁陳定等由袁家渡守備伍萬鍾汪如淵領千  
戶李朝陽把總張希軫杜廷武汪世才督陣官高連等兵  
由疆界河為事官蔡兆吉領把總猶鶴等兵由吳歪孫家



二渡各浮水搭橋奮勇登岸首尾屯劄通共斬獲賊級二百二十九顆俘獲賊屬一百二十三名奪獲賊仗九十二件諸葛銅鼓二面奪回被虜男婦一十七名口此皆三月二十一日以前事而長江不守乞降者頗多該本道會同李總兵揭旗招撫戒勿妄殺惟時為事官蔡兆吉先納巨賊李得祿等獻船二隻以為先聲而男婦六百八十二名口降守備伍萬鍾責差把總薛應時等嚴禁需索而男婦九百零六名口降守備汪如淵招致地里壩李彪等宣諭恩信而男婦二百三十六名口降其餘牛馬器械家夥等物不計悉陸續發內地安插此收拾江外之大槩也至是而賊膽已半寒矣所恃者黃灘千仞之關耳層崖壁立賊眾死據非鄉導不能入非掩襲不能取時則李總兵傳令副總兵陳寅中軍孫仲謨等揭示免死令票并報效賞格招出虜民蕭仁德唐榮智等計擒白泥土官楊正邊楊通漢父子並其妻子三百餘名口及本國男婦共九百一十三名口於是副總兵陳寅統率百戶李師沆中軍官張奇盛納級指揮李世培把總張希軫杜廷武張世敬易之謙土官楊燧監軍督兵二道督陣指揮周宗堯曹選何昂臣張體仁千戶張紳陳志道把總劉朝臣劉承胄李邦舉彭夢龍等攻其關之前用新降石勝鳳王志龍王志虎王賓



王倫尚習中及播民王其質從墳林暗渡襲其關之後生擒首惡王大安王愛追至張王壩盡掃其關之左右羽翼收兵堅壁立營固守通共斬獲賊級八百伍十六名顆奪獲賊屬牛馬被虜男婦器仗不計此四月十二日以前事而險關既潰乞降者益衆該本道會准李總兵委官宣令坐寨安撫惟時為事官蔡兆吉以招到夷民丘伯芝徐受等一百八十名報降頭石勝鳳以撫過虜民老鷹岡萬餘名報其餘牛馬器械家夥等物不計陸續半發內地半仍本地安插此收拾江內之大槩也嗣是江外關內之險既失而賊勢已弱三省七路之師並進而賊計益窮惟有脅

叛苗携妻子退據海龍岡而已彼其數年精力用之一國前後重關左右深谷將自謂負隅之虎莫可誰何而督撫嚴觀望之誅官軍矢必克之志以五月五日檇巢六月六日滅賊惟時攻守後關則副總兵陳寅守備伍萬鍾督同紅旗官楊守乾中軍張奇盛指揮李世培加級指揮張世敬把總張鶴翀吳文秀宋世臣李茂春陳汝栢等預備攻具勉竭攻力而都司徐成戴守禮遊擊張秉忠則又臨時鼓勇驅率官軍先登者也攻打前關則副總兵陳寅都司莊志傳守備伍萬鍾統率指揮徐登階把總張希軫為首杜廷武呂守現呂廷祿金世隆劉朝臣劉承胄等為從直



上層樓縱火燒燬而為事官蔡兆吉守備汪如淵千百戶  
李師沆李朝陽陳志道段必明王民皞督率把總徐用賓  
孫應祥王朝朱朝岳楊正行李邦舉等則又把截要路立  
禦賊黨衝突者也計圍前後斬獲賊級一千一百一十顆  
生擒首賊楊兆麟阿萬并收獲昌田驛驛印一顆長官  
勅命一道俘獲賊屬三百二十六名口賊益窘急舉火自  
焚縊死牖下火未及身而完屍已為我兵所獲并收其妻  
子家屬驗明押解則在事將領官兵人人畢力用命而大  
功於是乎告竣矣自出師之日起至破圍之日止前後通  
共斬獲賊級三千五百八十四顆生擒首從賊七十名招

降播民共一萬八千五百四十五名口俘獲賊屬五百九  
十八名口奪獲賊仗兇器一千一百二十四件又查得思  
石一哨以龍泉為咽喉以楚蜀為犄角方三省之兵馬未  
集孤城之防守不支逆賊之窺伺更劇其勢誠岌岌乎殆  
矣自首惡趙仕登為曾文學梁廷祿等所誅而義聲稍振  
則都司錢中選之密謀也自土官安民志以身與妻子死  
賊而軍威復挫則守備楊惟中之溺職也迨夫 王師分  
布之後各有零星擒斬之蹟俱經冊載外紀其人者三月  
十五日該指揮胡効忠蔣崇賢率千把總劉廷俸唐顯威  
李佑哨長曾朝舉等攻打革羅水青龍黃沙圍斬級一十



六顆生擒二名十六日該指揮蔣崇賢率千把總楊廷耀  
李明龍許從龍梁廷祿李廷機黎廷官百戶薛瑞等攻打  
餘溪庄斬級三十三顆擒獲從賊一名此則我兵發軔宣  
威之一奇也而其餘伏路搜獲零功亦附焉三月十八日  
該把總李冠李君寶陳効忠等率兵打盤脚圍斬級二十  
顆奪回婦女三口十九日千把總周世祿戴天球李君寶  
率兵打保子圍斬級二十八顆此則我兵長驅漸進之一  
奇也而其餘伏路搜獲零功不與焉四月初十日該守備  
徐允爵部下把總陳光大操高第王嘉彥等率兵打真武  
圍羅家坪等處斬級八顆生擒一名此則我兵乘勝深入  
之一奇也而其餘伏路搜獲零功亦附焉自是為直搗關  
內與楚兵合為一哨矣時惟四月十一十二十三等日攻  
打趙生長坎等圍斬獲首級共肆百八十三顆則楚將指  
揮徐時達劉自西黔將蔣崇賢中軍官葉定遠領兵千戶  
把總張夢麟黃明儒周世祿楊騰龍李佑薛瑞朱蓋臣李  
廷芳許從龍陸希管田應瑚梁廷祿等之功居多而同日  
指揮胡效忠把總楊昌連等攻羅安水斬級八顆十四日  
指揮蔣崇賢把總李佑李廷芳等攻青蛇圍後山斬級二  
十五顆以及十五十六日把總陸希管於青蛇圍後山斬  
級三顆其功雖微亦有足述者也四月十八十九二十二



十二等日攻青山圍五鳳庄小三渡關欄牛坎野苗圍并  
青山圍後等巢七起擒斬首級一百四十五顆則指揮胡  
效忠蔣崇賢中軍葉定遠千把總張夢麟李佑薛瑞楊昌  
連李廷芳葉占先王國臣宋受隆越其進等之功居多而  
二十四日守備徐允爵把總冉維鎮等克懸崖等處斬級  
四十八顆二十五日把總王和民等擒斬首級四名顆二  
十六日中軍葉定遠等復攻牛坎雉子岔擒斬首級一十  
一顆二十七日守備徐允爵把總田建邦操高第等復攻  
五鳳羅安水等巢斬級五十八顆五月初一日指揮劉自  
西把總丁慶等攻青水橋賊巢擒斬功級一十五顆指揮胡

効忠遣兵出哨生擒二名指揮蔣崇賢遣兵出哨斬級二  
顆亦應併錄者也自是而直擣白田壩與三省七路合為  
一圍矣六月初五日該指揮蔣崇賢張拱極統率各兵於  
海龍圍後截殺斬級三十二顆而千把總薛瑞李佑楊廷  
耀朱蓋臣越其進王嘉言王國賓以及武生錢之禎錢之  
祺韓希奇越崇功等亦均效勤勞者也六月初六日守備  
徐允爵指揮徐時達蔣崇賢劉自西覃宗伊張拱極督兵  
齊進海龍圍上截殺擒斬功級一百七十四名顆而千把  
總薛瑞朱蓋臣許從龍李廷芳越其進王嘉言黃明儒楊  
騰龍以及千百戶應襲胡來觀鄆民悅武生越崇功等亦



在效勤勞者也至於大兵齊入賊宅共獲元兇尸首并收其妻子家屬驗解則本哨將領官兵咸在而最後初八日中軍葉定遠復於國後深箐斬級十顆例得併錄於冊以上思石哨除楚兵楚將擒斬功次聽楚中監軍督兵道查敘外所有黔中兵將總計斬獲首從賊級通共九百一十三顆生擒三十七名俘獲賊屬三百名口招撫出播民一萬零三百二十九名口奪獲賊仗兇器三百二十三件等因冊報到臣又准總兵官李應祥及據紀功各司道冊報相同除龍泉一路係楚將楚兵者聽偏沅撫臣敘報外案照萬曆二十七年閏肆月內准兵部咨為狡酋殘暴無忌糾

苗殺虜防禦官兵等事該本部題覆奉 聖旨楊應龍輒敢糾苗殺官好生悖逆可惡著即催督撫李化龍郭子章及劉綎著遵旨一併星馳到任調兵進剿不許延緩滋亂餘俱依擬行欽此本月二十八日准兵部咨為播苗大殺官兵飛報緊急軍情等事又為土酋糾苗數萬圍殺官兵勢已披猖幾不可制乞勅 新命督撫諸臣星馳赴任等事該本部覆奉 聖旨是這叛苗圍劫事情著該巡按嚴勘具奏李化龍并郭子章你部裏馬上差人催他到任俱限於五月內接管行事劉綎也著再催先帶家丁馳赴四川俱不許任情延緩致悞軍機其餘應該區處的上緊酌



議來行欽此萬曆二十八年二月二十七日准戶部咨為播寇突出充斥興隆黃平之間等事該本部題覆奉 聖旨是貴州孤懸著總督將供餉銀兩先儘支發仍遵前旨於鄰省堪動錢糧內先動後題逆酋抗亂普天同讎各省直官宜請助兵餉豈得托言違旨支吾推諉著通行與他每知道欽此本年三月十三日准兵部咨為播賊分道突犯全黔勢甚岌危等事該本部題覆奉 聖旨貴州孤危著總督上緊與各鎮撫應援兵馬若少准再酌量調募另給糧餉與他廣西雲南湖廣各兵俱要齊赴信地戰守不許逗遛觀望童元鎮堪否策勵及應拏應換總督務遵照屢旨及今部覆從實行不得姑息陳寅等若再不到叅來重處朝廷不中制該督撫宜協心力任相機行事欽此本年三月十三日准戶部咨同前事該本部題覆奉 聖旨是糧餉用兵緊務難待奏報輾轉鄰省應解的著總督遵照屢旨嚴行催取該撫按不許執留短少致悞軍機以後不敷任總督便宜徵發借助不必一一奏請仍先儘貴州免令告匱若有抗違不遵的指名叅來處治欽此本年三月十三日准戶部咨為暫留起解錢糧抵給貴州萬分緊急軍需事該本部題覆奉 聖旨這銀兩著雲南解貴州充餉仍著按括設處務足題定數目解去不得再行奏擾



欽此本年六月二十九日准吏部咨為播賊殘破孤懸土  
司尋復歸巢謹據實查叅失事將官以肅軍政事該本部  
題覆奉 聖旨貴州兵事方啟郭子章著照舊供職上緊  
剿賊欽此本年七月十二日准戶部咨為黔師報捷滅賊  
有期諸路未齊糧餉不繼懇乞 嚴旨急集兵糧議殊賞  
以收全勝事該本部題覆奉 聖旨是滅賊有期需餉尤  
急你部裏速行與各該巡撫官將屢經奏旨助黔銀兩上  
緊定限解去毋得託辭怠緩誤事欽此節准兵部差叅將  
朱鶴齡都司孫繼祖解到太僕寺餉銀六萬兩南京戶部  
差主事唐斯盛汪若冰解到餉銀拾萬兩川湖貴督臣李

差官解到餉銀一十二萬二千六十餘兩雲南撫臣

陳 差官解到餉銀一十萬四千兩遣守備童龍等助

兵萬餘而親駐曲靖以為聲援兩廣督臣戴 廣西撫臣

楊 差官解到餉銀三十八萬兩助兵二萬餘而遣都司

莊志傳等為之督率湖廣撫臣支 差官解到餉銀五

萬兩河南撫臣曾 差官解到餉銀九萬兩福建撫臣

全 差官解到餉銀一十萬兩江西撫臣夏 差官

解到餉銀三千三百餘兩直隸應天撫臣陳 差官解

到餉銀一千九百五十餘兩今據前因該臣會同總督川

湖貴州軍務兼理糧餉巡撫四川地方兵部右侍郎兼都



察院右僉都御史李

看得逆首楊應龍者浮竹遺孽

沉木餘兇四境盡屬

王土百姓久入版圖乃其敢於稱

亂而尤輕於犯黔者有三一恃地險烏江黃灘板角等關

俱與黔鄰喬林插月崇巖隱天疊嶂復嶺猝難攻拔一恃

苗悍黔所在皆苗九股紫江紅苗黑苗賊擇其鷙者妻以

七姓婦女子以五司腴田刻為鐵契名曰虎兵恩若父子

猝難解散一恃黨衆腹心爪牙實繁有徒充斥貴陽伺我

虛實亦有民黠得其金錢出死力為內應猝難譏察而臣

自聞 命入黔以來其不足恃者有五清藩司之金僅止

肆千括通省之帑不滿五千是無米之炊也金不足恃標

下兵僅五百餘合一省兵不過三千是無刃之戟也兵不

足恃貴陽距播二百餘里賊一日夕可至而又無長江天

塹以限之嚴城堅壁以禦之是裸裎當虎口也險不足恃

硝磺出於楚銅鐵產於滇道路險遠不能應手是張空券

下鷺也械不足恃山箐滿目田畝幾何而又舟航不通於

龍灘輿馬交頓於鳥道兵稍鱗集無處運米是令三軍日

呼庚癸也糗不足恃賊所恃若彼臣所不足恃若此以故

逆膽大於身殘性猛於虎始犯飛練次犯東坡又次犯龍

泉又次犯烏江詐為乞憐實則搖尾假名辯寃翻成吠堯

一時海內臣工僉為臣危即臣自顧將不知死所矣仰荷



皇上發赫斯之怒授必剿之符臣請兵即予之兵請餉即予之餉已又俞輔臣請罷黔中監稅之疏已又俞部臣科臣協濟黔中兵餉之請皇威震疊下神兵於九天聖謨深潛決睿筭於萬里密勿輔臣弼贊廟略必克敵以尊朝廷筦樞司馬指授機宜不以賊而遺君父計部百道轉輸頓令貧弱變為富強科臣屢疏指示遂使犬羊失其險阻以故文武將吏齊心協力人百其勇士一厥心而逆首猶據如掌之地延翹足之項竟於六月初五初六日共集堂堂之陣用成善善之功賊首投繯遂醢其尸妻子為虜靡有孑遺乃知丹浦綠林之險果不足恃長蛇狡兔之黨果不足憑天地合謀鬼神助順豈臣等區區庸謏智力所能辦哉一時同事疆場如總督右侍郎兼都察院右僉都御史李聲名燭於冰天忠義貫於霜日遼左逐虜不求紙上之孫吳夜即平夷自有胸中之方虎論功當銘麟閣紀石不讓燕然湖廣撫臣古談兵凜凜挺節巖巖敲去蚊蟲之羣已張先勢掃空狐兔之穴即紀雋功豈獨三楚覆孟頫令八番安堵偏沅撫臣江韜鈴在胷勲勞奕世卒探虎穴皆猶枕席上之安師出龍泉胥賴帷幄中之畫即偏沅已在其覆露而全黔且潤於餘波巡按貴州監察御史宋激揚夙懋弘猷謀

激揚夙懋弘猷謀



斷允資勝筭威令則火炎雷疾壯士氣於前茅籌畫則鑑空衡平振皇靈於破竹凡此將士之效命皆由憲紀之肅

昭兩廣督臣戴雲南撫臣陳廣西撫臣楊江西

撫臣夏福建撫臣金河南撫臣曾應天撫

臣陳興同舟共濟之懷篤輔車相倚之義志在馬牛之

歸放誓將梟獍以掃除犄角則或多出兵或少出兵不以秦

越而異視饋餉則或以舟載或以車載宛如手足之相扶諸

臣與臣聯事封疆寔多弘濟弟共為憲臣爰遵明例不

敢僭敘外其總兵監軍司道副總叅遊并督陣登先斬馘

各官謹逐一甄別而具列之貴州總兵官都督同知李應

祥勇冠三軍籌運千里黃灘決渡已奮鳴劍抵掌之雄海

龍拔城遂收犁庭擣穴之績此一臣者縮全黔之卒徒司

漢夷之命脉論功相應首敘以膺特簡者也左監軍按

察使楊寅秋沉潜熟慮拮据苦心擊楫烏江有百折不回

之勇援枹險囹真八面受敵之才右監軍右叅議張存意

手抉盤錯腹滿精神憤逆賊之縱橫誓平蟻穴激將士以

義勇竟落梟巢以上二臣久勞營中躬跋囹下功宜首論

而楊寅秋操縱羅夷備嘗艱辛後囹之勞績更懋張存意

出入巖谷間關險阻前囹之首功最多相應特加超陞重

賚仍需大用者也督兵副使尤錫類忠誠許國謀略出



人守平越六城頓令生苗破膽拔黃灘三砦坐收西賊游  
魂督兵副使洪澄源厚德鎮浮正氣邁俗駕馭羅甸如迅  
雷之激清風馳驟山林若輕車之就熟路糧道左叅政郭  
廷良風力强敏心計周詳總列郡以餉也如身心之運臂  
指驅千騎而飛輓若子弟之從父兄餉道左叅議梅國樓  
萬竈連營一心幹 國出緡於帑已足陳陳相因之需峙  
粟於倉竟成多多益辦之助以上四臣功應竝論而尤錫  
類洪澄源投足固崖之險馳驅行久郭廷良梅國樓愁腸  
米鹽之細籌筭坐煎相應陞級重賚以酬勞勩者也督兵  
副使路雲龍精神折衝謀猷戡亂忠信篤敬蠻貊之邦以

行禮樂詩書犬羊之氣自奪紀功督餉副使陳與相卓犖  
通才權竒俊識弘猷應變措思石於丘山敏手撥煩弄播  
苗於股掌右叅議張文竒守郡則棠陰路滿出鎮則驪駕  
功高罷精力於轉輸寧辭跋涉歷紛難於樽俎益展謨謀  
河渡督餉左叅政王邦俊古貌古心實行實政籌邊遼左  
歷多年而塵清腥膻餉兵黔陽無幾時而威震草木都勻  
督餉副使袁應文秉心諒直臨政方嚴始督運於都勻貌  
貅宿飽後稽功於平越涇渭鑑明原任右叅議今降調梁  
銓見事風生當機刃解雖逢回道路或少纓冠之雄而却  
賊興隆實賴金城之勢以上陸臣相應優敘竝賚而路雲



龍陳與相獨當一面張文奇將漕三楚相應陞俸梁銓保障興隆雖經降調亦當併敘者也總餉左布政使應存卓地望如山門庭似水縮舊新之軍餉無煩木牛覈文武之戰功總歸冰鑑紀功按察使易登瀛貞姿勁質鐵腸石心功罪攸明燭照數計而龜卜號令不撓雷轟電掣而風行以上二臣總一省之糧餉查各路之功級且共守會城分督保兵勞績懋著應從優敘紀錄者也興隆副總兵陳寅智能料敵勇可摧兇東乘長風則島奴釁鼓西樹赤幟則夜即焚旗龍泉副總兵陳良玘勇略卓冠一路才藝足了十人連破險關而勢成解穽頻誅劇賊而功味采薇畢節

參將朱鶴齡坐籌可折遐衝指麾儘閑方略輸軍興竟逼敵壘督夷兵終馳捷書原任遊擊今起貴州都司徐成間關百戰夷險一心鳳嘴首登才推萬人之傑龍圖旋拔望在諸將之先都司錢中選奇骨昂藏每勵討賊之志巧技精絕克全敵愾之威大監都司戴守禮鳴弦邊鄙橫戈夜即攻險固不避艱辛校箐寇屢有斬獲廣西都司莊志傳枕轡閩海說劔轅門董西粵之兵以長驅望且蘭之城而直檇以上七臣提兵深入協攻險固俱應陞賚內陳寅謀勇無雙堪膺登壇之選徐成先登第一應以原任遊擊加陞當一面之寄者也掌印都司王納忠脩城編保壯省會



金湯之固繕械除戎增營壘批檇之雄守備杜鶴鳴能讀  
漢書兼解墨守疏捕不替夙宵偵邏更嚴斥堠以上二臣  
馘級未效疆場乘障有裨刁斗內王納忠應加優賚杜鶴  
鳴同加賞賚者也原任守備今督滇兵童龍赴赴鷹揚桓  
桓驍勇塗甲冒火一日而拔月城摧敵析衝三戰而入虎  
穴都清守備汪如淵英爽有爲驍雄孔武守興隆堅壁不  
動掃四牌鼓行而前標下中軍署都指揮僉事劉岳志銳  
策功令嚴督陣在虎帳可資籌略檇龍困雅中縱擒原任  
守備回衛指揮徐允爵技藝精練器宇魁梧破關已見封  
丸攻圍不忘累革督兵把總署守備事陳用實偉貌昂霄

壯志投筆一清蛇豕之毒大渙蜂蟻之羣貴州衛中所鎮  
撫會舉葉定遠戈文耿耿馬足駸駸彎弧而兇黨膽寒揮  
羽而妖徒瓦解以上六臣俱應陞賞內童龍摧寇鳳嘴相  
應特陞以酬先登者也貴州都司張秉忠氣本邁羣志在  
滅賊始雖垂翅河渡未塞虜旗後能奮翼海龍終拔趙幟  
雲南中軍官今陞遊擊張澍蹶而益奮敗乃爲功意慮因  
百折而堅事變終一麾自定原任守備陞都司僉書今立  
功官伍萬鍾膽氣鷹揚雄姿虎視昔雖失之偏鎮今能收  
之桑榆爲事官蔡兆吉渡江恐後檇圍直前幾年暫蹶霜  
蹄此日應搏風翮此四臣者或爲前拒或佐後攻而張秉



忠張澍以河渡之失已經參論伍萬鍾以偏橋之失原行立功相應以功議贖俱行獎資內張秉忠功浮於過相應厚資伍萬鍾相應復職蔡兆吉拔自泥塗相應開伍復職者也監紀雲南廣南府知府黃宇借寇五馬移餉八番嚴紀覈二路服其元龜公歛散三軍倚爲都竈貴陽府同知徐庭綬職縮芻粟而畫箸才優身爲金湯而枕戈志切思南府同知張羽鴻轉輸甘風雨之衝出入忘荆榛之險貴陽府推官張應選總兵儲足飽戍已之屯放軍興不挂庚癸之慮思州府推官吳天祐當羽檄馳而不撓於豺狼及首功覈而能分乎鹿馬貴陽府通判劉鳳儀能講度支之策有資紅腐之儲鎮寧州知州李珪弩矢前驅而不畏囊赤樵蘇後爨而坐觀突黔求寧州知州陳聖佐飛輓則晝婉婉者居多紀功則才恢恢而益辦定番州知州王應昌縮三刀割繁不媯餉千屯履險如夷普安州知州龍時躍輸轉而三軍宿飽馳驅則百瘁忘疲施秉縣知縣袁尚紀三楚甘泛舟之役萬竈均投醪之恩銅仁縣知縣陳廷範芻飛粟輓而民自樂輸葶食新眠而士忘罷露清平縣知縣劉啓周紀驗每臨京觀查覈能辨蕭蘭新貴縣知縣龔一麀首功之辨驗不爽饒道之絡繹如歸以上十四臣均應厚資內張應選李珪王應昌陳聖佐龍時躍袁尚紀陳



廷範俱在軍前勤勞最久仍應紀錄擢用龔一慶雖經黎平降調相應并敘者也鎮遠府知府張叔璽思南府知府陰鎔推官趙民說石阡府知府江至道都勻府知府鮑獻書推官楊應第駐鎮黃平四川重慶府通判羅應雲印江縣知縣張鎔婺川縣知縣葛楚元鎮遠縣知縣文嘉兆以上十臣或專城五馬或司庾一方雄論風生聚米而山川可料嘉謀電發奏刀而體髀皆虛雖徵調餉兵執鷲羽未閑於講上而折衝樽俎神鉉若躍於腰間相應竝賚而知府張叔璽地當孔道拮据尤苦知府陰鎔賊犯龍泉支持甚艱尤當優賚者也烏江沙溪哨領兵官總督標下督陣指

揮郭承勳千戶王三錫百戶呂大業胡邦奇楊教姚可興軍門標下督兵官王安民千戶王真廣西督兵南寧衛指揮羅萬善伍屯所指揮李懋樑南丹衛指揮康應麟桂林衛指揮霍世寵太監操守指揮馬化麟南贛中軍指揮馮邦濟納級指揮黃運清廣西柳州千戶趙夢胤把總陳邦楊陳大縉安時恭牙廷相操守鄧廷卿鄧光宇丘富即張嘉震徐大綬章爾知王演李擒龍王學禮邵以讓梅調羹爲事官周易畢節衛指揮主于忠納級指揮徐懋功千戶張四端秦仕喬章甫王世臣左堯臣百戶林鳳舉王璽把總許成名陳潤平越哨總督標下督陣官楊守乾高連李



繼晟馮伏領兵官指揮曹選周宗堯張體仁何昂臣納級  
指揮李世培千戶李朝陽張翀陳志道段必明百戶李師  
沉王民皞把總張鶴翀孫仲謨張奇盛汪世才安世珍安  
生呂守現李正中易之謙華統吳文秀許攀龍朱運昌戎  
茂才安字葉逢春薛應時陳定劉恩鄭國明杜廷武李茂  
春陳汝栢張世敬劉承胄劉朝臣呂廷祿張希軫李邦舉  
彭夢龍徐用賓孫應祥王朝朱朝岳楊正行金世隆蔡繩  
周思石哨領兵官指揮胡効忠蔣崇賢千戶王嘉言試百  
戶越其進薛瑞把總李君寶黃明儒千總周世祿以上一  
百零三員凌霜氣勁溢匣鋒雄麾白羽以臨戎明能燭敵

指黃電而對壘奮不顧身或山立軍前而志懷禦侮或肉  
飛馬上而功收犁庭皆身歷行陣應特加優賚內把總陳  
邦揚陳大縉先登鳳嘴厥功最奇張鶴翀久守黃平斬馘  
功多效勞最久中軍羅萬善馮邦濟深入賊阻宣力最勤  
李師沉少年驍捷署中軍獨繫王真千里赴援造火器獨  
精康應麟鄧廷卿丘富郎王學禮前守河渡力斃賊後仍  
應通候覈實功次分別錄用者也軍門標下募兵官千戶  
李春元百戶王弘業胡朝賢把總馬武卿劉崑買米官指  
揮張世卿千戶傅良臣李東生把總王允聽宋真相買硝  
磺官指揮張元勳百戶蕭鳳鳴陳良翰買魚鹽官指揮楊



祖禹千戶崔仕堯百戶鍾岐鳳造火器官指揮謝升階許敬所馬逢樂百戶王曰賢護餉官指揮魯仲禮鎮撫張國壯百戶魏國忠把總李國保旗牌官蕭時芳朱萬春印鎮國白其心贊畫官王懋德王有聲張一龍鄒宗魯何世祿葉天植朱應明王永年彭應祖湯承禹標下把總劉奔劉岱白雲鵬李文學主見龍吳秉鉞李翔龍周明丁文明陳文立陳鉞王國忠葉瑞梁鳳吟羅緯金重王守邦黎元德袁備陳文德石安邦李逢元劉汝輔翁獻忠林監精蔣文堂烏江哨運糧催夫官貴前二衛指揮楊師震李棟材夏應龍陳尚策白璋烏撒衛指揮李國忠永寧衛指揮蘇通赤水衛指揮許維垣畢節衛指揮朱承勳普定衛指揮許應春普安衛指揮劉化龍安南衛指揮吳東俊千戶楊希堯劉子爵鎮撫陳三德百戶魯師孔沈應麟煙夢堯王國葵平越哨造船指揮邵元爵運糧指揮薛紹瑄金汝陵張維美國柱趙清陳堯年婁聯璧高位郭維藩林起鳳常靖國百戶冷壁趙之奇督兵防守施秉縣原任守備今革任史良將思石哨防守思南指揮洪應選百戶周希舜羅國器以上壹百零壹員名共擅英姿各懷雄志當貼危而形勝壯鞏堞社於金湯精鍛鍊而戎器除利銛鋒於霜雪或防賊險阻潛奪肘腋之姦或徵兵楚粵橫紓肺腸之憤雖



未身歷行陣均各效有勞績內蘇通署中軍料理繁劇楊師震李棟材握衛符供億樊苦夏應龍催餉偵賊張世卿市米辰常均應分別同加優賚而史良將防守施秉環縣皆苗一年無虞相應議贖者也婺川生員曾文學替畫官生劉孟銑雲南替畫官黃龔原任州同鄭文都司經歷劉苗前衛經歷李稠威清衛經歷何璉貴陽府經歷吳德潤安南衛經歷包一鳴畢節衛經歷黃熾赤水衛經歷李大賓原任京衛經歷曾學孔鎮遠府經歷劉澤興隆衛經歷唐咨禹清平衛經歷鄧邦文新添衛經歷方良知安順州判官周懋良吏目朱仁壽

大紀晏啓魯胡有進蔡世福唐以儉栗廷蘭王裕繆泮典史譚文嘉操簡驛丞盛文科武生張國揚共負脫囊之類恥爲轅下之駒或數馬移粟而程筭錙銖罔淆或除戎運器而什伍弩矢俱備赴死地如奔鶩急公家若求亡以上三十四員勤勞惟均俱應併敘內曾文學首誅劇賊趙仕登足寒賊膽例得陞級劉孟銑再入險阻亦冒矢石備嘗荼苦黃龔獨航單車萬里召募不辭劇易所當優敘者也宣慰使安疆臣報效成於感恩士宿飽馬騰槽殉封疆之急者數萬鎮雄府土知府隴澄忠勇激於慕義披荆棘冒鋒刃希馬革之蹤者半年雖海龍壩之移師未收賊於猗



角而大水田之麋戰實牽賊於腹心焚州有同燎毛斬關直輕拉朽况奪路奪山馳驅方銳乎攻取而讓山讓路恭順無替於初終既絕廣土之嫌自杜鑠金之謗在安疆臣應優加職銜寵以章服之榮在隴澄應優加服色授以世及之襲一體特加厚賚其諸目把陳恩柯阿箇等同土官溫希舜宋顯印土舍李保等通候覈實功次分別議賞者也永順宣慰彭元錦貔貅遶屯蟻蝨生胃烏江雖云少却而首克險關之功當書告歸原係復讎而身被數矢之勇亦烈相應厚賚者也泗城州土知州岑紹勳慷慨圖雪殺恥殲渠破逆堪築鯨鯢之觀龍英州官男趙政立奮迅思

附驥踪斬關入囹竝探狐兔之窟在岑紹勳首事未免失律而勢實不支在趙政立後事或出因人而力則已竭岑紹勳應加重賚伊男岑雲漢同趙政立各應給以冠帶仍一體賞賚者也獨山州土同知蒙詔守興隆已能完壁攻黃灘遂至空庭把總播州宣慰司土舍羅寵披髮薦復讎之誼枕戈效討賊之忠保靖宣慰使彭養正平州司土官楊治安土舍楊治隆南丹州土舍莫勞鎮溪所土官張元虎張勝藻吳國輔張蘭冠帶頭目阿亮土官蔡國勳雍水司土舍猶鶴楊通霑孫之襲皆效勞於行陣鎮遠府土同知何守德土推官楊通淮新貴縣土縣丞甯國梁皆竭力



於運糧土舍楊國宏王家聘皆勩力於防守播民今充鄉導千總令狐遠彭廷志趙仁甫等俱應分別量賞內蒙詔揚治隆效勞一年出兵獨多相應厚賚者也原任戶科給事中今爲民陳尚象助米一百石土官禮思明助硝一萬斤宣慰安疆臣母鳳氏身臨賊境數月陸續發私倉米三千石給軍武舉張鶴狎庶母章氏助米一百石土官安大順助米一百石永寧衛監生宋仕通趙希伯袁任各助銀一百兩生員沈繼祖聞於臯桑來鶴程雲路各助銀一百兩壽官陳嘉猷助銀一百兩俱捐家貲共濟時艱雖云燭火之光少助陽暉之明俱應優獎內陳尚象掖垣風高桑梓義重家徒四壁公爾忘私相應起用以紓厥猷禮思明助硝萬斤量加服色鳳氏助米三千相應旌獎章氏百石亦應量獎以勸土司者也原任總兵充爲事官今被逮童元鎮義稱虎臣節擁上將兩關旣克而復失雖未收東隅之功三捷旋踵而繼聞亦足雪於殺之恥况陳大縉陳邦揚先登之兵皆本官銅粵携來之卒論罪誠無所逃論功或足相贖第已經奉旨被逮不敢擅議原任清浪叅將今充爲事官劉效節守黃平一年頗效勞勩守東坡數月亦無踈虞祇緣奉李總兵檄令其居守奉陳總兵檄令其入營本官進退無據悻悻動氣跡似剛愎因而被叅相應



仍錄其舊功准復原職者也原任遊擊手充爲事官今提問楊  
惟中器埒斗筭心實祖儉龍泉失守已犯離局之條板角  
協攻未見獲嘉之勇相應盡法正罪或以近日斬獲微功  
姑令謫戍以免一死者也總兵標下中軍指揮陶汝夔體  
貌本雄才猷亦裕但二豎爲祟於牀第一籌未展於轅門  
相應以疾革任者也偏橋衛提問指揮劉之屏本以多壘  
因而舉囚據稱招撫似多徒矣然未解驗而徑云安置曷  
釋羣疑據報斬獲似多級矣然未臨陣而何處得來難逃  
公議此一臣者情罪未明難以功贖仍從原問歸結者也  
葛彰司土官安其位地與播鄰情與播通賊有公移則頻

爲傳送賊出攻刦則頻供牛酒此一臣者當革職提問以  
正其罪者也名色把總葉明遠徒負偉貌長懷市心竟違  
命於指蹤遂奔北於行陣今已繫獄相應正法以戒懦怯  
者也都察院咨送令史沈震郭應明按察司送到臣處書  
辦吏馬良臣鄭伋總兵李應祥下令史張思文左監軍書  
辦吏王天民陳俊右監軍書辦吏孫仲良張問善匪獨案  
牘勞形亦且艱危驚心似應比照九絲龔習箴宣夏鄭天  
寵等事例內將沈震郭應明張思文各免考照依本等資  
格就選馬良臣鄭伋等免其內外歷役考試照依本等資  
格選用承差趙孟懿水陸間關晝夜奔馳似應比照宣夏



杜詩等例免其外考其餘功次一聽巡按御史覈實序報  
供事指揮千百戶州判縣丞主簿典史巡檢驛丞等官不  
能盡錄聽臣分別獎賞外陣亡原任遊擊楊顯同伊男指  
揮楊應芝舍人楊續芝廣西守備白明達貴州守備阮仕  
奇霸陽守備陳雲龍龍泉司土官安民志千戶訾嘉猷守  
東坡百戶劉經仁冠帶總旗張翱把總張一仕賈文忠黃  
文煥楊王王彥偉甘靖方朝宗許應元陳可行段承恩王  
道王景陳啓禮督陣官何天慶奮勇擊賊爲國殞身既  
勤王事於生前宜霈殊恩於身後在楊顯父子三人  
同日俱陷白明達阮仕奇駢首就戮安民志罵賊被害忠

魂可愍在陳雲龍擅違將令厲魄堪憐且先有破關之功  
後有死綏之苦當照王芬例贈官立廟於祖職外另陰世  
職訾嘉猷張一仕等量贈一官厚恤其家以爲死事之勸  
在營病故貴州指揮徐登階鍾英廣西總兵坐營官陳璵  
雲南把總張應元雖未傳刃於腹亦云暴骸於野相應量  
恤給以棺具陣亡各兵另行查出通候覈實再加優恤者  
也原任四川左布政使今陞順天府尹程正誼江西左布  
政使沈九疇福建左布政使朱運昌湖廣左布政使胡心  
得河南左布政使姚學閔四川左布政使盛世承廣東左  
布政使王泮廣西左布政使沈脩雲南左布政使梅淳帶



管臨安兵備道按察使鍾昌帶管曲靖兵備道副使孟紹  
慶安普道副使黃文炳湖廣督漕副使薛士彥廣西賓州  
兵備副使陳勗志共取亂義切抹焚或爲晉人之角或爲  
諸戎之犄相應竝賚內薛士彥汎舟獨勞黃文炳督兵入  
黔仍應優賚以旌勤勞者也舊鎮雲南黔國公沐昌祚新  
鎮雲南總兵都督同知沐睿廣西總兵官李如樟雲南督  
兵叅將盧承爵世受 國恩共拯鄰難或爲已先之輓或  
爲彼先之推亦應竝賚內沐昌祚業已致仕助金二千相  
應特 褒以示優異者也潯州府同知何文偉不畏險遠  
押兵而無犯秋毫雲南署守備事指揮沐榮周憚辛勤督

夷而與同甘苦相應并賚者也所據賊逆楊朝棟楊以棟  
良棟惟棟竒棟勝棟等賊屬田氏小田氏賊女貞惠等賊  
首何漢良等同時因內擒獲俱經總督軍門審解 獻俘  
以彰 天威外內楊惟棟生死之報先後似涉參差實何  
老等供吐之誤研查委非欺弊此外則有逆首腹心惡黨  
瓜牙姦徒楊兆麟尚意夏文茂彭道陳大恩或以親枝總  
管九族十二路之糧馬或以親暱贊決拒敵詐降之狡謀  
阿萬楊正邊楊通漢等曾先鋒於飛練袁五受張守欽曾  
首難於烏江馬騰漢之殺將綦南聶璽彭永壽之拒敵窮  
困文章之主謀探聽於都會皆兇逆貫盈罪惡滔天今大



熟既傳首於一國門各逆宜伏鎖於闕下俱經臣差官  
押赴總督衙門類解明正典刑除各哨功用造送兵部覆  
覈外伏乞 勅下兵部再加查議分別文武諸臣功罪上  
請一應善後事宜聽臣等會同督臣經理條議另疏題  
請凡支用錢糧辨驗功級照例聽按臣覈 奏施行謹題  
請 旨



續衣生黔草卷之六

奏疏

播平善後事宜疏

謹題為逆酋甫平邊圉未輯敬陳善後事宜以備採擇事萬曆二十八年八月十八日准兵部咨為欽奉

聖諭事該本部題職方清吏司案呈奉本部覆議條列拾事內開一討善後原議逆酋平定必當改土為流而各土司有能縛會以獻者或世守其爵或瓜分其土此昭昭



泰和郭子章相奎甫著  
友人楊寅秋義叔甫校





在人耳目者也今事已定矣水西隴澄於五月二十八日業已撤兵避嫌矣除斬關輸忠功自難泯聽其從優敘錄以爲土司效忠奮勇之勸而一切大計可不因原議而規畫之乎謂宜亟行督撫衙門備查播州一地某處與某處連區某地與某地接軫作何分隸某處應設某府某州縣作何安置某地應置何將作何統轄及一切善後合行事宜悉心計處所有子遺作何安插空闕處所作何招徠務令獮悍不毛之地盡入範圍撫馭之中被我衣冠服我聲教釋其非心防其逸志奠安絕徼以紓西顧其有應行未盡事宜在督撫諸臣身在彼中心經其事必有長計遠

慮佐所不逮一併議妥作速具奏定奪等因題奉聖旨元兇旣殄凡脅從牽累的都免窮治流移的招他復業毋許豪強乘機兼并還與優加賑恤以安新定地方兵馬父戍勞苦酌量應撤的次第撤還未靖諸苗橫恣連誅就著撤回兵馬剿處不必待奏可卽便宜行事軍中一應有功人員俱從公敘來其餘皆依擬該督撫悉心行欽此欽遵等因備咨到臣臣近閱邸報內開山西道監察御史李時華題爲三省干戈幸戢萬年計畫宜周恭陳一二膚見以備善後採擇事內開條議拾款就中強半多言黔事就經備行布按二司監軍紀功守巡各道會議詳報前來



除兵部九款已經奉 旨者臣等悉心奉行外所有未盡  
事宜該臣會同總督川湖貴州軍務兼理糧餉巡撫四川  
地方都察院右都御史兼兵部右侍郎李化龍巡按貴州  
監察御史宋興祖看得播州善後事宜統言播事兵部釐  
爲十款析言黔事李御史列爲十條詳哉乎其言之矣當  
局者迷觀局者智臣愚迷於局似亦可以無言顧計者取  
多謀者從可 聖明稽於衆或不嫌於互發謹以膚見釐  
爲十二條或爲諸臣已言而申明之者或爲諸臣未言而  
專陳之者總之杼一得之愚爲地方長計耳如或封菲可  
采瓦礫不棄伏乞 勅下兵部再加從長酌議覆 請施

行臣等未敢擅便無任跼蹐俟 命之至謹題請 旨  
計開

一議改設郡縣看得播州之地東西相距二千餘里  
南北相距四百餘里雖云熟國亦係樂土今議改  
流東西可設二府每府可設二三縣播境原屬四  
川與貴州鄰二省界限原自分明至論建置大槩  
臣意自沙溪以至白泥當以烏江爲界設一府於  
白田壩而真州婁山松坎等處可爲三縣黃平在  
元已爲府矣當設一府於黃平而餘慶白泥二司  
可爲一縣雍水重安二司可爲一縣此沙溪至白



泥一帶建置之大槩也自酋泥渡江至婺川縣以  
三渡板角苦竹三關爲界其中漢夷田土錯雜惟  
湄潭可縣龍泉可縣龍泉土官安民志陣亡其子  
尚幼其印已失其土地已爲楊酋踐躡合無將龍  
泉改建一縣增築城郭而以安民志之子世爲土  
縣丞以爲死義者之勸其祖職長官世爲土主簿  
此則思石一帶建置之大較也至於衛所似可無  
設先年石阡思南思州龍安馬湖俱係改流竝未  
設衛豈不謂養軍不若養兵贍紈綺之世胄孰若  
贍矛戈之勁卒乎哉惟設二道一崇以彈壓於中

每二縣設一守備以防禦於外則西南半壁可恃  
無恐若興學校築城池設公署建驛遞度土田勢  
當次第脩舉而爲費不貲若仍屬於蜀則黔中無  
所事事若分屬於黔貧黔物力難支似當於剩餉  
內動支完日覈筭第播州之名其來已久播之爲  
字番之有才者也以故應龍阻兵崛起曠戾竭四  
方之力僅乃克之夫南越破而聞喜建呂嘉得而  
獲嘉名龍州平改爲龍安九絲夷更名建武卽播  
州納土於宋亦改名遵義計 廟堂當有定謨而  
播之爲名似當更易伏乞 聖裁



一議遴選將吏時亂則急武庫所乏者孫吳韓彭之流時平則急歲星所乏者龔黃卓魯之徒顧絳灌無文隨陸不武兼才之難自昔嘆之矣夜郎既平守巡守令固二路之歲星也而才不易得事不易理辟草萊剪榛棘則初始之難復版圖充戶口則稽閔之難度土田起賦稅則覈實之難安反側歸鴻鴈則安輯之難比什伍編保甲則聯屬之難四鄰多悍五司多戾則駁駁之難道路多警山箐多梗則芟夷之難路室未除候館未建則往來之難相陰陽揣高卑則城址築鑿之難計徒庸慮餼糧

則衙署者工作之難講 聖諭行鄉約則教化開導之難准西既平留裴度爲彰義節度使下令惟禁盜賊鬪殺餘皆不問蔡人始知生民之樂淄青既平命楊於陵按圖籍視土地遠適計士馬衆寬分李師道地爲二道幽燕未平藝祖出地圖示趙普問進取之策曰曹翰可取可守而終議曰翰死孰可代 國朝交州既平以黃福守之則治及黃福去而交州始亂由是觀之取播易守播難臣竊意以爲文臣中必如裴度楊於陵黃福之治蔡齊交州而後播可守也武臣中必如曹翰之安燕雲而



後播可守也或令總督自擇守巡察備守巡自擇  
郡守郡守自擇縣令如其效 朝廷不難深信而  
久任之破格而超遷之以酬其勞不效則連坐之  
以繩其闇惟 聖明廟廊下部而遴選焉至於臣  
等黔驢之技已窮芻狗之用已陳其計畫無復之  
也不待明者而見矣伏乞 聖裁

一議五司改流夫五司之毒於楊應龍也久矣夷其  
丘隴妻其婦女奪其官職焚其室廬殺其父子兄  
弟其形之 奏牘止爲報讎欲改土爲流非一日  
矣 朝廷合三省之力費數百萬金錢豈獨爲五

司復讎計哉亦欲計安地方爲百年長慮耳若復  
立五司於蜀無損於黔大不便黔中一線之路四  
顧皆苗即五司之地也頃屬於播淪於異域下衛  
走馬抗頑不上驛遞之困實繇於此今乘此時郡  
縣之則廓清線路通爲孔道郡縣歲入不累驛馬  
用夏變夷千載一時若復立其後則黔封疆之狹  
猶故黔驛遞之罷猶故是何愛黔不如愛五司也  
夫五司與應龍一類也昔也應龍強而五司弱則  
五司以窮歸我應龍以索五司之故東寇西擾業  
已貽害邊民今也應龍滅而五司復強夷狄之性



決不安靜復有如應龍者出弱肉強食又將擾我  
邊民何也虎狼不可以爲鄰蛇虺不可與共牀也  
且當日起釁實在五司上貽害 國家費數百萬  
金錢下貽害三省度劉數十萬百姓中貽害將官  
殺戮百員而彼安然如故襲職享社凡我被害邊  
民之子孫其又誰與之恐其構禍猶未彌也查得  
鎮遠龍安新貴改流其土官俱改文銜既不失  
朝廷興滅繼絕之意又不釀異日以強凌弱之禍  
原任宣慰同知當改爲府土同知原任安撫當改  
爲州土同知原任正長官當改爲土縣丞副長官

當改爲土主簿一切俸薪儀節在府以鎮遠龍安  
爲例在縣以新貴爲例若土官從逆者如楊正邊  
之類正當絕其爵土而以傍枝入繼者又當改爲  
土巡檢庶幾夷漢相安邊圉允乂矣伏乞 聖裁  
一議清查黃冊楊酋逐五司刈七姓即以其田分給  
苗賊令自耕種錢糧不輸黃冊不造而其老冊在  
四川布政司冊庫猶可覆視也今旣郡縣其地則  
當清查田土楊氏即滅播官播民猶有存者欲不  
給還之則丘壑在目彼猶有辭欲一一還之則冊  
籍無憑恐售其欺臣意當檄四川布政司將播州



歷年黃冊另貯固封毋令吏書改換庶田畝之地  
名可尋秋糧之多寡可稽軍田民田夷田漢田不  
相溷淆欲稍給舊民則冊可憑若冊無姓名或有  
姓名而人被殘刈者其田入官以爲公田留作養  
兵之費此亦蕭何入秦收圖籍意也惜當時播州  
一破其州冊盡燬於兵耳伏乞 聖裁

一議更易轄屬楚黔接壤撫屬錯綜如黎平府永從  
縣近楚之沅州去黔千五百里而遙反屬於黔平  
清偏鎮四衛近黔之鎮遠去楚二千餘里而遙反  
屬於楚即云犬牙相制翻成彼此推諉頃者酋犯

偏橋而楚不能掇比者苗犯黎平而黔不能掇即  
黔有播患而黎平永從無一夫一粒之助非不欲  
林助也鞭之長不及馬腹勢也合無以黎平一府  
永從一縣改隸湖廣鎮遠偏橋平溪清浪四衛改  
隸貴州文武官軍俸糧歲費公用悉仍其舊則軍  
民合爲一家上下不相秦越即有寇警誰能諉之  
伏乞 聖裁

一議裁將留兵項者播患方殷黔之將不得不增今  
日逆寇蕩平黔之將不得不減清浪黎將原屬於  
楚非黔專官無容議矣黔中下六衛無一重將何



以彈壓則興隆叅將似不當裁都清守備當仍其舊龍泉既有守備則婺川叅將石阡都司應裁壩陽普安迤西三處既有守備則畢節叅將應裁省城既有遊擊則守城守備當裁播賊雖平苗寇未剪總兵標下留兵一千二百爲二營興隆叅將部下留兵一千二百內分其半爲一營守興隆隸叅將部下分其半爲一營守平越隸都清守備部下以爲下衛之保障壩陽兵二百分其半移隸安莊貴陽留兵一千分爲二營以爲省會之爪牙第養兵二千五百餘名每年約費二萬五千餘金貴州

無從出辦相應於剩餉內暫支俟二三年後地方大寧徐徐議撤婺川叅將王鳴鶴陳良玘俱將楚兵聽楚中去留畢節叅將朱鶴齡都司錢中選守備杜鶴鳴合無免其赴部另補別缺至於總兵駐劄昔在銅仁以故沈尚文之杜門童元鎮之託身眎爲兔窟眇若越人節經兵部題 准駐劄貴陽夫非於銅仁疎而貴陽親也貴陽近播而銅仁去播遠也總兵官似當仍駐貴陽待年餘大定之後以春夏駐貴陽秋冬駐銅仁永爲定例無許偏安一隅伏乞 聖裁



一議四川協濟黔省土瘠民貧不及中州一大縣其歲供之費往往取給於楚蜀之協濟查四川烏撒鎮雄東川烏蒙等四府每年協濟貴州本色糧一萬四千三百二十四石折色糧銀三千一百兩查每年解納不及十分之三播州協濟糧銀每年三千一百六十四兩七錢楊酋拒命逋負不納自萬曆十八年至二十七年未完銀約二萬九千八百三十餘兩酉陽每年協濟銀七百兩自萬曆十九年起至二十七年共欠二千九百六十餘兩徒負協濟之名無益軍興之實此在無事日猶不可

況今逆酋甫定地方多難之時乎祇緣四府酉陽襲職不由貴州渙然不相統轄即錢糧逋負既無可罰之俸又無可降之官至於屢催屢負未可如何以臣之愚四府酉陽即不能割隸貴州至其襲職起送四川撫按會同貴州撫按批允而後襲則彼猶有所畏憚此一策也不然請乞 嚴旨責成四川布政司立法嚴催催完總解載入職掌無得秦越相視又一策也不然請責烏撒同知東川烏蒙通判駐鎮本府督催四府協濟請責重慶府管糧府佐督催酉陽協濟其給由陞遷四川撫按會



同貴州撫按考覈視協濟之完欠爲殿最必完及分數批兌乃許離任又一策也舍此三策而欲籍悠悠難必之協濟以充嗷嗷待哺之正供欲保貧軍之不轉爲溝中瘠也必無幸矣伏乞 聖裁

一議楚省協濟黔中軍餉仰給楚中湖南一道所轄長衡郴府州縣每年協濟貴州糧銀三萬七百二十兩零遞年遞負不以時納自萬曆十四年起至二十七年止共拖欠銀五萬三千六百五十兩零而長沙府屬逋欠尤甚良由貴州撫臣兼制止及湖北不及湖南印糧官吏自以非屬怠玩成風雖

考成每年查叅不過徒飭虛文即完欠之數催促逾年而文始至極重者止於罰俸而止彼何所憚而汲汲完異屬之餉耶今楊酋甫定黔餉一空合無將湖南一道屬亦隸貴州撫臣節制其印糧官給由陞遷照依湖北例具文於貴州撫臣考覈錢糧有無完欠方許給由離任夫常德去長沙只尺耳常德可屬又何惜一長沙若長沙不屬貴州節制則拖欠之餉終無完日貴州之軍終無飽時其爲關係良非淺細伏乞 聖裁

一議驛傳協濟貴州四面皆夷中路一線實滇南出



入門戶也黔之設專爲滇設無黔則無滇矣國  
家輿地以雲貴爲極遠舊制倉驛小吏俱給符驗  
蓋憫其險遠耳以故流官中無論方面即倉驛之  
陞轉皆馳驛也土司中無論進表即貢馬之差  
遣皆馳驛也鄉官中無論方面部臣即教官舉貢  
會試入京皆馳驛也蓋以極貧極乏之區當極  
苦極煩之差臣日夕掛號堆案盈几欲裁之則行  
路嗟怨欲給之則夫馬逃亡欲處置之則帑藏空  
乏衛官貧而不能賠急之則閉戶驛官卑而不能  
支急之則逸去臣惟有印屋浩嘆而已查得貴州

之驛非若中原之地征民間之錢糧買馬走遞也  
又非若他省之馬戶有姓名可拘束也舊例俱輪  
土司走馬至於下衛則播州五司居其半自播酋  
弄兵五司出亡平越興隆黃平之馬一匹不到今  
播雖已戒五司猶未返舊疆驛馬之困猶然如故  
頃臣不得已疏請於上借滇楚稍閑驛分各馬  
十五匹分發平興共濟時艱至今俱未解到黔中  
以貧故累及二省甚多此亦必不可得之數也臣  
查得黔中道路黔之往來居十之四滇之往來居  
十之五楚蜀之往來居十之一每年雲南止協濟



一千五百兩遇入 覲年加一千兩似覺太少合  
無每年加增一千五百兩入 覲年再增一千兩  
如數依期解黔分給各驛俟五司改流之日錢糧  
上納不乏仍將滇銀照依原額臣又查得黔中原  
無水路至於鎮遠始有小江可通輕船逕至辰沅  
常德 會典載鎮遠清浪俱名水馬驛良有深意  
合無鎮遠清浪多造小船一切過往如 御扛齎  
奏及部院方面仍從陸路外自有司以下至二省  
會試舉人即有真正勘合牌票亦給船隻則平清  
晃州諸驛又得少蘇伏乞 聖裁

一議增設駐鎮看得黔地多陋習而無善俗則以上  
下諸衛未設流官以武弁馭悍卒狼者如虎馭羊  
弱者如猫同鼠如之何其不多盜也往年曾設都  
勻府推官駐鎮新添矣貴陽府通判駐鎮畢節矣  
邇年增設貴陽府同知駐鎮興隆矣儻再增設鎮  
遠府推官一員駐鎮偏橋都勻府同知一員駐鎮  
平越一衛之屯糧歲用責之收支一方之詞訟刑  
獄責之問訊一驛之馬匹館銀責之料理文武官  
評責之填報士習民風責之表率夷行苗俗責之  
化誨衙署不必建置取之本衛之公館俸薪不必



編派取之各屬之缺官僕從不必雇募取之衛所  
之戍卒無更弦易轍之煩而有用身變美之實黔  
之黎庶尚亦有利哉伏乞 聖裁

一議賑恤殘民楊酋煽亂流毒三省黔屬只尺尤切  
剝膚兩年之間一犯偏橋再犯黃平三犯飛練四  
犯東坡而下六衛殘五犯龍泉而思石燬六犯河  
渡而貴陽震其未犯地方大兵經過荆棘叢生轉  
輸糧餉則有運夫之苦防守城池則有保兵之役  
男停其耜女空其袖驛遞蕭條道路丘墟小寇竊  
發餓莩盈野陰雨連月禾稼不登元元嗷嗷莫必

其命適者大兵甫定瘡痍未起若不重加週恤則  
死者之冤氣彌天生者之號泣塞路恐播之餘黨  
一呼而號召之在在皆賊也爲今日計止有議蠲  
議賑二事然貴州錢糧董董亡幾何一議蠲則衛  
所官軍勢必枵腹待哺惟有賑恤一款似當急議  
而倉庫已竭無從發棠合無於剩餉內存留若干  
行守巡各道責成賢有司查覈罹害之輕重流離  
之多寡定爲賑濟之差等庶 恩周鄙屋民不流  
離伏乞 聖裁

一議增築外城貴州在昔爲荒服至元始立爲順元



路初屬四川改屬湖廣又改屬雲南原非重鎮即設城郭不名金湯本朝始立爲貴州布政司屹然與楚蜀滇滇雁行矣第地方旣褊民人未轉國初建城率因元舊而城址狹隘牆垣卑薄因陋就簡攀援可登二百餘年以來北關生齒旣繁且稠與城中埒頃者楊酋聲言渡江直走貴陽關外居民奔沓入城填滿城闔寄住街市無屋可貯無址可屋翹翹而危哢哢而懼臣竊憐之當時士民即有增築外城之呈顧時倥偬不暇議工又乏金錢誰與爲貲及今賊旣滅矣燕雀處堂亦哢哢然樂

矣臣聞存者非存在於慮亡樂者非樂在於慮殃貴州本苗夷四戰之地非百年無事之國稽之史冊聞之父老未有五十年不用兵者今播州即平皮林未剿東坡雖通九股尚存倘復有楊酋者出而後爲之所則晚矣臣遊淮揚官吳越淮安揚州廣州餘姚俱因倭亂之後增築外城倭無所掠遂不敢近若貴陽得援此例築一外城內固舊堞外增新壘即有烽燧民不遷徙此猶地方之利也黔中南達滇雲下制辰沅上下二千餘里衛所諸城極卑極薄不足以當富室之一牆今旣不能一一



增高而省會又無嚴城脫有緩急直破竹解籜耳  
念及於此則 國家藩屏之長利也查得外城估  
計約二萬金倘於剩餉內動支一歲可完一勞永  
逸一費永安惟此時爲然乎夫徹桑未雨畜豕未  
病及雨且病則無及矣伏乞 聖裁

播平奏報軍餉疏

謹 題爲逆寇旣平大兵已撤謹將支存餉銀造冊奏報  
事萬曆二十八年十月初一日據貴州布政司督糧道左  
叅政郭廷良造報覈查過貴陽平越龍泉三哨支銷各官  
兵糧餉賞功各項文冊到臣據此案照萬曆二十七年十

月二十四日准戶部咨爲播酋外逼等事該本部題覆奉  
聖旨是這銀兩著便行與各撫按嚴催解赴貴州應用不  
許推諉稽延致誤軍機欽此萬曆二十八年二月初二日  
准戶部咨爲楚滇助餉勢難如期等事該本部題覆奉

聖旨是貴州貧瘠殊甚軍興充宜加給所議各處協濟銀  
兩兵部便馬上星火差人守催如數如期解發若有支吾  
推諉的該部科叅來重處欽此同日准戶部咨爲楚滇助  
餉等事該本部題覆奉 聖旨川貴待餉甚急你部裡便  
馬上差人星夜嚴催鳳陽廣西如數解彼濟用不許執留  
遷延誤事取罪還立限與他欽此本年二月二十七日准



戶部咨爲貴州借餉數多採木又助全運等事該本部題覆福建撫按本奉 聖旨貴州用兵急需著該省遵旨如數速解限二月內到彼不許遲延短少欽此同日准戶部咨爲播寇突出充斥興隆黃平之間等事該本部題覆奉 聖旨是貴州孤懸著總督將供餉銀兩先儘支發仍遵前旨於鄰省堪動錢糧內先動後題逆酋抗亂普天同讎各省直官宜請助兵餉豈得托言違旨支吾推諉者通行與他每知道欽此同日准戶部咨爲播賊狂逞未已貴州物力難支等事該本部題覆奉 聖旨這兵餉急用俱依議行各省撫按司道上緊催解以後不敷著總督遵照前旨

於本省鄰省便宜處置各官務要同心共濟以期滅賊如有抗違支吾指名叅來重處不饒欽此本年三月十三日准兵部咨爲播賊分道突犯全黔勢甚隲危等事該本部題覆奉 聖旨貴州孤危著總督上緊與各鎮撫應援兵馬若少准再酌量調募另給糧餉與他廣西雲南湖南各兵俱要齊赴信地戰守不許逗遛觀望童元鎮堪否策勵及應拏應換總督務遵照屢旨及今部覆從實行不得姑息陳宙等若再不到叅來重處朝廷不中制該督撫宜協心力任相機行事欽此同日准戶部咨同前事該本部題覆奉 聖旨是糧餉用兵緊務難待奏報輾轉鄰省應解



的著總督遵照屢旨嚴行催取該撫按不許執留短少致  
誤軍機以後不敷任總督便宜徵發借動不必一一奏請  
仍先儘貴州免令告匱若有抗違不遵的指名參來處治  
欽此同日准戶部咨爲暫留起解錢糧抵給貴州萬分緊  
急軍需事該本部題覆奉 聖旨是這銀兩著雲南解貴  
州充餉仍著搜括設處務足題定數目解去不得再行奏  
擾欽此本年四月二十二日准戶部咨爲播酋殺虜官軍  
等事該本部題覆奉 聖旨這協助兵餉著火速嚴催接  
濟有再藉口支吾的該總督撫按指名參來重處欽此本  
年五月一十日准戶部咨爲師期伊邇謀貴萬全等事該

本部題覆奉 聖旨三省進兵費多師期又難預限况貴  
州尤稱貧瘠萬兵齊集其標站俱當存恤這南京河南銀  
兩著作速依限依數解去以前題取各處的務要湊解俱  
不許短少遲誤責有所歸漕糧聽督撫酌量調度還通行  
與各省直知道欽此本年七月十二日准戶部咨爲黔師  
報捷滅賊有期諸路未齊糧餉不繼懇乞 嚴旨急集兵  
糧議殊賞以收全勝事該本部題覆奉 聖旨是滅賊有  
期需餉尤急你部裏速行與各該巡撫官將屢經奉旨助  
黔銀兩上緊定限解去毋得託辭怠緩誤事欽此節准兵  
部差參將朱鶴齡都司孫繼祖解到太僕寺餉銀六萬兩



南京戶部差主事唐斯盛汪若冰解到餉銀十萬兩川湖  
貴督臣李化龍差官解到餉銀一十二萬二千六十六兩  
一錢八分雲南撫臣陳用賓差官解到餉銀一十萬四千  
兩舊鎮雲南黔國公沐昌祚差官解到報效餉銀二千兩  
兩廣督臣戴燿廣西撫臣楊芳差官解到餉銀三十八萬  
兩湖廣撫臣支可大差官解到軍餉并楞木銀共五萬一  
千九百五十一兩河南撫臣曾如春差官解到餉銀九萬  
兩福建撫臣金學曾差官解到餉銀一十萬兩又解到木  
價借充餉銀二萬二千三百三十三兩三錢三分三釐江  
西撫臣夏良心差官解到木價借充兵餉銀三千三百三

十三兩直隸應天撫臣陳惟芝差官解到木價借充兵餉  
銀一千九百五十二兩三錢六分八釐四毫二絲六忽三  
微俱經發貴州布政使司及貴陽府秤收貯庫聽貴陽平  
越龍泉三哨各監軍紀功司道陸續覈支征播官兵糧餉  
賞功等項又准川湖貴督臣李化龍咨據湖廣布政使司  
呈稱川湖貴三省均分漕米貴州該分漕米八萬九千二  
百三十石二斗五升八勺等因移咨到臣隨行委銅仁縣  
知縣陳廷範指揮張世卿等前往湖廣辰常起運過漕米  
九千五十三石六斗八升七合二勺至平越龍泉二哨軍  
前支用去後餘米八萬零一百七十六石五斗六升三合



黔中 卷之六  
六勺收貯辰常二府至本年六月初五初六日三省合兵  
輪攻逆賊楊應龍投綬而死妻子駢首就縛班師凱旋  
奏捷之後臣即牌行貴寧新鎮思仁守巡各道選委駐鎮  
興隆貴陽府同知徐庭綬思南府同知張羽鴻定番州知  
州王應昌鎮寧州知州李珏普安州知州龍時躍清平縣  
知縣劉啟周吊取各哨委官收支兵餉卷案簿冊逐一清  
查冊報到臣又經檄督糧道左叅政郭廷良重覆細加磨  
算總覈去後今據前因除覆覈相同外該臣查得新收各  
省直解到貴州兵餉及木價借充兵餉并舊鎮雲南臣沐  
昌祚捐助等銀通共一百四萬八千六百三十六兩八錢

八分一釐四毫二絲六忽三微陸續覈支貴陽平越龍泉  
二哨官兵廩糧賞功及衝鋒懸賞差官收買硝磺製造兵  
火器具糴運糧米魚鹽運夫腳價各項共動過五十三萬  
二千零四兩六錢六分七釐六毫七絲三忽六微二塵二  
纖實在至本年九月終止收貯布政司貴陽府二庫銀共  
五十一萬六千六百三十二兩二錢一分三釐七毫五絲  
二忽六微七塵八纖湖廣漕米貴州原分八萬九千二百  
三十石二斗五升八勺實運到九千五百三十三石六斗八升  
七合二勺尚剩米八萬一百七十六石五斗六升三合六  
勺貯在辰常二府未解硝磺二項除支用外實在剩硝一



萬二千五百六十五斤剩礦二千五百一十三斤該臣看得貴州土瘠民貧倉常餉軍仰給川湖數年以來逆酋匪茹臣到任後查司庫所存僅四千金時詎舉盈力小任重心之憂矣如焚如重仰荷 皇上明見萬里既憫其貧瘠又念其孤危陸續給發餉銀共一百四萬八千餘金漕米共八萬九千餘石臣既籍 皇上之威靈又籍 皇上之金錢因風振落頓坂走輪順逆之勢既已不敵強弱之形頓異於曩士氣益奮賊膽益寒臣因是得召募漢土合二省之力破千年之寇黔之封疆幾危而安黔之軍氓幾困而舒 皇上高厚之恩臣即死無以報惟一意與諸將吏

約無分毫冒破軍興以上負 主恩今所存者餉銀尚餘五十一萬有奇漕米尚存八萬有奇謹造冊 奏報外然此特自首事以來至今年九月終止之數也自十月以後尚有不能不用者六臣敢預陳之各哨官兵擒斬功級雖給有功票緣未奉 明旨未經按臣查覈不敢即給一覈之後紛紛告領不下五六萬其不能不用一也播州之地今尚未有定屬儻屬黔中則郡縣城池衙署經理之費不能不用二也臣善後事宜款開大兵之後遺黎當賑外城當築儻奉 旨俞允則拯饑築城之費不能不用三也留官兵三千七百員名以防播孽今年之糧臣已預扣自二



十九年正月之後其新兵之費不能不用四也皮林之役  
儻與楚中犄角討賊非二萬人不可則召募徵調之費不  
能不用五也九股黃岑等苗頃者陰助楊酋法當盡剿而  
種類繁多綿亘三省近臣宣布 朝廷威德亦有一二來  
降者儻苗果悔罪舉族出降地方遼闊不得不建置土司  
其經理賞賚之費不能不用六也以上六款勢必取給新  
餉特以未奉 明旨預難定數不敢擅開俟異日用過另  
冊具 奏銷筭今將萬曆二十七年六月三十日起至二  
十八年九月終止各委官收支存剩兵餉銀米硝磺數目  
理合開坐造冊具 題伏乞 勅下戶兵二部再加查覈

行巡按貴州監察御史覆覈施行謹題請 旨

題王叅政請告疏

謹 題爲母老子病乞 恩休致事據貴州按察司呈奉  
臣批據貴州布政司右叅政兼按察司僉事王邦俊呈稱  
職以萬曆二年進士由重慶府推官歷兵部主事員外郎  
中陞湖廣遼東僉事廣益兵備叅議二十三年三月內以  
破虜功加陞叅政至二十六年二月內考滿蒙 題到部  
四月初八日蒙兵部覆三年閱視疏奉 旨陞職一級如  
遇邊方巡撫員缺推用本月內李總兵追虜出塞失機波  
及叅降至二十七年十月內叙平倭功以原官起用二十



八年正月內職在籍聞報仍以叅政起補貴州是時職母年九十三矣職侍蔬水日在左右難以赴任又閱部疏以楊曾徇獫簡用司道爲詞職伏念叨荷 主恩深厚於有事之時不勉力圖報則跡涉避難於義不可於是抑情忍痛辭母而行此時心折骨驚魂銷腸斷孤馳赴任途經暑濕且病且走既抵任蒙軍門委赴河渡督兵督餉身處異方思母之心無時不懸久之思慮傷心溽濕侵骨前病愈深痰火遂作兼以泄痢服藥不效醫謂緣思慮所傷百病交攻非歸家見親不能痊愈值今楊賊已平職之病骨可乞生還伏望題 請致仕等因奉批播賊甫平瘡痍殊甚

勞來安輯恃在各道即有微恙不妨在任調理痊可即出視事仰司勉留繳奉此又蒙巡按貴州監察宋御史批逆會既平督撫叙功在即例應候 旨地方善後并料理上六衛縱惡諸苗政方倚仗勢難遽去壽母康強勿煩掛念仍候督撫詳行繳蒙此該本司備關勉留去後續據貴州按察司呈奉臣批據右叅政王邦俊呈稱職奉兩院批敢不仰承 德意但職素稟孱弱不習南土自觸冒暑濕諸病俱發兼以母老懸想憂懼傷心心神跳動病益加劇終夜不寐形銷骨立醫藥罔效終日昏憤不知世事久之必無生還之望伏乞俯垂矜憐俾得遂首丘等因奉批播賊



雖平地方未寧上六衛惡苗跳梁叵測正賴該道撫彌何得堅持山林之念仰按察司勉留以安地方繳奉此又蒙巡按貴州監察宋御史批黔中瘡痍云極平定難安輯尤難即欲釋去上六衛地方將何所賴邪強自寬留以安地方仍候撫院詳行繳蒙此隨准本司移行到職職安敢再有竇陳惟是職素稟甚弱原多疾厄一經異方暑雨瘴煙兼以思親抱疑懷懼心神受傷職一身諸病俱集又於七月初四日感冒寒邪潮熱往來耳鳴不已又於小腹左邊生一熱癰苦楚難堪偃臥昏迷生死未卜一切文移盡行停閣難以久廢伏望爲地方計急行題請庶不以職之

病廢遺累地方等因奉批仰按察司查報奉此又蒙巡按貴州監察宋御史批上六衛盜苗肆劫正賴該道出緒餘以整頓之以圖久安得人甚難纔得而旋言去如地方何勉留以幸地方所至願也但人子至情我亦人子難不體念按察司確議通詳蒙此該本司看得上六衛地方見稱惡苗出沒一應撫彌事宜正賴該道區畫雖暫違和不妨杜攝以慰軍民之望但稱壽母年逾九十思鬱成疾人子至情義難終強相應呈乞題請施行等因到臣該臣會同巡按貴州監察御史宋興祖看得右叅政王邦俊力扞邊圉誠塞天淵官遼左幾年知名草木入黔陽數月殫心



米鹽會楊酋授首之時止疆場叙功之會而本官念切慈  
母身病瘴鄉況母氏之齡實九十餘而遊子之身在萬里  
外白雲在望望劇勤思者情之不得已也思之不見展轉  
成病者勢之所必至也本官病非托假情甚迫切臣查得  
先准吏部咨內開在外官員患病告致仕者仍令撫按代  
奏又吏部見行事例凡自願告退官員及有疾者不分年  
歲俱准致仕合無照有疾例准本官致仕暫令回籍調理  
遺下員缺另行推補如念本官破虜平倭之功未酬入黔  
平播之勞未錄待本官病痊日照依叙功之格起用以酬  
其勞以竟其用臣未敢擅便伏乞 勅下吏部再加查議

將右叅政王邦俊准令致仕回籍調理痊可之日另行起  
用庶萬里母子之情不至終絕而邊疆勞勩之臣不至終  
棄矣謹題請 旨

考覈給由府官疏

謹 題為遵例考覈給由有司官員事據貴州布政使司  
呈奉臣批行准按察司并安平守巡道咨牒覆考得貴陽  
府推官張應選見年三十三歲湖廣荊州府江陵縣人由  
舉人萬曆二十年四月內除授岳州府華容縣儒學教諭  
本年六月二十六日到任二十五年三月二十五日陞授  
今職本年十月十三日到任扣至二十八年九月十二日



止連閏實歷俸三十六個月三年考滿任內蒙巡按貴州  
監察應御史復 命疏開本官銳氣發矓之刃朗識照乘  
之珠明恕竝行表裏如一系列薦一次例應給由任內竝無  
公私過名增減歷俸月日并將行過事蹟造冊結報到司  
詳奉本院批仰該司移會司道註考詳奉奉此又蒙巡按  
貴州監察宋御史批准移會各司道考覈通詳蒙此就經  
移行各該司道考註詞語結報到司又結查本官父母妻  
竝無貪酷再醮例應請 封呈乞考覈具 奏等因呈詳  
到臣該臣會同巡按貴州監察御史宋興祖考覈得貴陽  
府推官張應選三尺雅操百練長才總軍興不聞庚癸之

呼察獄情庶幾衣冠之畫稱職行接俸管事間案照爲朝  
覲事該臣等查得貴陽府新任知府劉冠南到任未及三  
月止有推官張應選在任空閑已經 題令入 覲今本  
官文冊即付親自齎繳外相應題 請伏乞 勅下吏部  
再加查覈本官曾經巡按貴州監察御史應朝卿列薦一  
次父母妻查無貪酷再醮近例應得 恩典併乞查酌施  
行緣係遵例考覈給由有司官員事理未敢擅便爲此會  
本專差承差王都齎捧謹題請 旨  
播平乞休疏

謹 奏爲逆首甫平舊病復發懇乞 天恩放歸閭里以



延喘息事臣自通籍以來竊祿中外三十年所而不敢一日偷閑實以犬馬戀主涓埃圖報年力未衰例難稱老比待罪閩藩入 覲往返道涂辛苦始患血症具疏乞骸未蒙 俞允已復再疏而黔中之 命下矣又以播賊充斥而 皇上趣臣赴黔之 旨又下矣臣家人抱疏長安未敢即 上而臣之病實未瘳也勉承 明旨星馳入黔以空拳當虎口當是時臣死且不測何暇言病仰荷 聖明憐臣顛危請金 予金請餉 予餉已而 皇威遠暢逆酋投綬臣兩年憂焦一朝頓解當是時臣樂與邊氓歌舞太平又何忍言去乃不謂十月十八日臣督率書吏磨勘

軍與類造清冊忽爾暈眩口吐鮮血遂不能禁至夜半始止扶就牀第氣息奄奄延醫問藥僉云舊病未除勞劇即發惟靜攝可調非藥餌能愈臣伏枕思之臣之身不死於寇而死於病臣即死有餘榮又何必求歸顧臣實有老父在堂年七十有八頃逆首披猖之際道路訛傳貴陽不支臣父驚悸以日爲年朝而倚門夕而迴腸病成怔忡幾不可爲已聞賊平差有生意不謂臣病狼狽至此復貽父憂也臣父前日憂賊憂在 國家今日憂子憂在骨肉老人精神有幾能堪此多憂邪故敢向 皇上乞臣未死之身與疾還家與臣父慰籍一番臣死且瞑脫籍醫藥不即填



溝壑則臣尚未老異日者東西南北惟 皇上使伏乞  
勅下吏部憫臣病危放臣歸去速推有才望者與臣交代  
臣無任哀懇待 命之至緣係逆酋甫平舊病復發懇乞  
天恩放歸閭里以延喘息事理未敢擅便為此具本專差  
承差黃德高齎捧謹具奏 聞伏候 勅旨  
請官經理播地疏

謹 題為就近選用司屬及時料理播地以杜釁孽以圖  
治安事萬曆二十八年十月十七日准川湖貴總督右都  
御史兼兵部右侍郎李化龍咨看得播賊既已蕩平例應  
改土設流行據各監軍守巡等道條議前來會 題間適

本院部感疾伏枕未得 題覆近閱邸報該山西道李御  
史具題議建二府又准貴州撫院移送會稿亦議建設二  
府輿論既已僉同即應如議舉行及查割撥一節以黃平  
設府餘慶白泥雍水重安草塘容山並龍泉設縣俱應屬  
之黃平隸於貴省但賊滅之後已及四月若不及時脩舉  
恐地廣人稀日久生變一有他虞反為不便除白田壩建  
府松坎建縣凡係播州五十四里之地及真州一司俱聽  
四川分屬已經委官推官高折枝同知張鰲知縣寇克順  
何珩分投往彼料理外所有黔省應委守巡察備知府知  
縣等官勢不可緩合行移知為此合咨煩將黃平餘慶等

卷中  
卷之六  
三



司應建郡邑速為委官及時董理共圖治化仍將選過文武職名并查草塘容山二司屬何縣治希由併示以憑稽督施行又准手劄湄潭一帶切近貴州仍屬於貴以關為界等因准此案查先閱邸報內開山西道監察御史李時華題為三省干戈幸戢萬年計畫宜周恭陳一二膚見以備善後 採擇事內開一更置郡縣播州烏江之隔分為東西江之西為內五司桃溪等庄五十九里九十八局江之東為外五司雍水草塘白泥浪城重安等司土地數倍於田琛建置何難於兩郡謂宜於白田適中之地建設一府四牌飛練之間建設一府東西相望二郡峙焉至於衛

所州縣因其地為多寡五司就地附屬爵流官管上民不失故物改換新銜彼之規模亦甚宏整其誰有不樂從建府須擇廉明太守州縣必擇才望正官安撫歸鴻消磨市虎仍久任而責成之破格加銜三年之後地方安堵績用有成知府加叅政銜州縣正官或加運同銜或加府同銜各照舊管事五年之內超等推陞行取庶得鼓舞激勸之方人無畏難苦遠之慮十年而往有不駸駸顧化咸與維新者臣不之信也等因又該臣會同巡按貴州監察御史宋興祖題為逆酋甫平邊圉未輯敬陳善後事宜以備採擇事內開一議改設郡縣看得播州之地東西相距二



千餘里南北相距四百餘里雖云愍國亦係樂土今議改  
 流東西可設二府每府可設二三縣論建置大槩臣意自  
 沙溪以至白泥當以烏江為界設一府於白田壩而真州  
 婁山松坎等處可為三縣黃平在元已為府矣當設一府  
 於黃平而餘慶白泥二司可為一縣雍水重安二司可為  
 一縣此沙溪至白泥一帶建置之大槩也自白泥渡江至  
 婺川縣以三渡板角苦竹三關為界其中漢夷田土錯雜  
 惟湄潭可縣龍泉可縣龍泉土官安民志陣亡其子尚幼  
 其印已失其土地已為揚首踐躪合無將龍泉改建一縣  
 增築城郭而以安民志之子世為土縣丞以為死義者之

勸其祖職長官世為土主簿此則思石一帶建置之大較  
 也至於衛所似可無設先年石阡思南思州龍安馬湖俱  
 係改流並未設衛豈不謂養軍不若養兵贍統綺之世曹  
 孰若贍矛戈之勁卒乎哉惟設二道一叅以彈壓於中每  
 二縣設一守備以防禦於外則西南半壁可恃無恐若興  
 學校築城池設公署建驛遞度土田勢當次第脩舉而為  
 費不貲貧黔物力難支似當於剌餉內動支完日敷筭等  
 因開欵具 題訖今准督臣李化龍移咨議將黃平設府  
 餘慶白泥雍水重安草塘容山隸於貴州就經會同巡按  
 貴州監察御史宋興祖備行驛傳道副使尤錫類督率貴



陽府知府劉冠南鎮靈州知州李珏施秉縣知縣袁尚紀  
料理黃平一帶思仁道副使陳與相督率銅仁縣知縣陳  
廷範料理龍泉一帶去後而臣病病矣連旬以來伏在牀  
第反復思惟終是臣身未了事播州田土拋荒二年明歲  
春耕在邇今年止有一月不及此時畫疆分界授田給種  
將令春耕無主秋成無望非計也臣等善後之疏尚未奉  
有明旨若待吏部銓選新官萬里跋涉便難到任卽到  
任亦未悉黔中事情悠悠歲月令反側未安釁孽復萌非  
計也臣將分委諸臣催促入播諸臣入署問疾見臣病篤  
相聚語曰撫臣病勢如此萬一不諱而不一題以重其

事民難慮始恐終掣肘臣卽病安敢不以聞之 皇上貴  
州瘠薄道險於蜀米貴如珠官於此地苦矣會有播之後  
枕戈泣劒出萬死一生又苦矣茲復使之經理夷壤馳驅  
蠻烟穿林箐餐瘴癘宿風憩雪旣無衙署遊息之所裹糧  
負米又無驛遞答應之便兼之羝羊羸角間或觸藩飛鷲  
在林未懷好音往來道路不無戒心則又苦矣夫鞠躬盡  
瘁夙夜在公在諸臣不敢言勞莫非 王事我獨勞瘁惟  
皇上一憫其私查得副使尤錫類陳與相知州李珏知縣  
袁尚紀陳廷範身在行間拮据奔走已幾一年知府劉冠  
南到任稍淺然軍興之銷筭播賊之問訊悉出其手無頃



刻隙諸臣才器俱可任使儻邀 皇上之恩道府州縣遙  
加一銜仍令管該道郡縣事一則憫念其辛勤少酬其前  
日之勞一則鼓舞其意氣冀收其將來之效如三省敘功  
之後果勞勩相應者即令實授不相應者仍令帶銜待二  
三年後郡縣既定漢夷相安或久任而加銜或超遷於中  
土或行取於臺省隨其勞而酬之如李御史之議可也如  
或職用不稱撫按不時叅劾執三尺以繩其後誰敢庇之  
遺下貴陽鎮寧施秉銅仁府縣四缺 勅下該部速爲銓  
補興隆特設叅將以防播孽黃平旣改爲府當移叅將於  
黃平以重彈壓黃平原有一千戶所城中盡是尺籍今旣

設府似當加軍民二字以便兼攝即如貴陽會城軍居十  
九民居十一知府問訊勾攝呼召城守編排保甲動輒掣  
肘亦當加爲軍民府以重首府事權此皆地方安危攸關  
非細故也臣病中具疏語無倫序伏乞 勅下吏兵二部  
再加查議覆 請施行不獨今日之釁孽可杜而萬世之  
治安可圖矣緣係就近選用司屬及時料理播地以杜釁  
孽以圖治安事理未敢擅便爲此具本專差承差黃德高  
齋捧謹題請 旨

請建印江縣學疏

謹 題爲地方初寧懇乞添設縣學以變夷習以弘 聖



化事據貴州布政使司呈奉臣案驗萬曆二十七年十二月初八日往禮部咨為貴竹帖危敬陳安邊五策以佐緩急事該本部題據儀制清吏司案呈奉本部送禮科抄出巡按直隸監察御史蕭重望題前事內一款弘化誨消獷悍夷民亦人也不可以威讟則化誨而懷服之即如思州思南故為田氏兩酋竊據國初雖納款奉貢而煽虐梗化致塵天討永樂間改流建學浸成禮讓之俗二百年餘無復夷患又近日故總兵石邦憲勸誘苗酋吳猪玃以儒衣冠被服其子而歸命恐後明效炤然播民之敢於從逆者良繇積威所劫人不知方而獷悍如故無惑也今印

江縣介在酉播鎮筇之間青衿幾滿百而寄學思南大稱不便以故洞寨子弟即有向化之心往往患苦跋涉弦誦中輟該縣官民僉謂印江建學其有益於化夷甚鉅臣熟其廟廡靡畧祭祀廩餼諸費種種備具第以疆事倥偬撫按官未遑題請耳相應比照先年婺川縣及近日雲南路南州事例准其建學其興隆衛生徒止數十人乃教授訓導兼設殊屬冗員合無裁革該衛訓導改設印江縣教諭一員頒給條記勸率氓夷將文德洽於遐壤而椎結盡為冠裳無復有頑梗為亂者矣等因奉聖旨該部看了來說欽此欽遵抄出到部送司案呈到部看得御史蕭



重望題條議貴州印江縣介在酉播青衿滿百寄學思南  
大稱不便乞要添設學宮改設教諭 頒給條記并裁革  
興隆衛訓導一節為照學校之設所以維世淑人微獨中  
原藉之以陶鑄人文即遐方異陬所為挽草野獷悍而歸  
之雍容禮讓則學校之所關係者大也印江縣古稱鬼方  
先是猶絀於文物邇來青衿之士遊黌序者百餘人矣尚  
爾寄學思南往返跋涉士子甚苦之今蕭御史陳安邊之  
策而首之以建學蓋商確於黔中衆宦而為此議非臆說  
也况廟廡簠等項不費公帑一錢而士民願輸又何憚  
而不俯從所請哉但建學事重未有不由撫按會議而徑

行者即蕭御史所摺發川路南建學皆係兩院會勘印江  
亦當照例行令撫按會議舉行等因於萬曆二十七年九  
月十八日題奉 聖旨是欽此欽遵合咨煩為查照本部  
題奉 欽依內事理欽遵施行等因准此備案仰司即便  
移行提學守巡道備查會議印江縣建學事宜應否舉行  
逐一會議妥當具由通詳以憑會 題施行等因奉此又  
據本司經歷司呈抄蒙巡按貴州監察宋御史案驗同前  
事蒙此俱經備行提學道及思仁守巡道會議去後至萬  
曆二十八年九月十八日准貴州按察司提學僉事徐來  
儀牒呈回稱行據思南府呈據印江縣申稱卷查先該本



縣知縣張鎔議稱照得印江彈丸僻邑蒙禮教以興賢三  
里編氓列青衿者踰百惟是附寄府庠山川險阻途經二  
日講學課考甚屬未便且有縣無學誠為缺典隨該卑職  
據士庶勤懇之情循婺川已行之規條陳兩院請建蒙允  
檄查業奉道府不次行議集諸公評師生廩餼歲該銀九  
十一兩二錢將縣解府需銀及汰冗役并本縣備用銀內  
共充其數春秋祭需原有租銀三兩及民劉朝一等捐田  
租穀一十九石又減禮生紙劄銀一兩七錢共足其額季  
考花紅試卷歲考科舉廩給供應并花紅試卷歲貢盤纏  
三項共銀三十七兩將裁減民兵舖兵庫子工食銀內扣

足考貢盤纏科舉賓興花紅酒席舉人盤纏學吏香燭米  
庫門工食等銀原有條編銀一十四兩八錢不敷者於減  
剩紙劄及募馬價銀湊足俱已分置停安竝不分毫加派  
於民又該卑職陸續捐俸薪銀八十餘兩選買城內寬洪  
吉地一幅以為學基隨即經營設處顧募工匠脩建 文  
廟三間明倫堂五間齋房三間門樓一座俱已完固其廡  
舍等件各鄉官士民多有願脩認狀在卷目今 聖化大  
行人文日盛乃本縣夷漢雜處信義未洽且府庠四百餘  
名尤宜疏通惟候題 請等因已經備詳奉前任巡撫貴  
州江都御史批仰候會 題行繳又蒙巡按貴州監察應



御史批候會 題行繳續因播酋稱亂地方有警未經會  
題今奉前因又該本縣看得印江建學議非一年目今規  
制俱已大備近蒙兩院助費百金士民懸望視昔尤切伏  
乞垂念夷方作興士類成數十年欲舉之志開億萬載道  
脉之宗速賜 題覆等因據申到府該本府知府陰鎔看  
得建賢育才本爲政首務偃武脩文尤變俗一機今知縣  
張鎔銳志創始規制已備該縣士民協力景從區畫具周  
即教官俸薪諸生廩餼一一措處得宜不加派於民而自  
足伏乞速賜 題覆用成該縣數載經理之志以開印地  
道脉之宗等因呈報到道看得黔省學校弟子員稱最多

者類不滿三百獨思南一府幾四百餘人而印江諸生實  
附贅焉通府學不無皓首淹滯之嘆析縣生亦有道里跋  
涉之艱以故該縣議建新學規制大備經費不煩誠屬便  
宜可行而況以漢夷雜處之區當播事方平之後爲興賢  
育才之舉未必非用夏變夷之一機也相應准從合行回  
覆等因又准本司分守思仁副使陳與相思石兵巡副使  
路雲龍咨會看得印江縣去思南四十里而遙苗漢雜居  
幅隕頗廣邇來文教漸昌士氣益倍生徒之附府庠者雖  
僅逾百而絃誦之在四封者不啻盈千章縫以肄業無所  
屬望甚殷鱗介以觀化末繇嚮慕亦切故蕭肅侍御軫念粉



里六少  
偷爲謀桑土畫安邊之遠猷創建學之始議知縣張鎔頻  
年蒿目圖維悉心經理一切宮牆廡餽業已犁然粗備次  
第可行况乘此偃武脩文之時籌用夏變夷之術似無亟  
於此者相應回覆轉詳俯賜酌議會 題等因到司准此  
該本司署印左叅政郭廷良看得印江建學事務今准提  
學守巡等道議覆前來相應酌議爲照印江爲思唐僻邑  
往聲華文物未著近挾經談統之士駸駸與婺川埒盛婺  
故有學惟印江之學闕焉士籍在學官者餘百十人歲時  
講課集隸郡庠負笈重趼多言不便該知縣張鎔身任構  
建著言經始分俸鳩工邑縉紳士與闔閭之夫納地捐貲

共贊厥成學宮殿廡堂祠齋舍與夫祀費廩需規模區畫  
犁然具備以此建師淑士使藝習專而夷風革也非今日  
所當亟舉者乎既經道府重復議妥備覆前來似應俯從  
呈詳會議題 請施行等因呈詳到臣除批行該司仰候  
會 題施行外該臣會同巡按貴州監察御史宋興祖看  
得貴州宣慰司與播州宣慰司一也貴州宣慰司有學故  
士多彙征夷亦向化播州宣慰司無學故酋旣狂信民亦  
頑悖則學之有無不獨文運係以興衰亦邊方所與共安  
危治亂者查得印江縣治距思南四十里該縣諸生業已  
百人身居縣地名列府庠跋涉羊腸殊爲艱苦以故蕭御



史深惟治理日擊士苦條議建學良爲急務而知縣張鎔  
桔樞有年節縮多方上不費公帑下不煩里旅移興隆訓  
導爲教諭官不必添裁各項工食爲俸廬糧不必派一切  
繁費竊然悉備既經布政司移會提學守巡等道覆議會  
同前來相應題 請伏乞 皇上軫念邊方主張文教  
勅下吏禮二部覆議上 請行臣等欽遵施行庶夷方在  
在有學荒服濟濟向風易鱗介以冠裳解椎結而詩書其  
關係邊計非淺鮮矣緣係地方初窺懇乞添設縣學以變  
夷習以弘 聖化事理未敢擅便爲此會本專差承差黃  
德高齎捧謹題請 旨

議剿皮林寨苗疏

謹 題爲剿苗有期進師宜慎謹陳末議以圖萬全事萬  
曆二十八年八月十八日准兵部咨爲傳奉 聖諭事該  
本部覆奉 聖旨元兇旣殄凡脅從牽累的都免窮治流  
移的招他復業毋許豪強乘機兼并還與優加賑恤以安  
新定地方兵馬久戍勞苦酌量應撤的次第撤還未請諸  
苗橫恣逋誅就著撤回兵馬剿處不必待奏可卽便宜行  
事軍中一應有功人員俱從公敘來其餘皆依擬該督撫  
悉心行欽此欽遵等因咨到臣准此案照先准湖廣撫臣  
支可大咨稱照得皮林寨叛苗猖亂狂逞殺戮官兵先該



本院具疏會題議俟播平之日另議剿處隨該兵部覆奉欽依備咨前來欽遵在卷今照播氛業已蕩平矣所有前項叛苗亟宜遵旨征討以靖地方茲該本院會同巡撫偏沅右僉都御史江鐸巡按湖廣監察御史王立賢牌行守巡湖北兵備及監軍等道將應用兵將餉糧等項一面酌議通詳進剿外合咨移會煩為查照施行等因准此隨據湖廣辰常黎靖兵備副使王應霖呈詳剿處皮林等寨惡苗條議五路進兵各款內開一皮林天甫等寨諸苗一通貴州都勻府九股一通廣西懷遠縣一帶誠恐大兵壓境或奔入各省糾引黨類相助或兵進則借路逃竄

兵退則復回巢穴將來必難結局相應請本院咨會廣西軍門及移文銅仁總鎮并新都二道撥兵把截一黎平五開均屬黔楚兩省犬牙相制原有深意皮林等寨惡苗罪在不赦楚兵一至勢必奔逸目今徒勞兵力日後猶為患害合無請本院檄行總鎮併新都二道提兵截殺庶首尾相應功收萬全等因到臣隨批五路進兵運餉把截事宜俱如議行仍候各院詳示行繳隨該臣查得皮林隘路後通偏鎮次及都勻卽移總兵李應祥提兵二千駐鎮遠副總兵陳寅清浪原任叅將為事官劉效節督兵一千駐偏興而以新鎮守道叅議張文奇監之以防九股之助都司



徐成督兵一千駐新添麻哈檄獨山等土司兵一千駐都勻以兵道副使袁應文監之以防皮林之逸用以內備播孽外爲楚援行各道副叅遊擊遵照去後又據副使王應霖呈爲惡苗抄虜縣治事准五靖遊擊董獻策手本移稱據永從縣典史丁崇德呈稱上皮林惡苗截殺官軍後本縣止存卑職并吏舒安馬鳴龍黃朝重民兵蔣元章楊桂友等二十餘人隨職在縣住守不料六洞惡苗聽八洞傳報木刻聞風大舉驚惶於八月十六日復糾洪州八洞多苗來縣將城門撞開蜂擁入縣將糴貯預備倉稻穀五十九石刮去等因又據黎平府呈同前因據此隨准偏沅撫

臣江鐸咨爲西事甫平等事內稱辰沅兵備道呈據黎平府及五靖叅將董獻策并黎湘潭溪等所衙門飛報皮林等寨多苗宰牛合款糾黨攻城意欲約期大逞情形叵測地方危急本院不得已檄副總兵陳良玘統兵前往靖州彈壓議將監軍紀功各道照舊紀功將兵馬錢糧悉心料理去後八月二十九日據分守湖北道叅政詹啓東稟稱本院一日留沅則省城撫院一日不便抵沅夫本院屢欲移鎮又復逡巡者蓋緣身在地方手握重兵目擊時艱誼難坐視不得不爲省城撫院暫擔利害耳今據該道所稟因本院留沅妨礙省城撫院移沅是本院心欲濟事反致



候事矣且聞訃已久日惟候 旨未得既得允歸謹遵  
明旨以九月初三日發沅州移鎮長沙完敘功及銷筭征  
播錢糧二項文冊以畢重務以息羣囂決不敢貽不了之  
局致滋衆口而撓公道其一應剿處叛苗機宜除嚴行湖  
北守巡兵備三道悉聽省城撫院軍令施行不必關白本  
院以致彼此耽悞外又經移會四川制院及咨省城撫院  
去後相應咨會煩爲查照施行等因備咨到臣該臣看得  
上皮林及六洞惡苗旣損將官復刦縣治窮兇極惡罪在  
不宥偏沅撫臣江鐸移鎮長沙湖廣撫臣支可大計入沅  
州建旌提鼓挾經秉袍刻鯨搏虎當有定謨矣惟是五開

黎平衛府同城衛屬楚中府屬黔中臣既有兼制之責不  
容無言五開城外四顧皆苗槃瓠醜類實繁有徒 國初  
洪武五年命江陰侯吳良征古州蠻十八年命 楚王率  
信國公湯和征五開蠻吳奮兒三十年命 湘王都督揚  
文征古州蠻林小師而命貴州都督顧成以軍策應天順  
四年湖廣巡撫王儉總兵李震帥師征絞洞苗而會貴州  
總兵李安分道夾擊夫以五開之苗勤勞 親王侯伯專  
征亦勅敵也雖未若播之衆亦不下播之悍兵未集則乘  
危怙險穿屋觸藩無所不至兵旣集則鹿豕驚鳥散風去雨  
還莫可放物此進剿之勢未易言也督臣駐成都相距三



千里而遙且以憂請去偏沅撫臣雖相距四百里而近亦以憂請去臣駐貴陽相距千五百里湖廣撫臣卽入沅州顧自武昌來亦二千餘里雖鞭之長不及馬腹雖燭之明不照垣外此控制之難未易言也臣黔中征播之兵多土兵客兵一破圍後滇粵客兵俱歸其鄉水西鎮雄土兵各歸其司不待撤而自撤矣頃臣善後疏中止留募兵三千五百蓋以防播餘孽也自奉旨後臣卽分布於鎮遠都勻堵截苗逸皆此兵矣第兵一過鎮遠卽非黔境無米可餉兵無夫可運米楚卽有米勢亦難以餉黔兵臣非敢自愛其力束於勢也而況沅州一隅未足以容二撫臣

也臣愚謂湖廣撫臣坐鎮沅州總兵陳璘驅兵從前入以搗賊巢臣當移駐偏橋同總兵李應祥督鎮遠都勻之兵以防其勾引九股廣西撫臣楊芳總兵李如樟似當移駐柳州督西粵兵以防其遁逸懷遠則犄角之師有所據而兵勢以強釜底之魚無所遁而賊滅可期矣臣未敢擅便相應題請伏乞勅下兵部再加查議覆請行臣等欽遵施行緣係剿苗有期進師宜慎謹陳末議以圖萬全事理爲此具本專差承差陳啓星齎捧謹題請旨





學  
卷之六  
五



續文生黔草卷之七

泰和郭子章相奎甫著  
友人楊寅秋義叔甫校

奏疏

協剿皮林招降九股敘功疏

題爲皮林蕩平有期黔師堵截無虞恭報斬獲功級并  
獻九股等寨內附戶口文冊以昭 皇仁以綏邊圉事萬  
曆二十九年三月十八日據貴州監軍道副使袁應文紀  
功督餉道右叅議張文奇呈准貴州總兵官李應祥手本  
移稱本年三月十六日據副總兵陳寅揭報奉令督同都



司徐成坐營中軍劉岳汪如淵原任守備童龍伍萬鍾史良將贊畫黃龔李師沆葉定遠蔣玉成劉漢徐一夔張爾知劉恩旗鼓把總易之謙陳正邦土同知蒙詔武生王治安提調把總李占先吳文秀陳猷華統鄭國明陳定侯仕芳督陣旗牌官馮邦濟劉英汪瀾等協剿皮林天甫叛苗跟踪追蹙於十五日五鼓至巴野險寨惡賊拒敵官兵分三大枝分途接殺直至日午共報斬獲真苗首級一百三十六顆奪獲盔甲刀弩等項各賊退據後山時因日暮收兵二十二日據副使袁應文呈准總兵官李應祥手本移據副總兵陳寅呈報奉令督同都司徐成坐營劉岳汪如

淵守備童龍等協剿皮林天甫於本月十五日前至巴野當有惡苗數千餘人協助皮林拒敵官兵分途接殺斬獲功級餘賊遁入山箐結連附近各寨阻絕道路官兵連日追剿直入深山不憚攀崖附壁不避迅雷暴雨奮勇於十七十八十九等日連破鬼懷石弄絞隴絞蒙絞稍等寨據各報稱當陣斬獲真苗首級一百八十四顆奪獲器械一百二十件合行塘報二十四日據副使袁應文呈准總兵官李應祥手本移據副總兵陳寅呈報六甫等寨懸崖茂箐恃險窩藏巴野各處遁賊當差把總吳應龍偵探非潛師暗擊不得收功於二十一日會徐都司密議以把總陳



定等統兵先抵國州寨伏兵以絕賊後路分徐都司統守  
備史良將提調把總華統徐大綬等兵以攻其左分坐營  
汪如淵守備童龍伍萬鍾統中軍提調劉恩等兵以攻其  
右本職自統贊畫中軍把總黃龔李師沆葉定遠等土同  
知蒙詔等兵以衝其前分坐營劉岳李棟材統將玉成等  
兵四路邀擊以防其援約定本日四鼓抵寨五鼓齊攻且  
申先登之令嚴後至之誅三路官兵如期會集令火器把  
總楊綸領火器手至寨外用百子鳥銃火箭攻打賊出拒  
敵三路夾攻賊不能支退入後山欲遁國州伏兵衝擊賊  
知不免多挈男婦從崖自墮屍相枕藉因萬石懸崖不能

取級據各報稱共斬獲真苗首級九十七顆并奪獲器械  
八十九件合行塘報又據副使袁應文呈准副總兵陳寅  
手本據都司徐成領兵至頗洞劄營惡苗前來衝敵把總  
鄧國明等斬獲首級二十七顆署都清守備童龍於清水  
江當陣斬獲苗級七顆把總吳應龍龍顯華徐可上護糧  
於桃場寨斬獲搶糧苗級貳顆又據副使袁應文呈據黎  
平府申報中林亮寨二司率家丁擒獲六冲寨賊首周良  
原係賞格有名苗頭又獲張弩等寨苗周保尚保生并妻  
龍氏陸蘇保陸付良并妻潘氏陸蘇喬烏仔并妻龍氏潘  
和保并妻吳氏楊劉生崖村寨民吳廷章等擒獲賞格有



名苗頭吳國佐親弟吳元保吳三保并顯同妻吳氏子吳樓又林大章等擒苗婦妹索妹娘共二十名口斬獲都莫寨苗老索董隨首級二顆潭溪司捕獲都莫寨苗吳南江苗女吳南女又斬首級二顆到府俱轉解辰沅道外又據赤溪司申報贛畫黃龔把總盛蠡印同本司土官吳臯楊鼎督率鄉兵於巴野後路把截斬獲首級二顆并獲槍弩腰刀等件又據印水司土官楊光輝申報領兵前去九簡五簡地方堵截斬獲首級二顆又據亮寨司長官龍祖華報稱帶兵於太平山斬獲苗級四顆防守永從縣把總向承倖帶兵於後山親斬首級一顆等因又准總兵官李應

祥移報相同又據副使袁應文呈據都勻府署印推官楊應第申奉院道紙牌遵依督千戶楊希堯撫苗把總屠登瀛李夢麒等招撫崖埋谷干與江外天壩一帶共九十七寨苗民歸降服府管束認納原額糧差情願建立廣化營於彼駐兵等情又據指揮桂本枝土舍蒙試張國興等報皮林諸苗被官兵殺敗奔潰各官舍督兵把守者牙等處一苗不得渡江奔逸等因又據經理播地副使尤錫類叅議張文奇呈據經理貴陽府知府劉冠南申准委官本府添註通判夏燾標下中軍官劉岳移奉撫按兩院紙牌遵依會同原任桐城縣知縣鄭國材原任武驥衛經歷曾學



孔標下旗牌官馬武卿思州府生員何鯨督率熟知夷情  
把總何楊保楊正朝李應元羅應禎沈仕達許希賢蒲月  
清等前往九股瓮谷龍等寨審勘諸苗情形順逆有無協  
助皮林據台徒等寨苗頭謝保仰計牙風等領苗千餘於  
瓮谷龍地方扶老攜幼稽首懽呼爭相納土願聽設流將  
戶口糧馬造冊呈遞職等受之共計大小七十四寨人戶  
二千四百六十六戶苗民男婦九千五百一十三名口遞  
年認納秋糧二百七十八石六斗馬館銀一百一十六兩  
二錢三分隨詣崖門地方據九股各寨苗民曹全真龍歐  
亮等吐稱上下九股苗寨蔓延三省其江內下九股通五

開衛皮林等寨原與湖廣接近聽彼就近降附外今台盤  
等寨上下六營共計七十二寨界在江外爲上九股苗夷  
附近貴州今願就近歸降改流乞准收撫免剿將戶口糧  
馬文冊呈遞職等又受之共計七十二寨人戶二千四百  
四戶男婦七千二百四十七名口遞年認納上田秋糧二  
十三石六斗三升八合每石折銀伍兩共折銀一百一十  
八兩一錢九分又馬館銀八十七兩二錢九分糧馬二項  
共銀二百零伍兩伍錢八分俱以萬曆三十年爲始起徵  
該職等看得各苗盤踞巖谷週聯三省瓮谷龍等苗舊隸  
黔蜀二省諸土司分轄雖云桀驁不常其受羈縻而稍稍



輸糧馬者猶有十之二三至九股則地既深廣種類浩繁披甲荷戈人面獸心蓋自土司劉玉海被戮以來歷伍十載不通王化無論荼毒生靈甚且助播煽虐莫可誰何真地方一大隱憂也近楚有事皮林正黔協力堵截之日而此苗與皮林壤地聯絡勢相倚輔儻不先謀攜解令諸苗居中陰合楚師從外擊則皮林援諸苗爲內應而且得匿其逃竄黔師從內截則諸苗助皮林爲外戶而又將邀我歸路首尾牽制進退衝決蓋亦危矣幸蒙院道先事定謀指授方略令職等臨巢撫勘各苗遂畏威懷德俛首乞降不煩片甲獻土投降自是西南漸底廓清而地方可幸

息肩矣所有取具苗寨戶口疆土糧馬文冊及苗頭姓名合行連人解詳定奪等因申詳前來該二道會看得九股瓮谷龍各寨諸苗種類繁滋盤踞窟穴者百十餘寨負固王化者伍十餘年向倚播酋聲勢已蓄兔狐之憤今助皮林羽翼益堅唇齒之盟我黔師欲圖竝舉則應援牽制之爲難欲先一隅則竄伏邀截之可慮故必伐謀以孤其黨方得專力以搗其堅所據委官通判夏勳等宣揚朝廷威德先旣外撫滾水等寨鼓之風聲旋即深入九股奧區落其膽魄自茲皮林天甫諸苗遂絕望於三窟我師長驅夾剿行收功於一舉除招撫有功各官分別敘賚等因呈



詳到臣據此案照先准兵部咨該本部題覆臣題爲剿苗  
有期進師宜慎謹陳未議以圖萬全事又該巡按貴州監  
察御史宋興祖題爲苗患方熾勢權未一懇乞 聖明速  
賜裁決以早安邊宇事等因題奉 聖旨兵部知道欽此  
爲照皮林惡苗戕殺官兵攻劫縣治其極惡窮兇之狀黔  
楚撫按形之疏揭者不啻詳矣近該本部查據偏沅湖廣  
撫按疏揭議令撫臣江鐸坐鎮沅州督同征播鎮道將領  
一意剿滅此醜而湖廣川貴廣西各省督撫查照題議事  
理移駐鄰近地方撥兵處餉協同進攻或遏其旁奔或阻  
其後逸仍申嚴大小將領等官各釋成心共襄 國事如

有挾忿睚眦秦越相視者聽總督撫按廉實指名從重叅  
究等因題奉 聖旨是這惡苗未靖著江鐸陳璘遵照前  
旨相機進剿各督撫著移駐鄰近地方處置兵餉協同攻  
擊不許參差誤事欽此欽遵又准川湖貴總督右都御史  
兼兵部右侍郎李化龍咨同前事等因備咨到臣臣與按  
臣宋興祖多方計議就經備行新鎮都清守巡二道調集  
漢土官兵轉運糧餉先發募兵五百付遊擊董獻策黎平  
府知府熊廷相永從縣知縣李宗周督率標下把總梁鳳  
吟五關衛千戶陳洽邦統領協同衛軍鄉兵共守黎平城  
池以固根本又行都清道副使袁應文行令指揮桂本枝



土舍蒙試張國興督兵二千名於都勻府爛土七囤地方逼近皮林去處分兵把截又委把總屠登瀛李夢麒等招撫崖埋峇干與江外天壩一帶屯守以防奔逸又行副使尤錫類知府劉冠南催令通判夏燭中軍劉岳等帶兵五百名深入九股受降待以不死以翦其羽翼又慮黔中歲侵米貴民不聊生行令叅議張文奇知府張叔爾等多方買米以爲軍興猶恐不足又行令湖廣右布政使梁雲龍叅議薛士彥運辰常漕糧剩米接濟又借米於偏沅撫臣蒙慨發鎮遠米一萬四千餘石就近發運以便轉輸臣於正月二十五日移駐鎮遠會同總兵官李應祥分布將領

陳寅徐成等於二月初八日出師由邛水天柱五開進發以爲楚師犄角以防惡苗奔突今據前因臣除批行紀功道查驗功級給賞候按臣覆覈行經理道將九股內附諸苗寨隸於黃平著實撫恤外該臣會同總督川湖貴州軍務兼理糧餉巡撫四川地方都察院右都御史兼兵部右侍郎李化龍巡撫偏沅等處地方提督軍務兼理糧餉都察院右僉都御史江鐸看得皮林諸苗頃乘播亂戕殺多官罪惡已劇誠天討所不赦者顧自楚鋤之路近而頗夷自黔伐之路遠而更險荷蒙皇上責成偏沅撫臣而令黔兵協剿臣受命以來移營鎮遠守黔要害但黔中



一線之逕四顧皆苗九股谷龍一百四十餘寨崖埋峇干九十七寨東與皮林通則其右翼梁上巴野鬼懷石弄三十餘寨北與皮林通則其左股臣與總兵官李應祥監軍道袁應文紀功道張文奇副總兵陳寅從長計議不撫九股崖埋等寨則我師一出彼從中起腹背受敵此立敗也不撫梁上諸寨則我師欲進彼從外阻道路爲梗亦坐困也況黔中彈丸之地連年用兵平播之後荆棘叢生臣宣布 皇上恩威諭以撫剿竝施九股地亘三省從來不庭谷龍夙稱崛強梁上久阻聲教崖埋向號獷戾茲者不費一鏃而土地戶口奉籍而輸者矢 天日而血盟不戮一

夫而椎髻侏離牽袂而來者睹帷幄而股栗計寨二百四十有奇人戶四千八百七十有奇男婦一萬六千七百六十餘名口秋糧三百餘石馬銀二百餘兩臣以爲諸苗既服可無內顧矣無何巴野鬼懷諸寨二百年來不服 王化白晝劫人赤囊殺吏虜人妻子掘人墳墓種種積暴亡異皮林近復爲皮林逋逃聲勢相倚黔師出天柱銅鼓必由其地乃桀驁如故馮險拒敵臣不得已令諸將鵬剿之以通道路之梗以伐叛逆之黨仰仗 皇上威靈 密勿石畫樞筦機宜省闈指授以故兵交刃接星流彗掃數日之間斬獲多級翦闢草萊夷爲孔道外得以會楚粵之師



內得以收安輯之功皆此戰矣是役也翦皮林之羽翼令  
五溪之蠻不蔓延於鄰封籍九股之版圖俾一綫之路遂  
式廓於土宇文武各官之功亦自有不可氓者如總兵官  
都督同知李應祥天授勝筭神輸祕圖草木爲兵宛乎金  
城方略椒蘭比德依然大樹將軍掎角秦人之鹿首尾常  
山之蛇功當首敘以膺 異數監軍道副使袁應文潛運  
宏略獨決神機分布於都雲天柱之間深入其阻指撻於  
巴野石弄之穴克成厥功功宜首論特行優敘督餉道右  
叅議張文奇當庚癸之呼勤水陸之運鱸銜舳接而澹爲  
安流輻輳輪輸而士騰宿飽經理驛傳道副使尤錫類舞

格苗之羽築降夷之城始撫谷龍折拒螳之怒臂繼臣九  
股權困獸之鬪心此二臣者運餉招降俱極苦心功應並  
論均當優敘副總兵陳寅提劔風驅援旗電掃巖居穴處  
之壘遽復於隍木衣卉服之酋盡褫其魄都司徐成雅似  
書生蔚然虎將破夜郎已如衝鷖之埽落葉馘叩苗直是  
烈火以燔秋蓬署守備童龍魁岸邁筆夷旗豎而氛埽梁  
上英風肅部伍劔鳴而鷹揚銅鼓此三臣者披堅執銳身  
在行間戰功竝茂應從優敘清浪叅將劉效節飭兵戎貌  
貅生色撫苗夷洞寨傾心累戰能立膚功一肯未虧素望  
標下游擊都司張秉忠循循緩帶臨敵壘而勇著先登烈



烈枕戈守中堅而師稱以律標下中軍劉岳却敵則桓桓壯略刁斗夜嚴撫苗則翼翼小心衣襦日戒守備汪如淵同士甘苦人懷挾纊之恩料敵險夷戰成破竹之勢此四臣者相應竝資而劉岳深入不毛以撫諸苗應從優賚者也經理黃平貴陽府知府劉冠南以理煩治劇之才行拯溺林焚之政五司卽頑梗恃若青天九股極獷信化爲赤子鎮遠府知府張叔重經濟足紹家聲練達允爲國器簡髮數米而萬口歡騰水運陸輸而八面應敵黎平府知府今以同知聽調熊廷相持空券以當虎口坐孤城而捍赤眉其苦劇於臥薪嘗膽而不驚其功成於投戈委弓而

益遜此三臣者備嘗艱辛均當優賚內熊廷相又逼於賊貼危而安或令復職以圖善後者也貴陽府同知徐庭綬籌筭輸貴陽之金馳驅入鎮遠之帑士腹不朽戎儲益饒貴陽府添註通判夏勳往來虎穴崎嶇羊腸覽三苗萬死之誅弘九股再生之路都勻府推官楊應繁署事雲中撫苗域外崖埋得復舊業者牙竟爲良民施秉縣知縣袁尚紀挈兩印拮据煩劇之場運萬鍾焦愁溪洞之險清平縣知縣劉啓周驚烽走傳而履變不駭飛芻輓粟而走險如夷婺川縣知縣葛楚元住邛水而與虎豹爲鄰辨首功而懸鏡衡不爽印江縣知縣張鎔旌旗觸天而討賊益厲舳



黑中  
艦沸水而催運如期來從縣知縣李宗周以世胄之子而當賊壘竭死守之力而完郡城以上諸臣均應竝賚內通判夏燭不以左遷二心不以入夷銷魂忠貞沈毅當破格以酬其勞者也原任守備伍萬鍾率酋豪而捍疆場化兵弩而持鉤鉏原任守備史良將紆籌自有甲兵校士皆成組練標下贊畫官黃龔仁且有勇常杼倚鹿之謀儒而能將力贊羹臬之計鎮撫葉定遠本武闡入彀之奇奮虎帳吞胡之勇贊畫官李師沆年少而峇能搏虎力勁而劍可刳鯨獨山州土同知蒙詔討夜郎不辭馬革征皮林復指臬巢以上諸武臣均當竝賚內贊畫官黃龔逢大敵不怯

見小利不取似當優處以儲將材者也原任桐城縣知縣今閑住鄭國材首建議以服苗夷遂因壘而降崇國思州府學生生員土舍何鯤見一面而知商網率九股以歸漢庭原任衛經歷曾學孔餐風宿水遍歷障徼標下旗牌官馬武卿衝泥冒瘴交盟大豕指揮李棟材治兵振旅控扼要害指揮張義把總黃如龍羅應禎何楊保楊正朝李應元沈仕達許希賢蒲月清王宗舜等俱以鄉導而效勤劬均應竝賚內知縣鄭國材以鄉官而歷險生員何鯤以土舍而傾誠在鄭國材當從優獎進階在何鯤應授一土巡檢以化誨諸夷輸納糧差者也標下練兵把總王嘉言丘



富郎梁鳳吟贊畫蔣玉成劉漢徐一夔張爾知劉恩指揮  
桂本枝千百戶梁秀魯思孔劉于爵張鳳起顧紹元王民  
皞陳治邦傅良臣楊希堯應龍張克震把總周明易之謙  
陳正邦李占先吳文秀陳定華統鄭國明侯仕芳盛彖印  
楊綸王世卿楊應詔任承忠譚春安世珍夏尚彬楊光岳  
江萬程葉茂胡來聘楊國欽陳猷向承倖吳應龍李茂徐  
大綬丘維屏徐繼冲屠登瀛李夢麒金聲孫應麒陳英督  
陣官馮邦濟劉英汪瀾向承宗熊諫總旗王嘉倫武生王  
治安張國揚葉占先上舍蒙試張國興土官吳阜楊鼎楊  
光輝龍祖華或馳戈矛而破敵或謹亭障以守禦均應竝

賚以旌其戰伐者也鎮遠府土同知何守德土推官楊通  
淮經歷包一鳴陳江定劉汝安饒崇奎陳九齡吏目萬一  
實典史楊啓指揮何天寵陳尚策魯重禮孫欽千戶李春  
元百戶蕭鳳鳴鎮撫張國壯俱運糧鎮浪而持籌於倉庾  
吏目張大紀千戶李朝陽吳秉鉞百戶魏國忠朱萬春湯  
承禹胡朝賢把總王安民劉崑白其心蔣文堂宋真相俱  
運米辰常而凌狎於波濤俱應優賚以酬其辛勞者也若  
黔中米貴如珠民多菜色千里餽糧勢難宿飽臣乞糴於  
楚荷偏沉撫臣發楚中盈倉之峙活黔中涸轍之魚慨然  
濟臣米一萬四千餘石臣甚德之卽解銀六千兩以助楚



餉第同事憲臣例不敢敘當其時湖廣右布政使梁雲龍  
右叅議薛士彥奉偏沅撫臣檄先後催運在梁雲龍自行  
間而轉輸輦車驪駕不以秦越而殊在薛士彥自省城而  
杼籌兩檝雪帆不以風濤而阻辰溪縣知縣張守緒躬至  
黔境而跋涉爲勞親放楚米而顆粒皆惠溆浦縣知縣梅  
友竹召募運舟而齎送有緒編發船戶而燥濕無虞永順  
司經歷唐元永州衛指揮張國皆同舟共事相與濟黔饑  
者古人重一飯之義臣惡敢忘之也除搗皮林之巢擊天  
甫之頸係楚師楚功臣不敢越俎聽偏沅撫臣另 題外  
臣謹將黔中斬獲功級據實 奏報并 進九股等寨內

附戶口冊籍 上塵 御覽伏乞 勅下戶兵二部候楚  
粵疏至總爲覆議分別上 請凡支用錢糧辨驗功級行  
巡按御史覆覈降苗戶口應附黃平行該道及新設府州  
措置經理施行謹題請 旨

調補各道以便經理疏

題爲方面多缺懇乞更調速補以便經理事據貴州布政  
使司呈准本司分守貴寧道左叅議梅國樓咨稱本職原  
籍湖廣黃州府麻城縣人萬曆貳拾玖年正月拾陸日巡  
歷永寧衛有家丁梅春報稱父梅汝觀於貳拾捌年拾壹  
月貳拾捌日在家病故本職例應回籍守制等因准此轉



報到臣據此該臣會同巡按貴州監察御史宋興祖查得該道統轄地方西連播境東制諸夷逆酋蕩平地方新定正在用人料理彈壓今左叅議梅國樓丁憂回籍近接邸報又復被察聽降所有員缺相應具 題速補案照臣先爲就近選用等事具 題行驛傳道副使尤錫類貴陽府知府劉冠南經理黃平一帶地方據稱黃平地狹戶不滿叁百城不過貳里斗大之域不堪建府若加壹道壹叅尤不能堪等情到臣臣以皮林事移營鎮遠因檄經理道府州縣各官同至鎮遠會議該臣看得黃平褊小止堪建壹州以壹叅將坐鎮其中將新府移置平越卽屬新鎮道專

轄不必另設該道衙門其經理驛傳副使尤錫類相應加銜調新鎮道新鎮道叅議張文奇應調貴寧道補叅議梅國樓缺遺下驛傳道副使員缺相應速補伏乞 勅下吏部再加查覈更調銓補庶黃平壹路得省壹道之設而新鎮貴寧驛傳叁道俱無曠官之患矣謹題請 旨

請監軍楊按察使 卹典疏

題爲監軍征播積勞身殞懇乞 聖明破格甄錄以卹死事以勸勞臣事據布按二司署印副使洪澄源都清道副使袁應文分守新鎮道右叅議張文奇呈奉臣紙牌據江西泰和縣申據原任貴州監軍按察使楊寅秋弟寅冬子



嘉禎等呈稱父因征播勞苦成病題 允回籍調理不愈  
於萬曆二十九年三月十八日病故乞賜轉達等情理合  
申報據此備牌仰司會同按察司及守巡等道備查監軍  
楊按察使歿於 王事與東征監軍陳御史四川監軍張  
叅政事例有無相符作速會議明白具由通詳以憑具  
題施行等因奉此行據貴陽府知府劉冠南會同同知徐  
庭綬申稱查得已故監軍楊按察使志在滅賊身唯許  
國兼程投責竄籌畫心勞穿暑入海龍腥膻氣染致成篤  
疾遽爾捐生杳與東征陳御史四川張叅政事例既同相  
應比例上 請乞 恩贈廕等因又該都清新鎮二道會

看得楊按察使經始剿播既食少事煩深入播巢復殄瘴  
飲血足以播事甫夷而遽乞骸骨詎意播功方敘而旋聞  
訃音 恩典未沐於躬膺忠魂宜慰於泉壤近征東陳御  
史四川張叅政查 明例既與相符 卹典委宜從厚等  
因到司該本司會同按察司看得已故監軍按察使楊寅  
秋忠貞體 國慷慨忘身拜 命當中外惶惑之時單車  
就道入貴屬兵食告訕之會畢慮經營武備振脩狙詐作  
使旣拔重關之險直禱危困之虛沐雨櫛風與士同苦援  
桴冒矢有死無生一戰斯得罪人積勞頓成痼疾引歸未  
幾訃報旋聞據前後決策運籌無忝以勞定國之列而終



始鞠躬盡瘁尤微以死勤事之忠况前者定交趾平府江  
勳在西粵爛焉其生也褒顯未膺其死也 卹典宜厚查  
得往歲監軍御史陳效歿於朝鮮該總督尚書邢玠具  
題該吏兵二部覆奉 欽依追贈光祿寺少卿廕一子錦  
衣衛世襲百戶仍與立廟祀之近四川監軍叅政張棟播  
事告成卒於渝水該川湖貴總督部院李化龍業經此例  
題 請今按察使楊寅秋死事既同 明例正合相應請  
乞具 題照品贈廕仍廟祀以慰忠魂等因到臣該臣會  
同巡按貴州監察御史宋興祖看得人臣之於 國死事  
易成事難非夫死之易也徒死而償事則成事者難也若

既成事而又死事則死尤難之難也 明主知其然故以  
死勤事則祀之憐其死也不問其事之成否也以勞定國  
則祀之酬其勞也不問其身之死否也若逢世難有定國  
之勞及功成兼死事之苦有臣若此 明主所以憐而錄  
之者又不知其當何如矣今貴州監軍按察使楊寅秋不  
幸類是當播賊方征貴州只尺虎穴獨櫻其剡臣以不才  
謬當是任文臣錯落晨星武將逡縮首鼠臣隻手獨拍爰  
爰乎殆矣寅秋捌月 陛辭十一月入黔賊方犯東坡邀  
之興隆幾為所困乃單騎之貴陽與臣調募漢兵操縱土  
夷即軍興戎器各有攸司寅秋既督兵又理餉既治軍又



繕械晝坐臣署手不停書夜叩臣門舌不停議而後東坡之賊始退既首拔烏江河渡二關賊突出犯其勢甚銳寅秋直以身當之作使隴澄安疆臣批亢擣虛以解其紛開路攻堅以扼其喉峭壁無水則雜血以飲積尸如山則析骸而臥而後海龍之功始奏歸來飲至容色黎黑不能卽席次尋聞母病飲食頓減不能下牀第臣見其病勢急卽爲具題伏蒙皇上俯從部覆憐允回籍調理病痊起用寅秋得旨以十月南還旣入里門病日綿延臣屢遣人問之卽從褥上輒以手書來不曰皮林未了之局作何收結則曰播州新救之邦未易控制無一語訴其病無

一字及其私臣猶冀其膚功甫奏寸祿未霑或可苟延歲時以膺皇上異數不謂三月竟長逝矣訃來貴州軍士哭於部伍土夷哭於邊徼僚案官吏哭於庭兒童走卒哭於市臣以總角共研席白首同干戈一生一死惡得不拊膺長涕臣又查得寅秋參政南寧日黎莫交惡羽檄日馳議者謂當閉關以待其自定寅秋至曲爲經略乃受黎之降不斬莫之祀無煩一鏃九真受吏臣竊以爲毛尚書伯溫之撫登庸不加於此矣已而府江猺賊弄兵林坳寅秋與粵西諸臣同心拮据斬獲數千比者宣捷告廟臣又以爲翁尚書萬達之定左江不烈於此矣寅秋在廣廣



重在貴貴重故廣西按臣黃紀賢涂宗濬常語人曰此真  
邊材川湖貴總督李化龍貴州按臣宋興祖常語人曰此  
真監軍有臣若此 國家不能盡得其用而俾之殲瘡觸  
霧以死故臣之痛哭不獨爲寅秋不獨爲貴州已也寅秋  
有母業已逾柒望捌垂白在堂寅秋有子女然而未嫁未  
婚者紉紉在孺此雖寅秋之私然今日所望以哀而存之  
者 皇上也古人惟蓋不弃爲埋狗馬貓虎必迎爲食鼠  
豕寅秋綏交征徭平夜郎二役彼存日尚不敢言功而况  
身後獨計以爲鼠豕之食犬馬之力 國家爲將來死事  
者勸自有 藪與不忍處其薄耳照得已故監軍按察使

楊寅秋世篤忠貞才兼文武枕戈以討賊則九死爲輕介  
石而歸田卽終日不俟方焚老上之塞遽隕營中之星志  
決身殲籌 國何減於諸葛功成勇退承家不忝於文貞  
况交南折箠之勳方之銅柱而府江破竹之列過於金城  
合三省之其勤以死以勞戰功爲最睹四夷之來享于理  
于疆 卹典宜優頃者陳御史歿於朝鮮近者張參政卒  
於渝水死事旣同 明例昭然又經司道查議非濫一應  
贈官廕子立祠各項相應比例上 請伏乞 勅下吏兵  
二部覆議明白查給施行庶幾幽以瞑勞臣之目明以鼓  
戰士之氣臣不勝懇乞 命之至謹題請 旨





國家圖書館, NATIONAL CENTRAL LIBRARY, TAIWAN, R.O.C.

二里六分

光緒三十一年

...



續本生黔草卷之八

泰和郭子章相奎甫著  
友人楊寅秋義叔甫校

奏疏

協剿皮林招降九股敘功疏

題爲皮林蕩平有期黔師堵截無虞恭報斬獲功級并  
獻九股等寨內附戶口文冊以昭 皇仁以綏邊圉事萬  
曆二十九年三月十日據貴州監軍道副使袁應文紀  
功督餉道右叅議張文奇呈准貴州總兵官李應祥手本  
移稱本年三月十六日據副總兵陳寅揭報奉令督同都



司徐成坐營中軍劉岳汪如淵原任守備童龍伍萬鍾史良將贊畫黃龔李師沆葉定遠蔣玉成劉漢徐一夔張爾知劉恩旗鼓把總易之謙陳正邦土同知蒙詔武生王治安提調把總李占先吳文秀陳猷華統鄭國明陳定侯仕芳督陣旗牌官馮邦濟劉英汪瀾等協剿皮林天甫叛苗跟踪追蹙於十五日五鼓至巴野險寨惡賊拒敵官兵分三大枝分途接殺直至日午共報斬獲真苗首級一百三十六顆奪獲盔甲刀弩等項各賊退據後山時因日暮收兵二十二日據副使袁應文呈准總兵官李應祥手本移據副總兵陳寅呈報奉令督同都司徐成坐營劉岳汪如

淵守備童龍等協剿皮林天甫於本月十五日前至巴野當有惡苗數千餘人協助皮林拒敵官兵分途接殺斬獲功級餘賊遁入山箐結連附近各寨阻絕道路官兵連日追剿直入深山不憚攀崖附壁不避迅雷暴雨奮勇於十七十九等日連破鬼懷石弄絞隴絞蒙絞稍等寨據各報稱當陣斬獲真苗首級一百一十四顆奪獲器械一百二十件合行塘報二十四日據副使袁應文呈准總兵官李應祥手本移據副總兵陳寅呈報六甫等寨懸崖茂箐恃險窩藏巴野各處遁賊當差把總吳應龍偵探非潛師暗擊不得收功於二十一日會徐都司密議以把總陳



定等統兵先抵閩州寨伏兵以絕賊後路分徐都司統守備史良將提調把總華統徐大綬等兵以攻其左分坐營汪如淵守備童龍伍萬鍾統中軍提調劉恩等兵以攻其右本職自統贊畫中軍把總黃龔李師沆葉定遠等土同知蒙詔等兵以衝其前分坐營劉岳李棟材統將玉成等兵四路邀擊以防其援約定本日四鼓抵寨五鼓齊攻且申先登之令嚴後至之誅三路官兵如期會集令火器把總楊綸領火器手至寨外用百子鳥銃火箭攻打賊出拒敵三路夾攻賊不能支退入後山欲遁閩州伏兵衝擊賊知不免多挈男婦從崖自墮屍相枕藉因萬石以懸崖不能

取級據各報稱共斬獲真苗首級九十七顆并奪獲器械八十九件合行塘報又據副使袁應文呈准副總兵陳寅手本據都司徐成領兵至頗洞劄營惡苗前來衝敵把總鄧國明等斬獲首級二十七顆署都清守備童龍於清水江當陣斬獲苗級七顆把總吳應龍龍顯華徐可上護糧於桃場寨斬獲搶糧苗級貳顆又據副使袁應文呈據黎平府申報中林亮寨二司率家丁擒獲六冲寨賊首周良原係賞格有名苗頭又獲張弩等寨苗周保尚保生并妻龍氏陸蘇保陸付良并妻潘氏陸蘇喬鳥仔并妻龍氏潘和保并妻吳氏楊劉生崖村寨民吳廷章等擒獲賞格有



名苗頭吳國佐親弟吳元保吳三保并顯同妻吳氏子吳樓又林大章等擒苗婦妹索妹娘共二十名口斬獲都莫寨苗老索董隨首級二顆潭溪司捕獲都莫寨苗吳南江苗女吳南女又斬首級二顆到府俱轉解辰沅道外又據赤溪司申報賚畫黃龔把總盛蠡印同本司土官吳臯楊鼎督率鄉兵於巴野後路把截斬獲首級二顆并獲槍弩腰刀等件又據邛水司土官楊光輝申報領兵前去九簡五簡地方堵截斬獲首級二顆又據亮寨司長官龍祖華報稱帶兵於太平山斬獲苗級四顆防守永從縣把總向永傑帶兵於後山親斬首級一顆等因又准總兵官李應

祥移報相同又據副使袁應文呈據都勻府署印推官楊應第申奉院道紙牌遵依督千戶楊希堯撫苗把總屠登瀛李夢麟等招撫崖埋谷干與江外天壩一帶共九十七寨苗民歸降服府管束認納原額糧差情願建立廣化營於彼駐兵等情又據指揮桂本枝土舍蒙試張國興等報皮林諸苗被官兵殺敗奔潰各官舍督兵把守者牙等處一苗不得渡江奔逸等因又據經理播地副使尤錫類叅議張文奇呈據經理貴陽府知府劉冠南申准委官本府添註通判夏燭標下中軍官劉岳移奉撫按兩院紙牌遵依會同原任桐城縣知縣鄭國材原任武驥衛經歷曾學



孔標下旗牌官馬武卿思州府生員何鯨督率熟知夷情把總何楊保楊正朝李應元羅應禎沈仕達許希賢蒲月清等前往九股瓮谷龍等寨審勘諸苗情形順遂有無協助皮林據台徒等寨苗頭謝保仰計牙風等領苗千餘於瓮谷龍地方扶老攜幼稽首懽呼爭相納土願聽設流將戶口糧馬造冊呈遞職等受之共計大小七十四寨人戶二千四百六十六戶苗民男婦九千五百一十三名口遞年認納秋糧二百七十八石六斗馬館銀一百一十六兩二錢三分隨詣崖門地方據九股各寨苗民曹全真龍歐亮等吐稱上下九股苗寨蔓延二省其江內下九股通五

開衛皮林等寨原與湖廣接近聽彼就近降附外今台盤等寨上下六營共計七十二寨界在江外爲上九股苗夷附近貴州今願就近歸降改流乞准收撫免剿將戶口糧馬文冊呈遞職等又受之共計七十二寨人戶二千四百四戶男婦七千二百四十七名口遞年認納上田秋糧二十三石六斗三升八合每石折銀伍兩共折銀一百一十八兩一錢九分又馬館銀八十七兩三錢九分糧馬二項共銀二百零伍兩伍錢八分俱以萬曆三十年爲始起徵該職等看得各苗盤踞巖谷週聯三省瓮谷龍等苗舊隸黔蜀二省諸土司分轄雖云桀驁不常其受羈縻而稍稍



輸糧馬者猶有十之二三至九股則地既深廣種類浩繁披甲荷戈人面獸心蓋自土司劉玉海被戮以來歷伍十載不通王化無論荼毒生靈甚且助播煽虐莫可誰何真地方一大隱憂也近楚有事皮林正黔協力堵截之日而此苗與皮林壤地聯絡勢相倚輔儻不先謀攜解令諸苗居中陰合楚師從外擊則皮林援諸苗爲內應而且得匿其逃竄黔師從內截則諸苗助皮林爲外戶而又將邀我歸路首尾牽制進退衝決蓋亦危矣幸蒙院道先事定謀指授方略令職等臨巢撫勘各苗遂畏威懷德俛首乞降不煩片甲獻土投降自是西南漸底廓清而地方可幸

息有矣所有取具苗寨戶口疆土糧馬文冊及苗頭姓名合行連人解詳定奪等因申詳前來該二道會看得九股瓮谷龍各寨諸苗種類繁滋盤踞窟穴者百十餘寨負固王化者伍十餘年向倚播酋聲勢已蓄兇狐之憤今助皮林羽翼益堅唇齒之盟我黔師欲圖竝舉則應援牽制之爲難欲先一隅則竄伏邀截之可慮故必伐謀以孤其黨方得專力以搗其堅所據委官通判夏勵等宣揚朝廷威德先旣外撫滾水等寨鼓之風聲旋即深入九股巢區落其膽魄自茲皮林天甫諸苗遂絕望於三窟我師長驅夾剿行收功於一舉除招撫有功各官分別敘賞等因呈



詳到臣據此案照先准兵部咨該本部題覆臣題為剿苗  
有期進師宜慎謹陳未議以圖萬全事又該巡按貴州監  
察御史宋興祖題為苗患方熾勢權未一懇乞 聖明速  
賜裁決以早安邊宇事等因題奉 聖旨兵部知道欽此  
為照皮林惡苗殺官兵攻劫縣治其極惡窮兇之狀黔  
楚撫按形之疏揭者不啻詳矣近該本部查據偏沅湖廣  
撫按疏揭議令撫臣江鐸坐鎮沅州督同征播鎮道將領  
一意剿滅此醜而湖廣川貴廣西各省督撫查照題議事  
理移駐鄰近地方撥兵處餉協同進攻或遇其旁奔或阻  
其後逸仍申嚴大小將領等官各釋成心共襄 國事如

有挾忿睚眦秦越相視者聽總督撫按廉實指名從重叅  
究等因題奉 聖旨是這惡苗未靖著江鐸陳璘遵照前  
旨相機進剿各督撫著移駐鄰近地方處置兵餉協同攻  
擊不許參差誤事欽此欽遵又准川湖貴總督右都御史  
兼兵部右侍郎李化龍咨同前事等因備咨到臣臣與按  
臣宋興祖多方計議就經備行新鎮都清守巡二道調集  
漢土官兵轉運糧餉先發募兵五百付遊擊董獻策黎平  
府知府熊廷相永從縣知縣李宗周督率標下把總梁鳳  
吟五關衛千戶陳洽邦統領協同衛軍鄉兵共守黎平城  
池以固根本又行都清道副使袁應文行令指揮桂本枝



土舍蒙試張國興督兵二千名於都勻府爛土七圍地方逼近皮林去處分兵把截又委把總屠登瀛李夢麒等招撫崖埋荅干與江外天壩一帶屯守以防奔逸又行副使尤錫類知府劉冠南催令通判夏燭中軍劉岳等帶兵五百名深入九股受降待以不死以翦其羽翼又慮黔中歲侵米貴民不聊生行令叅議張文奇知府張叔璽等多方買米以爲軍興猶恐不足又行令湖廣右布政使梁雲龍叅議薛士彥運辰常漕糧剩米接濟又借米於偏沅撫臣蒙慨發鎮遠米一萬四千餘石就近發運以便轉輸臣於正月二十五日移駐鎮遠會同總兵官李應祥分布將領

陳寅徐成等於二月初八日出師由邛水天柱五開進發以爲楚師犄角以防惡苗奔突今據前因臣除批行紀功道查驗功級給賞候按臣覆覈行經理道將九股內附諸苗寨隸於黃平著實撫恤外該臣會同總督川湖貴州軍務兼理糧餉巡撫四川地方都察院右都御史兼兵部右侍郎李化龍巡撫偏沅等處地方提督軍務兼理糧餉都察院右僉都御史江鐸看得皮林諸苗頃乘播亂戕殺多官罪惡已劇誠天討所不赦者顧自楚鋤之路近而頗夷自黔伐之路遠而更險荷蒙皇上責成偏沅撫臣而令黔兵協剿臣受命以來移營鎮遠守黔要害但黔中



一線之逕四顧皆苗九股谷龍一百四十餘寨崖埋峇干九十七寨東與皮林通則其右翼梁上巴野鬼懷石弄三十餘寨北與皮林通則其左股臣與總兵官李應祥監軍道袁應文紀功道張文奇副總兵陳寅從長計議不撫九股崖埋等寨則我師一出彼從中起腹背受敵此立敗也不撫梁上諸寨則我師欲進彼從外阻道路爲梗亦坐困也況黔中彈丸之地連年用兵平播之後荆棘叢生臣宣布 皇上恩威諭以撫剿竝施九股地亘三省從來不庭谷龍夙稱崛強梁上久阻聲教崖埋向號獷戾茲者不費一鏃而土地戶口奉籍而輸者矢 天日而血盟不戮一

夫而椎髻保離牽袂而來者睹帷幄而股栗計寨二百四十有奇人戶四千八百七十有奇男婦一萬六千七百六十餘名口秋糧三百餘石馬銀二百餘兩臣以爲諸苗旣服可無內顧矣無何巴野鬼懷諸寨二百年來不服 王化白晝劫人赤囊殺吏虜人妻子掘人墳墓種種積暴亡異皮林近復爲皮林逋逃聲勢相倚黔師出天柱銅鼓必由其地乃桀驁如故馮險拒敵臣不得已令諸將勦剿之以通道路之梗以伐叛逆之黨仰仗 皇上威靈 密勿石畫樞筦機宜省闈指授以故兵交刃接星流彗掃數日之間斬獲多級剔闢草萊夷爲孔道外得以會楚粵之師



內得以收安輯之功皆此戰矣是役也翦皮林之羽翼令  
五溪之蠻不蔓延於鄰封籍九股之版圖俾一綫之路遂  
式廓於土宇文武各官之功亦自有不可氓者如總兵官  
都督同知李應祥天授勝筭神輸祕圖草木爲兵宛乎金  
城方略椒蘭比德依然大樹將軍倚角秦人之鹿首尾常  
山之蛇功當首敘以膺 異數監軍道副使袁應文潛運  
宏略獨決神機分布於都雲天柱之間深入其阻指撝於  
巴野石弄之穴克成厥功功宜首論特行優敘督餉道右  
叅議張文奇當庚癸之呼勤水陸之運鱸銜舳接而澹爲  
安流輻輳輪輸而士騰宿飽經理驛傳道副使尤錫類舞

格苗之羽築降夷之城始撫谷龍析拒螳之怒臂繼臣九  
股摧困獸之鬪心此二臣者運餉招降俱極苦心功應並  
論均當優敘副總兵陳寅提劔風驅援旗電掃巖居穴處  
之壘遽復於陸木卉服之酋盡褫其魄都司徐成雅似  
書生蔚然虎將破夜郎已如衝風之掃落葉鹹叩苗直是  
烈火以燔秋蓬署守備童龍魁岸邁筆夷旗豎而氛掃梁  
上英風肅部伍劔鳴而鷹揚銅鼓此三臣者披堅執銳身  
在行間戰功竝茂應從優敘清浪叅將劉效節飭兵戎貌  
貅生色撫苗夷洞寨傾心累戰能立膚功一肯未虧素望  
標下遊擊都司張秉忠循循緩帶臨敵壘而勇著先登烈



烈枕戈守中堅而師稱以律標下中軍劉岳却敵則桓桓壯略刁斗夜嚴撫苗則翼翼小心衣襦日戒守備汪如淵同士甘苦人懷挾纊之恩料敵險夷戰成破竹之勢此四臣者相應竝賚而劉岳深入不毛以撫諸苗應從優賚者也經理黃平貴陽府知府劉冠南以理煩治劇之才行拯溺林焚之政五司卽頑梗恃若青天九股極獷狷化爲赤子鎮遠府知府張叔璽經濟足紹家聲練達允爲國器簡髮數米而萬口歡騰水運陸輸而八面應敵黎平府知府今以同知聽調熊廷相持空券以當虎口坐孤城而捍赤眉其苦劇於臥薪嘗膽而不驚其功成於投戈委弓而

益遜此三臣者備嘗艱辛均當優賚內熊廷相又逼於賊咄危而安或令復職以圖善後者也貴陽府同知徐庭綬籌筭輸貴陽之金馳驅入鎮遠之帑士腹不朽戎儲益饒貴陽府添註通判夏勳往來虎穴崎嶇羊腸寬三苗萬死之誅弘九股再生之路都勻府推官楊應箴署事雲中撫苗域外崖埋得復舊業者牙竟爲良民施永縣知縣袁尚紀挈兩印拮据煩劇之場運萬鍾焦愁溪洞之險清平縣知縣劉啓周驚烽走傳而履變不駭飛芻輓粟而走險如夷婺川縣知縣葛元住叩水而與虎豹爲鄰辨首功而懸鏡衡不爽印江縣知縣張鎔旌旗觸天而討賊益厲舳



艦沸水而催運如期永從縣知縣李宗周以世胄之子而當賊壘竭死守之力而完郡城以上諸臣均應並賚內通判夏燭不以左遷二心不以入夷銷魂忠貞沈毅當破格以酬其勞者也原任守備伍萬鍾率酋豪而捍疆場化兵弩而持鉤鉏原任守備史良將紆籌自有甲兵校士皆成組練標下贊畫官黃龔仁且有勇常杼倚鹿之謀儒而能將力贊羹臬之計鎮撫葉定遠本武闈入彀之奇奮虎帳吞胡之勇贊畫官李師沅年少而考能搏虎力勁而劍可刳鯨獨山州土同知蒙詔討夜郎不辭馬革征皮林復指臬巢以上諸武臣均當並賚內贊畫官黃龔逢大敵不怯

見小利不取似當優處以儲人材者也原任桐城縣知縣今閑住鄭國材首建議以服苗夷遂因壘而降崇國恩州府學生生員土舍何鯤見一面而知商網率九股以歸漢庭原任衛經歷曾學孔餐風宿水遍歷障徼標下旗牌官馬武卿衝泥冒瘴交盟犬豕指揮李棟材治兵振旅控扼要害指揮張義把總黃如龍羅應禎何楊保楊正朝李應元沈仕遠許希賢蒲月清王宗舜等俱以鄉導而效勤劬均應並賚內知縣鄭國材以鄉官而歷險生員何鯤以土舍而傾誠在鄭國材當從優獎進階在何鯤應授一土巡檢以化誨諸夷輸納糧差者也標下練兵把總王嘉言丘



富郎梁鳳吟替畫蔣玉成劉漢徐一夔張爾知劉恩指揮  
桂本枝千戶梁秀魯思孔劉于爵張鳳起顧紹元王民  
皞陳治邦傅良臣楊希堯應龔張克震把總周明易之謙  
陳正邦李占先吳文秀陳定華統鄭國明侯仕芳盛蠡印  
楊綸王世卿楊應詔任承忠譚春安世珍夏尚彬楊光岳  
江萬程葉茂胡來聘楊國欽陳猷向承倅吳應龍李茂徐  
大綬立維屏徐繼冲屠登瀛李夢麒金聲孫應麒陳英督  
陣官馮邦濟劉英汪瀾向承宗熊諫總旗王嘉倫武生王  
治安張國揚葉占先上舍蒙試張國興土官吳皇楊鼎楊  
光輝龍祖華或馳戈矛而破敵或謹亭障以守禦均應並

資以旌其戰伐者也鎮遠府土同知何守德土推官楊通  
淮經歷包一鳴陳江定劉汝安饒崇奎陳九齡吏目萬一  
實典史楊啓指揮何天寵陳尚策魯重禮孫欽千戶李春  
元百戶蕭鳳鳴鎮撫張國壯俱運糧鎮浪而持籌於倉庾  
吏目張大紀千戶李朝陽吳秉鉞百戶魏國忠朱萬春湯  
承禹胡朝賢把總王安民劉崑白其心蔣文堂宋真相俱  
運米辰常而凌狎於波濤俱應優賚以酬其辛勞者也若  
黔中米貴如珠民多菜色千里餽糧勢難宿飽臣乞糴於  
楚荷偏沉撫臣發楚中盈倉之時活黔中涸轍之魚慨然  
濟臣米一萬四千餘石臣甚德之卽解銀六千兩以助楚



餉第同事憲臣例不敢敘當其時湖廣右布政使梁雲龍右叅議薛士彥奉偏沅撫臣檄先後催運在梁雲龍自行間而轉輸犖車驪駕不以秦越而殊在薛士彥自省城而杼籌兩檝雪帆不以風濤而阻辰溪縣知縣張守緒躬至黔境而跋涉為勞親放楚米而顆粒皆惠溆浦縣知縣梅友竹召募運舟而齎送有緒編發船戶而燥濕無虞永順司經歷唐元永州衛指揮張國皆同舟共事相與濟黔饑者古人重一飯之義臣惡敢忘之也除搗皮林之巢繫天甫之頸係楚師楚功臣不敢越俎聽偏沅撫臣另題外臣謹將黔中斬獲功級據實奏請并進九股等寨內

附戶口冊籍 上塵 御覽伏乞 勅下戶兵二部候楚粵疏至總為覆議分別上 請凡支用錢糧辨驗功級行巡按御史覆覈降苗戶口應附黃平行該道及新設府州措置經理施行謹題請 旨

調補各道以便經理疏

題為方面多缺懇乞更調速補以便經理事據貴州布政使司呈准本司分守貴寧道左叅議梅國樓咨稱本職原籍湖廣黃州府麻城縣人萬曆貳拾玖年正月拾陸日巡歷永寧衛有家丁梅春報稱父梅汝觀於貳拾捌年拾壹月貳拾捌日在家病故本職例應回籍守制等因准此轉



報到臣據此該臣會同巡按貴州監察御史宋興祖查得該道統轄地方西連播境東制諸夷逆酋蕩平地方新定正在用人料理彈壓今在參議梅國樓丁憂回籍近接邸報又復被察聽降所有員缺相應具題速補案照臣先為就近選用等事具題行驛傳道副使尤錫類貴陽府知府劉冠南經理黃平一帶地方據稱黃平地狹戶不滿叁百城不過貳里斗大之域不堪建府若加壹道壹參尤不能堪等情到臣臣以皮林事移營鎮遠因檄經理道府州縣各官同至鎮遠會議該臣看得黃平褊小止堪建壹州以壹參將坐鎮其中將新府移置平越卽屬新鎮道專

轄不必另設該道衙門其經理驛傳副使尤錫類相應加銜調新鎮道新鎮道參議張文奇應調貴寧道補參議梅國樓缺遺下驛傳道副使員缺相應速補伏乞勅下吏部再加查覈更調銓補庶黃平壹路得省壹道之設而新鎮貴寧驛傳叁道俱無曠官之患矣謹題請旨

請監軍楊按察使 卹典疏

題為監軍征播積勞身殞懇乞 聖明破格甄錄以卹死事以勸勞臣事據布按二司署印副使洪澄源都清道副使袁應文分守新鎮道右參議張文奇呈奉臣紙牌據江西恭和縣申據原任貴州監軍按察使楊寅秋弟寅冬子



嘉禎等呈稱父因征播勞苦成病題 允回籍調理不愈  
於萬曆二十九年三月十八日病故乞賜轉達等情理合  
申報據此備牌仰司會同按察司及守巡等道備查監軍  
楊按察使歿於 王事與東征監軍陳御史四川監軍張  
叅政事例有無相符作速會議明白具由通詳以憑具  
題施行等因奉此行據貴陽府知府劉冠南會同同知徐  
庭綬申稱查得已故監軍楊按察使志在滅賊身唯許  
國兼程投貴筑籌畫心勞罕暑入海龍腥膻氣染致成篤  
疾遽爾捐生查與東征陳御史四川張叅政事例既同相  
應比例上 請乞 恩贈廕等因又該都清新鎮二道會

看得楊按察使經始剿播既食少事煩深入播巢復殄瘴  
飲血是以播事甫夷而遽乞骸骨詎意播功方敘而旋聞  
訃音 恩典未沐於躬膺忠魂宜慰於泉壤近征東陳御  
史四川張叅政查 明例既與相符 卹典委宜從厚等  
因到司該本司會同按察司看得已故監軍按察使楊寅  
秋忠貞體 國慷慨忘身拜 命當中外惶惑之時單車  
就道入貴屬兵食告訕之會畢慮經營武備振脩狙詐作  
使旣拔重關之險直禱危困之虛沐雨櫛風與士同苦援  
桴冒矢有死無生一戰斯得罪人積勞頓成痼疾引歸未  
幾訃報旋聞據前後決策運籌無忝以勞定國之列而終



始鞠躬盡瘁尤徵以死勤事之忠况前者定交趾平府江  
 勳在西粵爛焉其生也褒顯未膺其死也 卹典宜厚查  
 得往歲監軍御史陳效歿於朝鮮該總督尚書邢珩具  
 題該吏兵二部覆奉 欽依追贈光祿寺少卿廕一子錦  
 衣衛世襲百戶仍與立廟祀之近四川監軍叅政張棟播  
 事告成卒於渝水該川湖貴總督部院李化龍業經此例  
 題 請今按察使楊寅秋死事既同 明例正合相應請  
 乞具 題照品贈廕仍廟祀以慰忠魂等因到臣該臣會  
 同巡按貴州監察御史宋興祖看得人臣之於 國死事  
 易成事難非夫死之日勿也徒死而僨事則成事者難也若

既成事而又死事則死尤難之難也 明主知其然故以  
 死勤事則祀之憐其死也不問其事之成否也以勞定國  
 則祀之酬其勞也不問其身之死否也若逢世難有定國  
 之勞及功成兼死事之苦有臣若此 明主所以憐而錄  
 之者又不知其當何如矣今貴州監軍按察使楊寅秋不  
 幸類是當播賊方征貴州只尺虎穴獨櫻其剡臣以不才  
 謬當是任文臣錯落晨星武將遂縮首鼠臣隻手獨拍岌  
 岌乎殆矣寅秋捌月 陞辭十一月入黔賊方犯東坡邀  
 之興隆幾為所困乃單騎之貴陽與臣調募漢兵操縱土  
 夷即軍與戎器各有攸司寅秋既督兵又理餉既治軍又



繕械晝坐臣署手不停書夜叩臣門舌不停議而後東坡之賊始退既首拔烏江河渡二關賊突出犯其勢甚銳寅秋直以身當之作使隴澂安疆臣批亢禱虛以解其紛開路攻堅以扼其喉峭壁無水則雜血以飲積尸如山則析骸而臥而後海龍之功始奏歸來飲至容色黎黑不能卽席次尋聞母病飲食頓減不能下牀第臣見其病勢急卽爲具題伏蒙皇上俯從部覆憐允回籍調理病痊起用寅秋得旨以十月南還旣入里門病日綿延臣屢遣人問之卽從褥上輒以手書來不曰皮林未了之局作何收結則曰播州新救之邦未易控制無一語訴其病無

一字及其私臣猶冀其有功甫奏寸祿未霑或可首延歲時以膺皇上異數不謂三月竟長逝矣訃來貴州軍士哭於部伍土夷哭於邊徼僚吏哭於庭兒童走卒哭於市臣以總角共研席白首同干戈一生一死惡得不拊膺長涕臣又查得寅秋參政南寧日黎莫交惡羽檄日馳議者謂當閉關以待其自定寅秋至曲爲經略乃受黎之降不斬莫之祀無煩一鏃九真受吏臣竊以爲毛尚書伯溫之撫登庸不加於此矣已而府江猺賊弄兵林坳寅秋與粵西諸臣同心拮据斬獲數千比者宣捷告廟臣又以爲翁尚書萬達之定左江不烈於此矣寅秋在廣廣



重在貴貴重故廣西按臣黃紀賢涂宗濬常語人曰此真  
邊材川湖貴總督李化龍貴州按臣宋興祖常語人曰此  
真監軍有臣若此 國家不能盡得其用而俾之殲瘡觸  
霧以死故臣之痛哭不獨爲寅秋不獨爲貴州已也寅秋  
有母業已逾朶望捌垂白在堂寅秋有子女然而未嫁未  
婚者榮榮在孺此雖寅秋之私然今日所望以哀而存之  
者 皇上也古人惟蓋不棄爲埋狗馬貓虎必迎爲食鼠  
豕寅秋綏交征徭平夜郎三役彼存日尚不敢言功而况  
身後獨計以爲鼠豕之食犬馬之力 國家爲將來死事  
者勸自有 藁與不忍處其薄耳照得已故監軍按察使

楊寅秋世篤忠貞才兼文武枕戈以討賊則九死爲輕介  
石而歸田卽終日不俟方焚老上之塞遽隕營中之星志  
決身殲壽 國何減於諸葛功成勇退承家不忝於文貞  
况交南折箠之勳方之銅柱而府江破竹之烈過於金城  
合三省之其勤以死以勞戰功爲最睹四夷之來享丰理  
于疆 卹典宜優頃者陳御史歿於朝鮮近者張叅政卒  
於渝水死事旣同 明例昭然又經司道查議非濫一應  
贈官廕子立祠各項相應比例上 請伏乞 勅下吏兵  
二部覆議明白查給施行庶幾幽以瞑勞臣之目明以鼓  
戰士之氣臣不勝懇乞 命之至謹題請 旨





異知  
卷之八  
廿九



蟪木生黔草卷之九

泰和郭子章相奎甫著  
友人楊寅秋義叔甫校

公移

上閣部議播酋剿撫揭帖

職自去春 覲還二豎爲祟四支柴立已復有長兒之變  
不勝西河之感萬不獲已具疏乞身不謂 廟堂猶憐鷄  
肋至今年遂有貴竹之 命五月內已代於沅州矣貴中  
近事播酋爲急子章鈴槩是親軍旅未學聞 命以來心  
戰而臞第廣詢道路博採士夫有謂其當剿者人臣無將



將則必誅此酋今年殺官兵於蜀明年殺官兵於貴戍及將官至數十員既積鬼誅之罪正當天討之辰然必如淮西故事竭天下之力合四方之衆不愛軍興不惜歲月不惑浮言有憲宗斷之於上晉公恃之於朝而後職等得效李愬馬植諸人之功此剿之說也有謂其當撫者千年之逋寇未易騷除千里之險阨未易猝入千年固結之苗心未易解散國家與虜倭恃時敗時勝而二百餘年未嘗從事於播近年以來我師二敗此非其強於虜與倭也恃兔之穴馮蛙之井主客勞逸饑飽之勢異也犬羊之衆不下十萬十圍五攻我兵當得二十萬歲該費軍興二百

萬在貴中必不能在川中亦難支故不若撫之便此拊之說也有謂當先拊之而後剿之者則今日貴中是已貴本貧弱之國頃者飛練之役兵卒盡矣糧餉罄矣長平之敗趙人扶死林傷而後可以報秦會稽之棲越人生聚教訓而後可以報吳此皆敗後事也若再不恃重而再激之彼將乘我之敝撓我之腹則貴州危矣故不得不姑羈縻之以安其心而毋啓其疑俟吾之糧餉既聚兵力既集然後雲羅四合地道九攻一舉而克之此先拊後剿之說也有謂壓之以必剿之形而後撫之者五部材雄三河俠少如貔萬計躍馬千羣盡聚於川貴之間有必滅此而後朝食



之意彼若懼而悔罪獻其首惡返我侵地然後削其官職待以不死責其質子解其繫組如莫登庸故事可保數十年無虞此示以必剿之形而後撫之之說也子章入境未久尚未習其事然大約播情不出此四說惟密議密示則封疆之臣有所持循以便展布職無任悚仄俟命之至

上閣部院留宋柱史再按黔中揭帖

爲逆酋殄滅有期邊陲關係匪輕謹再借按臣以重彈壓以籍經略事竊照播酋匪茹敢逆 王師自二十七年三月弄兵飛練等處至於今年矣巡按貴州監察宋御史是時入境未及旬日變起倉猝勢甚張皇乃收拾殘敗之

餘卒鎮定輓輒之人心疏楊應龍躬犬豕不食之資取鯨鯢必戮之罪惡在不赦法無可原安疆臣實可教之孺子非治世之姦臣種類旣殊蕭蘭宜分於是民志始定地方攸寧自三月以至六月江撫院候代沅州總兵沈尚文託身銅仁貴陽距賊董二百里所以挽岌岌之勢奠之泰山之安者按臣之力也及職六月莅任兵不滿千士張空券按臣謂職急宜募兵於是時勢可虞緩急無備之疏而滇粵永保之兵相繼漸集糧不隔宿兵皆枵腹按臣謂職急宜集餉於是有兵集有期餉儲不繼之疏而滇楚粵西之餉陸續漸至論將師則曰某也如虎某也如蟻論州縣



則曰某也宜民某也擾民論轉輸則曰某處宜運某處宜  
停論驛傳則曰當借馬於楚借財於滇運奇堂上之兵制  
勝目中之虜今日之黔陽辛粗有備不至若昔日之單弱  
者按臣之力也今按臣已報滿例難再留第元兇未縛全  
局未收西南半壁所係一時與職共事行間亦不少矣察  
地利料彼已審機宜辨材官按功罪籌餉籌兵鼓舞作使  
陰陽土司收其力而制其命與職同心助勦孰有如按臣  
焦瘁膚敏此賊未滅按臣未應循故事遂離地方也仗  
天威赫濯賊旦暮授首功次敷敘善後經略消反側之釁  
萌定千年之規畫所需賴於按臣皆非職一手足所能辦

亦知及瓜而代者時非海內賢哲第恐初莅地方未必巨  
細畢知故問士民士民曰願借寇問將吏將吏曰願借寇問  
土司夷苗僉曰願借寇事勢若彼人情若此職何敢默查  
得先年倭亂兩浙御史胡宗憲卽以按臣任軍機事頃寧  
夏之變 朝廷不難 欽遣御史梅國楨特往監督今狡  
酋滔天狂逞且浮於島奴劉宇等賊有按臣若此豈可令  
弛擔以去况行取之命未下西臺之員多缺各省巡按御  
史不能交代伏乞軫念貴州事勢孔亟士民攀留懇切仰  
丐具 題將宋御史再巡貴州一年就隄犬差一差一以  
慰軍民漢土之望一以奠西南邊陲之命職愚幸甚地方



幸甚夫人情誰不好逸惡勞去危卽安以黔陽之瘴癘兼  
兵戈之勞攘誰能一日甘之顧按臣爲國匪躬何擇險  
夷職亦無暇爲按臣慮及此矣

咨兵部選補近播守備

爲近播守備一革一病請乞速賜選補以裨危急事職閱  
得邸報五月十六日兵部一本爲武弁通賊賣賊貽害地  
方懇乞 聖明亟賜究處以正法紀以固邊圉事奉

聖旨是史良將革了任與謬思忠等著巡按御史提了問  
職入黔中道經都清守備柳國柱臥病在牀旣以黃平告  
急令其馳守至今病尚未愈據兩司面議柳國柱原係武

進士文墨儘通勇略未聞當此倥偬之際恐非病夫所能  
馳驅職查得黔中文武與播爲鄰者文官則分守新鎮道  
駐平越都清兵巡道駐都勻思石守巡貳道駐思南駐銅  
仁今四道或以入 賀未還或以陞任未到無一可恃所  
恃者清鎮都清二守備今史良將旣革卽暫留署事終難  
展布柳國柱旣病卽病或可愈終非勇悍新總兵童元鎮  
在途未至舊總兵沈尚文杜門不出而職所與共事者止  
叅將劉效節一人左支右吾日力不給自綦江之破黔中  
人心搖動清鎮守備之缺以當速補都清守備之病似當  
更調查得沅州衛汪如淵體貌雄桀技藝精闕頃在偏橋



黑少 卷之九 五  
協守頗有斬獲之功似應補史良將之缺壩陽守備陳雲龍貌本魁梧射更穿楊壩陽地方稍靜未展其馳驅之材似應與柳國柱更調如清鎮守備缺儻已 題補乞將汪如淵量陞都清守備將柳國柱改調腹裏地方庶幾用人如器邊地攸賴矣

咨吏部調補方面郡邑各官

爲方面郡縣未到未補敬懇調補以實地方以禦強寇事查得分守新鎮道右叅議梁銓自二十六年六月入 賀至今年八月終未到違限已久新鎮鄰播豈宜久缺分守思仁道右叅議方萬策飛練之役雖云未委而喪敗之後

遽爾入 賀來且無期乞將方萬策梁銓調在腹裏急補有才望者令其速到管事若於楚蜀滇三省中二司推補到任更易分守貴寧道左叅議梅國樓久在黔中夷漢歸心頃見邸報推陞滇中合無推陞本省以副使仍管貴寧道事亦地方之幸也都清兵巡道副使添文昌業已奉

旨近准雲南撫院咨 題留滇中竣屯因事恐亦不至都

清顧其地距播甚近不可不速補也石阡黎平二府知府未補而石阡尤要思南石阡二推官鎮寧州知州婺川銅仁二知縣未補而思石二推婺川一縣尤要就近三省查資俸才望相應者或陞或調無令久虛可也夫貴州之官



黑州 卷之九 六  
可謂極少貴州之地人不樂居况今日被寇各官觀望兩  
司郡縣幾缺其半西南之難何時得已合行咨請貴部伏  
乞軫念邊方速爲調補得一賢如得勝兵萬人其造福於  
地方匪淺鮮矣

### 咨兵部起錢中選貸蔡兆吉管兵

爲軍務事行據貴州布政司呈稱照得播酋橫肆石阡原  
無衛所知府被論未補推官丁憂已去一府竝無一官地  
近播州士民洶洶平越與播最逼距飛練肆拾里自喪敗  
之後軍民談虎色變一府一衛原未設有將官彈壓今警  
報日聞於石阡平越設將增兵誠不可緩該本司左布政

使應存卓按察司按察使易登瀛都司署都指揮僉事王  
納忠會議得原任雲南都司僉書錢中選年力正強謀勇  
兼備且係偏橋衛指揮先年任思石守備坐鎮龍泉地方  
之險易夷情之向背知之甚周若令坐鎮石阡將見調銅  
仁兵一千名又募兵一千名令本官帶領赴石阡防守必  
能捍禦原任雲南叅將今謫戍清浪蔡兆吉年力尚強謀  
勇素著且係貴州衛千戶昔年任銅仁守備諸苗畏服若  
令使過赴守平越將見募銅仁平州司楊義司兵一千名  
令守平越必能防禦俟其有功查例優敘等因通詳到職  
除批行准令各赴石阡平越防守外該職查得 大明會



典一款內開嘉靖二十六年題准各衛閑住將官謀勇可用及懲創既深者聽總督巡撫官調取軍門令其分哨領軍殺賊果能建立奇功一體保薦錄用職看得原任都司錢中選被論回籍懲創已久原任叅將今謫戍蔡兆吉荷戈有年勇略尚閑今地方危急若借才於他省往返道路無以應卒今既三司會議前來合行移咨貴部於錢中選准其量復原銜督兵蔡兆吉准充為事官俟有功之日另行題敘施行

咨兵部起遊擊徐成

為缺官事行據貴州布政司呈奉本職憲牌前事遵依移

行按都二司查議去後今該本司左布政使應存卓會同按察司按察使易登瀛都司署都指揮僉事王納忠議得都司僉書李獻忠前任既有瑕疵今任遷延日久地方多事豈宜懸缺本官相應改請別用及會查得原任浙江遊擊管海寧叅將事徐成因督水兵征朝鮮至天津告病回籍係浙江義烏縣人本官才猷敏練堪以起補前缺相應請乞咨部銓補李獻忠改調別用施行等因據此案照萬曆二十七年六月二十三日准兵部咨前事內開貴州都司僉書王納忠推陞本省都司掌印查得 中都留守司僉書署副留守李獻忠姦謀百出鬼計多端堪以調任以



責立功改授署都指揮僉事銓註貴州都司僉書管事等因題奉 聖旨是欽此除劄本官定限本年拾月初伍日到任等因備咨到職准此就經備行按察司移催本官依限赴任去後今據前因該職看得播會匪茹貴州近方用兵遴選將材猶恐未稱李獻忠原註劣考豈能勝任况原限已遠將近二月既經三司會查原任浙江遊擊徐成原奉督兵征朝鮮告病回籍調理年力壯強戎務諳諳相應咨請貴部查照將原任浙江遊擊今告病徐成具題 請補貴州都司僉書將李獻忠改調別用施行庶勸勦攸賴緩急得濟矣

咨戶部備各省兵餉

為地方孤懸無援賊勢侵軼可虞懇乞 聖明設將增兵以圖萬全事行據湖廣布政司呈奉湖廣撫院咨准本職咨准戶部咨前事該本部題議查照東征加派事例於四川稅糧派銀一十二萬餘兩湖廣稅糧派銀二十六萬餘兩其加派銀兩楚蜀貴州三省通融支用等因於萬曆二十七年十二月十八日題奉 聖旨是欽此欽遵等因又准戶部咨為播寇突出充斥與隆黃平之間等語稱合無自今以後念貴州孤懸一隅道路梗阻不便轉輸凡楚蜀供餉銀兩俱聽先儘支發等因於二十八年正月十三



日題奉 聖旨是貴州孤懸著總督將供餉銀兩先儘支發仍遵前旨於鄰省堪動錢糧內先動後題逆酋抗亂普天同讎各省直官宜請助兵餉豈得托言違旨支吾推諉著通行與他每知道欽此欽遵等因備案仰司查照原文卽今應否先將白蠟銀內處解加派銀兩見今楚餉艱難尚無接濟該司斟酌另詳等因奉此該本司看得播酋肆逆流毒三省湖廣初議調兵三萬續增爲四萬五千統計四萬五千之兵兼以軍火器械等項非七十萬兩之餉不可先蒙部 題查追舊人自萬曆十七年起至二十七年止太倉銀一十六萬一千四百五十兩零折色白蠟商稅

銀共一十一萬三千三百二十五兩皆係遠年積逋勢難追併遂議留見在漕折銀等銀共銀九萬六千一百四十七兩又議復額錢糧六萬七千七百一十八兩二錢零又加派二十五萬四千九百三十四兩六錢零總之僅四十萬兩有奇目今軍兵方集本司發過餉銀及行令武長等府製造炒米姜鹽等項共動過銀一十四萬六千餘兩內有五萬七百八十九兩八錢八分係屬借支正嚴催加派復額以濟急需尚恐不能接濟其缺二十萬餘兩之餉將何設處乃貴州又執三省通用之議而欲分餉解彼夫加派復額 題留尚不能供本省四萬五千之兵再一分餉



必致束手無措變且不測此勢之萬萬不可也湖廣當十分匱乏之時其貴州請分加派銀兩應免撥發惟有起運漕糧一節蒙科部特議破格留用此則本爲三省非湖廣之所得專本色正耗米共計二十九萬七千一百七十一石四斗已經運發本色米七萬零六百二十三石零赴軍前聽用尚存二十二萬七千石輕齎枋木等銀共肆萬零一百一十八兩動解過九千六百九十二兩七錢零充餉尚存三萬四百二十五兩三錢卽以此項多助貴州在楚民亦所安心也等因通呈到職據此隨准湖廣撫院咨稱三省均分本色漕糧各該九萬二千三十石二斗伍升八

勺先據糧儲道呈差武昌衛指揮謝三錫等兌完漕糧五萬石於二月初八日自漢口開幫運赴湖北聽貴州差官接收搬運第今應找後數隨又備行該司道催運但沿途改舡雇夫雖動三六耗銀猶恐不足咨煩速令官兵前來常德地方接運免致淺舡至彼守候兩相耽誤等因准此又准福建撫院咨稱行據福建布政司詳奉本院案驗准戶部咨爲播寇突出充斥等事內開貴州糧餉急迫誠恐閩粵銀兩路遠到遲就近於滇蜀借銀二十萬兩卽以閩粵銀兩照數解補等因呈委本司照磨石世美都司都事李潔領解餉銀十萬兩解至四川交還補庫等因准此又



往雲南撫院咨准本職咨准戶部咨稱滇省後議銀十萬兩仍多方設處解赴貴州抵充軍需等因題奉 聖旨是這銀兩著雲南解貴州充餉仍著按括設處務足額定數目解去不得再行奏擾欽此欽遵備咨催解該本院查得滇中時事艱危庫藏竭盡後議餉銀拾萬兩即使本院效計然之策嚴按括之令終不能以有濟蓋欲剗無肉欲炊無米也除催布政司按括通省公帑有無另報請乞蚤爲別處免誤軍食急務等因備咨到職准此該本職查得貴州官兵平越三萬烏江二萬思石一萬二千沙溪一哨水西六萬鎮雄一萬養兵愈多糧餉愈竭見存銀米支用將

盡福建餉銀十萬稱解還川而不入貴雲南餉銀十萬回覆似無勢難必得湖廣十一萬之數止據解過銀二萬至於加派銀兩又云不予貴州漕米運至常德又欲貴州自運廣西餉銀二十萬道遠尚未即至強寇未滅用兵未已儻延歲月不即騷除貴州之勢蓋岌岌已查得漕米九萬餘石自常德水路至鎮遠逆水一十八站至貴陽原無水路約陸路八百餘里高山峻坡轉運甚苦大約用銀二兩而致一石約用腳價一十八萬兩又將何從措處擬欲具題再 請未免結怨各省欲緘默不言必致三軍脫巾合行咨請貴部伏乞蚤爲 題請或於南京兵工二部或於



淮庫廣東再借二三十萬至於湖廣加派原爲貴州用兵而題亦宜分三分之一以予貴州庶幾不悖明旨兵食幸甚地方幸甚

播平咨兵部銓補各將官

爲軍務事照得播賊未平將官不得不增播賊既平將官不容不處顧地方初平軍興有限若不就近補缺未免多費難繼查得普安守備趙大用貪肆不法該職會同巡按宋御史行按察司審問具招以候叅題所轄地方上通滇南盜賊出沒無常備禦不可缺人查得名色把總武舉張鶴翀韜鈴素諳會捷武闡守黃平不避艱險攻海國屢

有新獲且部多勳卒又係土人可裨戰守該職行令本總暫署普安守備事以禦寇盜以清道路又准總兵官李應祥手本移稱該鎮坐營中軍陶汝夔歷任未及數月臥病將近半年請假在籍曠職虛居隨查都清守備汪如淵一向隨征屢建膚功乞將本官以守備代署標下中軍等因到職已於敘功疏內將陶汝夔論列暫將汪如淵行令署總兵標下中軍事查得都清守備正當黃平與隆之間不可一日缺官雲南督兵原任守備童龍貌本驍雄更精騎射月城鏖戰克固先登似應暫補汪如淵前缺專守黃平一帶石阡都司錢中選原任守備今立功官伍萬鍾督兵



殺賊均屬有功今龍泉守備楊惟中革任提問壩陽守備  
陳雲龍陣亡未補合無將錢中選以都司署龍泉守備事  
伍萬鍾補壩陽員缺隨地器使就缺支糧一以省軍需之  
煩費一以救地方之瘡痍第龍泉既有守備婺川副總兵  
陳良毗不宜又羈一隅播事既定畢節叅將朱鶴齡貴陽  
守城守備杜鶴鳴原係新設似當暫補一缺乞請 貴部  
軫念各官征播勞苦俯將張鶴翀 題授把總錢中選以  
都司署龍泉守備事注如淵以守備改署總兵中軍原任  
守備童龍伍萬鍾暫授前職陳良毗朱鶴齡杜鶴鳴免其  
赴部銓補一缺通候覈功完日分別敘用庶各官得虞餽

之資而地方受保障之益矣





續表生黔草卷之十

泰和郭子章相奎甫著  
友人楊寅秋義叔甫校

公移

討播誓師條約

爲申誓戒以肅軍令事照得播賊楊應龍罪惡貫盈 天  
討必誅本院已涓言祇告 神祇分道竝進義旌所指雷  
響電掃所據軍前一應事宜合行申嚴告戒凡我文武將  
吏共期恪遵慮周萬全功收一舉以上宣 國威下紓人  
怨如或故違軍法具在須至諭者



計開

一大小將領督率三軍討逆除兇惟同心是賴在昔  
三千一心能令百億之衆前徒倒戈矧茲窮醜曷  
哉將士尚智畢謀勇畢力若操舟左支期於  
必濟若駕車後推前挽期於必赴 天日在上本  
院其何敢蔽抑或人自爲心嫉能妬功蓄疑修怨  
則率僂有罰決不假貸

一中軍調度全係大將總統自副參遊而下不分主  
客將官咸聽節制統督副參遊官責專一哨各分  
路領哨官雖素係同官或隸于隔屬自應一體遵

聽調度約束如或抗違阻撓遲遲觀望不用命致  
悞事機應專決者徑照軍法重責大者馳報軍門綁  
拿

一土司無大小皆世受 國恩大者誓同討賊必能  
祇奉 明威督率漢把獨當一面以收奇捷以膺  
懋賞次者皆素稱忠勇自負雄長當此報效立功  
之秋正宜督率奮勇克敵事盍超格優叙如或進  
止參差或賣路縱迹或妄殺平民報功或故縱兵  
目搶掠兵目軍前斬首土司竝按軍法  
一摧鋒克險以先登爲第一功首級次之至期不惜



重賞懸掛高竿漢土官兵有能結群合夥當先克敵即以懸賞銀給之領兵官督所部先登者主將官即於陣前或收陣後給督率先登牌一面執照監軍類報優叙其漢兵先登者懸賞之外准照衝鋒例補給役過月銀叁分之數

一衝鋒每因割取首級以致失事今後臨陣各將領官傳示殺手止許向前衝殺高聲於本哨本隊內指定某人割級隨殺隨喚陣後殺手得貳分割級得壹分鳥銃手火器手中敵先鋒取勝亦照此例各得貳分割級得壹分敢有違令戀級與混賴槍

級者分別立斬

一兵士退縮亂行回頭返走者陣前立斬

一放鳥銃火器俱俟賊在柒捌拾步之內聽掌號手吹天鵝喇叭聲方許點放如未吹天鵝喇叭即賊在伍拾步內不許先發敢有違令亂放賊至空手無措及放鳥銃不照星者斬掌號手臨陣不奉將令錯舉號頭致兵失悞或裝塘伏致賊驚走跡涉賣陣者立斬

一督陣有掠陣殿後專責土漢隊部但有觀望返走者得奉令牌立斬各主將官須揀選堅勁強有力



者克之督率衝鋒有進無退以首功論如先自退懦及攘功挾怨行私淆亂賞罰者分別處斬

一高招手指麾左右關係匪輕主將官揀選膽勇過人機變出衆者克之指麾進止有度因而克敵取勝以首功論敢有倉皇失措招搖錯亂悞事者斬

一塘報偵探及夜不收裝伏巡邏主將官須選膽勇機變不憚遠險及耐夜者克之偵探得實塘伏馳報以時因而克敵取勝以首功論敢有畏避惰悞梘言誑報致失人事機者斬

一鄉導兵生長播地無論熟識地利險夷亦且周知

賊情變態師行經過先期瞭望審視指導破陣克險先登者一體懸賞優叙如或輕率疎虞及自相猜忌爭功僨事者分別處斬

一各該哨道雖分畫信地然或賊併力一向或乘虛夜襲或追奔被圍衆寡不敵或險阻難克各將領官約會應荷角者荷角應合圍者合圍一哨有警但擺山銃響不待傳報左右隣哨登時策應敢有自分彼此逗遛觀望者以違節制論并別功不叙

一賊衝突在黎明在半夜在乘我劄營未定預先埋伏便措手不及或劄數拾里外我兵哨探無賊安



穩睡熟彼乃捲甲而趨前轍可鑿各將領官連珠  
下營得尺進尺得寸進寸深溝高壘分布柙角前  
後左右首尾相顧應槍營者先日密布審視隨到  
打立排柙開挖濠溝無留時刻遇夜巡警主將官  
宜不時放號查聞塘伏玩悞者照軍法割耳細打  
一賊披綿被用紅綠爲號狡詐不常各將領官嚴諭  
所部緊認號頭無論防賊亦防我兵自相混亂即  
如公差投遞文書或別營差使披有號頭者亦須  
審認明白以防奸細破陣警營巡視等役將官慎  
擇之

一賊慣半擊腰衝伍奈人不等潛伏茂林叢警候我  
兵過半突出放砲或打羊頭撞過我兵兩頭慌亂  
乘勢掩殺前轍可鑿將領官先用奇兵或鄉導一  
面搜山一面於高埠處瞭望毋得輕率妄進致落  
賊彀

一賊慣以佯北誘我大兵在後彼敢以百數拾人前  
來接鬪者誘我也宜防兵刃方加遽佯北敗走者  
誘我也宜防遇峻險盤旋轉灣人馬單行首尾不  
相應樁石倒樹裝菰當前邀擊我者宜防遇泥塗  
湓田陷坑宜防遇橋樑橋板朽敗裝成橋眼之類



宜防將領官俱宜令塘報審視及撥兵四旁徧搜  
又入關後賊巢中泉水糗糧酒漿或置毒藥亦宜  
告戒軍士加意隄防毋落賊彀

一大兵壓境臨關揭暨受降旗但有悔禍挈妻子乞  
降者不論夷漢賊親族僞提調巡警坐寨夷頭人  
等並許棄械赤身於受降旗下站立主將官嚴禁  
混殺候鄉導驗實搜檢有無夾帶利器押赴監軍  
審驗相宜護押安插招納過人數仍以功次紀叙  
敢有索詐驚嚇搶奪及收匿降民妻子阻塞降民  
歸順者漢土官另議兵士分別處斬惟是受降如

受敵詐降叵測慎之慎之

一大兵除兇救民水火豈宜妄殺以干天和克國斬  
關之後除怙終拒敵逆我顏行者法所必誅一應  
老幼婦女不許殺驗有婦級老級幼級者以所獲  
真功壹級扣抵不錄無功可抵者以妄殺論敢有  
於把截關隘處所將平民割級克功者以妄殺論  
抵將領故縱另議別功不叙

一火藥最難收拾須十分關心屯劄處所藏有火藥  
火繩火籠火箭等項俱要安置空閑營傍其火箭  
鏃頭俱外向以備不虞至如火籠軍士自裝多不



如法臨陣先一二日將領官先令火藥匠將火箭如式裝入籠內用紙固封火繩火罐亦如之庶臨期不致悞事

一運糧雖專責一日不繼兵且坐困將領官於某處劄營某日移營俱要先期約會糧官明白某處當預兵接收某處歧路某處險隘賊可藏伏或衝突邀搶者當預兵押護逐程計算至如交單畫會不許留難篋篋包袋有可轉發者不得丟棄克破巢囤如可因糧於敵嚴戒兵士毋得燒棄但得壹石即以壹石之值給之各兵不願領糧每米壹升

仍給銀陸釐以省轉輸分猷共念是在將領加意黔中彌盜條約

為立法彌盜以靖地方事據威清兵巡道呈詳備行上六衛印捕官將各街置立柵欄查撥哨兵護送官商僉立土巡捕責成捕盜緣由到院批行外查得貴州往昔有新添姚趙二鄉官都勻鍾鄉官近日威清楊生員等家俱被強賊入城劫害偏橋衛清平衛俱被強賊入城劫獄此柵欄之不嚴也上下六衛沿路往往小苗出劫官損行商此哨兵之不嚴也相應通行本院復以已意推廣數款刊刻成書分發各守巡道通行所屬衙門著實遵照每衛各哨各



給一冊施行毋得違錯須至冊者

計開

一塗中盜賊出劫皆緣哨守官兵偷安有賣放回者  
有私自逃回者有逃去串同惡苗出劫者惟是查  
點不嚴以致哨兵離伍今每衛站中火舖再立一  
總哨即於該衛軍或新募兵於內輪撥二十名委  
一勤能武官督率住彼不時往來各哨巡警各道  
俱要置簿差官往來巡查如貴盛道信地起貴陽  
至平越共小哨若干總哨若干每哨各置一簿詳  
書官兵姓名送道印發各哨該道於每月朔將貴

前二衛差指揮或千戶一員再領一單與簿相合  
許帶捕軍六名馳驛馬前去自省城起沿途逐哨  
查點如官兵到即註某月某日某官查過俱到如  
有一名不到即於本名下註不到二字仍註單上  
限二日夜至平越將公文投新鎮道查驗取不違  
限回文回日亦如去日逐哨巡查註簿註單亦限  
二日夜赴貴盛道查銷該道查單即提不到哨官  
兵解轅門細打一百如差官違限及需索哨官兵  
酒飯錢布官打三十兵五十往回共限五日又差  
一官帶兵輪查名曰梭官新鎮道信地自平越起



至鎮遠止安平道信地起貴陽至普定止威清道  
信地自普定至亦資孔止其法俱如貴盛道差官  
巡查以道里遠近酌定日期文到各道限半月內  
先送印過哨兵簿送院查覈庶幾稽察嚴密官軍  
不敢偷安哨守有賴道路自尔肅清

一哨兵稽查既嚴自難偷安若月糧不以時給彼將  
有辭布政司自後給散兵糧先儘哨兵如以錢糧  
不繼則冗食之兵稍汰一二未為不可頃蓋日後事  
宜疏內有撤大橋營黃絲得勝營之議縱不能盡  
撤稍汰三之一以為哨兵之需可也

一城內外關廂正街合面每百家設一柵中等街每  
五十家設一柵小巷以首尾為度設一柵柵以粗  
木為之環栓高鑰俱全每柵置大銅鑼一面長鎗  
二水缸一麻搭二母論鄉官舉監百姓輪流每夜  
一家關鎖遇有盜賊不論強竊鳴鑼為號前後關  
廂先固柵欄保兵齊集互相堵截即有強賊豈能  
飛出柵欄開閉以起更絕更為度起更後不許擅  
開止有收生巡醫二事亦須預先告明如有違玩  
恃強開柵者當夜守柵者呈稟該管官司究治若  
係勢官豪家具稟該道枷號細打如不服解院重



治重罰大抵強盜入城所垂涎者正在官豪不在  
貧戶如官豪不先守法是開門而揖盜也愚甚矣  
慎思之哉慎思之哉

一官使經過地方哨兵照界護送該衛即具一批差  
一軍隨送批後黏刻單一張上刻某衛自本衛起  
或上或下至某衛止共計若干哨某哨軍兵若干  
名某哨軍兵若干名官使至哨界之時哨兵即時  
護送過往官即於批內親註有哨兵幾名隨送無  
者註無用圖書鈐蓋差役領批回銷印官查註無  
兵者即解該道重治細打黏單該道另具一式發

衛刊行印捕官不行提究

一客商馱馬不許零星難為護送每日早不問多寡  
聚為一起該衛即出一牌黏一單以卯時出門放  
砲鳴鑼為號放城外空濶處取齊哨兵即行護送  
客商亦於單內填註有哨兵幾名隨送付差人回  
銷印官查未註者即行究治如客商不遵條禁零  
星亂行倘有疎虞來言者決不准理遇晚歇宿以  
馱馬歇大家即歇不許貪程强行大約以未時為  
止如有臨晚要行者哨軍不許護送此單該道另  
為一式發衛刊刻衛官不行提究



一強盜入城不從門入多用梯上不在人煙輻輳之地而在絕無人跡之處故城外有居民住處止用柵欄亦可阻賊如城外無人住處城上堦口須置柰何木一根安於堦口之上賊至必攀其木木一墜下賊亦隨下此亦阻盜之法載在城書可舉而行也各衛印捕官清查應置柰何木堦口處所即行置用將置過數目呈報查考守城軍夫亦當嚴於僻淨之地夜用梆鈴重加防守如有不著實舉行者將印捕官提究

一各衛掌印官宣慰司將所管土司夷寨逐一查出

每一土司夷寨各僉立有身家人衆所服二名爲土巡捕將姓名報該道刊示曉諭遇有該管夷民爲盜即責成跟要如土巡捕用命擒獻真賊破格重賞如一年內該管地方寧謐並無盜賊生發申詳給與冠帶以勵後效如養寇爲亂不行竭力拿賊者提解以窩盜止罪

一盜賊入城未有無內應者如城內人家勾引苗賊入城者審有實跡不論勢家大族匾其宅曰盜賊之家塞其中門令於旁門出入以羞之子孫世世不許更換



一強賊入城市非劫庫獄即劫鄉官文到各衙門有庫獄者將庫獄各門并週圍墻垣逐一查估應修理者呈詳修理每庫獄除原有看守人役外再加強健軍夫二十名宿守如違官以不及註考城內外鄉官家每家門首左右自置大柵欄二座夜則關鎖多撥家丁宿守如違印官密揭以報若有失事彼亦何能怨有司哉

初檄宣慰使安疆臣防守地方

看得兵部咨到本院業已行本司遵照去後合再責成保固地方爲此牌仰宣慰使安疆臣照前部文并本院牌面

將該司治所屬地方烏江沙溪及省城一帶挑選精兵差勇悍目把并宋承恩地方嚴加防禦務保萬全 朝廷責成本官意甚嚴切本官世承 國恩宜効圖報臣子果能忠順 朝廷自有殊異如安氏先世通路雲南至今奢奢香驛之名流芳百年大征香爐加以右叅政之官具載史冊此皆忠義不朽之報彼岷強者竟何益乎特差旗牌官王安民前來宣諭取具地方不致疎虞甘結陳恩王嘉猷速令出見歸結即着立功贖罪俱無違錯故諭

再檄安疆臣進兵

看得宣慰使安疆臣千年忠孝之家一代弓裘之嗣茲者



四郊多壘兩省靡寧本官聞檄即能督率所部不煩官臧  
所望士一厥心人百其勇緝傷夷之後振怯為雄制密邇  
之間保危成固 天鑒非遠不庭者必誅 王爵無私有  
功者是享本官若能近固內地遠暨奇功豈惟揚名濟美  
孝著於家聲抑將加秩策勲忠光於 國籍特遣材官馬  
武卿持 令旗一面催促進兵并由花段獎勵本官以將  
本院優待之意故諭

三檄安疆臣圍困

大水田之捷本院喜劇兄弟本是一體顧弟不可以先兄  
本院叙功循序并 題矣第該司未入鎮雄已建此奇捷

聞該司已入將來之捷更有奇於此者本院拭目望之揆  
之人情未有焚人居室夷人宗廟而不以為讐者豈勝進  
攻海龍正在此時若猶豫不斷所謂養虎自貽患也與其  
養虎而以害貽子孫孰若并虎斃之而以安貽子孫乎至  
於眼前賞賚又其次焉者矣隴澄有膽曷可密以此商之  
然後知本院之為安氏子孫慮至深遠也不獨為今日也  
發來餉銀數目具在公移故諭

四檄安疆臣隴澄攻圍

五月初六日據左監軍畢節道呈報司道直入播州抵海  
龍圍尾劄宣慰安疆臣大營會同朱參將督率獮兵會合



川兵進攻海龍國侯獲元兇另報等因據此查得安隴二兵又已屯劄海龍國後元兇未報授首合行催促為此牌仰宣慰安疆臣知府隴澄督率自兵上緊攻剿今日之事有進無退如退一步即以軍法從事仍着修理帳房聽候本院親臨即於該營中屯劄通觀厥成以憑 奏凱先具遵行緣由馳報故諭

獎諭安疆臣擒尚義等來獻

尚義黃繼枝二惡此總督朝夕所欲得而甘心者本官能生致之厥功懋矣今為許其不殺實留以 獻俘耳發來餉銀分賞諸役楊應龍公文李輔等請一批去今批示之

未封本官看過固封發去又發來降人一名為信然不欲令其回國恐其一回將此中事機盡洩不便即令在營聊以示信見諸人皆未殺也雖然公文批去應龍亦未必來此皆是冷着無益惟有整兵乘隙破賊乃是真着惟本官力圖之故諭

破播州諭宣慰安疆臣知府隴澄

公移至知首守死國無復能為左右心腹或逃或殺或獄此 天亡賊之會亦爾家用間所致也太平有日普天同賀豈特川貴一隅已哉惟爾兄弟戮力圖之終成此大事以報 朝廷斬早東市縛吳淮西方於斯役猶或為禡不



獨爵賞而已也楊監軍已從烏江入播適觀厥成即如本  
院親臨復烏江關破播州城并檄降萬戶共作一疏於二  
十九日上矣故諭

聞田氏降諭安疆臣隴澄

田氏之降真耶贗耶不於水西而於川中竊疑其贗也今  
亦毋論真贗果真降則圍內自亂乘其亂而取楊酋為力  
更易脫係偽降彼假此以懈我軍心衝突之勢所必不免  
尤不可不嚴防也楊酋一日未降則一日為賊名其為賊  
人人得而誅之未有因其妻之降而不以殺酋為功者除  
惡務盡庶幾不貽子孫之禍在官軍班師後人人散去該  
司世與之隣豈以一存其祀便以為德而於破城降民等  
事不以為讐耶該司試思之必了此而後為功大必了此  
而後禍根除內謀之母外謀之曉事目把此勾踐不忍於  
夫差而范蠡不聽也事正相類可三思之故諭

溫旨獎勵諭安疆臣隴澄

接邸報及兵部咨汝家上疏遂得 溫旨有忠義之褒有  
嘉悅之綸有誰敢妄生讒毀之語此即大臣未能得之  
主上者 主恩深重不知女母子兄弟何以頂戴何以報  
稱也 朝廷卷卷不過為此一事竭力圖之速致渠魁  
上心更嘉悅汝家更忠義謬言三至決不信矣公移到汝



兄弟當迎入營中一以寒賊之膽一以壯軍之威慎毋忽也故諭

諭龐澄

朝廷盛典先及該府該府一戰之功下成母兄之志上保祖宗之爵既忠且孝何其榮也自今以後當益效忠順以無負 朝廷無負本院聞病未愈宜益加調攝以慰本院之心李萬年回發來新曆百本此諭

檄安疆臣母淑人鳳氏

看得宣慰使安疆臣母淑人鳳氏作配將門能脩壺教相夫而保邦族僉言閩內孟桓課子而閑韜鈴共稱文中頗

牧茲者四郊多壘兩地橫戈而疆臣一聞飛檄整師遏莒皆母訓也特命材官王安民函來花段以旌蘭儀永光蕙問疆臣勉承慈訓如立竒功則石窳之封無讓司徒之婦而迺鄉之典可比翟母之榮故諭

播平諭鳳氏

播未平時 皇上有褒安疆臣討賊之旨有欽賞龐澄之旨中云成母兄志 皇上之待汝母子天高地厚矣播既平後本院叙功汝二子作一段叙汝作一段叙本院之待汝母子善始善終矣 皇上之恩加汝母子欲汝保障西南為地方生靈耳本院之厚待汝母子欲汝忠順 朝廷



亦為地方生靈耳汝母子心事忠赤本院亦能諒之但有不知事體目把在外多事上不思 皇上之恩中不體本院之意下不顧壞汝母子忠順之名利歸於奴罪歸於主汝老成人決當一處之見汝家法不然人說汝在深閨中令若輩誑汝也陳恩不可令接閩王嘉猷當今在省中承聽傳話不可令安逸在家張問達張崑令其一意忠順使汝母子內外無間今楊監軍已去總督李老爺聞憂將行我亦要上疏乞休不知後來老爺意思若何趁我在此教誨汝目把們事事忠順我即去亦無後慮以後公文汝母子要字字看過用關防鈐記來隴澄且在水西領過 欽

賞方去鎮雄汝尚無孫可戒疆臣不宜夜飲要早起勤幹公事隴澄還當娶妻在水西早得一二孫則四十八枝人心方有係屬此第一要緊之着汝老成人當日夜關心我又聞得要子孫當行好事行好事第一要忠順 朝廷第二母得害侵百姓汝母子勤行之他日子孫不蕃衍吾不信也故諭

初批播州公移

五司構禍七姓起釁本院一入黔中知之詳矣第該司與五司七姓一方主僕之分也該司與 朝廷一統 主臣之義也奴負主人上司處置未當 君門萬里那由得知



而飛練之役戕 朝廷之命官綦江之役破 朝廷之城池該司其未之思邪又沿邊小苗假該司名目殺人命擄人財實利歸在小苗惡名嫁於該司該司其未之聞邪今已往勿論該司此日自當急還播州請命 朝廷朝廷之上有時雷霆亦有時雨露人臣之義過則歸已該司惟悔罪歸咎積誠以感動之而已本院詳閱該司忠孝堂集楊氏祖宗爵土已歷八百年皆以忠順守之非以智力留之該司顧堂名思忠孝義蓋必忠於 朝廷而後能孝於祖父也且該司一子死於重慶念念不置今長子尚未襲職餘舍尚未分授獨不為生者地乎該司試中夜思之然後

知本院為忠告也此繳

再批播州公移

飛練之役兵至而應之猶可原也該司合西南之鐵鑄不成一錯字只是壞了綦江城池上觸 聖怒凡為臣子誰敢置一喙該司如果實心悔罪只合席藁歛戢哀請 闕下乞降 督府萬一 朝廷弘不殺降之恩憐爾先世恭順之父該司猶得保其首領子孫猶得保其爵土而播州生靈猶得免於鋒鏑是謂失之東隅收之桑榆計莫良於此者該司內謀之妻子外謀之宗自上為祖宗慮下為兒孫地早計而決之可也此繳



三批播州公移

本院昔在川中曾叙該司三征之功入黔半年三批公移開該司自新之路即不謂德亦當不見怨今播州之兵克斥於興隆黃平之間擄殺我人民阻塞我往來是該司以怨報德也今據申文極其恭順而兵留我境又極跳梁所言如此所行如彼其誰信之第據差人稱說興隆之兵係九股之苗原非播兵我宣慰在播州並不知道此亦事之或然者然而木刻之語俱以播州為名果係各苗駕禍汝播州該司力能掃除即除之不能當差人解散之庶幾猶可相信不然千言萬語總是套話本院率漢土蕩此小醜

何難第該司心事何以自白即本院不能曲為之解矣本院即以此卜該司誠偽順逆解散之後還着知事漢把一二人前來回報本院另有分付此繳

四批播州投降公移

大兵四集事等權枯忽尚義等來投該司公文請解一面之網諸將爭言此汝緩兵之計不宜深信本院則以為該司悔罪之明未可逆詐如出真心可於五月朔日令妻子具降文從水西營護送出投該司亦宜解甲投戈靜聽處分如能挺身自來則解縛焚觀歸之 朝廷本院與總督部院俱同此意亦何苦而窮兵耶尚義黃繼枝等姑留為



質特發一人齋公文來該司宜自決無詐無遲此繳

檄楊朝棟速降

查得 欽定賞格內開應龍妻子能大義滅親縛降自贖亦准末減仍為優恤欽此為照楊氏爵土其來已久應龍即有罪其祖宗無罪也慕江龍泉二役尔朝棟不與尔父即有罪尔猶無罪也如能大義滅親賞格開載自明如父子天性不忍推刃但能束身來降亦當待以不死不絕尔祖宗廟祀與其從惡父而殄祀孰若順 朝廷以綿尔廟祀之為孝乎 明旨昭然決不食言事在然眉早宜自決如或遲疑總歸滅亡後悔何及汝宜三思之故諭

檄田一鵬等出降

看得大兵壓境勢如破竹 朝廷止為首惡一人尔等胡甘與同禍本院前遣思南田興弟專諭田一鵬兄弟想當已到今尚義來亦能道一鵬歸順實情更道李旭李紹尚欽羅繼顏宗政何邦佩何林高文憲楊廷章彭道彭燧傅賢苟文賓尚蘭州等雖陷網羅同懷中國若能舍舊從新便是轉禍為福尔等同仗大義賞格自明不惟全尔性命保妻子抑且錫尔官爵福及子孫如或食言 天不我祐尔或遲疑後悔何及諺云當斷不斷反受其殃汝輩深思之深思之故諭



續文生黔草卷之十一

NATIONAL CENTRAL LIBRARY, TAIWAN, R.O.C.



泰和郭子章相奎甫著

友人楊寅秋義叔甫校

綏交錄序

猶之夷也有夷之夷擯之可也有華之夷字之可也而更有乍叛乍臣之夷有似華非華之夷擯之不可不得不存之以固吾藩字之不可不得不錮之以去吾敵蓋嘗觀漢唐之故矣漢文帝時匈奴十四萬騎入寇至彭陽上親勞軍欲自征何壯也而南越尉佗好言款詞不難稱側室子甘與之隣唐元和間釋宣武魏博我成武寧橫海不誅何



仁也而獨誅淮西舉朝竟言罷兵晉公堅持四年而始克  
奚也南越亦臣亦叛在門牆外淮西似華非華在臥榻側  
故尉佗臣而漢治以光元濟擒而唐威愈振一張一弛文  
武之道也繇斯以論今日之交之播何以異此乎友楊義  
叔叅知粵西會有黎莫之訐數年不決貢賦不輸 上命  
督撫臣議或曰鵠蚌持予承其敝復永樂之舊千載一時  
乎或曰莫莫黎黎莫陳奈何逐一篡者予一篡者義叔曰  
不然陳氏已矣黎非叛中國也復祖讐言而逐篡臣也毋論  
今日以 章皇帝之威靈不終郡縣 肅皇帝之英毅竟  
授都統乃脩毛司馬故事嚴黎擅殺罪黎乃肉袒牽羊面

縛與觀義叔徐宣 天子今解縛受降而今存莫祀於海  
島不遺一夫不煩一鏃出交人於湯火莫南氓於衽席書  
奏 上大悅賜金增秩有差義叔次第其事為書名曰綏  
交錄而屬予序時予監中 命下奉 嚴旨過往不及就  
墨入黔播益張賊東西奔突度劉人如管蒯 上大怒遣  
五大將軍六監軍屬三中丞總於李司馬合三省材官討  
之而義叔以才推來監黔軍主勦益急于私訖之曰君於  
交主綏於播主勦奚也義叔曰不然交故夷也夷則夷之  
黎莫交惡不侵漢土不刈一漢兒何罪而可誅綏之便播  
華也太白流夜郎夢得刺播州故中國地而逆酋用苗變



夷阻兵以來殺命官戮大將積屍數十萬不寸斬之何以  
令西南夷誅之便予乃請益兵增餉會蜀楚兵以二月出  
師三月義叔督兵先奪關四月作使水西三戰三捷五月  
合兵圍海龍六月五日破圍城明日賊雉死縛其妻子無  
噍類比飲至稍隙予再取綏交錄讀之然後知義叔之南  
越交也漢文款佗之策也其淮西播也晉公誅吳之斷也  
張弛撫勦道故如是竊聞之吾鄉故老宣德初改元漢庶  
人恃叔父尊叛於樂安楊文貞公勸上親征逾月而平  
至交州反側不虔師老財匱文貞援漢奔珠崖例勸上  
討陳氏奉正朔罷郡縣至今避之義叔文貞七世孫也其

綏交而誅播也繩祖武也况播之惡什百漢也平播有錄  
予當復為義叔序

### 熙園吟序

熙園者予友人康用光築之以自老也旦焉暮焉游焉息  
焉而自吟詠其間名其詩曰熙園吟續衣生過而問之曰  
子何熙而吟也用光曰黔婁有言不戚戚於貧賤不汲汲  
於富貴吾思夫戚戚汲汲者之致吾樂也故日求熙焉吾  
里名蠡山自先世卜築在文溪武姥之南三顧雙華之西  
魚鬪龍洲之側每一游頡頏鬱鬱佳氣盡入肝肺吾地甚熙  
吾遭逢聖明潢池不兵三革既定五刃亦隱耕不釋耒



臥不下捷是如春之世也吾世甚熙吾北歷梁嘗登太行  
望嵩高高南游閩粵吳楚絕扶胥泛洞庭躡武夷訪金焦西  
抵蜀黔上峨眉下三峽以極於八番吾遊甚熙吾先人廬  
足蔽風雨鑿山為室依雲成宇彈卜子之琴詠先王之道  
吾居甚熙吾昔師友則平川未庵今日師友則兩江禹門  
與君吾黨甚熙吾不挂軒冕自製薜裳著詩自娛忘懷得  
失吾吟甚熙吾又何戚戚焉汲汲焉而營營於貧賤富貴  
之區乎蠩衣生聞而嘆且愧焉吾三十年馳名利之場溷  
戈矛之鄉求一日之熙如吾用光不可得而竊嘗求聖賢  
之熙矣詩稱文王於緝熙敬止解之者曰熙光明也益戒  
禹百志惟熙解之者曰熙廣也此性體也性體如天無不  
覆如地無不載如日月無不照臨如是光明亦如是廣大  
即逍遙蓬華不加淡即名利戈矛不加濃是熙之原也致  
廣大極高明是緝熙惟熙之學也地熙世熙居熙游熙黨  
熙吟熙皆熙之助也於是用光起拜予曰有味哉予之言  
而徒熙吾圃也

城書序

守城事宜武經總要有城守章紀効新書有守哨篇呂中  
丞有城守尹朔野有堡約籌海圖編亦載守城一卷其說



詳矣顧事太煩瑣器亦重複介胄之士多不解其說予入  
 閩得福州何太守所刻守城事宜總括武經新書而稍淺  
 其詞令人易曉守城之善物也已矣入黔中疆場日駭城  
 垣為急乃增呂尹二公數條間杼一得付之剞劂凡守城  
 將帥人給一冊命之曰城書熟讀而詳味之庶幾黔之金  
 湯乎故曰敵無脆有備者勝國無小善守者全曰備曰守  
 無出此書召伯營謝為教城沂竊為諸將望焉

先天九曜圖序

孟子曰星辰之遠也苟求其故千歲之口至可坐而致也  
 則知往似易易曰數往者順知來者逆是故易逆數也則

知來似難予謂往來一也神以知來智以藏往沈心之極  
 何往何來萬世不惑於知人百世可知總之因禮未能  
 知人知禮焉能知來此不易之說也數學亦然先天九曜  
 圖皆未來之曜一日者能算之豈非謂其故可尋而逆可  
 數乎第來年之臺曆未頒村野談星者漫言休咎皇惑愚  
 夫則此圖不為無助倘亦吉凶與民同患之意乎

黔臺校統錄序

海宇譚聖學半宗餘姚餘姚之學成於龍場龍場故黔地  
 也黔之士待文聞夷奮而起者若孫司空山甫李太參滄  
 之馬內江朝寵其榮榮著者予入黔謁餘姚祠低徊者久



之異黔士中得如三公者與之上下切磋益卷卷焉會夜  
夷跋扈戎馬在郊部曲督候司馬祭酒之屬鱗集戲下每  
食而廢箸者三也迨烽堠少息鏡歌振響則又槐黃期邇  
逢掖生方且賦桂枝歌鹿鳴爭衡筆陣決戰文場矣由前  
則王事靡盬由後則多士彙征相頌其殷竟相遇左也  
嗟嗟元凱臨戎講論不輟安石却秦遊息如故即餘姚禽  
逆濠日講學座上聞吉語余甚媿焉進督學使者徐君商  
之徐君曰諸生習鉛槧驟語良知奏笙簧樂鳥也無若就  
舉子業牖之易入會四方門人及黔孝廉以舉業來就正  
者若干篇檢付徐君鏤布學官人畀一冊若予與諸生對

語雖然舉子業與良知語非二物也舉子業由良知發是  
子應毋膝校膠理開而常達也不由良知發是責火焚景  
責寒結風理閉而常窮也餘姚山東程錄非舉子業乎鼻  
日者為大臣為大儒具在錄中彼以良知發之即時稅皆  
心話在吾輩善讀之耳潘岳誦夏侯湛詩謂別見孝弟之  
性阮籍讀張華鷓鴣賦嘆其有王佐之才諸生以岳籍之  
讀詩賦者讀是編庶幾上窺餘姚不負龍場予非詹詹以  
舉子業語諸生也

### 黔遊草序

浮梁黃二為水部與兒建同為諸生在里中名相甲乙萬



曆丁酉同舉於鄉明年水部成進士建下第歸坊又明年  
大內火延科廊水部縮將作於邱夙有郤於中璫疏自引  
罪風悟 主上璫譖之 上怒謫水部臺省交林省中程  
公言愈危 上益怒從中旨謫貴陽故事以言謫者率稱  
病不入竟卽以他委還榆里水部曰貴陽卽鬼方予聞王  
文成公迂逆瑾丞龍場吾鄉鄒銓部公扶綱常論相臣戍  
都勻二公竟以此地透悟良知爲世鉅儒貴陽何負於人  
而薄之邪乃携蒼頭檐簷浮湘入黔會文武校士柱史宋  
公胥屬水部見一善則盱衡扼腕遇一才則揚眉抵掌一  
時墨子劒客盡出其門稍隙則登東山眺烏江陰嘯諷咏

發爲聲歌久之成帙題曰黔遊草而屬予序予惟騏驎不  
試婆娑槽櫪壯士未申坎壈多辛跡水部之遇不寄悲於  
菀柳則傷心於揭車不鬱悒於杞楨則鼓操於猗蘭乃獨  
惡呻吟之響又酸辛之酷暢其天倪杼爲和聲嘔之而生  
吹之而落若不爲此契契者予時叩之水部曰某始與璫  
郤也予未出長安而璫瘦死予逐而病於舟隣舟駢死於  
瘦予舟獨完活 上以楚璫之譖謫貴者三人猶惜不與  
而獨與我貴陽 天意厚矣 主恩渥矣予何爲不豫予  
迫然曰子悟幾是乎王文成之勲不在禽濠拊田之日而  
在龍場鄒爾瞻之望不在給諫銓部之疏而在都雲今居



夷集與雲中存稿可知也夫萬物罔乎北蒙乎南酋乎西然罔者有之舍也蒙者耀之主也酋者生之府也水部躋於北留滯西南不可謂非罔蒙酋矣又惡知非有邪耀邪生邪子歸矣爾瞻在文水上講文成之學當與之日切劇而遂其學以閱於詞异日者合居夷雲中集三之鼎峙於黔予之望水部以此

贈宋柱史方麓先生六載考績序

夫物情之佚媮憂危生於竟之順逆平陂而事功有鉅細人品有哲愚多懸於情之佚媮憂危夫非佚媮憂危之足以監功而定品也彼順逆平陂之竟空纏乎情而佚媮憂

危之情牽落於竟故履順而無憂者思不遠處身常逸者志不廣三折肱而成良醫九斷四屬而表蘊藻熾承於天水萌於地愁勞聖人之所以起也孔子於素位不徒曰貴富而曰素夷狄素患難論不違仁不徒曰終食而曰顛沛孟子論獨行其道不徒曰不淫不移而必曰威武不屈將下謂鍾鼓匪椎擊弗聲鬲薰匪燒燔弗芬乎故夷狄患難顛沛威武亦士之椎擊燒燔也今天下所稱夷狄者北虜東島奴西南諸土夷赤白囊不發旛旄不翩人情虞於湛樂輒號曰太平一有警風起塵合彼所謂患難顛沛威武皆是物也 國家當是時嘗博選博敏沉毅不貳心之臣



假柱下權以鎮其浮而疏其穢解其焚糾而救其旣亂彼  
惇敏沉毅不貳心之士亦欲陟崔嵬集苞栩勤王事以銘  
功於社稷而昭品於萬世以予睹記嘉靖間虜騎薄都城  
內江趙文肅公以太史兼御史勞軍棘門倭訐吳越新都  
胡桂史公殲之王涇劉字據朔方叛麻城梅柱史公自疏  
監軍而賀蘭平彼三君子武庫五兵縱橫一時卽其才實  
俊而虜倭亂賊爲之殫殫矣比紀其期久者春月近者數  
月卽履逆蹈跛爲日幾何若縮柱史篆歷三命積六載  
亡歲不與鹵獵亡日不與賊持則今蜀廣漢宋柱史公是  
已公以名進士起家知德清爲循令五年天子召爲御

史維時順義款塞長昂窺遼左倭寇玄菟樂浪間天子  
命公按遼東亡何虜婦衆闌入公與今李司馬公協謀逐  
虜賊數千級捷告天子命銓部紀公功亡何夜郎反側  
不本而犯天子將修天罰命公按黔比至飛練日駭公益  
憤召軍吏戒樂正令三軍鍾鼓必備曰吾將明聲之也章  
不佞承天子命來填拊茲土公復與予協謀赦諸夷令  
間夜郎合蜀楚滇越兵比年圍夜郎海龍公及瓜且代予  
懇留公具言黔倚公爲長城賊未威卽威鴻鴈未輯奎丘  
牡丘未築奈尙令公去銓部以聞天子命公再接黔一  
年庚子六月威夜郎亡何復有皮林之役公復與予協謀



降九股夷巴野剪賊翼以戡黎辛丑三月威皮林公益禁  
暴示權定革隱办四隣慚惕五司協附而公且奏六年滿  
牘予惟柱史銜 命行縣貴倍矣為豐年玉易為荒年穀  
難逾有虜倭黔有夜郎皮林論竟非逆則破論情雖欲佚  
媮不憂危其執焉得乃公在遼遼重在黔黔重掃宇宙之  
穢慝清西南之埃塵眎趙胡梅三公何以多遜計歲月久  
近卽三公猶董董也銓部且以公六年牘上 天子曰是  
曾為朕逐虜遼隊者是曾腦夜郎碎皮林者紀之太常庸  
之車服下 爾書褒嘉徵入疑丞在公以年勞得在 國  
家以考課令甲行亡足為公異竊計士大夫蒞官有三載

六載九載之考其居身有萬世之考委夷狄而行素患難  
而行孔曰君子自得造次於是顛沛於是孔曰君子成名  
威武不屈孟曰大丈夫公六載轍環古所稱險瀆番汗靡  
莫鬼方不得一日臨中原文物之鄉又益以臨場決敵左  
弭右索廬廬乎有浮舟千仞總轡萬尋之虞夷狄患難顛  
沛威武四萃於躬其椎擊燒燔當不知凡幾其必為君子  
為大丈夫無疑也章不佞請以俟之千萬世焉

來矣鮮先生易注序

易之為書潔淨精微古今稱知易者在漢則楊子雲在宋  
則邵堯夫揚之言曰宓犧氏繇絡天地經以八卦文王附



六爻孔子錯其象而彖其辭然後發天地之藏定萬物之基邵之言曰太極既分兩儀立矣陽交於陰陰交於陽而生天之四象剛交於柔柔交於剛而生地之四象八卦相錯而後萬物生焉夫二子之言非意之也天地間惟陰陽兩端獨陽不生獨陰不成其氣不得不錯天道下濟地道上行其氣不得不綜自然之運也伏羲氏仰觀象於天俯觀法於地而作圓圖圓圖者一左一右之形也雖未名錯而錯義已備文王繼伏羲分上經爲十八分下經爲十八而作序卦序卦者一上一下之說也雖未名綜而綜義已備孔子讀易章編三絕韋適三折窮年兀兀至於五十始

悟伏羲圓圖爲錯悟文王序卦爲綜故曰錯綜其數極其數遂定天下之象嗚呼盡矣顧象極於錯而未知所以錯象極於綜而未知所以綜卽孔子未明言也王弼掃象范甯比之桀紂伊川專治文義不論象數自云止說得七分朱子直云象失其傳理會不得如子雲縣絡經錯之語堯夫陽交陰交之訓似上契羲文下闡孔氏又且嘗爲覆瓿譏爲玩世上下二千年易象悠悠真如長夜予友來矣鮮起自梁山生子雲之鄉學堯夫之學一舉孝廉絕意軒冕結快活庵坐九喜榻晚入求溪萬山中研心圖象積三十年而易注始成其言曰錯者陰陽相對陽錯其陰陰錯其



陽如伏羲圓圖乾錯坤坎錯離八卦相錯是也綜卽今織布帛之綜一上一下如屯蒙之類本是一卦在下爲屯在上爲蒙載之文王序卦是也定天下之象如乾坤相錯則乾馬坤牛之象名震艮相綜則震雷艮山之象名是也雖然此猶得之圓圖序卦中也其論八卦相錯爲乾坤坎離大過頤小過中孚有四正錯有四隅錯論綜有四正綜有四隅綜有以正綜隅有以隅綜正論象有卦情之象有卦畫之象有大象之象有中文之象有錯卦之象有綜卦之象有爻變之象有占中之象論變如乾初變卽爲姤兌初變卽爲困離初變卽爲旅震初變卽爲豫之類皆存千古

未發代四聖欲言上而玄黃雨雲飛而龍馬龜羊巨而國家李陂細而瞽膚天劓微而復道履道顯而鳴謙鳴豫二從錯綜來不假安排天然脗合其言似揚之繇絡經錯而無大玄之艱深其旨似邵之陰交陽交而絕皇極之枝蔓使王弼程朱三子見之象不必掃理自能會予謂矣鮮易注繼往開來亘百代而一見者也其自謂孔子沒而易已亡若至今日始明豈虛語哉嗟嗟子雲見嘲劉歆而桓譚侯巴謂其必傳堯夫見嫉於秦珣鄭夬而司馬君實以兄事於洛中予不佞結交矣鮮今且白頭所爲求溪桓侯司馬非予而誰後世有來矣鮮當謂予知言矣





國家圖書館, NATIONAL CENTRAL LIBRARY, TAIWAN, R.O.C.

聖  
光  
卷  
之  
二  
三



續文生黔草卷之十二

泰和郭子章相奎甫著  
友人楊寅秋義叔甫校

碑記

新建神武祠碑

神武祠祠漢前將軍壯穆侯關雲長也將軍佐蜀漢以戰  
功封侯物後世崇褒祀封武安王又稱王晉人以王行不  
詭於賢聖又稱聖賢予讀史王之文不少槩見止辭曹孟  
德書曰日在天中心在人中日在天中普照萬方心在人  
中不容一私王肝腸光潔皎如烈日此其一節云予入晉



穩括其語題王祠曰心日天人而未以語家人一夕內子  
夢謁王祠頓首顧扁王曰此郭先生題也內子識之寤以  
予語嗚呼異矣萬曆己亥予祗役於黔受命討夜郎離  
西昌夕夢王戒予周重默示賊平期予入黔逾年始會蜀  
楚師入播不五月播平悉如王旨乃於署東建祠祀王題  
曰神武祠命兒陵八分書之陵請曰神武之義與心日天  
人其旨異同予曰子未學易乎易曰古之聰明睿智神武  
不殺而始之曰聖人洗心退藏於密神以知來智以藏往  
夫惟洗心也而後神且智惟神且智也而後其武神孟德  
猜忌殘忍夫人知之矣戮揚德祖誅孔文舉不翅几上肉

獲玄德妻子不殺猶曰為天下者不顧家殺之無為也遇  
王殊禮不殺猶曰異為我用賴以驅馳也白馬之役王已  
報效辭去必不為曹用乃禮而遣之庶幾長者之行豈非  
日心之天即猜忌殘忍之夫亦足少動其良邪孔子曰天  
生德於予桓魋其如予何天未喪斯文匡人其如予何桓  
匡殺機已萌而猶恃生德之天與未喪斯文之天以自免  
王盟在桃園堅若金石秉燭達旦義動鬼神此心之日炳  
炳如丹孟德即桓匡其如王何矣嗚呼王之日心能動於  
許昌而不能決於荆楚能諒於孟德而不能信於仲謀能  
全劉氏室家於流離艱險之秋而不能輔成帝業於威震



華夏之日豈天命去漢留之不可其說然邪王物到今千  
八百餘年其英爽義魄即婦人孺子無不知王其廟祀血  
響遍天下即窮陬委巷無不祠王幾與文廟埒又誰戶說  
而家諭之則以秋陽之暴與日心之天光明俊偉無豪毛  
滓亘千萬世無變也宜晉人謂王聖賢也祠在東園射亭  
右祠之右為碑亭貯石三中刻建祠始末左刻像傳右刻  
靈蹟碑亭右為馬亭爰紀神功系之以辭

辭曰炎漢日落皇綱幾絕天生虎臣為萬人傑蒲坂降神  
桃園軟血龍從豫州鴈行諸葛辭曹歸劉燭曰植節美鬚  
桓桓雄武揭揭批郤陷堅雷轟雷制害見效氣老瞞褫魄

馬足方峙天柱遽折魂遊宵晶靈首光烈靡地不祝靡人  
不德嗟嗟黔陽雜糅漢夷夜郎不虔煽毒邊垂予小子童  
肅將 天威王赫斯怒嘿護艱危假夢善猶馮虬賦詩斬  
關拔此烏巢我 王師兔穴既埽虜庭乃犁東市然卓南粵  
獲嘉邊毗案堵將士偃旗功在社稷誰其疇之疇之維何  
祠初神武金相玉質儼然射圃聖賢可親心日可睹精靈  
如在竊比尼父盤江湯湯貴山膺膺廟貌維崇永奠茲土  
綏厥戎蠻懾彼豺虎勒石千秋銘勛萬古聿昭神貺以篤  
國祐

壯繆侯辭



予讀蜀志先主時惟法正謚後主時諸葛亮蔣琬費禕亦見謚陳祗寵侍夏侯霸遠來亦復得謚於是追謚龐士元靖侯關雲長壯繆侯張翼德桓侯馬孟起威侯黃漢升剛侯趙子龍順平侯時論以為榮夫靖桓威剛順平皆美謚也謚法名與實爽曰繆雲長出四子上豈宜橫加惡名考之字義繆眉抹切戾也純繆也即名與實爽之謂也讀作去聲繆莫六切謚也繆之為繆借音不借義通作穆穆敬也美也厚也清也漢書作敷通作繆謚法布德執義曰穆注故穆穆也中情見貌曰穆注性公露也周穆王史記周紀稱穆秦紀又稱造父以善御車於周繆王秦紀稱繆公

任好尚書注秦誓又稱穆公孟子稱魯穆公史記魯世家稱穆公顯氏族大全繆姓或讀作穆則繆與穆故通稱也公報効孟德執義甚固心皎如日中情甚露大行既立宜受大名而豈名與實爽之繆乎夫周穆猶有八駿之疑秦穆猶有二良之疑魯穆猶有不用賢之疑謚穆可謚繆亦可公之穆無纖毫可疑者而惡得疑為繆也世之祀公者輒曰漢壽亭侯不知此曹所表非公意也建安二十四年先主為漢中王拜關某為前將軍假節鉞後主七年追謚壯繆侯則前將軍者公之終官而壯穆公之易名也不書先主之拜而書曹某之不失其實矣子章祠公於黔之東園



題曰漢前將軍壯穆侯關公之神庶幾公生前之官身後之謚兩得之矣

泰和邑侯張東山先生德政碑

古今譚賢令曰潁川四長美考其世荀猶稱神君韓鍾陳三君類皆以智包愚以德酬怨厚性寬中尅己反善無可喜可愕之事而當塗朗陵為荀立祠羸長有碑林慮有頌聞喜太丘吏人追思之則何以故焉匹夫匹婦離之則愚合之則神惟其愚若可罔也惟其神不可欺也鷹擊毛擊之治武健嚴酷雖足以博一時之愉快而黎民不又智囊虎冠之吏野無行盜道不拾遺非不有造於氓而窮愁遷

及何可勝言夫惟以吾之神合於匹夫匹婦之神設大法而不任順人情而不詭故所居民富所去見思潁川四長率是道也予西昌下邑自有邑以來不知凡幾令顧城東有三賢祠城西有達侯祠繫於民思者四抑何董董也至於今得宛陵張侯焉張侯令吾邑六年所稍遷南繕部主事尋改職方措紳大夫裒文學父老俵俵然若失慈母乃謀伐石紀公德政而以文屬予亡幾何有黔中之命治兵討夜郎日在行間無須搖櫓諸大夫趣之者再因投戈言曰公涇上人夙有志竹貴於書無不厭咀比成進士業且署名中祕或謂侯抗直改令吾邑崇大體不越肩期會



每聽兩造出片語射民肺肝邑賦繇最甚民習為負積胥百計隱射公不忍狼鼠嘍民膏血設合征令戶長帥子弟自相灌輸吏不得挾寸牒驚邨戶鷄犬邑田籍懸吏手虐賦為梗富人子連阡陌不輸公家租貧無立錫而更繇如故郡侯汪公司理劉公行度田法侯相之戴星炙日尋壑經丘稽田以戶核賦以田闔邑窶人出湯火單車問俗無煩里旅行鄉約與父老丁寧舉不遺葑菲懲不肯強禦至桀奴悍婢凌轢主人者盡繩以三尺旱魃為祟民嗷嗷待槁公自覲還邑露跣禱三顧雨隨至田乃有秋虔臺及爪率代於白下公請從餘皇使數十年供億繁苦民始息

有蠲餼葺學宮遷縫掖程秬譚經上瞿然顧化邑城襟武山帶澄江直匯龍頭邇來石脂之鑿鑿潰漏山液迅流之射侵嚙別鮮公下令隄龍洲壩錮武山石剏龍頭浮屠苞扶地脉醞釀人文百年之利也公自奉約而馭家嚴兒建在諸生中公獨獎借恒舖之即半菽二豆相對而飽邑署後故有圃隙驅家人子辟草萊時藝蒿公獨吟嘯其間故名其所著書曰秬葵園稿以此公令西昌六更寒暑不斃法不澆淳不用己不拂民故子衿安於教猾胥束於威芸夫牧豎狎於真賢者樂與之俱不肖者懼為所短去日久懷日深遠繼穎川四長近續西昌四令昇日勛名隆赫政相



伯仲豈可塗人耳目襲而攫之哉嗟乎四長之頌多出李杜諸大儒手即城西建侯之石又公椽筆童愧不文亡能繼塵令史局傳循吏者有所檢鏡耳侯名應泰字大來別號東山萬曆壬辰進士石勒於學宮之左併系之辭

辭曰最爾西昌提封百里嘉禾獻瑞邑名多美天閔元元張侯戾止函牛之鼎烹鮮是庀崇文飾治勅法震紀鷄犬無驚依鼠盡徙痼瘵乃身父母孔適邑有逋賦百孔千倉劑量畫一令氓合征邑有虛稅十戶九傾拮据清丈絲役攸平巡行郊坰鋤暴鳩正倡學育賢外彪中翔新想所泉譽髦日丞傷心文魁焦石爍金三顧步禱百稿迴生與草

盈林祥鸞集庭歲星普照編戶咸寧靈蘇所鍾寔緣膠脈鑿脂有林悍不有宅鏤鑰龍頭昂建鴈塢以張形勝以抑崩澆氣益扶輿毗殿衽席子康既徵寇君不借愛棠與思頌聲嘖嘖頰視龍江涓涓清白環觀瑤華矗矗名德爰採村謠鐫茲磬石百世不確其永無斁

明故勅封孺人許母易氏墓誌銘

萬曆己亥春二月予以閩藩入 覲還病齊魯道中乞骸未俞三月播酋楊應龍叛犯黔之飛練 天子震怒命子章填撫貴陽自里中趣入黔予以六月蒞事黔距賊不二百里遊弩往來晝燔夜烽照耀洪邊維時同年許觀察子



恒居藏甲岩下予曰智囊在城亡慮賊矣於是朝諮夕諏  
得破賊要領明年六月賊平冬十有二月予風疾發杜門  
請告觀察帥其弟湘鄉蒙化二君謁予曰一德兄弟母易  
孺人以乙未重九日物于寢至今未卽下里筮明年春啓  
先御史藏而合窆焉惟是藏中石未有屬敢請予以病再  
三辭不獲則以馬柱史公狀來按狀孺人姓易氏故四川  
順慶府同知封御史長泉許公竒配也易之先出江西吉  
水元至正間有崇立者仕順元路遂家焉數傳貴登明  
景泰甲戌進士廷試二甲第二歷官辰州知府數傳至崇  
爲郡諸生配李氏生孺人性端靜聽而婉公憐愛之不輕

諾委會時順慶公舉于鄉初配胡孺人無子早世易公曰  
許氏子少年謹重是南金也遂歸之孺人生長脂腴毫無  
驕侈能躬女紅典炊爨不取成於童婢事尊章親謁溫清  
亡不得其驪先是順慶公五歲失恃繼母王孺人推燥居  
濕育如己子公事王孝養備摯孺人佐之益祥順公有伯  
氏貧而早歿丘嫂長者任業寡中外咸仰於公孺人姑眎  
嫂兒眎侄饑餽餽遺以時誨諸侄掖之暨立公守州倅郡  
婁紆邦紱孺人從宦卽幾二十年縞帶紵衣弋綈蒼布猶  
然故笥服扃後闈無私啓垣無私竇公宦轍所之廩廩者  
冰蘖聲孺人力居多焉舉五子卽在文葆母姑與自嘗謂



吾非不能爲兒製一繒烹一雛顧獨慮其習貫異日者不  
耐寒膚凍腹耳比長曉窓夜燭親績紝督之少盭教旨投  
以夏楚以故觀察昆仲爭淬礪畋漁於書林相繼以明經  
起家上埒平輿之三許和熊之效於茲燦然矣觀察以蜀  
令治行高等 天子召爲御史三載考績封順慶公御史  
母孺人已二孝庶弟捧檄分牧孺人老而就養諸子左右  
無方重錦甘醴殊不色喜居平不二羨哉非祭享不飭佩  
組諸婦服間有冰紈純麗者不敢上食莫年猶躬操作僕  
僕不自休家人諫止之孺人曰老婦非不耽逸也吾五子二  
女十有七孫九曾孫十有三女孫七曾女孫食指繁貧家

不足贍聊以身模之耳或曰易辰州公以名進士出守甌  
離不偶卽日拂衣歸歸而貯書萬卷穀詒後之人觀察兄  
弟得微成此宅相邪或曰易氏故吾郡吉水俗尚纖勤吉  
水又稱文水家絃戶誦孺人得無恭敬桑梓以艾其兒孫  
邪不然何其家法酷肖吾郡也順慶公癸巳冬弃賓客孺  
人哀毀成疾居亡何物肯萬曆乙未九月九日也距公物  
董一年餘距生之日七十有五年子男五長一德卽觀察  
嘉靖甲子解元隆慶辛未進士雲南按察司副使前陝西  
道監察御史娶越氏次崇德嘉靖辛酉舉人湖廣湘鄉縣  
知縣娶李氏繼段氏湯氏次裕德隆慶庚午舉人雲南蒙



化府同知娶馬氏次厚德娶余氏次成德廩生娶段氏女  
二孫男十七女十三曾孫男九女七諸孤以萬曆辛丑二  
月二十一日合葬於翁岩順慶公窀穸右章木佞敬爲之銘  
銘曰維螺川文水之靈暨於順元而茁於易牙維辰州之  
祥發於淑媛而訇於文叔之家相順慶矣澤流三巴毓平  
輿矣學富五車鳳兮噦噦麟之儀儀采蘋采藻去泰去奢  
爲許令妻爲烈女士不遐有佐翁岩膺膺大谷豁衍舉業  
於生前合城爲佳宜尔子孫振振兮首千萬年綿綿其瓜  
明故工部員外郎宋雲麓先生墓誌銘

萬曆己亥六月予入黔會播酋匪茹日夕與柱史宋公計  
播事予因言今天下有二大患虜倭與播播然眉矣虜卽  
未亡盟倭稍退顧隼質狼心叵測也柱史公曰某昔接遼  
東習虜事邊卒辱不北行一寸家伯氏昔令定海練鄉卒  
獲倭級三百爲當事者抑不得敘夫兵何常不練則邊卒  
弱練則鄉卒強予聽之間因譚定海公事甚悉旣而播平  
定海公長子守愚以公狀來乞銘柱史涕泣將之予侍柱  
史父又督學蜀中時守愚以國子生就試鄉闈予首拔之  
有一日之雅義不得辭按狀公諱繼祖字汝孝號雲麓世  
居廣漢古店鎮父贈文林郎德清令長泉公有隱德耽書  
史娶吳孺人以嘉靖丙戌十二月十五日生公五歲吳卒



育於繼母張孺人卽柱史公母也公自幼狗齋開悟筆端  
風生稍長出就外傳詣雲龍寺就佛燈馮几據梧吾伊不  
輟壬寅娶蔡孺人丙午廣漢守安成劉公忍齋小試噐之  
寘第一克弟子員巳酉山陰祁公蒙泉以保寧司理與外  
簾首舉公不偶置乙榜因攜偕錦屏耳提面命公亦條濯  
滓麻味塞芳腴比歸祁公送之曰子行脫穎矣壬子舉於  
鄉癸丑成進士授定海令時倭寇浙東陷慈谿疆場日駭  
定海距慈僅六十里公增陴繕械鼓鄉勇率先出境逐倭  
乃解去婁年大練鄉兵歐之戰斬倭數百以贖忤紀功者  
竟不錄慈谿令同年某以慈陷故當議戍公分首功數十

贖得免其急人難若此倭平修東岡隄注填淤之水漑鹹  
鹵之地民爰牧耕稼其中至今思之埒於史起之灌鄴也  
語且定海誌中慈谿故亡城倭去議俾其城以爲民速強  
宗柄家甲可乙否度城址三易府官不就當道議屬公公  
乃左乃右相陰陽度高薄仍溝洫計徒庸一日疆理一日  
版鋪旬內陬陬亮亮百堵且與故趙尚書某昵於分宜鼻  
息所衝足變霜露城經趙氏宅欲少迂公曰法行自近貴  
始重榘其僕引繩直之旣城謗議起趙曰宋定海健令也  
密遣人諭公附巳可得分息海道且釋郤公不應趙心領  
之丁巳春銓部下行取檄計公尉薦十有一疏置之首趙



竟排阻之遷工部主事會 三殿火 上治宮闕公戴星  
督工工竣 賚金如千戊午春虜入寇雲中部解軍械軍  
興數十萬備邊諸司以虜訐次且公毅然請行大司空壯  
之行次懷來聞故經歷沈公鍊死於讒公憤然瞑目枕擊  
歸語同年吳給事公時來曰夫夫也殺人媚人吾恨不盪  
其腦能縛吾舌乎吳曰君亡言責某當言會虜入三輔撫  
臣楊某兵北吳彈之楊誦戍而沈之子得不瘦死真定國  
土中公一言力也已又風吳曰事當爲不止此袖中彈文  
可但已乎會吳當使琉球乃極論分宜謫戍是時薦紳紛  
託足重人八公獨守高緇武已未蜀中缺銓部鄉評推高公

而又有欲爲戚地者遮前狀譖於分宜公公以故不得入銓  
出視權荊州未幾遷員外郎未幾遷河東運司同知公曰  
吾旣未歇也如命何竟之河東庚申晉兩臺屬修運司志  
又屬督書院課諸生得士爲多辛酉分宜以星變故傳考  
朝臣計陰擠異已者公名在察中時年方三十有六公曰  
吾旣未歇也歸杜門裹足不入城斷舌相戒不敢譚天下  
事甲子分宜罷相公聞听然曰吾今免矣邑有清白堰白  
馬綿江公用水工醜諸渠引其水用溉河壩棄地生稻梁  
到今民享其利稍隙群子弟及里人士討論學業如柱史  
公及從弟郡丞述祖王階蔡心一王問臣劉世茂楊道南



關蒙章等後先起家爲名上公性孝友通籍八年所積俸  
盡付文林公爲諸弟妹治產奩餘以仁三族三族倚爲都  
竈文林公歿公爲大治松區起吳孺人合窆虛其右侍張  
孺人張拊公如已出公卽貴曲爲承驪出反必頓首諸弟  
中極友柱史宦轍所之輒與俱常曰繼吾者其五弟乎柱  
史行五也以故柱史公語及公淚淫淫承睫廣漢楊七泉  
公爲作孝友傳益實錄云公生平亡恙萬曆甲戌正月忽  
庭謨愚曰科目士人羔鴈何可無顧天下第一等人不盡  
繇是涂杜子美以獻賦周元公以任子楊文貞以辟舉顧  
人自處何如耳一日游長春山指示愚曰此吾玄廬孺子

識之八月病瘡甚語愚曰吾歲在起起乎吾宦官雖不敢  
自欺終犯血氣戒幾與旣隣孺子戒之小心翼翼文王我  
師也病且革無以爲殮先是公爲張孺人治櫬美至是張  
孺人省之曰兒脫不諱當以吾櫬觀兒公從第上頓首顧  
謂子愚曰吾死後急治祖母櫬如吾櫬吾乃瞑頃之諸弟  
子環侍公大呼曰天地之道貞觀者也日月之道貞明者  
也天下之動貞夫一者也柱史進曰兄藝語邪公曰不然  
吾適登一金臺日光皎皎射我我故云云語畢而卒時甲  
戌十有二月望也享年五十嗚呼余讀續溪胡尚書薦宋  
定海疏曰青年雅質義膽忠肝搏擊豪強修明武備百姓



戴如慈母一方倚爲長城似若知公者又讀內江趙文肅  
公寄宋汝孝詩曰曾將密計獻元戎跨海擒鯨奏上功不  
向天涯悔銅柱先騎款段下隆中則傷之矣當胡尚書擒  
王直徐碧溪時公幄籌必多而竟不一敘比予按狀至城  
慈谿雪沈青霞事然後知公敢於割鯨而拙於媚竈也分  
宜當日所昵者趙所恨者沈公犯其昵者而憐其恨者柰  
何不黜胡縱知公如市虎三至何猶幸其疏與文肅公詩  
存也公不死矣公四弟俱張孺人出光祖興祖卽柱史楊  
祖繩祖一子卽守愚以廩生入國學十戰文場不捷長女  
適新都庠生楊勉仁次適彭縣庠生李遇時三適本州庠

生高且正守愚娶吳氏郭氏生三德五德六德萬曆丙子  
三月葬公長春山之陽墓木拱矣予始銘

銘曰維宋之先源出莫城爰徙廣漢蔚矣文林篤生庠祁  
長君岸岸脫穎天達如竹之勁如玉之璨綰邑定海恩洽  
里宰威懾街彈島奴東訶繕裨練卒逐寇救亂旣城慈谿  
骯髒不偶讒夫詆譎入遷水部出倅河東士論扼腕公不  
爲動房湖可棹石亭可畔綿洛之間導醜白堰引水用灌  
聚書詒穀宇棟以充牛馬爲汗家庭教授國學疑疑柱史  
侃侃菟裘者室蠶屈者形公名彌煥歲在龍蛇曾子易簣  
令公捐館治命有言日月貞明天地貞觀長春之陽樂哉



斯丘萬古泮負

神武祠鐘鼎銘并序

考之志曰鐘西方之聲以象厥成惟功大者其鐘大垂則為鐘仰則為鼎一也萬曆二十七年三月予被黔命討播離西昌夕夢關王冠帶臨予宅賓主坐告予曰十有二月播滅公且重默六月入黔予內子夢王帶甲來助已又夢王臨江干有一棒破老君關之句明年六月播平討予入黔期實十三月也七月雙芝之產王廟樹惟此播功實王默右乃命工範銅鑄鐘一懸廟左鑄鼎一寘廟右用彰神武而為之銘

鐘之銘曰一夢而期播滅再夢而助之甲二夢而犁其穴惟播之扶王之伐雄雄是鐘懸於廟闈億千萬年永亡齧鼎之銘曰繫予黔境環播是鄰彼播氛惡公痛毒我黔民維心日天人乃武乃神金鉉王鉉神功攸甄俎於斯豆於斯春秋踰踰





國家圖書館, NATIONAL CENTRAL LIBRARY, TAIWAN, R.O.C.

國家圖書館  
金卷之十一  
十一



續文生黔草卷之十三

泰和郭子章相奎甫著  
友人楊寅秋義叔甫校

檄文

討逆酋楊應龍檄文

蓋聞陰吸陽噓天道不能去殺文經武緯王業所以勝殘  
故虞廷奮有苗之誅殷高與鬼方之伐聿觀盛世不諱言  
兵播賊楊應龍者槃瓠遺種夜郎支酋襲千年之爵土不  
思締造之艱受累朝之綬縻損忘泰養之恩弑父而滅  
宗支有同梟獍殺妻而室弟婦反并鳴鳩言之汚齒牙書



之穢簡策試觀大倫之數已犯首惡之誅其罪一也惟辟作福惟辟作威人臣無將將則必誅而宦官宮妾之奉僭擬 宮闈總管統制之除大亂 國法稱已曰朕稱子曰新主稱女曰主主譙縱劉關合為一人丹浦綠林結為一黨其罪二也五司七姓莫非 王民小有齟齬遂肆魚肉避難遠竄者追而炮烙之銜冤赴 奏者捕而支磔之填穉孩於萬仞之壑聚母女為一堂之驩甚至剝孕婦而嬰呱丸枯骨以犬飼疇非人類惟此荼毒其罪三也自十四年以來謀動干戈焚劫屯堡繞可接腋於井蛙遽思恃順於海鼈問罪之師方營白石拒敵之寇反殺官軍由茲倖

勝驕彼雄心其罪四也逆節之獄未正其罪征倭之調適墮其姦一脫幽犴竟成漏網 聖朝念先世之勛督府開自新之路示之五事藐若秋毫連年之逋賦不輸四萬之罰鍰烏有徵調不赴驕悍愈滋其罪五也放豚躡躅歸虎咆哮邊民怨之入骨官司聞而咋舌屯師飛練拯民湯火風雲未陣蛇豕突至將帥不保其首領士卒盡膏乎甲兵流血成河積屍徧野延燒百里之內絕無寸草之遺其罪六也基築江城郭創自 朝廷群孽併攻一旦不守破獄劫庫聲勢滔天殺將衄兵肝腦塗地闐闐市民盡作莫敖之鬼縉紳巨室旋為羊舌之宗逆 天不道與 國為讐其



罪七也急於要撫巧於弄兵率九股之生苗連數萬之勁卒東坡橫截六衛震驚掠商販以資糧斷佛像而為曰千里孔道兩月不通其罪八也逆黨趙仕登者騁其螳螂之臂蠶害思石之地天心厭亂兇人授首鼠子挾雙言而報怨龍泉被割而罹旤土司何冤奔無噍類其罪九也嬰鑊之魚期在消爛葦苕之鳥勢且摧折春秋之法亂賊必誅不思囚繫而祈生尚懷微倖以免死投賄而女奴人盡縛挾撫而詭使就擒罪惡彌彰朝野共憤其罪十也有一於此未或不亡况鴟性已受於胎生之始狼行益恣於稔惡之餘曠古無之終今何極即身齏粉不足雪數十萬人

之冤縱草薙禽蒐難以償二百司堡之命神人之所共憤天地之所不原且賊亡有期咎徵恒見祖塋碑哭知廟鬼以何依海國山崩覺地靈之盡竭可為短氣良足長吁本院奉天討而挈義旗順人心而鋤妖孽材官雲集猛士星馳剋剋皆蒙輪挾輶之夫桓桓亦拔距投石之士以此赴敵何敵不摧以此圖酋何酋不得斯蓋丈夫食肉之秋壯士封侯之會冰有可折時不再來宜舉正正之旗百道並進圖堂堂之陣萬弩俱飛使董卓之魂先為東市之燼元濟之惡難逃雪夜之擒功名與日月齊輝爵賞將山河共永指白日以揚麾對蒼天而布檄凡諸漢土咸使聞



野火  
知

誓師文

漢武伐夜郎多巴蜀校尉之力諸葛擒孟獲實濟火軍旅  
之資黔陽故典尚存青史勛名猶烈我 皇朝子毓萬國  
賓服四夷島奴啓釁於朝鮮懾天威而遠遁劉勃弄兵於  
寧夏望漢幟以就擒惟茲逆首楊應龍者素藏禍心敢犯  
天憲喜則人怒則獸睚眦之隙不忘稱爾戈挈爾矛號餐  
之兇遂次殺戮無分善惡侵軼且賈城池數百里內青草  
不生十餘年來白骨盈壘數其罪不容於死正其惡自絕  
於天 皇上嚴必勅之令授決勝之符天地合謀鬼神助

伐大師聚集問罪有期指天日以揚麾對神明而作誓凡  
我文武將吏以及漢土官兵為 王朝之臣子則不共戴  
天之讐討小醜之姦雄則當奮從王之義感激宜雄眸有  
淚叱咤應怒髮衝冠震若雷霆方為烈士捷如虎豹斯稱  
壯夫故或卷甲晨趨或潛師夜起或縱金鉏而入其阻或  
橫玉弩以挫其鋒或折其拒敵之雄心或截其歸困之要  
路必呂嘉之首是馘而劉闢之庭盡犁京觀築於遐方組  
練收於外府庶上足紓 朝廷之忿下可洗邊圉之寃建  
茲大功自膺懋賞 明旨皎焉如日神亦陰為擁佑若督  
撫鎮道及副叅遊守府縣衛所大小文武等官有貌似驍



熊志懷首鼠口譚忠義未堅鐵石之心念切身家尚絺帷  
牆之見不思投醪饗士而剝削無厭未能超距賣勇而跋  
踏自弛迎敵鼓行惟倚前茅當陣却步未誅獨柳妬忌勝  
則等畫每相矛盾涇渭淆則是非不辨玉石或以小忿而  
亂大謀或挾私心而害公義或首尾不相接應或秦越不  
為助援或分地而止守疆域或違約而不顧孤懸土司懷  
狐兔之悲而旅進旅退漢人造萋菲之謗防而如鬼如域而  
且貪貨負於破賊之初淫妻女於埽穴之日爭功則按劍  
相視邀賞則鼓譟而呼有一於此在國為不忠在家為不  
孝在將為不武在士為不律無獨難逃 朝廷之斧鉞抑

且大犯神明之網羅赫赫在上具亟殛之

禱神伐叛青詞

伏以天討有罪大振貔虎之威神聽無私詎忍豕蛇之毒  
聲靈赫濯幽顯皈依竊惟播首揚應龍者隼質難馴狼心  
自野馮險負固罔知三面之恩挾黨蓄謀益肆九頭之暴  
徒勤諭蜀無改吠堯弒父殺妻棄大倫於埽地剝胎斮骨  
稔極惡於滔天懷忿七姓五司度劉殆盡拒討白石飛練  
傾覆靡遺加以綦江之屠兼之龍泉之陷前後戮無辜者  
數十萬命終始怙不悛者幾二十年日月其悖神人胥憤  
九重未安於丙枕三藩徒整乎申兵惟 上帝顧謬之命



浸隆垂下民生成之德至厚五丁開道陰符彰殺伐之天  
威六甲呈祥神武收蕩平之偉烈驅忠魂而愬闕下盡  
令守虎豹之關拔厲鬼而護軍前罔俾滯黠之野庶鋒  
鏑之腥盡洗而瘡痍之肉復完 宗社蒙休官民頌德謹  
詞

與宣慰安疆臣等盟文

竊聞諸葛公之擒孟獲也當時所仗者火濟侯景之不得  
志於高涼也南海所倚者沈氏閨闈中豈無頗牧檠戟外  
便是良平自古定大難者率由茲道非一手足一耳目之  
為烈也播酋揚應龍者席三苗之遺種煽九頭之餘孽包

藏禍心跳梁并幹公連異類欲恃太陽昔年殺官兵於白  
石今年殺官兵於飛練至於基江之陷益肆滔天之惡犯  
天下之大戒此人情之必誅 帝赫斯怒授鉞專征本院  
銜 命入黔泣劒共憤嘗膽同苦看得貴州宣慰司宣慰  
使安疆臣本火濟之胄而母淑人鳳氏亦沈氏之儔世篤  
忠順富蓄精銳又有宗目漢把陳恩王嘉猷等為之左右  
尚念爾祖助順討逆蠢茲播酋自干 天討如能戮力掃  
穴悉心為 國剖貪恠之豕心獻突梯之鼠首本院合奏  
朝廷申明 前旨褒汝元功懋膺上賞今舉大事須當軟  
血上告 皇天后土下告山川神祇如疆臣與陳恩王嘉



猷等陽為聽命陰故敗謀以誤本院負 朝廷論笑天下  
則不忠在疆臣等有如此血如疆臣等功成之日本院頓  
改初心不為 題請則不忠在本院亦有如此血惟神正  
直鑒此血誠有不如約者其亟殛之謹告

告文

馮牙文

大明萬曆二十八年歲在庚子二月乙亥朔越十有二日  
丙戌貴州巡撫郭子章謹以牲醴昭告于 旗纛之神曰  
稷稷生靈共戴 聖王百蠻率服萬方接堵惟是逆播揚  
應龍者性自豺狼兇猶狡獪橫暴亂屠戮邊圉侵城殺

將上千天怒爰授節鉞征茲不軌猛將如雲戰士如虎烈  
烈高牙聞聞伐鼓獨言啓行馮於征所正直為神忠勇是  
扈萬靈司戰五將擁部鏃刃鋒鏑集于亂賊鎧甲千楮完  
于軍旅早餞渠慙盡縛妖豎靈毒一麾皇風四煦以綏南  
黔以薦聖祐凱旆旋旌丕昭神武

告文帝文

兩儀有政四海有君逆首不道大負國恩 帝命九伐爰  
整三軍諏吉誓衆特薦苾苾龜蛇耀日貔虎成雲有征無  
戰偃武佑文黔國惟寧玄德彌尊

告武廟文



惟靈始畫六韜寔肇九伐以遏亂畧以救民社逆播煽毒  
萬靈顛越 天討有罪授我節鉞卜吉陳師誓掃兔窟千  
羽風寒旌旄電發徵靈能罷滅此蠱蠹赫赫休光齊明日  
月

告火神文

天生五材火德為崇陶鑄戎器以戒不恭蠢茲逆播梟鯀  
同兇肅將 天討敢告祝融畢方煽煽助我火攻疾如迅  
電歛若颺風烽煙旋淨永燁神功

告五顯文

狡首逆天構孽稱亂 國有明罰孽不可逭五靈司土助

服代叛獨言誓師惟神出將生靈救兵合夷漢一鼓鯨  
鯨母俾鼠鼠焚燭蕩沃萬姓安瀾赫赫大帝光靈永燦

告關王文

逆播祭虐久辜亭毒 天討有罪師出以律霜戈成林玄  
甲耀日將陳蛇陣旋掃兔窟雄戟一揮凜如破竹願言神  
武顯茲大戮

告諸葛武侯文

惟靈昔伐南蠻威震古黔百代尸祝天威如臨胡播陋孽  
虐燄不禁 帝赫斯怒命我徂征消吉告期徵福羽林廣  
開八陣潛授七擒早封京觀永奠生靈



告黑神南將軍文

惟靈像圖凌閣神遊鬼方旣淫福善歿厥遐邦狡首匪茹  
敢越天常奉 命徂征蠲吉啓行崇牙蔽野義鋒凝霜顯  
戮巨憝汎掃欃槍神其羽之大慰民望

告烏江神文

惟神上應天漢下截夜郎逆首不諫 天討用彰消吉渡  
關方舟以航冰不必合沙不必囊凌陽無波長鯨是創聿  
昭水德綏此蠻鄉

祭陣亡將士文

爾等新關先登效順討逆臨敵血戰元氣鋒鏑功雖未就

情則足惜旅魂悠悠冤聲唧唧遣官戒奠河流嗚咽早縛  
渠魁用慰義鬼

播平謝諸神文

頃誓三軍討茲大逆賊勢方張神威有赫潛攸其氣陰禡  
其魄貌貅賈勇狐鼠就馘漢斬呂嘉蜀擒孟獲克匪二年  
凱奏六月地闢草萊忙恬衽席積虔酬恩永戢矛戟

播平謝關王文

夜郎不虔奉 命徂征鷹武維揚燕巢遂傾千年逋寇一  
朝犁庭餘孽盡掃京觀乃成轅門奏凱牂江洗兵七姓復  
業八番更生天日所照永戢光靈



播平追薦陣亡孤魂疏語

伏以聖心救苦弘宣不二之法門談口修因顯化大千之世界恒河不沸震日迴春顧此夷風寔迷佛日皇天厭亂奮除渠孽於牂牁大德好生忍墜冤魂於草莽十年荼毒萬劫塵蒙或被戮於犬羊起釁之秋或犯難於梟獍屠城之日或橫戈擐甲而勇以捐軀或輓粟飛芻而苦且實命積屍盈野去年之東坡飛練可哀流血成川今歲之烏江龍泉允際橫殺及入山之婦酷害見投谷之孩兼以二豎為殃不翅三途受苦往往叫冤叫屈大乎尚忍言哉築築無倚無依誰則為之主者真空西南未有之變寔是天地莫大

之悲匪籍慈航曷離苦海啓天人之大會拔苦惱之衆生燈點金蓮輝一天之星十香赫寶象騰五色之雲烟散錢給東市之魂施食飽莫教之鬼有緣皆度無劫不銷伏願光徹九原恩覃六道大捨慈悲願俾種種滯魄蚤登快樂之鄉廣開方便門庶啾啾餓鬼旋出輪迴之地布陽春於幽谷灑甘露於冥程功德無邊漢夷有造

祭李夫人文

扶輿淑氣盤礴三輔寔應名世寔毓女士表靈清漢燦英玄圃禮訓不騫德音孔臚弘美慶宗禔政是苞陰範圖書壺馨蘭杜馬倫齊躅德曜婉軌司馬矯翰天達振武清要



陟華臬着侈譽建牙遼海威震索虜晉秩復卿望赫吉甫  
夫人承之左翼右羽 帝命褒嘉昭茲敬美翟軒葱珮錫  
耀無疆司馬再起征彼夜郎擁傳入蜀相與頡頏外宣九  
伐內塵七襄瑰猷徽行鳩淑麟祥輿頌偕息令問彌昌詎  
知金母招游帝鄉吉路永辭仙都翱翔色黯玉壘不咽錦  
江懿惟內美彤笈留香博夜晦矣不晦者長童侍司馬昔  
在建康茲領豹畧巴黔接壤不聞虜響稔于懿筐赴問遙  
傳五內如創敬戒繁多龍龔奠靈床歆馬來格環珮鏘鏘

祭李封君文

嗚呼滌璇源於柱下兮襲玄足而應餘曹神明之芳曾兮

頡淑氣於扶輿昂容岍之僊僊兮酣道德而遊蓬洵玉質  
而金相兮埒周盤與魯瑱人倫藉以獎勸兮謠俗軌乎盱  
睢迺長風之不借兮肆川觀而巖居勗司馬以大業兮負  
名世之偉器矯鵬翮於天達兮蜚鴻聲於 朝著著承髦士  
於齊梁兮儼歐冶之鑪錘牙韞建乎遼海兮長城壯於顛  
顛醜虜不敢南牧兮紫塞為之熄燧維夜郎之反側兮簡  
文武之咸備起司馬於東山兮肩西南之重寄挈虎豹而  
登壇兮掃欃槍之妖孽計元兇以就馘兮邀 殊恩之游  
至胡白雲之日望兮溢少微其夜隊德司馬之權腸兮抱  
終天而含對淫雨酸然濯兵兮愁雲淒其掩旆春相杵而



輟歌兮士張戈以賈淚章始侍司馬於水衡兮既領豹畧  
於黔陽知泰山之可印兮指北斗以相望嗟蒼旻之不吊  
兮悵詰人之遽亡東徐蜀而告奠兮歌楚夢以徬徨苟靈  
光之弗歇兮監炙絮其來嘗

祭江太夫人文

惟靈虎林毓粹鶴夢載吉三德婉閑六行允率鏘彩藝宿  
敷芬月室伉美觀察瑩然雙玉爰潔蘋繁恪脩棗栗蔚蔚  
世胄媿媿詰匹祥誕中丞鳳芝龍木霄甍振采華樞疊隲  
比戀崔輿歸弄來服霞帔金鑿承權侍膝夜郎不度 帝  
戒玉節敬授中丞偏沅特設武鄉七牖戶牖六出蠶茲逋

寇遂膏斧鎖露布遙聞 天顏喜溢駿結既紀龍誥具錫  
胡為夫人遽爾舞月邊徽鬱黯將士悽慄矧在中丞曷已  
駸裂章於中丞締交有日久聆芳徽金相玉質昔壽萬年  
不愧拙筆茲介大耋擬頌隆邳今則已矣心神愴怵陳誅  
告奠秋風蕭瑟庶幾鶴馭翩翩來格

祭許淑人文

名賢應世倪天配倫道存伉儷教則維均猗與淑人茂誕  
閨珍清漢委和貴阜凝神日歸慶闕觀察作嬪壺儀玉樹  
內范克敦言瑜行瑾色慙心恂蘋蘩以潔蕙蘭是紉觀察  
矯翮射筮金門初縮銅章兩燁琴聲比膺特簡為耳目臣



名高補袞望赫埋輪疊轉藩臬氣槩嶙峋完懿具良幃政  
聿新 天子葵之翟第頓宣和九有訓鳳毛郁郁共期曼  
壽允稱三德溘焉一夕遽邁百六蓮摧並頭魚垂比目吊  
鶴書鷄哀狝夜嘯章於觀察誼聯仕牘近入黔中耳屬懿  
淑寶發沉輝蕙帷霄馥爰薦生芻用彰如玉

入黔祭吳楚黔中水陸神文

子章欽承 明命填拊貴筑自古徂黔繇水登陸方舟泝  
泝良馬逐逐乘風江湖驅車林麓惟神默佑疑此景福

入黔告祖廟文

仰惟列祖德厚流深予小子章夙廁 朝簪晉陟中丞出

拊于黔州屬荆梁野分井參播酋不諛嘯號山林何以九  
攻何以七擒匪革其面將攻其心穆卜告廟祖考如臨惟  
俾飛鷄懷我好音

祭楊義叔觀察文

嗟嗟義叔遽止於此耶子與義叔幼業鄭圃歲在丁巳同  
入橫序君年十一予十有五君實庚庚子亦嘒嘒里人眎  
之葛龍召虎辛未之春予先君舉君起甲戌後先齊武君  
令東官予為潮守始以陵兒委禽相府羅附於松邾偶於  
魯君不予彼夙昔之故 天子召君主柱下史蹇蹇匪躬  
皇皇靡盬出臬入藩為霖作雨劬勩拮据備嘗辛若交州







擁衛愛護其敢或替綬交有錄予爲君評平播有碑予爲  
君營府江攸馘旣宣于 廷身後之卹當有殊旌君雖亡  
矣不亡者名盡瘁而死亡异孔明九原可作何忝文貞予  
所恨者予負義叔義叔之病病繇貴筑貴筑之來其來爲  
僕勤比勞新苦猶如蒙未及畫麟柰何賦鵬君今已矣僕  
猶鹿鹿聞君之訃如何不哭嗟嗟義叔縱不予督予能不  
蹙蹙邪予能不蹙蹙邪

征皮林誓師馮牙文

么麻皮林介於邊徼旌頭鹿羣萬尾毒搖驚我鴻鴈埒於  
鷓臬 王命出征鋤彼有苗惟神威靈上拂漢霄止則虎

幄行則鷄翹爰度云龍印告赤標神兮默祐助我驃姚

征皮林告關廟文

頃禱播酋實仗我侯不謂皮林大國爲讐 王命春蒐章  
也執劉爰礪文才爰整貔貅籍神壯猶鋤此螟螽卷長狄  
喉飲月氏頭下解氓愁上紓 主憂獲醜青丘敢忘神謀

五日謝雨文

屬者恒暘爲灾四野如赭民幾不粒子章躬率官吏師生  
耆老人等齋戒徒步控告於我明神惟神之靈閱民之不  
辜若響若答晦夕大雨端三日又大雨旣霑旣足嘉種入  
土民不咨嗟惟神之休空中若有物焉皆雨而下土民曰



卷之十三  
十五  
凌羅子又曰羅雜子或曰桂子或曰菩提子考之於志隆慶壬申曾雨於城是歲大稔士民競拾僉曰瑞徵是用潔茲牲醴少伸謝虔第旱極之雨如人久病小瘳越時弗繼土且復焦坼更祈益楊神功裨甘霖益霽霽民用有秋子章等幸免於盪神亦獲有報事

偏橋開河告河伯文

惟黔之山如彼田陌在在崔嵬蠢蠢矛戟惟黔之水如彼金液流不容舸溪不盈尺年來寇旱路半兵革赤子磬懸驛舍柴瘠偏鎮之間民苦行役偏亦有河河中有石爲水之梗爲舟之厄石去其半舟亦可刺誰其司之司於河伯

積慶告神募工分擘惟神陰相毋令捍格石澗州流舟行溪闢民困少紓敢忘神德

祭楊憲副龍河年丈文

層溪高龍其近也尺朱陳世起里旅共籍予與觀察幼共研席言臭如蘭情洽莫逆出試有司名通仲伯談天曰衍雕龍曰奭庚午之秋南北共板里人目之連城雙壁後先出守相期無斃君祖伯起家傳清白予派榮陽敬于二號君遷觀察弭節荆襄予繇七閩填枵貴陽夜郎憑險逆我願行章也受斧叩君智囊君爲借箸裨我勛勩亡何君疾竟逐西昌楚黔氣濶若參與商君才本軼君齡方將猶冀



勿樂載飛載翔亡何赴來云遊帝鄉君與義叔並亢于揚  
一月之間兩驥偕亡俱我肉戚如何不傷嗟嗟君幸有子  
襲裘紹芳四世三公君家之常爰歌楚些以薦豆觴魂寢  
巨室何存何喪

開塩井告山川祭文

子章昔在蜀中親歷塩井刻爲圖說以告來許比拊黔中  
夜郎匪茹淮南之塩不入楚境滇蜀塩客縮武絕跡黔中  
塩乏有如玉屑每斤之直幾至百錢比播平而賈復入視  
昔價日增矣章竊惟五行之水潤下作鹹禹貢之文青州  
貢塩北海南海出於海滇南西川出於井河東出於池河

北出於地永康出於崖民生日用不可少缺以故字內無  
處不有宜獨黔中而靳於斯乃取蜀故刻募蜀精匠三人  
入黔相其陰陽俱云地脉流膏可穿井出塩茲者卜吉備  
牲昭告于神惟神孕靈當醞不愛其實陰灑神液早賜茸  
鹵俾黔與蜀道齊美與海池分功民獲嘉利神亦永享祀  
於無疆





續衣生黔草卷之十四

泰和郭子章相奎甫著  
友人楊寅秋義叔甫校

策論

問語云王者不勤兵於遠豈不以鴟鳴狼踞不足喜  
怒鴈海龍堆難與競逐或者以爲經生目論至兵  
法以去國越境師爲絕地其故何與然則遠者終  
不可制耶試稽往事大衆已集衆入康居刻期百  
日攻下遼東節發旁國兵而定莎車屢上屯田疏  
而制先零或以三十萬衆破突厥於黑山或以三



千騎走頡利於定襄此安在越境之必絕哉抑制  
 遠之道別有所繇不限於地也我明威靈鬱勃  
 創守同符其遠略必有可言者邇來智蘭玄菟夜  
 郎三大出師亦可謂不患苦遠矣談者謂播之役  
 莫難於黔以其域近也豈近更有難於遠者耶然  
 則不踰時而盪寇又若易易者何也夫地有遠近  
 時亦有遠近彼摧陷廓清之功掀揭一時易而久  
 安長治之策貽謀千百世難或謂削跡無遺根無  
 與禍隣禍乃不存或謂夷種敏夥如截葱薤後則  
 復生此二說孰當近而救播遠而安黔願與諸士

圖千百世者其為我著竹帛之言

萬曆庚子貴州武舉程策

夫兵者國家不得已而用之者也不不得已而至於用兵勝  
 負之機佻於毫毛而治亂之故類於尋丈故當事者當酌  
 勢之緩急以為進止而不當計地之遠近權事之利害以  
 為從違而不當較功之難易勢而緩也荆榛不必蔓於宮  
 闕豕鹿不必遊於臺沼豈曰勤遠即肘腋之間將守吾雌  
 焉假令吾蒼赤當刀俎之危桂蠹必除人邪必翦鋤而去  
 之無論近遠矣事而害也沮舍之下不可坐倚墻之傍不  
 可立豈曰苟難即只尺之易將畏吾趾焉如能為國家貽



磐石之安拾蠶而衣持鰾而食蹶而趨之無論難易矣故  
緩而急之太健者跋太利者缺急而緩之茅靡者仆波流  
者沉害而利之養虎於麀場母曰何傷子狼於春園母曰  
何咎利而害之天與不取反為之災時過不行反受其殃  
此四者皆兵家所忌也故善將兵者酌緩急權利害彼勢  
誠急卽日出日入之部荷旃被毳之鄉皆吾子也苟利吾  
國卽鳴鏑飛矢之衝復腸涉血之苦皆吾分也為人臣子  
敢言勤與遠哉祭公謀父曰王者增修於德毋勤民於遠  
彼非無說也蓋言犬戎樹悖以其職來王而王自為頓也  
夫遠非國家所得諱矣經生縮胸守和與主陳說不侈稱

舞羽則借節閉關而兵法亦以去國越境為絕地茲其故  
何也夫飛芻鳥道轉粟薪波彼尚有摩此猶枵腹何如近  
而軍儲易集川涂緬藐山谷冥迷羊腸鋸齒率然不抹何  
如近而間鑄易乘懸師深入卒與敵逢歲月相持堅壁老  
我何如近而進退可據首尾衝決聲問不通客主勞佚之  
形既分而衝突要遮之患是虞何如近而揀援可及持此  
說者亦可謂明於數而熟於計也夫孰能易之雖然董見  
一斑耳易言行師明以行險訓而法又以自戰其國為散  
地則安在夫近者必易遠者必難也夫兵無全利亦無全  
害勢之偶也近者易即遠者亦易勢之倚也遠者難即近



者亦難難易何常之有入虎穴探虎子吾無畏難之衷靜若魚潛動若獺奔而將之以圖難之謀吾謀所及將九天是秘九地是潛是故深明避擊曉暢堅瑕席中國全盛之威藉同仇無前之勇時增齊竈時臥燕壘卒能反勞爲逸變饑爲飽雖窮荒絕域外有百萬之師千丈之幟吾取而覆之掌上若承蜩射隼然何分遠近難易哉彼往事可鏡已有度我可制遠而勝者陳子公也深入康居斬郅支頭而威加西域胡其壯也有度遠不虞我而勝者司馬仲達也計取襄平刻期百日舍大圍而徑覆其巢遼左以定胡其審也有以迅疾勝遠者馮子明也以節發諸國兵問罪

莎車蠻王授首而叛漢者不赦真雷霆之不測乎有以持重勝遠者趙翁孫也坐守數十年屯田之計緩策先零屬國歸心而鎮安西鄙真山嶽之莫移乎有以衆制遠者裴守約也率三十萬衆星馳而北乃伏甲士於糧車而縛溫傳此以全力捕鼠矣有以少制遠者李藥師也提勁卒三千度嶺而西乃立旌旗於定襄而禽可汗此用尺箠驅羊矣之數子者咸犯天下之至遠蹈天下之至危大戰大勝小戰小勝詎非方略素定哉繇斯以譚制遠之道別有所繇信不限於地也 明興二百餘載威靈鬱鬱創守同符燁赫至 今幅員愈闊日月照臨悉主悉臣邇來三大出



師八荒霧卷四表雲徹載旆西征則哮劉糜金戈船東渡  
則秀吉禡菟 尚方南飛則揚酋滅跡神武遠略即起前  
數子於九原能必其鷹揚獸駭若是耶乃談者以爲莫難  
於播播之役莫難於黔則胡以說也夫酋馮二十九世之  
資保畝二千餘里之地銅山丹穴毒弩鉅戈富強絕倫形  
勢極便包以飛谷帶以長江天險雄關如礪如斗千乘馳  
輪匹夫可守而酋陰狡多謀驍果善戰不受朱提要結惡  
苗不惜鷹鷂奔走流人靡莫袒跣之徒爭爲效死恃長蛇  
之兩頭固狡兔之二穴故曰西南之大鳥也寧直青首羅  
鷲可以獨招而夜射乎以故暫假游魚又稽 靈誅養成

滋蔓今始風驅雷震總三方而鞭笞之誠難之矣然此之  
爲難是黔與楚蜀共也當時蜀建大將旗鼓渡瀘水而西  
楚亦秉鉞分旄壁五溪而陳論兵非六部之良家則三河  
之俠少論餉非錦江之萬斛則雲夢之千艘論謀帥闔臣  
非荆楚之奇材則岷峨之銳士九邊宿將勒勁騎而集轅  
門者不可俛指而中原無麓大海無波率天下全師一意  
討賊攻則有餘守非不足設酋奮其孤羽逆我顏行執必  
不能飛越基合而飲馬梁津必不能膺擊沅湘而垂頭漢  
沔日剪月蹙以計圖之徐當有要領何也彼其剝不以膚  
戟不在胆而制勝之具有不待遠求者在也乃若黔何時



也又何執也一線孤懸伍符流亡二三疲卒爲牛馬走且弗給闔志何有即一旦赤白囊紛發夫獨構之唱唱虛而莫和而黔無兵黔比寄生土無毛矣嶢巖把耒僅足哺刀耕安得備軍興費一朝戒嚴响濡可閔無論三十鐘致一石大邊轉粟亦盜糧是齎而黔無餉黔藩帑貯不足中人十家產平時養廉咸仰川湖今日之役責法錢懸於烏有請內帑不救然眉凡修戈繕甲行間飫賜之需徒仰屋竊嘆真無米之炊也而黔無財黔人十七犴獠十三適卒與客子輩旣登陴又轉餉官司與衛貢道馳驅暴骨等丘陵而黔無民黔馬遠產峒夷官圍欲數而對無繇也皇華

駑蹇脊爛蹄穿師中自偏校以下不能具款段卒有警國馬公馬亡一可恃求驟絳於木不可得而黔無騎黔武庫空虛矛如鍤錐有如榆葉矣如此大舉非復橐囊桃棘弧矢三革五刃六均七屬資斧莫從戎作弗具而黔無械將家孺子不吠不鳴乍冰乍火二三文吏宦茲土者如廣野疎星寥寥相望以之盡入行間奔命爲疲荼苦藜辛未足爲喻而黔無將吏楚蜀先言戰後言守黔則先言守而且戰且守會城去賊巢僅三舍耳自綦江一屠東坡一虔而人莫必命浸假酋以精甲五千夜薄城下必無幸矣徐命私卒斷七星之橋加其右臂則六詔之路絕而西粵寒心



再馳偏師畫澠江之口填飛雲之谷而奪興隆之城解黔左肘而外擊都雲則黔之東外棄而楚師躡大則長驅小則挾撫潰決橫出莫可誰何而况輔車之勢韓魏之交投足輒有輕重又難以深言者故黔之難尤難於近也夫以天下視播則播遠以黔視播則播近論黔之患播若在几席而論黔之所以制播又不啻域外非徒以地形言也幸宗社之靈廟廊之畫閭外副受得人而當事者苦心如藥以溫言挾纊以杯水投膠鉢積儲胥九泥牖戶卒能鼓其積弱消其未萌棘矜皆吾利器草木皆吾軍卒且推誠置赤斷絕深交俾酋所恃以自固者無一不爲我用而我所以困酋者無一不因酋以爲用又邀天之衷潛奪其魄使馭馬棧豆不敢勃洪造一步而我得徐爲之備一舉而撲滅之不然有黔無播有播無黔黔旣不戒恐楚蜀急未可得志也吾安知所稅駕哉今難者易矣而執事猶惓惓於久安長治之策欲圖所爲千百世者即愚生亦竊息之夫英武之所籠蓋則雉獮何難而風雨之所漂搖則綢繆不易天下事變卒然而來即加我以遠且難亦可以卒然應之比事變一定又恬坐安處自以爲泰山苞桑之固而不知徒見眉睫未睹項背一旦潰決將至不可收拾而前功盡捐然則今日黔中善後之策愚有八議焉一日經畫

以困酋者無一不因酋以爲用又邀天之衷潛奪其魄使馭馬棧豆不敢勃洪造一步而我得徐爲之備一舉而撲滅之不然有黔無播有播無黔旣不戒恐楚蜀急未可得志也吾安知所稅駕哉今難者易矣而執事猶惓惓於久安長治之策欲圖所爲千百世者即愚生亦竊息之夫英武之所籠蓋則雉獮何難而風雨之所漂搖則綢繆不易天下事變卒然而來即加我以遠且難亦可以卒然應之比事變一定又恬坐安處自以爲泰山苞桑之固而不知徒見眉睫未睹項背一旦潰決將至不可收拾而前功盡捐然則今日黔中善後之策愚有八議焉一日經畫



當定先王經野畫圻便利是視播故隸蜀蜀地廣播爲贅  
旒黔雖號藩省曾不足當中州一大縣以之附我則武廓  
線路提封漢境籍其歲入可供續食况播於蜀尾也而在  
黔爲腹尾大不掉腹即使便易鼓耳一曰郡縣當設晉以  
詰戎始設衛所今世曹以妍皮裹癡骨腩削部士沉閣簿  
書猶土偶也謂宜周覽地形建設郡邑如思石銅鎮改流  
故事嚴火籍孰與供劔客養統袴子孰與贍甲冑士百年  
之後其皆樂國乎一曰五司當革夫酋強而五司弱五司  
以窮來歸酋滅而五司復強彼將效尤生心 縣官費數  
百萬金錢僅爲而輩復仇乎謂宜劬馬湖鎮遠新貴例官

其後爲土丞簿旣不失 朝廷興繼之體而亡虞日後弱  
肉而強食之旣千載一時矣一曰將吏當遴淮西平而裴  
度留燕雲定而曹翰守淄青入而楊於陵分爲三道故慎  
選經略之臣精擇下極之吏一切從便宜治之訪鴻鴈於  
棘荆之下追黠鼯於篁竹之間而又令新造之牧守假以  
久任舊戍之駐鎮益以丞倅橐此不戰之弓再造可封之  
俗其惟良二千石乎一曰田賦當清蕭何入關收秦圖籍  
播冊具海國當按國日付之一炬而蜀舊版在可覆視也  
是宜以蜀版爲程以故老爲質楊氏之故土盡爲公田負  
版之原業復還流民將賦額亡虧絲戍有資封豕不食室



家膏慶一曰流亡當振大軍之後瘡痍未起呻吟未蘇不以此時大沛渥澤人將以酋在酋亡無益於苦樂之數而囂然喪其樂生之心故發棠移粟起溝瘠而肉之庶幾民勞迄可少康一曰脅從當貫元惡既擒蔡人吾人巨憊已滅助逆者尚首鼠林箐求活草間螳螂之志何能自息若弘開商網貸以更生經戰伐地下寬大書即夜即反側共老止戈之代奚不可者一曰轄屬當易勅羣永從距楚近而屬黔平清偏鎮距黔近而屬楚雖云犬牙翻成推諉頃酋寇偏橋而楚不能秣比苗犯五開而黔不能援可鑒也說者謂以黔之郡易楚之衛異日者上下一家不相秦越

即有寇警誰能諉之夫後之視今猶今之視昔往者不諫因循養亂以至於今今幸決其癰矣藥石此時梁肉亦此時若徒曰京觀既築景鐘已勒吾事畢矣遂可以長驅入漢關也此豈慮犧之鷄不忘壁之鼠乎哉雖然此就播事言耳若欲為黔計千萬年愚復有二議焉一曰破調簡之例二曰革借襲之請三曰杜礦稅之使 國家北隣虜西隣夷雲中榆塞號曰衝邊四方批大卻導大窾者鱗集其中至八番七星間鄙為夷壤一切闕茸么麼改而貯之名曰調簡夫地接舟馳類煩繁瓠蚊雷聚響蟾谷稱威簡耶煩耶可臥治耶酋之踰十年不誅也利可餌貪吏威可憚



懦吏則調簡之例自誤耳秦罷侯置守爲萬世開又安漢  
立六國後子房借箸難之今日處土司止有郡縣一策柔  
其獷悍歸之文物蜀之叙即戎滇之臨安即哀牢黔之思  
石即田氏土也無端開釁斬人之祀不仁有故不除遺子  
孫之患不智今宜著爲令丙幼者不借襲絕者不以旁枝  
襲爭者兩不襲漸消漸歇漸郡漸邑西南之患庶有瘳乎  
礦稅之使遍省直矣頃主上以播故止黔使不遣愚謂  
即無播患黔與各省直殊黔無礦即汞砂產苗壤中原民  
氓不敢抗主上蠢苗猶真其天性也黔亡稅即布履之  
推董董以佐各司俸薪一奪而歸之上令各司柴炭爲

朝廷治事乎苗訂則民不既官饑則事不集此又何利焉  
而以博亂也由前八議以救播亂由後二議以永黔治黔  
即距長安萬里在朝廷爲遠慮黔即錯壤諸夷在今日  
無近憂廟堂主持於上封疆之臣奉行於下朝令夕及  
一勞永逸回眎討播之日增繳克蹊坎穽塞路轉運印攻  
百道艱阻其難易霄淵矣語曰樹德莫如滋去惡莫如盡  
葱薤復生其根尚存削跡掘根去惡乃盡千百年之畫也  
諸葛公南征南人懼天威夫不復反矣公不留外人即其  
渠率用之爲三不易之說以對或人且曰吾紀綱粗定夷  
漢粗安彼其時魏勅吳狡未暇與犬羊爭故南中小定止



求粗安韓范討元昊心寒膽破之謠傳於軍中吾祖元卒之書達于朝端乃自謂足矣不張皇兵力賂幣用半至靈州永樂之役死者六十萬人神宗臨軒痛悼則韓范諸公不得辭其責者當慶曆時宋執猶強與章武建興殊不拔禍根竟以賊遺君父故諸葛可原而求韓范當備也今之日與蜀宋又殊不襲縱獲之虛名不貽元昊之實禍在事諸臣取為得策第立紀綱安漢夷當圖萬年堅永之策不當為目前支吾之計若徒藉口諸葛公曰粗定粗安是守燈燭之宵矐昧三光之晃朗遊潢沔之為適忘南溟之浩汗也英雄當國家全盛之日長慮卻顧當必有邁諸葛而軼韓范者愚何足以知之

問談兵者率不外奇正矣正兵受命於君奇兵將所自出其略可指而言與所謂相生不窮循環無端者詎有跡可見也又有以異為奇者有云仁人之兵成卒成列者有以先後分合言者果有當於奇正否與金版六弢之書具在人人緩頰鷹揚虎視之士代出彼此共之我能正敵亦能正我能奇敵亦能奇顧常勝之機必奚道而可諸士黔人也第徵黔事夫黔固羅施之僻國也古人以兵力開之始事茲方何帝何王秦漢而下何奇何正至我



二祖猶煩用師其握守之妙誠非前代可希迄今追慕名將凜然若生有戰羌蓬者有戰清江者有拔香爐渠西者有拔凱口銅人者英雄用武每恨不得論其世而進退之豈古今人不相及與則今日正者何在奇者何在所宜急講也黔兵有四更踐爲成召募爲客野處爲苗土司爲夷訓而練之抑可爲正兵與察兵之微在心莫惜於志而莫邪爲下則奇固不在兵與而所謂奇將者又安在也諸生挾策有奇而來必不無說而處於此其警奇正之義書之於簡用觀將略

萬曆庚子貴州武舉程策

兵有常制敵無常形而我有常勝或法法或不法法法者形也不法法者神也形而措之神而運之奉明德靈誅以乘之則勝敗之數不定于敵之日也夫大將受命于君憫然以身任國大事堂堂逢逢居有禮動有威左杖鉞而無事於誅右把旄而有事於教於是因敵之強弱虛實善對待而交錯以成變倚角而參伍以成規則何小攻之不克克顧我與敵兩角而互承勝者也兵端伯千萬億不可紀彼之伺我與我之應彼亦伯千萬億不可究詰向非洞神明之用操變化之機獨聞獨見倏往倏來形無形而聲



無聲則何以廟戰而必萬全故善用兵者因形于法之中  
運神于法之外奇正遞用等無遺策車不發轉騎不被鞍  
甲不離矢刃不嘗血旌旗一指所至披靡矣辟之石焉堅  
者正也堅而可轉如水從高墮下赴萬仞之壑而不疑奇  
也辟之席焉平者正也平而可卷不盈一掬藏胠篋之中  
而莫敢窺奇也決機兩陣之間收功百戰之後匪是二者  
何以勝哉孫子曰兵以正合以奇勝奇正相生如環無端  
不可勝窮夫惟相生也不可以帷幕捍不可以關鑰遏而  
靈有端夫惟無端也引之莫始推之莫終如尋寰中不見  
其際而靈有窮妙哉兵家之秘計也謹論除時動靜料高

深審機祥辨險夷備銛利連什伍明旗鼓慎偵候指攻圍  
示掩躡信誅賞不啻三令不啻五申使之若虎豹之有爪  
牙飛鳥之有六翮斯古法之可按而兵政之可尋正之謂  
也東西易其處黑白變其形攻守改其調靜躁更其法張  
而翕之取而予之直而迂之銳而衰之卑而驕之忤而合  
之攻所不守趨所不意雷轟電掣首知端倪神出鬼行莫  
知虛實處女脫兔莫知遲疾轉丸決水莫知上下與飄飄  
往與忽忽來莫知其所之與條出與間入莫知其所集如  
山如林如江如河如炮如燔如垣如室如水火金木之代  
爲雌雄斯妙其法于可知不可知之間奇之謂也故將不



知正而逞臆以決望而無表割而無法挈輕重於兩手釋  
衡石於不懸是易可無師而秦可無誓也命之曰鴻鵠之  
兵將不知奇而馮株以守扶繩而辨循刻而議易膠柱於  
昔絃忽官商之乖調是趙括之書而宋襄之鼓也命之曰  
魚鼈之兵劉安以異爲奇靜爲躁奇治爲亂奇飽爲饑奇  
佚爲勞奇此奇論也而以當夫桓文之節制則敗矣韓嬰  
謂仁人之兵聚成卒散成列延居若長刃兌居若利鋒圓  
居若丘山方居若磐石此正論也而以遇夫韓白之詐力  
則劔矣曹孟德以先合爲正後出爲奇然猶拘先後也又  
惡知先之非奇後之非正乎以當敵爲正旁出爲奇然猶

泥分合也又惡知分之非正合之非奇乎古稱大將者神  
識機智冥會於古今之表玄同於法意之間衆人見端我  
獨窮委衆人決膚我獨測裏衆人鼓翼我獨弭耳衆人爭  
巨我獨察微衆人爲杓我獨爲淵若郢人之運斤若庖丁  
之解牛若五色相宣而不盡若五聲相濟而不窮吾奇在  
正之外吾正在奇之外藏奇于正藏正于奇者也吾奇兵  
即爲正兵吾正兵即爲奇兵無乎不正無乎不奇者也吾  
正而正吾正而奇吾奇而奇吾奇而正奇可爲正正可爲  
奇者也敵實則我以正我正而敵反視爲奇敵虛則我以  
奇我奇而敵反視爲正敵不知吾孰爲正孰爲奇也始之



以正勿忽變而奇又終之以正始之以奇勿忽變而正又終之以奇即吾之兵亦不知吾孰為正孰為奇也謹斥埃擊才斗無淫輿無遺輜終其身以正勝而未嘗不奇置之死而生置之亡而存不學古兵法而好野戰終其身以奇勝而未嘗不正即後世亦不知吾孰為奇孰為正也此之謂相生此之謂無端此之謂無窮夫惟至於無窮而後可以無敵然而勝敗之數或有出於奇正之外而不能自必者包茅是徵昭王是問而無以屈屈完水濱之對禁先其本兵戰其心而無以彌李斯秦庭之讒師行有紀名震關西而無以錫馮惜三輔之叛心戰為上兵戰為下而無以追街

亭流涕之誅此正而無益於勝負者也文能附衆武能威敵而高國之譖日至黃金間項雲夢禽韓而白登之辱未損行無部伍人人自便而封侯之數終奇六出祁山七縱孟獲而鼎足之業未一此奇而無益於存亡者也夫非正與奇之罪也則嘗聞之范子矣其言曰聖人之功時為之庸得時弗成天有還形天節不遠五年復反小凶則近大凶則遠吾正且奇而勝而存者時之庸也吾正且奇而負而亡者非小凶則大凶也項羽百戰百勝一戰而敗非始善戰而終失之也所謂天亡非戰之罪也漢高百戰百敗一戰而勝非始浪戰而終得之也所謂天授非人力也明



於漢楚之故則興亡治忽之跡勝負得失之際若縮之天  
乎顧天道遠人事邇將不得諉之天也愚生長於黔請言  
黔事夫黔固彈丸之地也亦四戰之國也蠻夷君長蓋以  
什數居常負險恃林菁鳩集蟻結蝟起鴟張自擅不討  
之日久矣顧聲教肇自皇虞干戈尋于紫世非一日也人  
孰不首稱格苗哉昔在虞帝干羽兩舞七旬來格乎化之  
奇也稍不降心則三危之誅不終日繼之何嘗專言夏德  
人孰不隆重湯孫哉自我高宗宗入鬼方克以三年撻伐  
之正也倏而革面則來享之告朔武湯而矢之何嘗久於  
宿兵楚莊躡從沅水伐夜郎軍底且蘭椽船步戰奇矣比

秦奪楚巴黔躡乃留王滇池邁跡牂牁即自王不失爲正  
也者漢陳立偕邑君誅亡狀鉤町漏臥震恐入粟正矣比  
翁指據院爲壘立使奇兵絕饒道斷汲路即窮兵不失爲  
奇也者唐蒙不計制口嘉上書借夜郎精兵十萬浮舟入南  
粵兵法出其不意之說也而道遠險阻終莫能至說者以  
爲悠謬之空談李恢給南人官軍糧盡以誠相告竟截盤  
江一戰兵法因懈而擊之意也而追奔逐北南土遂定說  
者以爲漢興之駿功羅施之伐滇楚巴渝三道竝進兵且  
壓境而卒降其酋長則以李仲實馳驛止兵諭阿察趣降  
其明信足恃也順元之役蛇節隆濟二酋不諛弃地千里



而終破之黑特則以劉國傑創為利看賊遇有即仆其謀  
略叵測也由斯以談介我肘腋叛服無常時而羈縻時而  
瀕洞當時猛將策士用奇正而制荒服者大較如此比及  
我明順治威嚴星曜玄逐鸞舉麟振被於公有亘古為  
烈高皇帝開天闢地再造區宇勝國既滅雷震宋欽以  
次納土刊山置傳爰通巴蜀而黔之草萊始闢建文皇帝  
淨氛清霧畫土分疆思南既歸田琛宗鼎日夕接刃密遣  
緹騎潛械入都而黔之幅員始廓其在志也彘逢之戰斬  
將塞旗殫顧鎮遠之鸞勇必無留行矣未幾縱舍蠻酋推  
心置腹此何異武鄉之南征清江之戰潛師壓境奉湯信

國之勁兵可以直搗矣乃立柵雜耕計擒渠帥此何異營  
平之輯柔香爐萬仞阿旁荷戈木刻已約都蘭又攻遽可  
撲滅乎向非都制府雨夜千金懸軍賈勇則誰能拔幟先  
登此雪夜之奇功也渠西六誦胡賊首難飛箭已傳銀賴  
聲援遽可擊斷乎向非龍鎮巡進薄重圍因風縱火則誰  
能斬關而入此宛城之偉績也凱口餘孽破蟻坡破籠囤  
幾滔天矣卒宗祐失律而返至徵羅甸徵十牌以勦夷為  
之掃除而守無絕險即羗鬣之翼周北貉之助漢何以加  
焉銅仁黠苗酋印江陷思州執勢燎原矣張惠安建牙於沅  
乃沈希儀石邦憲以名將為之羽翼而進靡堅營即樓船



之獲嘉狄青之殲智何多遜焉之數子者提能虎之師將  
雷霆之命卒以平黑水靖烏江武庫鞬戈戎亭徹候用夷  
狄爲四守統華首及於一家豈能外奇正兩涂乃 執事又  
兢兢于黔之今日孰爲正孰爲奇奚也夫正與奇難言矣  
可言者形也曲制官道主用也不可言者神也渾渾沌沌  
放乎九天之上蟠乎黃虛之下圓而不可敗也請以醫論  
刺法曰無刺焯焯之熱無刺漉漉之汗無刺渾渾之脉言  
正之嚴也郭玉曰醫之爲言意也賡理至微隨氣用巧針  
石之間蒙芒即乖神存於心手之際可辨不可言言奇之  
妙也黔之正其大約有四有戎兵有客兵有苗兵有夷兵

上六下六西四諸衛所屯伍游倅星羅其布二百餘年衣  
食 縣官即云銷耗尚存其半 而脆弱巽悞不堪批搗訓  
而練之以資城守則前後相赴左右相趨父子妻兒相顧  
此西漢之城將戍兵之正也頃者討播石募吳越旣闔粵  
蜀戰擊之士幾五六萬夫夫離鄉井捐親戚弃墳墓而從  
事於戈矛今卽稍稍散去當苗苗十之二厚其餉而肄之爪  
牙旣鋒膽力無伍驅之湯火其又誰禦此齊魏之技擊客  
兵之正也金筑石門之間紫苗紅苗獐苗長裙短裙以及  
九股虎兕之與儔牛馬鹿豕之與羣此不可魚麗馬行浮  
阻而輪衝之籍其勇捷蹶張履險如康莊趨死地如鶩此



元鼎之胡騎苗兵之正也羅甸獨山楊義烏羅各擁健兒  
各保巖阻烽燧一然徵之虎幄用衆者萬用少者千寬其  
文法時其饑飽以夷攻夷以狄攻狄此唐人之蕃騎夷兵  
之正也黔之正兵具是四者至於奇不可得言矣奇在將  
將之奇在心身盛心心盛智以智爲母以權爲父不智不  
權非奇也步於林者不得直道行於險者不得履繩一有  
所變非奇也遁關不可復亡犴不可再可以爲常非奇也  
魯鄙人爲閉而知其不可解兒說之弟子不爲閉而知其  
不可解不可解而解之非奇也觀鳥起而知伏視鳥集而  
知道不知敵之伏遁非奇也如可擊如不可擊如可却如

不可却惴惴焉不能自斷非奇也逐鹿者不顧兔決千金  
之貨者不爭銖兩之價肩胛焉而計小非奇也周鼎鑄佹  
而斲其指墨翟爲鳶一日而敗役役焉而鬪巧非奇也有  
見於齊無見於晉有見於詘無見於信非奇也以束薪爲  
鬼以火煙爲氣其心數轉如秤乍低乍仰非奇也婦人可  
謀則姜氏醉重耳而晉霸無鹽說齊王而齊強亡虜可遇  
則秦降由余而戎亡漢侯曲逆而項蹙詐誕可任則子囊  
北而全楚弦高誕而存鄭禽豎可羈則牛可火象可燧鷹  
鷗可擊貔貅可教而戰也枝械可使則木可牛馬可流八  
公草木望之皆兵也水火可驅則汾可決沙可囊赤壁黃



鷓之艦可燒而走也奇乎奇乎滑渟精微變化消息耳可  
鑿而塞目可穿而眩口可利而訥興師動衆萬夫莫議可  
動可靜可堅可瑕可騎可步可左可右可生可死可過可  
關名配天地不爲尊利制海內不爲厚代不數人人不數  
戰夫惡可數數見矣說在李藥師之對唐宗唐宗問曰兵  
法孰爲深李曰臣嘗分爲三等一曰道二曰天地三曰將  
法將法正也道與天地奇也古口今知道者幾何配天地者  
幾何安得奇將挾經秉枹載常建鼓爲之執鞭而推轂乎  
張良以兵法說他人不省沛公獨省而韓淮陰猶謂不過  
能將十萬孫武之書武自用之止於強伯及曹孟德用之

亦終不能滅吳蜀故將而奇古今稱難而矧夫區區之黔  
也幸哉環黔而夷者總總狂狂獠悍亡奇也如敵有奇者  
愚不能不爲黔危獨危黔且爲海危故按奇快異當  
事者宜蚤夜焉

大兵發而萬物皆服

萬曆庚子貴州武舉程論

有所以約天下天下束於吾之約而及夫約之弛也則逸  
有所以繫天下天下就於吾之繫而及夫繫之窮也則渙  
約天下者用天下者也繫天下者無用於天下者也用天  
下者可知而其用著無用於天下者不可知而其用微無  
用而用之如可知如不可知之謂神而用始大約天下而



用之天下束縛糾結於吾之約而屈於力而力不足以振約之弛繫天下而無用之天下浸灌綢繆於吾之繫而屈於德而德不足以維繫之窮夫惟無用而用於天下天下未能窺吾之無用未敢抗吾之用而屈於吾德與力之間吾約稍弛而繫足以振其弛則民制而不逸吾繫稍窮而約足以維吾繫則民思而不渙不逸不渙名之曰服以爲服吾德也而吾之德未始不雄於力以爲服吾力也而吾之力未始不讓於德以爲非兵也而權強拉枯之形衝波截轍之勢孰嬰其鋒以爲兵也而藏於九地之下動於九天之上孰測其緒此大兵也大兵發而萬物服發者發此

者也服者服此者也夫萬物萬矣而萬物之總未始不一雖曰一矣而號物之數未始不萬萬彙之疏躍枝舉百昌之莖葉條蘖皆本於一根而條循千萬也若此則有所統之矣其勢不得不趨而服於一何也萬不可以治萬治萬者必一也而林林矣總總矣熙熙矣攘攘矣詢詢矣謦謦矣九州不可頃畝八極不可道里山嶽不可丈尺江海不可斗斛民萌不可分數其紛紜而雜揉者難服而齊也隼質無磨狼心自野交頸相摩分背翹陸其狂信而鷲悍者難服而降也朝渭而夕涇始葦而終藋墨以爲朗狐而其蒼其變幻而反復者難服而常也網羅橫張機埒步設創



基水泮之上搖足枳棘之林姦藏於叵測者難服而馴也  
虎豹在山蝮蛇在淵鼠鳴於室梟張於樹賊橫於四出者  
難服而撲也且罟旣設而鯨鯢復吼增繳旣具而麋鹿突  
至患起於倉卒者難服而防也覆頭者不能令足不濡蔽  
腹者不能令背不傷勢隔於兩全者難服而周也語其情  
則萬不能不服於一語其勢則一惡能遽服乎萬而况萬  
物之態狀千億萬億至於不可勝窮詰舉玄黃以判未有  
之事宇宙以內必無之情心思所不及慮耳目所不及周  
不獨赤蟻雄虺未易服也即中原文物之區亦時有斬木  
爲兵揭竿爲旗者矣不獨州家部郡未易服也即朝廷輦

轂之下亦時有隆衝以攻逆弩以射者矣夫不獨貴戚大臣  
未易服也即父子兄弟之間亦時有以女交謀蘇以庸刃堅  
者矣不獨元兇巨憝未易服也即婦人宦寺之細霍顯之  
謀將行於杯杓節甫之禍將起於帷幄矣不獨赤眉黃巾  
未易服也即蟻穴煙突之隙熒熒不滅將炎雲臺涓涓不  
壅將決九河矣當此危急存亡之秋艱難險阻之會吾欲  
帝人亦欲帝吾不欲虜人亦不欲虜丹中皆敵國堂上皆  
竈突而欲使萬物斂衽以朝隳肝以從也其勢甚難假令  
其不吾朝不吾從而吾亦未如之何也則人爲刀俎吾且  
爲魚肉人爲熏樞吾且爲狐鼠其事又甚難故英雄特達



之主不得不思以服之矣吾將服以智而縱橫者裨闔者起而吾角吾將服以術而鉤距者飛箝者起而吾撓吾將服以剛而骨勇者血勇者起而吾折吾將服以柔而弭毛者卑飛者起而吾伏故一人之智術剛柔不足以服萬也不得不臨之以兵而萬物之智術剛柔又非徒兵之所能懾也不得不臨之以大兵夫大兵亦難言矣劍耀長虹弓翻滿月百樓忽起萬弩齊發鐵馬蛇矛大黃白羽此兵之械也其小者也五人爲伍五伍爲兩百人爲卒五百爲旅二千五百爲師小國一軍次國二軍大國三軍天子六軍此兵之制也其小者也有廐將有重將有材將有城將有

弩將有樓煩將有郎駟將有慎將有特將此兵之將也其小者也明於日月星辰之運刑德奇偶之數背鄉左右之便前後知險易見敵知難易此兵之符也其小者也疾視兵也作色兵也傲言兵也欲潛以深欲參以伍兵之微也似矣而猶其小者也以仁義爲干櫓以忠信爲疆場不潛軍不留衆不越時不屠城不殺老弱不獵田稼服者不禽格者不赦犇命者不獲順刃者生倭刃者死此禮義教化之兵時雨雲霓之師也而兵斯大矣夫械制將符兵之力也末也可以約天下而無德以維之則約者弛深潛參伍仁義忠信兵之德也本也可以繫天下而無力以振之則



繫者窮張五力於天下以振繫之窮而脩吾德於一身以  
維約之弛以文爲裏以武爲表以文爲種以武爲植是謂  
廟戰是謂賢武是謂麟之儀儀鳳之師師其至矣乎此兵  
一發若地湧天降而敵莫知其所從來若寒暑風雨之代  
序而卒無所爲序也若決水以灌千尺之溜不知其孰來  
而孰承之也而人之望之若饑渴之望飲食懸之望解農  
之望歲嬰兒之望慈父母也故可以百戰百勝可以先勝  
後戰可以不戰而屈人兵以其寡覆其衆以其弱擊其強  
避其實擊其虛實實虛虛而敵不能測我之端倪兵識將  
意將識士情平原曠楚則萬衆鼓行險道傾仄則遊兵暗

伏而敵不能窺我之動躁堂堂之陣正正之旗虎豹龍蛇  
變幻而出沒風雲雷雨頃刻而交加變主而爲客轉逸而  
爲勞以飽而待饑以靜而制動而敵且疲于奔命而策應  
之不暇罪人斯得則竿之藁街佯獻泮宮琛歸青社恬無  
吝心曠無傲色而人皆諒其無當天下心單車可以適  
遠杯酒可以釋兵強家可以墮城悍將可以落膽片言可  
以兵萊夷玉帛可以戮汪罔干羽可以格三苗人書可以  
宥萬國其誰敢不服惟此義不明而貪功徼利之徒窮兵  
黷武之主若齊魏徭戍荆韓召募秦始尚大漢武事外萬  
里奔走連年暴露旌旗豎于原野之間組練迴于川谷之



內法重心駭威尊命賤利鏃穿骨驚沙入面血滿長城之  
窟屍填巨港之岸力盡鼓衰弦絕矢竭刀折刃交軍蹙死  
決日寒草短月苦霜白胡爲誠服胡爲心悅嗟夫一人之  
心千萬人之心也吾愛其功人亦念其身奈何以千萬人  
之身博一人之功其何以服天下故其威可以席卷宇內  
并包八荒而不可以得匹夫匹婦之心其權可以鞭撻四  
夷陶冶萬物而不可以掩至愚至賤之口其恩可以光照  
綺筵春生金屋而不可以免仰屋之一嘆其澤可以附白  
骨之肉然死灰之燼而不可以化積丘之沉寃而消鷓亭  
之飲恨信服天下者之難也自有干戈以來此兵之發亦

未可數數見矣載籍所圖兵政所紀一發於軒轅修德振  
武治五氣藝五種治五兵以征不序而蚩尤榆罔服再發  
於成湯自葛載至南巢攸徂之民室家相慶而夏人服三  
發於成周如虎如貔如熊如羆于商郊爲牧野之誓而殷  
人服四發於漢中三軍縞素爲義帝發喪傳檄三秦蹙項  
垓下而秦楚服五發於昆陽以三千敢死之士破尋邑百  
萬之衆而新服六發於淝水胡馬飲江八公皆兵而羗服  
七發於貞觀雪恥百王除兇千古而夷狄服自七戰以後  
積甲齊山封尸築觀豈曰無兵非驕兵即憤兵矣螭虎桓  
桓鷹隼戢戢豈曰無服非心服乃面服矣此無他故焉束



於力者或涼於德是獵者逐禽令車馳人趨不殫其力不  
歇也惡乎不弛繫於德者不勁於力是畜池魚者縱獺養  
禽獸者豢虎也惡乎不渙弛且渙而誰能服之雖然此太  
公之告武王也公之言曰大明發而萬物皆照大義發而  
萬物皆利大兵發而萬物皆服兵之未發也為明為義物  
之未服也為照為利明則知已知彼洞若觀火義則如震  
如霆天下盡驚照則好我芬若椒蘭利則親我惟若父母  
故不明不義之兵不可言大不照不利之民不可言服此  
太公六韜之旨也世之勤兵者或未之知也雖然此猶以  
兵言也兵莫階於志莫邪為下三軍可奪帥不可奪志志

者帥之心也用兵之道先於治心心之未發為中已發為  
和中和既致天地自位萬物自育此之為發何籍於兵至  
位且育又無論服矣嗚呼此循蜚因提之盛也即涿鹿阪  
泉之戰已不可望愚安得干戈為甘臥以游于其中矣

封建論上

封建之議始發於秦皇再發於唐宗秦之議在丞相綰請  
分王諸子在廷尉斯請罷侯置守而秦卒從斯唐之議在  
魏徵慮侯國之祿厚斂困民在李百藥慮易世之後驕恣  
攻戰不若守令迭居而唐卒從徵至於諸儒互相排詆彼  
此聚訟自晉以來至於今靡定也陸士衡曹元首胡明仲



主封至羅氏必前後究言三篇極論封建十利郡縣十害  
則左袒縮者柳宗元蘇子瞻主罷封至馬氏端臨通考一  
論謂必有公天下之心然後能行封建否則莫如郡縣則  
左袒斯徵百藥者愚嘗反復惟之論理道當議是非論法  
制當權利害詩曰殷鑒不遠在夏之世志曰前事不忘後  
事之師封建之制利邪害邪酌之古準之今有同姓之封  
有異姓之封有恩澤之封有伎幸之封有夷狄之封總之  
未有全利者堯舜以後三代卜世長矣夏再傳亂於有窮  
終代於商商代於周周二傳昭溺於楚宣敗於姜桓射於  
鄭赧威於秦則皆所封建之國也嬴秦暴虐亡可翹足待

非郡縣叛之亦非不封建促之也漢家承秦啓土封疆淮  
陰以假王疑黔布以淮南誅王諸呂而祿產誣王諸劉而  
潁成叛侯五王而新都篡則封建何利於漢光武不任功  
臣以事而教諸子以讓故內有東平河間之美外無楚梁  
九江之誅安順以後宦官爲政一日而封十九侯一日而  
封七侯一日而封五侯雖其封國原非世爵然而被之以  
封建之名猶足以亂亡人國况實予之以政乎魏宗室子  
弟玉空虛之地君不使之民即云矯枉過正而懿師昭炎  
世爲大將軍錄尚書事則子弟無封建之名大臣有封建  
之實維謂魏亡以封建可也典午平吳盡撤州縣武備大



封八王以爲之屏而成都長沙日相屠戮兼之內郡雜胡不徙邊地匈奴世居晉陽羯世居上黨羌世居扶風氏世居臨涇鮮卑世居昌黎五胡更亂貽恨懷愆雖謂晉亡以封建可也唐自安史誅後方鎮相望父子繼世自擇將吏號爲留後以邀命於朝廷喜則連衡拒命怒則以力兼并甚則稱兵向闕馴至梁晉更犯京師而唐社以屋雖謂唐亡以封建可也宋初以杯酒釋藩鎮之兵而竟不礪甲楛以禦夷狄之侮西困於元昊則以趙氏世居賀蘭南苦於智高則以儂氏世族廣源此即夷狄世封且爲中國患而安能強中國之必行乎我太祖分王諸子三十餘國顧

自靖難後漢盛安化相繼弄兵其在四夷交州之役今日立陳明日立黎麓川之勦一爲思祿一爲思機即萬曆播州之討彼楊酋者亦恃八百年世爵故敢與王師抗然則封建之典可復施之後世哉雖然此猶以利害言耳即論是非亦未見封建之必爲公而郡縣之必爲私也何也天子至尊無上封建合諸侯以成其尊郡縣合守令以成其尊雖私也亦公也封建王天子之子弟與功臣之子弟自天子功臣子弟外不與焉何其私也郡縣推賢即天子功臣子弟不賢不與而閭閻子弟雖繩樞甕牖之家一有材智皆得以握符而展采何其公也且其所以握符而展采



者求以安民字衆爾矣而安民字衆非知稼穡之艱難悉  
田野之疾苦者不可求斯人於野十得二三求斯人於世  
家百得二三瘠思勞肥思逸人情大氏然也八元八凱代  
若晨星渾沌窮奇世乃比肩博望夷於山雲丙魏削於弘  
顯楊素損於玄感玄齡既於遺愛使當時守山河之誓授  
蒼赤之符其橫暴恣睢又不知當何如故責統袴膏梁之  
子以奉職循理之効求魚山林需稻江河數必不得若分  
王子弟止以鞏固神京而不顧生民休戚吾又未見民億  
亂起而能屏翰王室者也昔酈生勸漢高立六國後業已  
刻印子房借箸畫八難明其不可而印始銷陶部公主爲

其子求即漢明不與曰即官上應列宿苟非其人民受其  
殃故封建之說酈生監儒之見而陶部婦人之請也若曰  
三代聖人之制必有深意未可遽變彼改禪而繼易寅而  
丑即夏商不能因堯舜而况千百年之後邪故封建之必  
爲郡縣也猶田之必不可復井刑之必不可復肉也挈土  
地授天下賢智而不必爲誰家之物挈人民予天下賢智  
而不必治以不肖之子公且仁郡縣之制矣有天下者遴  
選賢智分布郡縣即周曆可過而何事封建爲也

### 封建論下

國家郡縣之制不異於秦封建之法稍似於漢即有胸濠



之變一夫倡難四國莫和若濠起南昌王文成自古安聚  
郡縣兵蹙之鄱陽郡縣封建得失益明矣而今天下之害  
有出於分封之外者莫如諸衛所之世官世戍王府有封  
建之名而無封建之實衛所無封建之名而有封建之實  
何以明其說也王府兵不過護衛民不過在丁選昏子女  
多有屬邑長史等官例不外遷親王以下禁不出郭繫其  
手足柔其爪牙事制曲防即欲如煦如濠不可得而安有  
七國八王之既所謂有其名而無其實者也其流之害不  
過宗祿繁多有司莫給而已若衛所則異是指揮鎮撫千  
百戶之世爵世祿猶藩封之將軍校尉也衛所旗軍之世

戍世餉猶藩封之庶人也合天下衛所若干旌軍若干祿  
糧顆粒皆閭閻脂膏也考古兵制或藏兵於民或取兵於  
民以民衛民因而衛國無有養軍以衛民者我 祖宗若  
曰與其取民之丁而罷其身孰若取民之財而入其資民  
出資以養軍軍出身以衛民民不必罹鋒鏑而自完兵不  
必廣召募而自足將不必加遴選而自精不可謂非良法  
矣乃今世官不識一丁世戍不勝一雛而世祿如故世餉  
如故一遇烽燧莫敢擅調即調之莫能發一矢突一陣遠  
不能悉數即如萬曆中寧夏朝鮮播州三役有一衛官衛  
軍足調乎不得不召募客兵以討賊而養兵之費又出自




民間民既困於養軍又罷於養兵是何惜軍珠玉賤民糞  
壤也乃糧一日不繼輒鼓噪甚且恃衆而叛遠不能悉數  
即嘉隆間留都軍變殺黃侍郎矣大同軍變殺撫臣總兵  
據城以叛矣閩中軍變逐伍方伯矣益夏軍變戕撫臣挾  
親王且指斥乘輿矣以之殺賊故爲選悞之狀以示不能  
以之謀叛又大張狼虎之威莫敢誰何乃衛所武弁姦者  
倚之爲利弱者依之自固西北諸邊衛不與有司同城者  
虜使其民日朘其下是所謂無封建之名而有封建之實  
者也罄民間之財以養不能戰之卒是養蠹也其既猶可  
言也竭有司之力以媚莫敢誰何之軍是養賊也其既不

可言也及今不一議恐他日國家之既不在夷狄不在  
盜賊而在若輩矣夫竭力以贍宗猶曰祖宗屬籍天  
子之骨肉也此輩何功何親至與屬籍共廩而食乎并矣  
况二百年來罪人永戍者不可勝計而又使罪人之子孫  
與屬籍共廩而食乎并之并矣今議者輒曰尺籍日耗予  
行天下見有耗者有不耗者而不耗者尚多也南直江浙  
湖廣河南山東之戍日見消耗即無折衝之勞而有運漕  
之苦故多逸亡若西北九邊閩廣秦蜀雲貴坐而食之世  
而守之即有絕者旋坳旋補不戰不漕月有餘粟又何苦  
而耗也故清勾選補優給借襲之法當行於漕戍不勾不



補不給不借之法當行於不漕之戍比試比槍之法又當  
槩行而嚴覈之不中者如律遞降至卒而止若曰彼祖宗  
有功不忍弃之則 朝廷之祖宗獨無功乎而其子孫猶  
降庶人也柰何嚴於宗室而寬於武弁也或曰如子言世  
戍將益耗脫有變將何所恃邪曰世戍養之不足恃不養  
之易爲亂不足恃必養其足恃者而後可易爲亂將使之  
無亂而後可故養世戍爲土著而練之以守城養召募爲  
客兵而練之以備寇有土著則客兵不敢驕有客兵則土  
著不敢亂是兩救之勢也第世戍可減不可增召募可增  
不可減是在主兵者加之意耳



國家圖書館, NATIONAL CENTRAL LIBRARY



續先生黔草卷之十五

泰和郭子章相奎商著  
友人楊寅秋義叔甫校

詩

黔中 命下鄒銓部南臯龍叅伯澄源王明府篤菴

歐陽宮詹瞻南鴻臚體南聯顧寄園賦謝

幽棲詎意捧除書忽枉盈門長者車池畔三台臨顧巖庭  
前五老狎匡廬歲舟愚谷猶嫌晚仗鉞殊方又覺踈更道  
夜郎多反側不知何計斬鯨魚

過袁州宣風亭苦雨和田竹山年丈韵二首



門外江山帶雨痕  
桃花漲湧一溪渾  
不聞乾鵲鳴前浦  
坐聽鷓鴣叫遠村  
衝嶽峯懸雲易合  
星沙地近書常昏  
黔陽有事心如戟  
獨滯泥途欲斷魂  
一夜山溪長水痕  
平湖水沒稻田渾  
衝泥勒馬迷行徑  
穿雨歸鴉失故村  
去路偏愁黔國遠  
捲簾頓覺楚天昏  
新詩讀罷旋相別  
鬱鬱遐思擾夢魂

遊桃源洞

桃源縣

山色蒼茫萬木稠  
一泉引路叩丹丘  
洞門雲鎖仙凡隔  
石徑虹侵日月幽  
方竹詎緣秦世種  
桃花不泛武溪流  
到來勝境偏惆悵  
漁父何勞問舊遊

仙橋

來訪桃源勝  
磷磷石路歎仙橋  
雲欲度靈跡  
鳥還窺幽竹  
渾如畫  
繁花賸可詩  
中涵千古秘  
惟有洞天知

觀音洞

沅陵縣

誰鑿圓通小洞天  
香龕萬疊擁青蓮  
金姿幻吐空中碧  
翠華蓋倒垂鏡裏玄  
石筍怕澆花雨潤  
松門不斷法雲懸  
登臨暫坐清虛境  
條盡煩囂爽氣偏

噴玉泉二首

沅陵縣

泉從天外落  
萬仞瀉巖扉  
亂撲千珠灑  
倒垂半練飛  
風飄瓊樹濕  
日映瑤花晞  
塵跡真堪洗  
獨憐未息機



削壁懸飛瀑晴空灑雪靈藤垂如意白簾掛水晶瑩遙望  
長虹色細聽急鐘聲山靈名筆護紫氣倍崢嶸巖下有亭  
亭有先師

胡廬山  
公碑記

### 偏巖玉華洞

沅陵縣

偏巖玉洞鑿鴻濛洞口常餘氣鬱葱座擁諸天橫色界壘  
開萬像踞瑤宮知超幻劫塵無染縱使丹青畫未工花雨  
飛來都石乳冷然真趣似崆峒

### 沅江送江皖瑞中丞還新都二首

中丞底事賦閑居意氣翩翩薄太虛玉帳慙依貂尾後油  
幢喜衰筆花餘黔南已草平蠻檄柱下猶傳諫獵書歸去

瑞陽耽瑞色叢生萬物滿庭除

畫錦何緣驛路逢沅江幾日快登龍相期馬援標銅柱却  
怪留侯伴赤松袖裏六符懷象緯斗間雙劍匣芙蓉懸知  
聖主人惟蒼丹詔賜環下九重

### 華嚴洞

誰鑿清虛洞玄冥啟玉樞諸天羅法象三界攬真圖乳滴  
千花碎靈通九曲迂雪言然炎燠盡恍惚坐冰壺

### 飛雲巖

萬丈巖巖局浮雲去復停幻裝螺髻碧巧綴石痕青老樹  
清堪榻飛泉靜可聽凭欄紆遠望軒窗博客懷醒



飛雲巖次江耽瑞中丞韵并贈

飛雲巖上雲相待座俯楫欄暑氣清望海恍延三島入伐  
山那籍五丁成林塞日月壺中迥泉挾雷霆澗底車轟公去  
思威留徼外青天萬里鳥頻嚶

初抵黔陽紀事四首

截舟未遂賦西征愁見翩翩竹馬迎可耐夜郎雙上國翻  
教賢子作干城井墟夕曳櫂槍迥山箐秋高瘴癘橫憶自  
長平新敗後蕭然風景倍含情

狡賊頻年毒八番恭將天討闢轅門僅餘壯士聞鷄舞乍  
寡良家躍石喧營壘未開魚鳥陣烽煙且逼犬羊村何時

得拔夷關險一洗於殺萬古冤

羞把漢貂珥鐵冠穰苴未解強登壇雄心詎忍摧譚劔苗  
裔終難說舞干畫角聲喧鳥水咽黃雲影度鼓山寒八公  
風鶴如相助倒壓符秦百萬殘

插筆臨戎富水濱驚心羽檄不堪聞畫糧誰獻平巒策浮  
竹徒宣諭蜀文馬援屯邊刁斗急武侯壘上陣雲分書生  
有意封函谷誓掃妖氛答 聖君

聞綦江城陷房參將張遊擊劉守備遇害

鐵衣轉戰血痕紅力竭三良百堵空抗賊衣顏千古烈碎  
身張許萬夫雄綦江水咽冤難洗玉壘雲愁恨未終義魄



有靈還報主應為厲鬼戮元兇

秋日閱城示將吏二首

翼翼層城宿霧收黔南風色凜高秋黃金市劍懸籌帷赤  
羽徵兵插戍樓百雉雄飛貔虎士八番險扼蚋蚊酋試看  
擁衛登陴者誰解九重旰食憂

千里提封石作城萬山環抱一溪縈登樓誰識風雲氣卻  
敵應嚴鼓角聲未許野狐憑舊社由來猛士請長纓相期  
戮力擒元濟佇報淮西雪夜平

同宋方麓柱史觀聖泉

境內干戈擾不禁  
蹇從柱史問幽林  
泉疑通海嶺消長石

似凌波乍陸沈池滿晴騎駉馬色潮鳴暗度鳳凰音相期  
共挽清泠水洗盡蠻煙殿古黔

王百穀有詩贈予次韵以酬

授鉞征南魏孔明倉皇五月趣嚴程犬羊尚踞三苗窟鏢  
鎗空博萬里城黑水涵煙多夜雨蠻峯疊瘴幾時晴忽傳  
赤素來江左杞讀新詩病骨清

中秋夕聞警言紀懷五首

一夏月始東秋色正腫臃夜郎恣反側芳宵獨忡忡把酒  
聽吹笳益腕未折衝黃雲壯我陣金風勁我弓宵衣南顧  
在何日識渠兇



二更月漸起黯澹烏江水羽書夜不休  
劬勅狐穴只嗟彼傷弓鳥競投茂林止  
獨上貴人山矢婦蠻王壘此心如此  
月那敢負天子

三更月正午急風送寒雨可憐良夜月  
不照我心苦高原走飛猱山箐藏嬌虎  
激烈坐中宵穰苴擊千古豈無庾亮  
興登樓轉躊躇

四更月浸西巒烟萬樹迷孽種自三苗  
躡躅逾五溪泣劍悲憤集起舞向鳴鷄  
戡甲岩徒在七擒事可稽何以紓籌  
策京觀築鯨鯢

五更月已仄猶寫我顏色顏色何顏頰  
口嘉首未得天闊彗星低露冷長蛇匿  
枕戈以待旦滅此後朝食誰謂鬼方  
伐可待三年克

次韵贈楊濟寰中丞

西粵牙旗鬱絳虹瑞光遙曳蜀黔東  
壯猶望已推方叔武庫才應軼杜公  
龍水風清霄練劍旄頭影落綠沈弓  
何時指授平蠻策早遣夜郎與漢通

九日轅門泛菊感懷菊有紅黃白紫四種各賦二首

碧桃春色盡丹桂秋英墜獨茲霜葢發  
千朵紅雲碎豔分甘谷種興逸柴桑老  
光浮朱幘動似促妖彗掃右紅菊  
染就女貞色不與衆花伍黃中意自真  
誰識風霜苦



風娘黃金盞露澆鸚鵡杯縱令離下醉莫博好懷開右黃菊

皎皎傲霜枝融融疑月魄帳中塵不染為爾惜清白

不須拭汗粉露珠滿玉盤旋摘泛秋醞偏宜帶月看右白菊

乍吐瑤瑁姿還撲臙脂色勁節不奪朱却在歲寒識

紫花暗裏香惡氣散朝夕寄言費長房不用茱囊辟右紫菊

祝彭方伯宜所年丈六十壽詩二首并序

彭方伯宜所年丈豚兒延外舅也方伯以浙藩奏最邀

恩封太夫人 廷議推中丞躅足可竢方伯念太夫人

春秋高乞身歸侍太夫人日夕瞽方伯旦夜祝 天會

有以金篦刮者旋復明人謂孝感云方伯歸甫艾今六

十矣字內多壘 天子側席青原白鷺之間豈能長留

作主人耶章越在黔南無能稱觥為壽敬撰俚句戒兒

延從六郎君後歌以侑觴并致彈冠之意

綸恩甫遂展親情賦就歸來四岳輕竹榭開陰稱大隱萱

堂孝感說重明二吳棠樹千家頌陸地蓮花一夜生仙骨

珊然元有種還看八百續錢鏗

遙祝岡陵自夜郎春花春酒薦霞觴星瞻萬里輝南極風

邁千秋到上皇雲裏吹笙雙鶴舞階前弄綵六龍翔平津

相業從茲起早晚徵書下建章

送楊廉訪使義叔督軍征播



黔南羽檄正紛紜 帝遣法星鑠野氛  
親領廟謨宣九伐 直嚴旗鼓肅三軍  
指揮文武龍笈在呼吸 風雲雁陣分行  
看夜郎爭解 辯漢庭奏凱策元勛

寄康少參省堃

三峽雲迎使者軒 巴童擁傳過夔門  
武侯陣繞龍蛇動 衛國圖開鳥雀喧  
錦濯雙江添藻色 山橫兩劔護微垣  
西南有幸狂夷殄 籍甚輔車報主恩

貴陽十二景

東山雄鎮

山接夷嶠曉日暉 名山勝似此山稀  
天開鉅鎮雲常護 地

標雄圖瘴欲啼 箐樹搖空金刺動  
江流遶郭玉虹飛 居然別墅堪招隱  
那得風塵學息機

南嶠崢嶸

南山削出筆如椽 郭外巒岈半插天  
恍掇金莖披湛露 翻疑玉筍破蒼煙  
峻臨萬島浮雲外 俯看千家落照前  
不是扶輿鍾淑氣 文明怎揭一峯懸

截甲遺踪

見說武侯此地過 旋擒孟獲震黔羅  
巖窺龍虎知截甲 洞引風雲為偃戈  
石匣曉看晴瘴癘 山精日落繞松蘿  
征南只尺天威在 飛響猶疑奏凱歌



銅鼓留愛

鬼我孤嶺直聳城東羅甸猶高相漢功巖谷深藏銅鼓在天  
河一洗甲兵空峰蟠羽翼三分烈棠芾風霜百代雄聞道  
幾迴陰雨夕餘音髣髴挂空峒

犀潭澄碧

丞相祠邊瑞氣酣犀潭疑是卧龍潭日融水鏡光涵碧雲  
綻江花色拖藍嗑吸千山收颯颯紫迴百堞濯煙嵐每逢  
晚寺鐘聲發明月澄瑩燭斗南

鰲磯浮玉

健石為鰲障急湍明河漱濫鏡中看波濤不怕龍門險砥

柱偏連後嶺寒俯弄山光窺睥睨直吞雲影吐琅玕芳亭  
夾岫風塵隔鍊鑰地靈紫翠蟠

霞山仙洞

山腰古洞說仙來洞口棲霞石逕開媚日疑從丹竅吐觀  
雲似帶赤城迴巖披錦色朝成幄圖挾金光暮洗臺幾度  
登臨携滿袖窺人猿鶴謾相猜

獅峯將臺

老將威稜振射雕築壇千仞瘴嵐銷明河穩抱獅臺勝紫  
氣疑銜鵠印驕諸葛風雲留八陣虞庭千羽化三苗裒然  
開國殊勛在不數伏波漢柱標



靈泉印月

靈泉瑩徹一泓深入夜常招皎月臨直抱冰壺浮淨域倒  
涵玉宇浸空林山光朗度歸猿影桂魄香薰浴鶴心獨對  
姮娥詩興賸旋呼桑落酒頻斟

聖水流雲

神泉四水屬昆侖此水帶雲漱石根素練飛花蒼蘚合白  
衣林樹碧池暄鏡中玉液通仙籟谷底潮聲接海門天地  
虛盈元不毀誰從一竅覓真源

虹橋春漲

鬢髯中流駕巨鼇獨撐春水跨江臯祇疑蟠鍊垂仙渚那

畏蛟龍挾怒濤聲擊桃花紅漲偃色榕柳樹綠雲高千秋  
鎮遠行人頌不獨當年畫六韜橋為願鎮遠侯建

龍井秋陰

曾聞龍井似龍湫梧葉風生井榦秋石竇瀉來冰鑑瑩銀  
瓶汲出雪花浮寒生玉液千家潤光吐丹砂萬樹稠試問  
西湖名似者清冷得共此中不

恭謁王陽明先生祠

鬢髯長庚謫夜郎三年屈蠅滯龍場文光撲漢青藜焰道  
脉維風赤幟翔勛勳曷彙平淠成書成科斗逼鍾王炎荒  
鄒魯千秋業臚臚蘋蘩薦未央壁間有先生手書



題武侯祠

曾從羅甸畫兵機  
七縱雄聲盡鐵衣  
銅鼓風雲藏陣略  
祠壇草木識天威  
雕闌俯瞰蠻煙淨  
綵棟遙連蜀日輝  
鼎足未酬伊吕志  
千秋有恨鵲南飛

題神武祠

祀關前將軍

盖世雄才國士風  
祠開神武鎮黔中  
天人未解吞吳恨  
心日猶懸翼漢功  
手將美髯傾五虎  
志恢鼎足吸長虹  
千年生氣留光岳  
願掃妖氛鼠穴空

題黑神廟

祀唐忠臣南霽雲

南八男兒烈丈夫  
睢陽赴義挾雄圖  
徵兵齒指天應泣  
抗

賊指身海欲枯  
誓許同心期報主  
乾坤有恨失吞胡  
忠精不獨凌烟畫  
邊徼宗勛祀典殊

挽蘇廉訪使君禹二首

暫脫朝簪與世違  
清源鷗鳥共忘機  
聞天一夕騎鯨去  
遼海何年化鶴歸  
丹荔花殘悲暮雨  
碧溪柳闇怨春暉  
孝標未報中山序  
把讀遺文泪滿衣

擾擾兵塵日半蒿  
哭君恨逐角聲號  
劍埋斗氣沉  
迤浦珠墮夜光泣  
海濤懷舊忍題潘  
岳句招魂誰續  
楚人騷翩翩令子繩  
弓治不數超宗有鳳毛

誓諸將士二首



誰獻平蠻第一籌登壇授律盡貔貅盤江飲馬聲通列武  
 庫陳兵氣轉道鼓角風喧魍魎泣烽煙雷掃犬羊收軍威  
 更籍天威重凱奏漢庭雨露稠  
 百萬天兵擁羽林雲旗獵獵馬駸駸校鞭可斷烏江險捲  
 甲何虞虎穴深月照弓弧張義膽星搖劍鏑壯雄心朝  
 廷不靳懸金賞七縱誰將子孟獲擒

聞賊上海龍岡

獨坐窮山祇自悲牽羊銜璧亦何為鐵柱縱踞登天險石  
 砦翻憐伏金危不悟淮西平雪夜却從城下以虞姬千年  
 廟社都煨燼燕雀顧無有幾時

平播凱歌十首贈李霖寰大司馬

狂童扇亂十年餘司馬頻煩諭蜀書直待天兵臨月窟頓  
 令狡兔泣蟾蜍

遼左建牙理漢貂長城萬里虜塵銷東山再授征蠻鉞括  
 盡孽根斷有苗

元老臨戎富壯猶雲中忽睹隕旄頭七擒孟獲天威在况  
 是渡瀘五月秋

浮竹餘妖說夜郎居環遯水毒如狼狎柝岸南夷滅悔  
 不當年款楚襄

玉帳遙臨玉壘寒三藩策士擁登壇一麾太白懸酋首多



少降亡不忍看

帝遣尚方賜太阿霜殺凜凜震關河  
俘來銅鼓傳諸葛自是勛猷蜀漢多

破竹風聲拔九關居然三箭定天山  
祝融火後無青草遍灑恩波真百變

百萬貔貅解鐵衣帳中無復畫兵機  
蠻烟毒霧俱收盡重睹天南日月暉

凱奏轅門蚤掛弓旋師洗戟錦江紅  
圖形定有麒麟畫劔閣先銘第一功

附驥幸連司馬臺風雲陣裏識奇才  
臨淮自有封侯骨斗

大還看鵲印開

播平志喜四首

去年此日泣黔巫萬里臨戎擁僕姑  
草檄千金貔虎合鼓枹半夜犬羊遁  
營邊烽燧留殘壘陣裏風雲捲壯圖  
多少材官爭獻捷林鴉筆鳥亦嗔呼

鐵作雲梯石作臺天兵百萬自天來  
鯨鯢盡斬成京觀虎豹還驅闢草萊  
五夜莫聞刁斗擊三江漸睹瘴嵐開  
千年廟社都銷歇豈是昆明有劫灰

漢家喜復舊山河白氣旋迴紫氣多  
自昔盤江堪洗甲而今武庫已藏戈  
鬼方何待三年克凱什真成六月歌  
仗劔



佩刀應始解獨憐博得髮毛皤

夜郎盤踞已千年酋首一朝太白懸毒霧那能遮漢日妖  
星遽遣墮蠻天牂牁百折江流咽棘道萬重月色連自是  
朝廷紆廟略論功敢擬勒燕然

太平宴罷追述西事十首

遺孽孽苗種鴟張已十年三軍填馬窟千里有狼煙授鉞  
心如棘枕戈夜不眠蜀人還擊地漢將似從天  
一入黔陽境那堪羽檄頻路傍堆白骨徼外滿黃塵說劍  
期張楚借兵欲哭秦于今征戰罷念此更傷神  
兵渡烏江後威揚白羽旌未諳司馬法徒說伏波營風疾

子逾勁霜飛劍欲鳴狂  
不悟空守夜孤城

授律貔貅奮鼓袍兔鼠非三春才振旅六月已班師郡邑  
南蠻土冠裳左衽夷紛紛款者欣觀漢官儀

九重宵旰日萬里軫念旋遣良家子復廣內帑金師方  
叱虎口賊已斷熊心一洗兵戈苦無勞說七擒

盤江喧浴馬諸將盡登壇霧氣連山迫腥風入夜寒鯨鯢  
京觀築鴻鴈澤蒲安柱旆歸來飲邊愁醉裏寬

且蘭雙言漢室伐叛遣唐蒙百萬官兵合滇臯空弓橐  
夷地月角靜成樓風十二鏡歌發翩翩興不窮

旂閃龍山紫劍橫鳳嶺青麾兵朝拂露憂賊夜覘星圍拔



登天險營餘戰血腥蠻王駢首戮髮髮漢同亭  
狡兔驕三窟天兵勒九關勝風傳吉語壯士破愁顏已雪  
於散耻更綏轅道蠻瘴烟知洗盡千里見青山  
凱歌催飲至滿座盡奇英席上酬杯酒帳中戢甲兵荒郊  
生斷靄邊圍聽流鶯微獨天顏喜懽聲沸海瀛

楊監軍義叔平播還黔二首

捧檄西來伐鬼方長纓矢縛夜郎王營披榛棘千山霧威  
懾駸駸六月霜京觀築成牂水赤靈旗捲罷陣雲蓄何緣  
中立逢韓愈籍甚平淮報未央

五月渡瀘甫五月旬勝風偏送捷書頻千年巨寇餘殘穴萬  
里邊疆息戰塵共說黔巫先奏凱誰知矢石半投身艱危  
不避功成早漢室輝煌有畫麟

送楊義叔平播還西昌

千里白雲入夢騎驪歌正屬凱歌時巖留諸葛歲銅鼓地  
畧將柯勒昂彝彝夷道不聞山鬼嘯天威更結遠人思  
有詔君恩渥擁傳還者上玉墀

題嶠岳圖贈康仲子君揚

松篁千古秀環抱子雲廬宅枕嶠山舊文餘錦浪妍墨池  
頻洗月書閣半含烟載酒亭中客相將守太玄

賦得秋高斌姪壽表兄蕭崑陽比部七十并序



邑西有斌姥山陶皮二處士嘗修煉於此邑勝槩也表  
 兄蕭崑陽先生屋其西獨鍾靈祕歷仕南比部郎賢聲  
 蔚起臺省交薦邊才為有中之者遂拂衣歸相羊四巖  
 吟嘯自適今年秋七月十日齒七十予有事於播勸勸  
 行間友人康用光為告壽期遂賦詩寄祝而以秋高斌  
 姥題篇云

武山窄寧高插漢削出芙蓉萬仞燦四面巖吐畫圖色一  
 溪水逸青玉案比部當年此山居千秋靈秀攬扶輿靈結  
 銅章製美錦連揮丹筆績刑書共說阜齋業可就壽邊推  
 轂甲兵富詎柰山靈結夢魚思賦成歸去來名岫名岫松菊

尚凌霄陶皮仙侶坐相邀武漣瑤壇丹井在時吸瓊漿萬  
 慮銷蒼生屬望東山起捷徑羞作終南比與來鸞鶴相唱  
 和長嘯聲撼章江水玉露開秋敞壽慈佳辰揆挈正希年  
 仙臺樹發三花郁曹子綵弄五色妍我亦厭兵憶三顧雙  
 眸遙挂武山樹枝戈為賦長生篇西來白下秋風度

挽劉侍御國基年兄二首 并序

予同年劉國基為御史時上書極言故相江陵張公事  
 落職為民公銜之甚於是雙冢謝燿者希旨請闕下  
 告國基位事而理官亦迎合張公意文致之罪竟死戍  
 潯州國基以壬午六月廿日竟死戍所張公亦以是日



死燕吁嗟乎異矣已言官稍稍言張公怙寵擅權并上  
 國基寃狀 上大怒削張公贈謚罷諸子官而錄國基  
 贈光祿少卿子感而傷焉子蘭讒原竟問龜於澤畔絳  
 灌短詛卒賦鵬於長沙然而口離騷經者憤原之忠手  
 治安策者服詛之智國基忠且智具在一疏又何愛一  
 死不以三屈賈乎予又聞國基死之日賦易箒夏文設酒  
 大噎不以生死芥蒂胸中疇原之憔悴詛之太息尤為  
 過之顧予兄弟之情惡能已於痛哭耶聊致萬里之曲  
 用信白馬之悲

嗟君竟實百蠻鄉廣柳車迴兩粵長忍抱丹心甘萬死翻

成碧血灑千行漢歌不駐明朝露燕獄空鑿六月霜聞道

霍侯紛就第誰將曲突疏 明光

半畝犁雲祗自憐幾回刻木吏相煎無情汨水終沉屈可

奈韓灰竟溺田象嶺瘴迷寃莫白螺江流咽恨難捐寢門

哭罷堪腸斷為續招魂情逝篇此詩作於國基易箒之年

孟銑入黔助予討播  
偶出此詩附刻于茲

播平贈宋方麓柱史

征苗草檄畫兵機六月凱旋露布飛總是臺中懸廟畧故  
 令徼外識天威手持三尺攬槍墮風撼百蠻瘴癘稀何幸  
 同舟還共濟斗南籍籍法星輝



贈宋直指再按黔中

法臺我豸復西巡不數曹懷借寇恂  
攬轡重驅盤水淨橐  
弓更洗夜郎塵八  
番行部青鸞舊六  
察提綱紫綬新天  
憫  
瘡痍猶未起故留  
邊徼需 皇仁

瑞芝詩四首 并序

予入黔初神武祠於東園祀關前將軍也祠前故有李  
樹六月播平七月忽產雙芝於李色始間紅黃已變為  
柳黃宛似荷葉又似一僧披禪衣而坐乃為檻護之因  
題詩紀歲月云

六月鏡歌徹 帝廷雙芝之一夕產園亭英英看樹猶攀李

芝生於李樹 蔓葛緣柯若奇營自本自根開 國瑞非烟非霧  
表神靈金莖玉葉應函祉願祝八番到處寧

豈緣署圃近僊鄉玄氣俄鍾兩幹芳圓葉玲瓏塵莫染豔  
姿爛熳猶為房不從澗底分三秀却向枝頭鍊九光把酒  
披圖閒翫賞清風引動欲生香

妖氛蕩盡瑤光合佳氣鬱葱神武祠階下千年森玉李樹  
腰八月吐金芝效靈謬擬龍姿異應瑞還標鳳首奇自是  
皇仁昭遠布齊房仙種植邊陲

靈華下燦燦自僊家夷地何應綻瑞葩  
點綴臙脂和露濕包  
含玳瑁情雲遮  
抽莢似結同心綺  
逐影疑擎並蒂花  
那得



根株移上苑 彤墀拜舞醉流霞

賀宋柱史秋闈得士

夷平凱奏復賓賢相 兩卷龍得九致黑水英雄期入殼烏  
臺雋又愜登僊居然 目書天老應有真材屬道詮謾說  
遐方稀國士狄門桃李 鮮妍

李總戎邀賞中秋時格用平席上賦贈

臺開綺席絕妖氛秋色融融此夕分玉帳輝搖杯底月金  
輪影度陣邊雲獨慙庾亮情偏逸却喜臨淮氣不群多籍  
平蠻馳露布共將皓魄報 明君

雅歌軒賞月紀興二首

去歲逢茲夕愁心咏五更旄頭今盡落月魄復分明露洗  
千營濕秋澄萬社清太平欣有象光徹夜郎城  
黑水兵塵淨瑤臺月色團豈憐雙鬢白偏照寸心丹爽氣  
噓金籟清輝轉玉盤霓裳何處曲逸響落吟壇

播平請告示延太二兒

夜郎雖已滅夜氣猶未清我欲賦歸來尋彼鷗鳥盟昊天  
有成命於我爲生生旦旦慎斧斤孳孳戒鷄鳴雖在兵戈  
中不忘敬與誠無若混泉石世故埒浮萍捐跡反吾一其  
庶乎屢空

我爲國事苦翁爲家事愁我欲賦歸來不貽堂上憂門戶



我支持田園我種糧父在不稱老勇退須急流彭澤五株  
柳鴟夷一葉舟嗟彼逐逐者朝莫水上螭至樂在庭除何  
必公與侯

過天然洞

千蓮倒地垂七寶隨風舞斧鑿渾無痕天然一淨土

讀史

秦皇與漢武於赫稱雄材備胡築長城却夷渡龍堆鞭笞  
流沙外未能庇其孩戾園弄父兵扶蘇竟自裁高允何爲  
者信信本多猜而翁不自悟慧也以爲台刑餘那可近博  
望爲誰開惆悵沙丘事歔歔思子臺僉壬間肉骨千古令

人哀

牝雞司晨鳴呂周事相耦人疑已堪憐醉骨毒於酒隆準  
幾上種諸李遼陽九誓悍不可羈乃猶顧其後帝惠自早  
物景龍終矯首相王旣踐祚唐綱未解紐嗟乎豹與虎何  
嘗無父子父

放牛飛林野歸馬華山麓旣散鹿臺財復歿鉅橋穀人說  
周家仁寧知商家粟秦民湯武起羸氏失其鹿咸陽三月  
火阿房變陵谷重瞳暴如虎實乃祖龍築嗟彼聚斂人何  
其愚且黷

漢唐當不造黃屋如維樹勃提楮鼎鉉景監備師傅鼻息



上衝霄頃刻變霜霧舉舉陳寶子傷彼黨人錮太和開成  
間亦有訓與注機事少不密溢焉先朝露成敗論英雄之  
子并谷鮒如其謀果成千載稱豪舉

賀鄒爾瞻司諫生子二首

昭陽太歲已更辛南嶽降神甫及申豈是子門高有日頓  
令黍谷暖回春青原白鷺祠謀石玉峽金川紱魯麟但願  
箕裘能世業桐江江上莫憂貧

蒼松勁柏長新枝五十得兒未是遲人訝先生留錦里天  
教佛子出蓮池世間草芥無青眼掌上相看有白眉我欲  
歸來尋舊隱曹郎正乃試周時

送石屏太守蕭觀我之潯州

五載異龍湖去家幾萬里相對石馬蹄比隣人交趾關地  
得石坪課士成槐市金馬跡已陳諸葛碑猶壘使君真吏  
隱古人亦如此竟爲目皮相循資僅一徙去滇復得粵乃  
在倉梧汜嶺重瘴結廬樹家猿爲侶媿我弄兵戈終年坐  
蘭綺相見還相憐空谷足然喜玉筍樓蕭齋廬獄歸穎士  
故家饒典型觸目皆良軌君去食枕榔慎勿載蕙苾

送陳生鳴陽赴皮林軍中

且蘭雖已淨楚氛猶未息三苗顧危巢五開半叢棘山犬  
吠妖狐溪鬼憑短蜮青丘一跳梁赤眉終反側帝曰籍勝



兵爲予除兇慝東馬列長蛇卷甲捕百勝之子起南海雄  
風振九域一朝度庾嶺單舸入楚澤曲逆本多奇無怠憤  
結客竭來貴筑城旦莫杼籌策入爲畫八難出爲賦九式  
齊桓辭牛耳楊子解雞肋豈無魁與從玉石須有別露布  
報明主功成輕疏勒

久旱夜雨有聲起視桂子紛落志喜

辛丑五月三日夜

獨憐兵旱久妨耕虔禱桑林緩步行少女枝搖催列缺雨  
師浪鼓矢欃槍月中桂子和風落檻外蓮花遶地生亂後  
逢年真可喜披衣起坐待天明

裂石歌

西南樓槍烟占在川之播夜郎匪五嶺躑躅效尉佗并底  
窺蒼蒼不知有漢大黔中久愉恬一角輒頓挫青犢嘯  
江蒸江湏搖破城市吼虎豹平原起堦堦天子赫斯怒  
命將出左箇猥予在田間驅之入邏娑夜夢壯穆侯馳車  
來相過倒屣延之入席分賓主坐論賊本信信牝糠亦易  
簸巢幕整偷安積薪以待莖及予入八番一一與神課初  
戰滂其城再戰醢其腹蜀黔半壁天從此登平陸躬祠祀  
君侯昕夕薦膏馥爲文紀神武爲謚辨壯繆命工伐貞珉  
刻之東園隩忽子負前念改劂金芝曲君侯怒不度一夕  
石如斷蒼頭走來告予自東西應爲更刻玄石敬以煩太



祝裂右不敢弃留置在虎幄庶幾旌予過長歌以爲贖

送李仁宇元戎鎮播州

銅人按節鎮三苗遵義殊恩下九霄  
蒼頭尋葛亮壽邊閣上話文饒  
愛棠故吏捫花咲騎竹新童立馬驕  
海內鼓鼙猶未淨西陲那得老票姚

去年此日叙西戎飛將勲名定遠功  
武庫揮戈纒縹馬戍樓  
徹候集歸鴻妖氛已落焚輪外  
朽骨長肥大冶中新貴  
夜郎衣帶水八行早晚寄郵筒



續文生黔草卷之十六

泰和郭子章相奎甫著  
友人楊寅秋義叔甫校

記

止權記上

萬曆己亥三月予奉命撫黔五月與故撫臣江公東之  
代於沅六月入黔是時播酋楊應龍已破飛練既陷綦江  
狂象野獸搪揆蹴蹋羽書紛發日亡隳刻所幸者稅礦遍  
宇內獨黔未有命耳六月間有應天衛百戶范倉者上  
言恪遵祖制敬復貴州稅課少助大工上曰貴州稅



課并土產名馬有裨國用差內官監左監丞張慶率原奏  
官民往黔照例征收 旨下八番士民整鬻一時中外臣  
工咋舌錯愕謂黔方用兵民坐萬仞坑中益以飛丸激矢  
令人膾截耳於是吏部尚書李公戴疏畧曰貴陽一省皆  
山也其地狹隘無奇異之產其閭閻蕭索無難得之貨即  
該省歲額兵餉且仰川湖目今播酋猖獗流毒川貴民心  
洶洶又以稅使臨之民其何堪伏讀 聖諭稅止三萬餘  
及名馬耳時下用兵即有名馬不給軍征戰而實內廐非  
計之得也遣將調兵所需而不貲西征靈夏東援朝鮮皆以  
數百萬計今平播酋恐亦不減此數 朝廷爲川貴不惜

內帑數百萬而顧與乎三萬之利乎此斷斷乎當止者况  
道路喧傳播酋傳檄爲謀區測今復以權稅之事離散民  
心是驅民就亂矣民不憚播而讎稅使已不可與爲敵况  
歸而助彼乎以利言則不必行以害言則不可行 主上  
明見萬里獨不念及此乎都察院左都御史溫公純副都  
郭公惟賢僉都陳公薦疏畧曰貴州彈丸之區餉資各省  
而播酋復鴟張 皇上惻然西顧方且趣兩省督撫星馳  
征討以拯塗炭柰何從而重困之軍馬芻餉方望 內帑  
給發數千百萬而求數萬之稅于其地與素不產之名馬  
乎此驅民歸播驅商旅不出入于滇楚譬如藩垣不培盜



必斬關而入病夫垂斃而復飲以烏啄鮮不立仆 皇上  
不爲封疆計則已苟爲封疆計可任網利之徒忽意漁獵  
以撤其藩垣且益之疾而速其斃乎戶部尚書陳公彙疏  
畧曰貴州本西南夷古稱鬼方不入職方永樂中始制行  
省止爲一線之路可通滇南官則土多漢少民則夷十漢  
一僻處遐荒孤懸可念寔不及江南一大縣崎嶇萬狀商  
賈不通况今征播肆釁等於絕域三萬五千之稅并名馬  
四十匹安所取辦無論稅額即頻年軍餉尚仰給楚蜀彼  
銜 命而往者廩給夫役安所編派乎狼子野心安戢戢  
難求金于魍魎之鄉索馬于躑躅之境徒取山鬼椰榆耳

臣未見其可也兵部尚書田公樂王公世揚疏畧曰百戶  
范倉臣誠不知爲何如人要不過一市井無賴耳彼見稅  
使滿天下獨遺貴州以爲此奇貨可居也 皇上因之過  
聽亦以爲貴州乃十三省之一柰何獨遺不知大謬不然  
者按貴州古羅施國萬山險惡地定不毛語曰天無三日  
晴地無三尺平此在平時猶懼發難而今何時哉逆酋楊  
應龍包藏旼心睥睨西南匪一朝夕 皇上獨不見彼中  
撫按告 請兵餉之疏乎臣等切齒此逆以么麼小醜抗  
侮 天朝至食不下咽寢不帖席日夜望督撫諸臣蚤至  
地方計處兵馬謀合滇粵楚蜀之師爲傾巢覆卵之舉若



以征稅之故既奮其力于供億又成其心于算斂不知此時督撫將爲民計乎將爲討逆計乎夫論黔之地稅本無利論黔之時稅反有害豈惟有害其害將大臣等誠不忍無缺金甌一旦爲群小搖撼而瓦礫壞之也戶科都給事中李公應策疏畧曰黔自國初開一線通于滇南爲保釐滇也諸司竄竊恨不能得間隙而入楊酋負嵎吞舟已漸有無柰伊何之勢若稅使一至勢必攪擾軍民首出乘機發端藉欲離之衆志廣已叛之賊巢橫行西南致危軍國則誰實貽之咽喉既塞滇南豈復可保哉皇上尚謂黔民無慮邪所轄下六衛上六衛西四衛藉止存三三與

無兵同協濟銀六萬八千兩解多逾時緩不及濟與無餉同撫按方扼腕傷心臣又痛惜沾危條議清尺籍督積通增將吏弘化誨拓疆圖五筭見今覆議允行未見實效而賊鋒愈熾徒手搏虎無米炊粥雖勇而巧者難與爲謀矣皇上尚謂黔地無虞邪據奏權稅每稅不過三萬五千兩權名馬亦不過四十匹廟堂肯一節省不知當幾千百萬舍源泉而問行潦進美稗而異穫嘉臣等殊切爲今日惕况由御門至黔中實八千餘里一路喁喁相繼夫馬逃竄驛遞蕭條已慘極入骨而蒙差監丞張慶等百戶范倉等土人譚應麒等卽至少亦不下數百人沿途所餐所



乘所宿而供應者出自何地何人也貴州道御史應公朝  
卿疏畧曰貴州逼隣播地楊應龍自去冬猖獗軍民受害  
已極頃臣得代出境後將吏以輕動敗殺戮官兵難以數  
計臣謂 皇上且赫然震怒不惜帑金助餉殄此而後朝  
食詎意更遣使權稅以益亂而長寇邪臣竊計之有萬萬  
不可者五貴州崎嶇山谷中苗夷盤據 國家以滇南門  
戶而郡縣之兵餉倚辦川湖徵解愆期動欲脫巾商苦盜  
劫往來稀少乃天下最貧最苦之地不宜驚擾其不可一  
也平居支持已難遇警張皇益甚倘稅監一到軍民驚惶  
逃竄散入夷方恣行勾引莫可究詰是驅民資寇其不可

二也楊應龍去冬傳檄謂方今稅礦遍天下民心思

亂將出兵上掃雲南下平謂都此其志已叵測今虐焰方

張輿尸正寢更遣使征稅人心動搖示之以隙而益長其

雄心其不可三也貴州水銀等物俱產窮山苗穴中今權

稅以此為名奸人蟻附成群苗獠劫奪蜂起鄉落騷然道

路阻塞其不可四也民叛于內播棄于外致亂益速滇省

坐隔四方聞之且有環起而響應者其安危且不獨一隅

其不可五也夫邀必不可得之微利冒此五不可之危機

皇上亦何利而為之御史蕭公重望疏畧曰蠢爾賊酋狂

悖稱尊曉底且無 朝廷何有於中使籍使得足償失以



軍屯夷寨而有稅可征也則當事者何不務議以裕兵餉而翻塵協助于川湖以深山窮谷而有利可權也則主計者何不疏請以佐時難而必俟揆括于弁監當此之時陛下慨然深卹發內帑以爲此方生靈紓倒懸之厄猶慮弗給而忍更促其生乎必不然矣倉之言曰恪遵祖制臣聞我二祖之馭貴州僅僅以不治治則化誨而懷服者先朝柔遠之訏謨也倉又曰敬復課稅最爾貴州二百餘年未嘗設有抽分衙門本無課何名爲復也以貴之危急如彼而倉之欺罔如此臣固願陛下罷中使勿遣而無徒爲奸人所熒惑也疏入俱不報時予與御史宋

公興祖接邸報慄慄皇懼乃會同上疏畧曰貴州雖名一省實不如江南一大縣山林之路不得方軌溝渠之流不能容船民居其一苗居其九一線之外四顧皆夷即平居無事商賈稀濶今年楊酋二月圍我偏橋三月屠我飛練四郊小苗乘間崛起道路行劫無日無之加以基江之破民莫必命商且絕武誰肯委身豺狼投尸鯨鯢即城市所貿易者不過米穀菜果棉花油布之類蓋董董也至范倉所稱水銀硃砂銅鉛名馬等物生於嵯巖之中隣於虎豹之穴倘一開鑿之後苗人耽耽劫奪而去臣將欲陳兵衛之乎則禦備之兵臣方疏請之皇上而安得復請兵



護洞穴也將欲貨之商賈乎則青犢嘯風游商歛跡而臣  
安能驅之必來也將盡輦而致之闕下乎則鳥道千里  
龍灘九折非若金銀之轉輸其積尤可辦也名馬之有無  
臣不敢知然每歲土司貢馬折銀以進則此方之驥騫大  
較可知也况查貴州常賦每年硃砂共三十三斤水銀共  
四百四十四斤黃蠟共二千九百一十斤祖宗朝豈不  
知諸物之產黔中哉而限其數若此之儉者以爲荒服外  
可以青包茅不當盡錄錙銖明以其利遺之實以安之也况  
地方官兵之力量以守城池猶且不足而必不能分其力  
以布於巖洞之間臣等之謫劣以禦強寇猶尚未周而必

不能分其心以杜彼苗羅之發如使臣言不驗國家之

福也萬一稅使甫臨播寇環於外苗賊竊於內臣顧此夫

彼捉襟肘見此身不足惜如辱朝廷何此臣等所爲愁

慮迴腸丐之皇上以貴州非他省比也肥瘠之地殊而

治亂之形異也伏望皇上仰體祖宗貢賦之額毋溢

舊數近憐地方殘破之劇特收成命俾臣等專力戰守

以淨妖氛則內地之隱憂既銷而邊圉之底定可期矣疏

行計尚未入長安大學士沈公密奏曰礦稅二事天下皆

以爲不便皇上獨以爲便亂端數見天下皆以爲危

皇上獨以爲安豈皇上之心獨與天心通而能保天下



必無事乎臣愚殆不能曉也 聖音堅定轉移未聞臣民  
日夜禱求庶幾少減而乃日甚一日使人何所歸命至於  
廣西乃窮苦百粵之地諸蠻巢穴控禦為難民無他業惟  
田是資猺獞出沒往往病耕地促賦逋一切官俸軍需皆  
仰給於廣東 先朝設置總督兼制兩廣正為此此地自  
給然且不足而况可加一稅使乎四萬之征從何而出尤  
不可之大者也昨日奉 旨又有貴州之差則滿朝臣子  
益驚怖而嘆息矣蓋貴州乃古羅施鬼國地皆蠻夷山多  
箐穴水不涵滄土無貨殖通計民此僅十四萬石為天下  
第一貧瘠之處官戎歲給金仰於湖廣四川二省蓋本非

都會之地從古不入版圖我 朝修國雲南而從此借一  
綫之路以通往來一綫之外悉皆夷峒鴟張豕突易動難  
安今云產有水銀銅鉛硃砂雄黃白蠟等貨每年可征稅  
三萬五千兩名馬四十匹理所必無臣不敢信縱使有之  
亦出蠻夷今蠻夷侵田奪貨逞欲無厭撫之尚難豈可復  
擾彼稅使能從蠻夷征乎况楊應龍正肆猖獗殺戮無算  
朝廷方議征討一新督撫鎮守等官而施為次第尚無可  
言昨巡撫郭子章交代以書問臣內設四策一曰戰二曰  
撫三曰先撫後戰四曰先戰後撫臣心皆以為難不能  
對答蓋撫則損威辱 國而此會又非撫之所能定前事



覆轍已可鑒矣臣故難之戰則須兵一二十萬餉一二百萬假以便宜寬之歲月而彼主我客彼守我攻難易懸殊勝負莫料臣又難之臣思督撫鎮按等官正是無米而炊徒手而搏千難萬難不堪展布之日 皇上宜爲之夙宵軫念發餉處兵以餉此首梟獍之心聯屬諸夷招徠異類以割此首羽翼之助庶可近安楚蜀遠通滇南而還太平之舊規何爲顧惜小利妨害大事又遣此一稅監邪臣恐彼處久困水火望採之民將避益深益熟之害奔迸林藪助賊爲虐有司益難措備將校益難攻討一綫之路坐致淪沒而雲南亦將永斷矣國家安危豈小小而已

哉且用兵制敵之法弱當示之以強饑當示之以飽貧當示之以富不足當示之以有餘今 天帑所儲原無不足司農出入尚可拮据而必以窮乏二字遠播夷方兵戈之場亦皆刮取揚首若信 朝廷窮乏則猖獗益甚若不信朝廷窮乏必謂方各兵費不能用兵而其猖獗亦甚非所以昭廣大富實而讐服蠻夷反側之心也妨於安攘大計又非小小矣夫各處礦稅臣每苦諫未即 賜允猶日庶幾至於貴州稅監則臣謂萬萬不可所宜亟收 成命蓋皇上誠欲奮誅揚首當示兵力之雄財力之富決不可虛示貧弱爲彼所輕笑侮慢既不惜兵餉大發將士則宜先



免此三萬五千以慰彼軍民之心權衡於輕重緩急之間所蠲者甚少而所獲者甚多願母以反汗爲難安危之幾在呼吸間也臣不勝懇竭祈求之至書奏 上下優詔答之曰覽卿奏揭忠君愛國遠慮深謀嘉尚不已貴州差官非專爲貨財欲訪彼中軍民利病起釁之由耳朕復思之黔中正在用兵征討之時勅諭中使已停寢矣 旨下貴陽軍民舞蹈踊躍甚至有泣下者曰 聖天子舉動如此何憂賊哉明年六月播州平稍隙予撫拾舉朝諍疏次第其語作止權記上

郭子章曰曠稅之遣字內共苦甚爾貴陽 主上不難反

汗聽閭臣之諍章以爲仁明武三善具焉仁故隱黔朕罹於鋒鏑明故見萬里外武故必於戰不以稅使分封疆臣之力不然以黔之瘠章之庸益以曠稅立稿耳黔稿而西南可完活哉雖然蘇文忠言之欲聞仁人之言與天下之大計自非元老將安取斯是舉也機發於舉朝之諍而環轉於密勿大臣黔之幸西南之幸也

### 止權記下

萬曆庚子六月西南三省兵會海龍圍下五日破賊外郭及其月城六日酋自殺妻子就縛捷書奏 上大悅乃下詔曰元惡既殄脅從罔治招復流移無容豪強兼併優加



賑恤以安新定地方大哉王言所以覆露西南仁矣黔人  
士如父病邪客入皮毛舍於孫絡閉塞不通不得溢於大  
絡而生奇病遇扁倉劑而通之求一日之卧以養天倪即  
雞犬之鳴兒童之跳亦不樂聞亡何有興武衛指揮周原  
茂者踵范倉故智復以礪稅之說進是時山西道御史李  
公時華貴陽人也思貴被兵後十分狼狽不堪再擾乃上  
疏曰臣奉 命巡方行有日矣偶聞興武衛指揮周原茂  
又上貴州開採之疏臣不覺髮上指冠恨不生食其肉而  
寢處其皮也竊念今日貴州正在安危未定之天有萬萬  
不可擾之使亂者敢泣血爲 皇上陳之蓋自播首肆逆

三省騷然 皇上憤此賊之憑陵憫生民之塗炭輿內外  
金錢百萬徵調八路兵馬 廟堂籌畫備極苦心當事勸  
勦殫厥謀力頃方捷 奏成何容易亦欲以成之一旦者  
而激之使亂棄之一旦臣不知原茂何心忍於發此廣西  
交南之事殷鑒不遠 皇上超然遠瞻見斷不行原茂之言  
以蹈交南之轍惟是臣鄉如在水火纒幸脫離則關心莫  
先於此者至於地方疲瘠之狀臣近疏善後十款業已盡  
其大槩萬望 皇上破格優卹如驛遞無人走馬堡站無  
糧養軍舊穀以兵餉罄盡市無賣米者即有之斗米數錢  
人鮮再食新穀以運糧未種所在拋荒即間有栽插又值



淫雨淋漓立根不定十室九空千瘡萬孔臣心慟咽喉難  
 於悉數 皇上謂此等景象尚堪以一事擾之乎貴州一  
 線之路商賈不通原無稅可權萬山之中虎狼為政毫無  
 礦可採原茂之意不過以播酋厚積動 皇上而不知桃  
 溪廟舍業空於煨燼之中諸國原藏盡火於鏡砲之下以  
 彼亂臣賊子即有珠山金海總是不祥之物不宜致之  
 內庭况已烈焰無餘原茂何所垂涎於已何所欣動於  
 上乃為此釀亂激變之厲階蓋亦不思之甚矣臣非不知  
 未滅播酋之先曾有開採貴州之疏已蒙 皇上採閣臣  
 之言 慨然下明詔禁止其事原茂何人 御墨未乾忽

慢有此悖 詔旨喪良心首大難之端棄垂成之地臣謂  
 原茂之頭可斬也 伏望 皇上大奮乾斷置原茂於理以  
 為計利不計害殘 忍不仁欺誑不忠者之戒仍乞 玉音  
 申飭前旨以安西南方定未定之人心貴州安則天下舉  
 安勿謂一隅無關於全盛也臣愚幸甚天下幸甚書 奏  
 留中是時內外臣工唾罵原茂以貴陽人方出水就岸柰  
 何復投之火也 上亦不忍食優恤之言以故原茂疏遂  
 寢不行作止權記下

郭子章曰病加於小愈破賊難方破賊而救之尤難張輔  
 定交趾郡縣之矣中官馬騏索賄激變黎利再逆遂討不



服竟立陳曷弃交州則馬騏之爲旣烈也麓川之役斬思  
任設隴川靖遠裂土伯矣未幾而思機擾孟養再勤王  
師竟不得機而割金沙以外畀思祿則王振之爲崇深也  
黔交趾孟養埒耳甫定之後安得重加以騏振之擾耶故  
知主上之爲黔摯矣李柱史之爲維恭計亦厚矣



蟻衣生黔草卷之十七

泰和郭子章相奎甫著  
友人劉孟雷靜之甫校

雜著

跋文信國遺墨卷後

子章爲諸生時曾讀此卷於廬陵城中比今三十餘年矣  
劉文光太守持入黔予復得焚香展卷而細攷之信國公  
手書二篇詩四章詩作於燕獄中黃土一丘隨處是故鄉  
歸骨任蹉跎何其達也前書有吉甫字吉甫聶心遠先生  
也聶吾吉人公曾遣其季弟從弟從游集中有生日和聶



吉甫詩細咏詩工部開評字率更聶故歐杜流也後書有  
如心先生差強人意不知今果死否之句如心與化陳丞  
相文龍也興化陷賊擁如心至軍中左右凌挫之如心指  
其腹曰此皆節義文章也可相逼邪至杭餓死毋繫福州  
謂人曰吾與吾兒同死復何恨從子陳瓚亦死如心一門  
無負信公矣獨疑書中謂朝廷養士三百年無死節者無  
論海宇卽吾豫章一隅鄱陽故相江公萬里死於家吉水  
楊公邦乂死於金陵泰和魯公如驥死於楚信州謝公枋  
得死於燕而與公共死爭死者吾鄉貳十餘人柰何謂無  
意公所恨者恨臨安失守日無一死者耳嗚呼公以成仁

取義之風倡於景炎祥興之日吾吉士爭自磨若將死  
於公元亡日無一死事者若爲公讎虜人明而死靖難  
死交州者若干人景泰易儲言靖議禮死者又若干人曾  
柱史鳳韶臨刑衣帶中自贊曰吾可遊於地下而不愧吾  
天祥孰非公風之邪公不負宋吾吉士大夫不負公君臣  
之義無所逃於天地之間亘千萬世如一日也文光與公  
比隣子章距公家六十里近聖之居若此其甚遭逢聖  
明仁不必殺身成義不必舍生取而猶依章澳忍負公桑  
梓之間非夫也章與文光將共淬礪焉  
書鄒汝愚先生遺文後



合州鄒汝愚先生弘治初上封事論萬劉尹二相得罪謫  
粵右城吏目予友吉水鄒爾瞻萬曆中論張江陵公得罪  
戍黔都勻汝愚以庶吉士爾瞻以進士其茂年筮仕同其  
英聲直氣同其遠謫同足稱二鄒矣顧都勻賜環石城長  
逝卽云有命而予讀汝愚辭 朝詩與爾瞻赴謫詩若有  
爲之識者汝愚詩曰雲韶聲靜拜彤墀轉覺徘徊不自持  
罪大故應誅兩觀網踈猶得竄三危盡披肝膽知何日望  
見 衣裳只此時但願太平無一事孤臣萬死更何悲爾  
瞻詩曰羅施雲霧障遙天迢遞三危路幾千瀝膽未能昭  
白日捐軀敢復憎青年微生遠寄南荒外清夢長懸北闕

前投杼恐驚慈母意曰頭顱望夕陽邊一則曰望見衣裳  
只此時一則曰清夢長懸北闕前豈非脩短之識邪獨汝  
愚謫石城依陳白沙爲師爾瞻戍都勻與李同野爲友陳  
李崛起粵黔願學孔氏母欲母意爲一代名儒二公得而  
師友之又不幸中之幸也蘇子瞻常謫粵矣寄程人眸書  
曰出無友王伯安常謫黔矣何陋軒記猶云龍場在夷荒  
之外結題鳥言山棲羝服以二公眎之何如哉嗟乎子瞻  
歸老毘陵伯安錫爵新建爾瞻遇今 天子卽棲遲田垌  
嚮用尚未艾獨汝愚一斤石城不復返而天且斬其嗣予  
讀其遺文爲之掩卷長潛云